

سعدی کہنشا



# کمال کہانی

ساجو

کمال کہانی



# کمال کہانی

سعید بھٹا

سازجہ

ایہناں کہانیاں نوں چھپاون، ترجماون یاں کسے ہور ڈھنگ نال ورتاون کان  
لکھاری یاں ادارہ سانجھ کولوں لکھتی اجازت لینی ضروری ہے۔

پہلی وار : اکتوبر 2006ء  
مکھ چتر : صابر نذر  
مُل : 160 روپے  
چھاپہ خانہ : شرکت پریس لہور

ورتاوے

صدیق بک ڈپو مین بازار سلانوالی

ISBN: 969-8957-09-X

سانجھ

دوجی منزل، مفتی بلڈنگ 17/31 ٹمپل روڈ لہور

فون: 042-7355323

sanjhpk@yahoo.com

نادر علی دے ناں



## سارنى

9	سعید بھٹا	”کمال کہانی“ دی کہانی
14	سعید بھٹا	کمال دیاں گلاں
29		راجا پورس
48		راجا کرنال
68		مٹلاں دو پیازہ
83		گامن چچار
117		جکھتیار ہرل
126		خضر، علی خاں دا بھٹی
136		نارنگ ساہی
149		نور، کندر دا سپرا
157		میر، مل دا کھرل
171		راء صاحب بھٹی
190		چودھری بہاب للیرا
196		فتح خاں موتیاں آلا
206		تخی سوداگر
221		چار سیانے





## ”کمال کہانی“ دی کہانی

تخصیص چنیوٹ جھنگ ضلعے دی تے تخصیص ساہیوال سرگودھے دی، اتھوں دے چتے دانے پنے بندے ہن، پڑھیں پنچایت دے گل باتیے، سرتے بندے، اوہناں دے دلاں وچ مینیں کمال دین کان پک موہ ہے۔ مینیں کمال دین داناں اسان بچنے توں ای سُنیا ہويا ہائی۔ اساڈے علاقے دا میراٹی ہے۔ اوہ کہانیاں سُنیدا ہے تے کہانی وی انج بھئی بستے بنھ دیندا ہے۔ پر کمال دین وڈیرا بندہ سیانیاں کول بہن آلا۔ کدی ستھرتے کدی پڑھیں پنچایت وچ۔ اسان بالان نال تاں اوہدا واہ کوئی نہ۔ بن ای نہ سگدا۔ جیہناں تھاہراں تے اوس جاونا ہا اتھے اسان نہ جاونا۔ ناں اوہدا ضرور سُنیا ہويا ہا، جیہڑے چھوہر ذری دل عمر دے ہان، ستھرتے یاں پڑھیں انج جا کے بہہ لینا، اوہ آ کے سُنیدا ہان مینیں کمال دین انج ایہہ لطفہ سُنیا ہے۔ لطفے اوہ مغل بادشاہواں دے تے مہاراجا رنجیت سنگھ دے ہان۔ اوہ لطفے وی پکو جیڈیاں توں سُنے ہوئے ہان۔ بالپنے وچ مینیں کمال دین دا ایہو گھ پتہ ہا بھئی رونقی بندہ ہے۔

وڈیاں ہوياں پنجاہی دی چس لگی۔ اساڈے علاقے انج پک شاعر ہويا ہے مُراد بھٹی۔ میں سوچیا: اوہدے بارے مضمون لکھاں۔ میرا گواڈھی وی ہاتے اوہدی شاعری دی لوکاں وچ مانتا وی ہا۔ اوہدے اُتے مضمون لکھن توں پہلاں مینوں

اودھے ترائے چار بند یاد ہان۔ میں اوہناں دے تھینہہ بچ جا نکلیم۔ تھینہہ دا ناں کوٹ سلطان ہے۔ مینیں مُراد دی اولاد نوں جا ملیوم۔ اوہناں تھوں مینیں مُراد بارے کچھ پُچھیا دیا۔ اوہناں آکھیا، ”اسانوں تاں ایہناں گلاں دا پتہ کوئی نہیں۔ میاں کمال دین میراٹی ہے اوہ سدا دینے ہاں۔“ کمال دین دا گھر اوہوں نال فرلانگ پک تے ہے۔ کمال دین آ گیا۔ کمال دین میرے وڈکیاں نوں جاندا ہا۔ کوٹ سلطان دے بندیاں میرا دیا۔

مینیں کمال دین توں گلاں پُچھیاں مینیں مُراد بھٹی بارے۔ جیہڑی گل میں پُچھی اوس ہر گل دا جواب دتا۔ اودھی گل اچ کوئی ودھیکی، کوئی چکر ناہی۔ شاعری اوہوں مینیں مُراد بھٹی دی کافی ساری یاد ہا۔ یاد ای اوہوں اُنج ہا۔ پک تاں بھٹیاں دا میراٹی جوں ہا۔ دوا مینیں مُراد دی اولاد وچوں دو بڈھڑیاں مانیاں ہان، اوہناں نوں مینیں مُراد دی شاعری یاد ہا۔ بندہ اوس ٹبر اچ کوئی سیانا ہا۔ اوس سوچیا ایہہ شاعری ایہناں بڈھڑیاں دے نال ای ٹر جاوئی ہے۔ اوس مینیں کمال دین نوں سدوا کے اوہ شاعری مُراد بھٹی دی لکھوائی۔ جدوں میاں کمال دین مینوں ملیا ہا تاں شاعری اوس کول لکھی ہوئی کائی نہ، اُنج اوہوں کافی ساری زبانی یاد ہا۔ ایہہ مینیں کمال دین نال پہلی ملنی ہا میری۔

مُر میں ”نواب مظفر خان دی پوڑی“ سو دھن لگا تاں کسے دیا میاں کمال دین ایہہ پوڑی پڑھدا ہے۔ میں کمال دین آل بندہ گھلیا۔ اوہ آ گیا۔ میں دیا ایہہ ایہہ کم ہے۔ اوس آکھیا، ”میں پوڑی سُنیدا ہام تے بڑی سُنیدا ہام۔ بندیاں کولوں ”مظفر دی پوڑی“ سنا کے جھیں وی لئیاں ہن۔ اوہ زمانے لد گئے۔ اوہ بندے ٹر گئے جیہناں نوں چس آوندی ہا ایہناں شیں دی۔ ہُن پوڑیاں سُن دے ای گھٹ نیں۔ ہولی ہولی اساڈے چیتے وچوں ای اناں اُدگنن۔“ پوڑی کمال دین بڑے کمال دی سُنیدا ہا۔

ایہہ تاں ڈھیر بندے آہدن۔ ہُن بھاویں دند نہسوں رہے پراج وی چنگی سُنیدا ہے۔  
شیریں وی ہے۔ سواد وی ہے۔ اٹ پڑھن دی جاج وی بیس۔

کمال دین راتیں اساڈے کول رہیا۔ میں آکھیا، ”سُنیا ہے میاں کمال دین  
تسیں کہانیاں سُنیدے او۔ اج کائی کہانی سناؤ؟“ اوس آکھیا، ”تہانوں کہانیاں دو  
سناونیاں ہن۔ ہک ”راجا پورس“ دی تے دُوئی ”گامن سچیا“ دی۔“ راجا پورس دا ناں  
کسے پنجابی اگے لیوے تاں اوہنوں دھروہ تاں پونی ہے۔ دل دھرکیونا تاں ہے۔ اساڈا  
ایڈا وڈا سوراہا تاں اوہدا کجھ وی سانجھ کے نہ رکھیا۔ جو کجھ اساڈے کول لکھیا  
ہے اوہ پرانیاں دا لکھیا ہویا ہے۔ تہاڈا پورس ایہہ آہے۔ پنجابی کیویں ویہدن؟  
میں کہانی فیتہ بند کر لئی۔ جیس ایلے کہانی اُتاری تے اوہدے بعد پڑھی۔ مینوں گل ای  
ہور نظر آئی۔ ہک احساس جیہا ہویا۔ پنجاب دی تاریخ دا ایڈا وڈا واقعہ تے لوک ادب  
وچ کدائیں وی نہ دسیا۔ چھاں تے ہزاراں سال پہلے دی کہانی اج وی سینہ بہ سینہ  
ٹری آندی ہے۔ دُوئی گل بولی با کہانی دی۔ جیہڑی نثر اساں پڑھی ہوئی ہائی اوہ اُکا  
ای ہورویں ہے۔ اوہدے پچھے اثر ہے اُردو تے فارسی دا۔ فقرے دی بہتر ڈھیر واری  
مانگوس لگدی ہے۔ پورس دی کہانی تاں جیدی نثر لگی پنجابی دی۔ جیویں پنجاب دی  
فلشن ہوونی چاہیدی ہا۔ ایس گل مینوں بلو نیا۔

”راجا پورس“ دی کہانی 1993ء دے ”راوی“ وچ چھپی تاں یاراں  
بیلیاں تے بابیاں وی پڑھی۔ اوہناں وی وڈا سراہیا۔ اوتھوں من دے وچ ہک چینگ  
لگی۔ بندہ بہوں گنی ہے ایہدیاں کہانیاں سانبھیاں چاہیدیاں نیں۔ نال نال لوک  
ادب پڑھنا شروع کیتا۔ انگریزاں تے سکھ کھوجیاں دا کم وی ویکھیا۔ انگریزاں دے  
کم وچ ہک خاص گل کھٹکی۔ انگریزی ہون دی وجہ توں اوہدے وچ پنجابی فوک آلی  
گل کائی نہ رہی۔ فوک دی چس تاں نہ، اُنج مفہوم تاں دس ای پوندا ہے۔ ونجارے

بیدی دے کم وچوں مینوں ہک بڑی مت ملی۔ ونجارے بیدی لکھیا ہے۔ میں کہانیاں اکٹھیاں کرن نکلیوم۔ ہک بندے توں کہانیاں سنیاں۔ میں نال نال نوٹس لیندا گیوم۔ جیس ایلے گھر آ کے اوہ نوٹس ویکھ کے کہانی بناونی شروع کیتی لوک کہانی نہ رہے میری کہانی بن جاوے۔ اوس ایلے سمجھ آئی انج تاں لوک کہانی نہیں ہوندی۔ میں وت گیوم۔ اوہناں بندیاں توں اوہناں دی زبان اچ سنیاں تے نال نال لکھدا رہیوم۔ ونجارا بیدی دی ایہہ گل پڑھن مگروں گھنڈی مینوں وی سمجھ آ گئی۔ کتاہنگے پدھ توں بچ گیوم۔

ایہدے مگروں مہیں کمال دین توں کہانیاں سنیاں شروع کر دتیاں۔ میں جدوں لہوروں جاواں تھینہ اپنے۔ مہیں کمال دین نوں سد لنیں۔ اوہ بڈھڑا بندہ۔ دیہاڑ اچ دو کہانیاں سُنائے یا ترائے۔ انج کر کے میں اوہدے کولوں 22 کہانیاں فیتے بند کر لیاں۔

ایہناں کہانیاں دی ہک خاص گل تاریخی ہون ہے۔ ایہہ گلاں زریاں گلاں وی نہیں۔ ٹھیک ہے کہانی وچ تاریخ انج نہیں آوندی جیویں تاریخ دے علم وچ۔ لوک کہانیاں سینہ بہ سینہ ہوندین۔ گلاں اچ وادھے گھاٹے وی ہوندین۔ تھوڑا بہتا زمانے نال زبان دا فرق وی پے جاندا ہے۔ ہک تاں ایہناں کہانیاں دے باہلے پاتراں دی اولاد سگویاں تھاہراں تے بیٹھی ہے۔ کہانیاں دے پاتراں اُتے ڈھولے، واراں تے سد اچ وی لبھدن، جیہڑے ایس حاضری توں اُتوں چھوہیاں۔ دُونی گل ایہہ کہ ایہہ پاتر ایسے نہیں جیہڑے زے میراثیاں دے پاتر ہون یاں میراثیاں ای ایہناں نوں بچایا ہووے۔ ایہہ اوس وسوں دے پاتر ہن۔ ہر کہانی وچ ہک خاص اخلاقی نکتہ ہے، جیہڑی لوک کچھ نوں اُساردی ہے۔ اُتلی نظریں تاں ایہہ کہانیاں لگدیاں ہن فیوڈل دیاں پر ایہناں دی پٹھلی پدھر وچ راٹھ اوہنوں ای منیا گیا ہے جیہدے وچ بندیاں

ہووے۔ کدائیں ظالم تے انیائی دا سوہلا نہیں۔

ایہناں کہانیاں وچ جیہڑا زور ہے ایہہ ہیکلے کمال دین دا کمال نہیں۔ زور ہے  
وسیب دا۔ ہزاراں ورھیاں دی کہانی سُنن سُناون دی ریت ہے۔ اوہدے پچھے ستھاں  
دا زور ہے۔ جدوں ستھی بہندن تاں مُلرم مُدعی دیاں گلاں سُنن۔ ستھی مُلرم تے  
مُدعی کولوں پک ڈھنگ نال گل سُندا ہے تے اوہدی کیتی گل دیاں پرتاں کھولی جاندا  
ہے تے اوتھائیں بیٹھیاں گل دا زور کر لیندا ہے۔ پک پاسے تاں ایہہ گل ہے کہ ستھی  
کولوں بندے سکھدن گل دی جاچ۔ پر ستھی کدوں سکھدا ہے؟ ستھی پچھے وی لوک  
سیانف ہوندی ہے۔ اوہ دانے پینے بندے۔ راتاں نوں بہہ کے کہانیاں سُنیاں تے  
اوہناں دے راہیں بندے نوں سمجھنا۔ اِنج ایہہ دوہرا کم ہوندا ہے۔

اج دا اساڈا جیہڑا پوڑا ہے کہانی دا، ایہدے پچھے انگریزی، اُردو دے  
افسانے دی سکھلائی تے نقالی ہے۔ اج دا اساڈا کہانی کار جے لوک کہانی تے لوک  
خزائیاں نال اپنے آپ نوں جوڑ لیندا ہے لفظالی، بنتر تے اسلوب دی پدھر اُتے، تاں  
ہی وڈے نثر دے لکھاری جم سکدن۔ اسیں جے رل کے لوک کہانی اکٹھی کرن دے کم  
نوں ہتھ پائیے تاں اسیں نثر آلا کھپا وی پور سکدے ہاں۔ ایہدی عینہہ اُتے نویں کہانی  
وی اُسار سکدے ہاں۔

## کمال دیاں گلاں

س: ایہہ دسومیاں جی ٹہاڈے وڈکے کتھوں دے رہن آلے ہان؟  
ک: جی اسیں ابتدا دے ای کوٹ سلطان (تخصیل چنیوٹ، ضلع جھنگ) دے رہن آلے ہاں۔ کوٹ سلطان تاں کچھ سلطان بھٹی گھتیا ہے۔ گرواہاں دا ٹھٹا پہلے ہویا ہے۔ اتھے ریحان ہوئن۔ پھلرون ہوئن۔ لکاں آلی مسیت اج وی کھلی ہے۔ راء سلطان دے نانکے ہان پھلرون۔ اوہ لا ولد گئے تاں اتھے راء سلطان آیا نانکی پتی تے، بھوڑانی دے وچوں۔ اودوں ایہدا ناں کوٹ سلطان رکھیا۔ گرواہاں ”باگھر“ کھوہ دی زمین دتی ہائی بھئی اساڈا وی دوہترا ہے، پھلرون دا جوں دوہترا ہے۔ اوس ویلے لوکاں نوں لجاں ہوندیاں ہان۔ گرواہاں دا ٹھٹا اج وی نال کھلا ہے۔ تھوڑی جیہی آبادی ہے۔ اسیں میراٹی جدی گرواہ دے ہاں۔

س: بھٹیاں دے نیہے؟  
ک: نہیں اُنج بھٹیاں دے شجرے، سدّ، پوڑیاں ایہہ ساریاں مینوں یاد ہن۔ شجرہ بھٹیاں دا وی میرے کول ہے۔ جدی اسیں گرواہ دے ہاں۔ اتھے ای میرا پو دادا رہندے ہان۔ پو میرے دا ناں کرم ہے۔ دادے میرے دا ناں میاں خواجہ ہے۔ ایہہ

بڑے کارکن ہوں۔ کم تند تانی دا کریندے ہاں۔ محنت نول اچھیاں جاندے ہاں۔ بڑے  
 بختاں دے وچ ہوں۔ بڑیاں دھوڑاں ہوئیں ایہناں دیاں۔ اللہ دی قدرت ایسی بنی  
 ، پیو میرے شادی کیتی۔ وڈے بھرا میرے دا ناں جمال ہا۔ پتریر دا ناں لال۔ مڑ میرا  
 بھرا دتا۔ مڑ پتریر میرا مٹھا۔ ایہہ تہاڈے دادے منہیں امیر بخش ہوراں ناں رکھے ہاں۔  
 اساڈیاں وڈکیاں دے مُرشد حضرت میاں کرم بخش بھٹنا ہوریں ہاں۔ میرا ناں تہاڈے  
 بزرگاں ہی کمال رکھیا ہا۔ میرا جمن 18-1917 دا ہے کیوں جو پیو میرا کتیں دی بیماری  
 اچ فوت ہو یا ہا۔

س: کتیں آلی بیماری 1918ء وچ آئی؟

ک: انجیں ہوسی۔ وسا کھ اچ میں جمیا ہام۔ میں اچے بہندا ای ناہم جوں پیو تے  
 چاچا فوت ہو گئے۔ اسیں یتیم ہو گیا سے۔ ماواں اساڈیاں رنڈنیں ہو گئیاں۔

س: چاچا کدوں مویا؟

ک: میرا پیو تے چاچا بخش ہکے راتیں موئے ہاں۔ اللہ تعالیٰ جنت بخشے اساڈیاں  
 ماواں نول۔ جے اسانوں نوکریاں تے لیندیاں بھٹیاں دیاں تے تاں کاہیں اچ استھے  
 پھنچنا ہا۔ اوہناں سانوں پڑھایا۔ میں دوئی جہات پڑھدا ہام تے میں پہلی نظم لکھی۔

س: پڑھدے کتھے ہائے؟

ک: کوٹ سلطان اچ۔

س: سکول اچ یا مسیت اچ؟



ک: سکول اچ۔ ایس سکول دے وچ اوس ویلے پنچ پڑھائیاں جاندیاں ہان۔ میں  
دوئی چوں فیل ہو یوم۔ مڑ اوسے دوئی دے وچ بہایا گیا۔ اوس ویلے میں مانیٹر ہو  
گیوم۔ مڑ میں پنچویں تائیں مانیٹر رہیوم۔

س: تئسیں پڑھیائے کتویں تیکر؟

ک: جی میں پنچویں چوں ہٹ آیا ہام۔ اُستاد ماریا ہا۔

س: اُستاد بہشتی داناں یاد ہے میں؟

ک: (نمھا جیہا ہس کے) اوہ جی اللہ یار سیال ہا۔

س: اگے نظم دی گل کرن لگے ہائے۔

ک: دوئی دے وچ میں ایہہ نظم لکھی:

میں سوراں رب رحمان، خُداوند پاک نوں

رازق رب یزدان، ہے مخلوقات دا

اوس بھجیا پاک قرآن، محمد مُصطفیٰ

خُر آیا وچ مدان، تے نعرے مار کے

انج دی اک نظم بنائی۔ پتہ اوس ویلے مینوں ایہو کجھ ہا کہ سُبحان میں ص نال

لکھدا ہام۔

س: شاعری دا شوق تہا نوں کیوں لگا؟

ک: ماما میرا دینا ناں ہاوس۔ اوہ کجھ شاعری کریندا ہا مگر ایڈا چنگا شاعر نہ۔ اوہدے

کولوں مینوں شوق لگا بھئی میں ای لکھاں۔ اوہنوں میں اُستاد جاندا ہام۔ جیس ویلے  
اُستاد ماریا تاں مُڑ میں نکل کے مسیتی جا پیوم۔ میاں رمضان موچی اوہ اُستاد ہان  
ساڈے۔

س: اوہناں کوٹ سلطان وچ؟

ک: جی آ۔ اوہ میں عمر کے سدیندے ہان۔ کنیں پڑھیاں گزر گئیاں ملوان  
گتی کریندیاں۔ مینیں رمضان کول میں قرآن شریف پڑھیوم ناظرے۔ اوس ویلے  
مولوی منور دین صاحب آگے منگلیاں دے چک (ضلعے سرگودھے دا پنڈ۔) میں مُڑ  
اوہناں دا جا مُرید ہو پیوم۔

س: مولوی منور دین کتھوں دے رہن آ لے ہان؟

ک: ایہہ بوچھالاں (ضلع چکوال) دے ہان۔

س: فوت ہو گئین؟

ک: جی آ۔ ڈھیر سال ہو گئین۔

س: کوئی اوہناں کتاب وی لکھی؟

ک: اوہناں جی توحید دا ڈنکا اساڈے علاقے وچ ماریا ہا۔ میں اوہناں دا مُرید ہو پیوم۔  
اوتھے مُڑ میں کچھ فقیری وی سکھی ہے۔ ذکر اذکار۔ توحید وی سچھی ہے۔ سورہ فاتحہ جیویں  
میں بیان کریناں انج تھوڑے عالم کرین۔ اوہناں دے کول قرآن سکھیا۔ عقیدہ  
سچھیا۔ مُڑ میں نظماں لکھن لگ پیوم۔ مُڑ میں بہوں نظماں کرن لگ پیوم۔ ”کلے دی

شرح، ”اعتقادِ مشرکین مکہ“، ”جنگ بدر“، ”جنگ 1965“، ”جھنڈا اسلام“۔ جھنڈے اسلام دے وچ میں جناب محمد مصطفیٰ توں لے کے ایوب تیکر جرنیل گنوائے ہن۔ ہور چیزاں بہوں ساریاں لکھیاں ہان۔

س: مولوی منور ہوراں کول کتنا عرصہ رہیائے؟  
 ک: انج میں رہیا نہیں۔ جمعے دے جمعے ویندا ہام۔ پہلی نظم مُڑ میں اوتھے پڑھی ہے۔ میں ٹھلھا (موٹا) ہام۔ پیومینوں گھیلا سدیندا ہا۔ اوہ گھیلا، کمال دے اُتے چڑھ گیا۔ میں گھیلو مشہور ہام۔ جیس ویلے میں ایہہ نظم پڑھی:

غنیوں کا ورثہ نبیوں کو ہوتا تو آدم نہ کرتے قریبی شجر کی  
 اگر نارگزار کا علم ہوتا تو عورت نہ بڑھتی جلیل القدر کی  
 اوس ویلے مولوی صاحب آکھیا، ”ایہنوں کمال دین سدیاے۔ مت کوئی گھیلا سدے۔“  
 تاں اوہ بلا میرے مگروں لتھی۔ نہیں تاں میں انجانو تھاہر تے جاواں ہام تے اوہ پچھن  
 ہاناں تیرا؟ میں آکھاں، ”گھیلا۔“ اوہ جگت سمجھدے ہان۔ ڈھیر بندے کوڑی پوندے  
 ہان۔ مُڑ میں شاعریاں کرن لگ پیوم۔ ایہناں شاعریاں انج مُڑ مینوں بہوں سار کمانی  
 ملی۔ زمیندار وی چاہن لگ پئے۔ دُوئے بندے وی۔ مولوی وی۔ انج وی اللہ دا فضل  
 ہے جتھے جاواں بندے عزت دی نظر نال ویہدن۔ نظم سُندن۔

س: تئیں مولوی منور توں اڈ کسے ہور کول وی پڑھے ہو؟  
 ک: نہیں جی۔ اوہناں دے بعد میں کسے ہور اُستاد کول نہیں گیا۔

س: جُہانوں پنجابی دے کئی شاعراں دا کلام زبانی یاد ہے۔ ایہہ شوق کیوں لگا؟

ک: پہلوں مینوں شوق لگا ”پوڑی نواب مظفر خان“ دی دا۔ کرم دین میرانی ہا شاہ پور  
دا۔ اوس توں جا میں لکھوائی۔

س: کرم دین اتھے آوندا ہا اساڈے علاقے وچ؟  
ک: اساڈا لگدا بندہ ہا۔ اوہ وی آوندا ہا اسیں وی جاندے ہاسے۔

س: اتھے چھاں تے پر بھ ہاسوں؟  
ک: نہیں جی اوہ اودوں دا ہا۔ سانوں ملن آوندا ہا۔ اوہدے کولوں میں نواب دی  
پوڑی لکھی۔ مُر مینوں ”نادر دی پوڑی“ دا شوق لگا۔ ایہہ میں میراثیاں حاجی عثمان  
(تخصیل چنیوٹ) آلیاں توں منگی۔ اوہناں نہ دتی۔ مُر میں گیوم چک ڈوگھڑے  
(تخصیل چنیوٹ) اتھے اساڈے مسیر ہوندے ہانن۔ اتھے ولی محمد سہیل قوم پاولی دا،  
اوس تے ”پوڑی نادر دی“ یاد ہائی۔ اوس آکھیا، ”تیرا مُونہہ پڑھن آلا کوئی نہیں۔ توہیں  
جیسے اُستاد نوں لعنت گھتیندن۔“ میں چُپ کر گیوم۔ میں میراثیاں میںیں گہنے کے گھر  
آ گیوم۔ اوہناں مینوں آکھیا، ”بچیا! پوڑی نواب دی سنا۔“ میں پڑھن لگ پیوم۔  
سوتے دی نماز پڑھ کے ولی محمد گھر پیا ویندا ہا۔ اوس گلی وچ آواز سُنیا تاں ہٹ آیا۔  
بہہ رہیا۔ جیہڑے ایلے پوڑی سُنیوس، اوہ اُٹھیا تے اوس آ کے تھبا بھریا۔ اوس آکھیا،  
”مینوں غلطی لگی ہائی۔ میں سمجھیا ایس بندے پڑھنا کوئی نہیں۔ تیرا مُونہہ انجیں بھولا جیہا  
ہے۔“ اوس مُر ”نادر دی پوڑی“ دتی۔

س: ایہہ پاکستان بن توں پہلے دی گل ہے؟  
ک: بہوں پہلے دی۔ میں اودوں لُوا ہام۔ مُر میں رتے (تخصیل جھنگ) گیوم۔ اتھے

عُلام اکبر شاہ سید ہا۔ محمد وارث دا نانا۔ اوس توں میں ”ذوالفقار علی دی“ لکھوائی۔

س: ”ذوالفقار علی دی“ کیہ ہے؟

ک: جیسی ویلے مرحب حضرت علی نال لڑائی کریندا ہے:

بھڑک تیغ حیدر دی جاوت میانوں

مِثل برق دید اے لسکار نکلی

ابن طرز دی چلی جاندی ہے۔

س: ایہہ کیہدی شاعری ہے؟

ک: فدا پک میراٹی ہو یا ہے ملتان دا۔ فدا تے گدا دو بھرا ہوئے۔ ذاکر ہان۔

س: ایہہ تہاں ساری یاد کر لئی؟

ک: اودوں شوق وی انج ہاتے دماغ وی اللہ ایسا دتا ہا کہ میں اوتھوں ٹریوم رتیوں۔

کوٹ سلطان دے پیا آوندا ہام۔ شادی پور دے آوندیاں پکا لئی۔ کاغذ پاڑ سٹیا۔

”نادر دی پوڑی“ میں بارہاں دینہاں انج یاد کیتی ہائی۔

س: ”نادر دی پوڑی“ ولی محمد کول لکھی ہوئی ہائی؟

ک: نہیں جی۔ اوہ تاں ان پڑھ بندا ہا۔ اوہنوں زبانی آوندی ہائی۔ اوہدے پیونوں چھ

ویہاں اٹ یاد ہائی۔ اگوں اوس تے 70 اٹ یاد ہائی۔ جیہڑی میں لکھی۔ انجیں ہار

ڈھیر چیزاں ہن، جیہڑیاں بندیاں توں لئیاں۔ میں ہن گن وی نہیں سکدا۔

”کیت نواب مظفر دے“ یوٹے بھٹ توں لئی۔

س: اوہ کتھوں دا ہا؟

ک: وسنال ہن نال بوچھالاں دے، اوتھوں دا ہا۔ اساڈے علاقے وچ بہوں آوند ہا۔  
ہُن نمانا مر گیا ہو یا ہے۔ بس ایس طرز نال ایہہ چیزاں میں لنیاں ہان۔ جیہڑے  
”سد“ پن بھٹیاں دے، ایہہ مینوں گوش کیاں ناہن دتے۔ اوہناں دے بنے ہوئے۔  
ایہہ سُن کے یاد ہوئیں۔

س: مینیں باز نال کیہ تعلق ہا تہاڈا؟

ک: بھٹیاں دا میراٹی ہا۔ ایہہ بھٹیاں کول بہوں ویندا ہا۔ گلاں اوہدے کولوں سُنیاں  
ہن۔ پڑھیا اوہدے کول میں گجھ نہیں۔

س: اوہدے نال نیہے رہے؟

ک: نال میں رہیا کوئی نہیں۔ بندہ ایس مزاج دا ہا اللہ جنت بخشے۔ دو گلاں دا ٹھکر یہ  
ادا کریناں۔ پک ایس حسد نہیں کیتا۔ دُوا جتھے جتھے رہیا ہے مینیں باز، ایس قدر بنائی  
ہے اپنی قوم دی۔

س: میاں باز گل کیہو جیہی کریندا ہا؟

ک: پک اوہدے وچ ایہہ صفت ہائی، کسے دی پھٹک نہیں بنائی۔ دُوا گلہ نہ کریندا۔

س: تہاڈے کولوں بڑیاں سچیاں کہانیاں سُنیاں ہن۔ ایہہ تہاں کدوں لنیاں ہن؟

ک: پیو دادے دیاں گلاں وچوں میرے ہتھیں گجھ نہیں آیا۔ میں تاں اودوں بال ہام،

جدوں اودہ موئے۔ ماما میرا جیہڑا ہے، اوس نوں گلاں تے کہانیاں یاد ہان۔ اودہ دے کولوں میں سُن کے پکائیاں ہن، ”اکبر بادشاہ دی“، ”راجپوتاں دی“، ”راجے پورس دی“، ”راجے کرنال دی“۔ باقی دیاں ایدوں آدوں۔ بھٹی کوٹ سلطان دے بڑے دانا ہان۔ راٹھاں دیاں گلاں بہوں کریندے ہان۔ راٹھاں دیاں گلاں یا بھٹیاں کولوں سُنیاں یا مہینیں باز توں۔

س: آبدن کوٹ سلطان دے وِچ بندے بڑی مٹھی سوہنی تے ٹھہرا کے گل کریندن؟  
 ک: بھٹیاں نوں راٹھاں دیاں گلاں بہوں یاد ہان۔ جے، چدھرڑ، لک، ماہنی، لالی۔ جیہڑیاں گلاں میں کریناں ہاں، اوہناں تھوں سُنیاں ہن۔ اوہناں دی دانائی دی ہک گل سُنائیں؟

س: جی سُناؤ۔

ک: راء ملک، راء شہادت دا رتے گیا۔ اودوں ہٹا تاں سردارے آلے تے رات پے گنیوس۔ اوتھے دھی پرنی ہوئی ہاس، اوہناں تے رہ پیا۔ اوہناں دودھ دتا۔ دودھ داگھٹ بھر کے آکھیوس ساڈی حمیل مجھ دا ہے اوتھے کیویں آیا ہے؟ اوہناں دسیا: اساڈی مجھ مرگئی ہا تاں تہاڈے گھر دیاں دے گھلی ہے۔

س: تَساں ایہناں بندیاں دیاں گلاں سُنیاں؟

ک: جی آ۔ کچی گل تاں ہوندی جوں نہ۔

س: جُہاڈا پھیرا ٹورا کیہڑے کیہڑے علاقے وِچ رہندا ہے؟

ک: میں ویہت، چھھاں تاں بہوں بھنویا ہاں۔ راوی تے کدی کم نال ای جویندا ہے۔  
اُنج میری عادت نہیں عام بُو ہے تے جاون دی۔ جیہنوں سِک ہووے اوہدے کول جانا  
ہاں۔

س: جیہیں تہانوں پک واری ملنا ہے سِک تاں اوہنوں رُوئی ہوئی۔  
ک: (ہس پندے نیں۔)

س: سُساں زندگی اِچ کئی میراٹی دیکھے ہوں۔ کوئی چنگا تاثیر آلا، جیہڑا تہانوں چنگا لگا  
ہووے؟  
ک: میری نظر اِچ تاں باز جیہا کوئی نہ۔

س: گوش کے میراٹیاں وی چنگے ”سد“ لکھے ہین؟  
ک: میں تہانوں ایہناں دی گل سُنیدا ہاں۔ ولیاں دا میراٹی ہا۔ گھوڑی آلے دے بھٹی  
منگیو لائے گئے کوٹ موہلے دے۔ میاں باز آہدا ہے: اسیں وی جانکلیا سے پیو پتر۔ بھٹی  
دربار لیندے ہان اوس ویلے۔ صاحب میراٹی وی آ گیا ولیاں آلا۔ سارنگی اوہدے کول  
ہا۔ عالم جھنڈے دے آکھیا، ”ہلا بھائی سد سُنا۔“ اوس سارنگی تے سد شروع کیتے۔  
ایدوں روٹی آگئی۔ سداکھے لکاں تے لالیاں دے سُنا۔ اوس شروع کر دتے:

راٹھ ساون دے بدل ہین، چڑھ آئیاں ہین گھٹاں  
محرم امام ہے، پڑ نیستی ہے اٹھاں  
سمو، سہاں نوں پون تلواریں، جیویں آہرن تے سٹاں  
حاکم جیے دیاں امبر بھونڈیاں ہین، گنڈے اودھ ولٹاں



ٹاہ ٹاہ اوہ وی بزار ہے، ہڑتال ہوئی ہے ہٹاں  
پڑتاں لالیاں ہے، سمو خان، سائل تے کلاں  
مارے جواناں دے بُت دھرتی پیٹھ،

جیویں سٹے بین بھار سودا گراں، پڑ خالی پینیاں بین چھٹاں  
استے نوں روٹی آگئی عالم دی وی۔ ”روٹی کھا۔“ اوس آکھیا، ”پک واری محرم تے  
سمو، سائل دا متھے پئے لگدن۔ روٹی رکھو۔“ اوہناں آکھیا، ”کھاوندا ای رہیں تے سُندا  
ای رہیں۔“ بھٹی پہلا گرانہہ بھن کے مُونہہ اِچ گھتیا۔ میراٹی آکھیا ہے:

آویں او حاکم، سائل وی جاوے  
سائل پڑ بھ کھلوتا، جیس نوں لڑن دے دعوے  
تلوار حاکم چپے دی ہے، وڈھ کوپر، سر اگانہہ ماس جگر دا کھاوے  
آہدا حاکم ایہہ ہئی مُراد، خان، سائل، جیہدے سر تے بھدا ہاؤں، بُت  
ویریاں دے دعوے  
مارے سمو، خان، سائل توں چکھے، مہر داد دو دلیلیں ہے،  
دُھکھ رات وِہاوے  
استھے میراٹی آیا ہے عالم ڈھٹھا ہے۔ اوہدی چند نکل گئی۔ اپنے مارے  
یاد آگئے۔

س: پوڑی تے سد اِچ کیہ فرق ہے؟  
ک: جیہڑی زمین یا چال رکھدے بین نا شاعر، اوہدا فرق ہے۔ پوڑی دو پواں  
سدیندے ہاں، جیہدا آدھی دے وِچ ردیف (قافیہ) ہووے۔  
نواب صاحب دل تکلڑی، کر کے بولیا

توہیں گل نہ کیستی پکڑی، مرزا قُطب دین  
 ہووے کسب جھماں دا ترکڑی، کیہ لڑ جاندے  
 ایہہ وی اٹ ہے پوڑی دی۔ ایس طرز دی وی چلدی۔

اول دئی توراں کر اپنی پائی  
 وت لئی چوباناں گجھ مُد وسائی  
 وت لئی سی غوریاں گھت تلوار کٹائی

ایہہ دو طرزاں ہین پوڑی دیاں۔ ہک دا اخیر تے ردیف (قافیہ۔) ہک دا آدھی وِچ۔  
 جیہڑا سد ہے نا ایہہ ڈھولا ہے۔ کیوں جو ایہوں ڈکا کوئی نہیں۔ کر کے مسلت تے دھا  
 پیڑا وگے

بھٹی پین بلوچاں نول جیویں ساون مینہہ ارڈاٹ دا ہے بدل سار دا گجے  
 متھا محمد یار تے لطف، کریم دے دا ہے، شینہہ چھٹ گئے پین بگے  
 سد تے ڈھولا ہک شے ہے۔ پوڑی دے وِچ قافیہ نہیں گھتھا جاندا۔

س: تُسیں جدوں کہانی سناوندے ہوتاں ڈھیر سارے شاعراں دے شعر سناوندے ہو  
 جیویں حافظ برخوردار، علی حیدر، نجابت، مُراد بھٹی، شاہ عظیم، وارث شاہ۔  
 ک: حافظ برخوردار دی شاعری مینوں بہت پائے دی لگدی ہے۔

س: تُساں کیویں یاد کیستی؟

ک: میرے کول ہک کتاب وی ہوندا ہا۔ نالے میں قصیاں آلیاں کولوں بہوں پکائے  
 ہین۔

س: قصیاں دی ریت کیہ ہوندی ہا؟

ک: ایہہ جیہڑے دو تاریاں تے قصے گا کے سُنیدن۔ اوہناں دے کولوں۔

س: اگے اتھے رواج ہا، کیویں گاوندے ہان؟  
ک: عام طور تے مینیں گوش کے وی سارگی تے حافظ دا مرزا گاوندے ہان۔ مُسلی وی  
آہدن۔

س: کیہڑے کیہڑے قصے زیادہ گاوندے ہان؟  
ک: مرزا گاوندے ہان۔ ہیر چوغٹے دی۔

س: چوغٹے رجوعے دی جُوہ دا؟  
ک: جی آ۔ ہیر چوغٹے دی تے مینیں وارث شاہ دی۔ ”مشری دا قصہ“ اکبر شاہ سید دا  
ہا۔ ڈھول بادشاہ دا قصہ۔ آپو آپ شاعراں لکھے ہین۔ بندیاں نوں اگے شوق ہوندا ہا۔

س: حافظ برخوردار بارے پئے دسدے ہائے؟  
ک: اصل وچ اوس فقر اچ گل کیتی ہے۔ ایہہ گل تاں بہوں اُچی ہے۔ آہدا ہے:  
جُڑے شاہ مقیم دے پک جی عرض کرے  
مطلب ہے شاہ مقیم ہمیشاں قائم رہن آلا بادشاہ خُدا ہے۔  
پنچے مرن گواڈھنیں، پنجاں نوں تاپ چڑھے  
دہ لطفے ہین انسان دے اندر۔ پنچ عالم امر دے ہین۔ رُوح تے نفس دا مُقابلہ ہے۔ پنچ  
چیزاں نفس دیاں ہین، جیہڑا عالم دُنیا ہے۔ عالم ارواح دے وچ پنچ چیزاں جیہڑیاں  
آوندیاں ہن: رُوحی، اخفی، خفی، سر تے قلب۔ ایہناں دا مُقابلہ اگ مٹی، پانی، ہوا تے

نفس نال ہے۔ ایہہ فقیر جلدن۔ جے رُوح نفس نوں ڈھالے تاں انسان دا پرواز  
 فرشتیاں توں اُچا ہے تے جے ڈھے جاوے تاں مُنچ توں نیچی مخلوق چوں اُٹھانا  
 ہے۔ پنج گواڈھنیں مرن یعنی نفس مریوے تاں رُوح جاگے۔ پنجناں نوں تاپ چڑھے  
 یعنی ذِکر وِچ آ جاون۔

گُتی مرے فقیر دی، جیہڑی ٹوں ٹوں نت کرے  
 ایہہ زبان گُتی فقیر دی ہے۔ ایہدے وچوں بکواس نکلنے بند ہو جاون۔  
 ہٹی سڑے کراڑ دی، جتھے ڈیوانت بے  
 ایہہ پیٹ ہٹی کراڑ دی ہے۔ ایہنوں حرام حلال نال واسطہ کوئی نہیں۔ ایہنوں رجن نال  
 واسطہ ہے۔

سُجیاں ہوون گلیاں، تد مرزا سیر کرے  
 تاں رب آوندا ہے۔ انج دی شاعری ہے ایہہ۔

س: میاں کمال دین بال کتنے بین تہاڈے تے کیہ کریندن؟  
 ک: چھڈو پرانہہ کچیاں گلاں نوں۔ کائی ہو پچھو۔

س: اپنی شاعری ای سناؤ؟  
 ک: پک دن مینوں خیال آیا کمال توں کیہ شے ویں۔ ایویں تیراناں کمال رکھیا نیں:  
 ز۔ زاری سُن کمال دی، اے قادر جل جلال  
 مینوں حرص دُنیا دے گھیریا، لکھ گائے پئے جنجال  
 میرے کپر پئے جہاز دا، توہیں کرنا ہیں آپ خیال  
 میں کشتی ٹھیلی ہے کچ دی، توں آپے لئیں سمھال

توں بخشن ہار غفور ہیں، میں اوگن ہار کنگال  
پُر دفتر بدیاں والڑے، جیہڑے وزنوں پئے پتال  
میرا راہ شیطاناں ملیا، مینوں چڑھنا پارُ محال  
نہ ظاہر کریں پر عیب دے، فن، مکر تے کوڑ پلال  
اے محرم راز قدیم دے، چاں نظر مہر دی بھال  
توڑے چرکا آیا ہاں دُور توں، پر توں میرا الجچال  
میری ہر حرکت عیب ہے، بس ایویں ناں کمال

س: میاں کمال دین بہت مہربانی۔ تِساں بڑیاں کمال دیاں گلاں دسیاں ہن۔  
ک: اللہ راضی ہونیں۔

## راجا پورس

بادشاہ ڈھیر ہن پر جیہڑا اعظم سدوانا ہے، ایہہ بہوں گھٹ سدوا گنن۔ دارا اعظم ایران دا بادشاہ ہویا ہے۔ مُر سکندر وی اعظم سدوایا ہے۔ مُغل بادشاہ اکبر وی اعظم سدوایا ہے تے اشوک اعظم وی اعظم سدوا گیا ہے۔

شاہ دارا ایران دا بادشاہ ہویا ہے۔ اوہ ہفت اقلیم ہویا ہے۔ ست ولایتیں اوہدے ماتحت ہائِن۔ مقدونیہ دا بادشاہ فیلقوس ہویا ہے۔ فیلقوس سکندر دا بیو ہے۔ ایہہ فیلقوس نکلے تاریندا ہا، شاہ دارا ایران آ لے دے اگے۔ اوس زمانے جیہڑا ٹکا بنیا ہویا ہا سونے دے انڈے بنا کے دیندے ہائِن۔ فیلقوس فوت ہو گیا ہے تاں ستارہاں سالان دی عمر وچ سکندر بادشاہ بنیا ہے تے بیو دی گدی اُتے بہہ گیا ہے۔ چھماہی گزری کھلی ہائی کہ ہلکارے بادشاہ دارے دے آگنن تے اوہناں آ کھیا، ”اوہ انڈے دے۔“ سکندر آ کھیا، ”اساڈی اوہ کڈوی مرگئی ہے، جیہڑی انڈے دیندی ہائی۔“ وزیر، امیر تے مصاحب بول اٹھن، ”سکندر ہوش نال گل کر۔ اسیں ایران نال لڑن جوگے کجھ نہیں۔“ سکندر آ کھیا، ”جیتنا جیونا ہے شیر دی زندگی جیونا ہے۔ گدڑ دی زندگی مینوں منظور ہی نہیں۔ میں اپنے مُلک دا پیسہ ہک بادشاہ دے ڈرتوں دے چھڈاں، نہ اوہ دھی دے لیکھے نہ دھین دے لیکھے۔ کیوں دیواں؟“

اودوں ایران تے وڈے عروج ہوئَن۔ اوہناں دا تاں چھوہ ہی نہ بھریندا ایہو  
 جیہاں اُتے۔ شاہ دارے نوں اوہناں ہلکاریاں جا کے گل کیتی ہے کہ سکندر باغی ہو گیا  
 ہے۔ بغاوت تروڑن کان شاہ دارا ایران توں چڑھیا ہے تے مقدونیہ دی کدھ نال جا  
 جھنڈا لایا ہے۔ جیہڑی قوم اُٹھیندی پئی ہووے اوہ جفائش ہوندی ہے۔ ایرانی قوم  
 عروج تے گئی کھلوتی ہا۔ ایہہ شرابی ہو چکے ہائَن۔ زانی ہو چکے ہائَن تے عیاش ہو چکے  
 ہائَن۔ سکندر دی قوم ایرانیوں نوں دھک کے ایران جا جھنڈا لایا ہے۔ اتنا چچھانہہ مار  
 آندا سوں۔ اتنے تائیں ایرانی جنگ توں تنگ آچکے ہائَن کیوں جو عیاشاں نہ رہیاں۔  
 اوس ویلے اوہ سوانیاں دی جوانی ڈھوڈھیندے ہائَن۔ راگ ڈھوڈھیندے ہائَن۔ جیس  
 ویلے کوئی قوم تڑے تاں ایہناں کیتیاں کماں اُتے آپوعدن جیویں اج کگڑاں اُتے  
 آپین۔ خیر جنگ ہو رہی ہے۔ شاہ دارے دے دو وزیر، میدان جنگ وچ ، رات دا  
 وقت ہے، اوہ آگنن۔ اکھ، ”اساں سکندر نوں ملنا ہے۔ شاہ دارے دے وزیر  
 ہاں۔“ سکندر آکھیا، ”تلاشی لے لوو تے آون دیو۔“ اوہناں آکھیا، ”روپیہ لکھ اسانوں  
 دے، دیو بھرے اسیں تینوں دارا مار دیندے ہاں۔“ سکندر لکھ لکھ دتا۔ جیہڑے ویلے  
 دھمی فوجاں اکٹھ کیتیاں، شاہ دارے تقریر کیتی ہے جیویں ”نادر دی پوڑی“ آلا آہدا ہے:

خاں دوراں کرے سوال، تے سد سپاہ نوں  
 اج بنیا حشر زوال ، دلی دے تخت نوں  
 صدمہ ایہو کمال، برے تے کڑکیا ہے  
 ایہہ زر فرزند تے مال، نہ ویسی نال کوئی  
 کیہ ہوسی پک سال، چکھیرے چونا  
 اج کرو نمک حلال، محمد شاہ دی

دارا تقریر کریندا کھلا ہے کہ کل تائیں ایہہ لوک اساڈے غلام رہن تے اج

ایہہ غلامی دا طوق اساڈے گل وچ ہووے تاں اسیں دُنیا نوں کیہ مُونہہ  
 وکھسائیں؟ اتنے تائیں دارے دی فوج وچوں ہاتھی جیڈے قد دے دو بندے نکلن:  
 گینڈے دے پھماں آلے۔ آن کے اوہناں پک پک تلوار دارے نوں ماری ہے تے  
 دارا ڈھے پیا ہے تے اوہ بھج کے سکندر دی فوج وچ جا کے رل گئیں۔ فوجاں ہنگھٹ  
 ہائیں سوڑے کھلونڈے ہائیں دوویں دل کیوں جو اودوں پھادھویں ہتھیار ہونڈے ہائیں۔  
 ایدوں دارے دیاں فوجاں وچیاں ہن لڑائی کرن کان۔ شاہ دارے ہتھ کھلا کیتا ہے،  
 ”ٹھہرو۔“ ٹھہر گئیں۔ اوس آکھیا، ”ہتھیار سٹ چھڈو۔“ میں ٹسانوں وصیت کریں کہ  
 سکندر جیڈا بندہ مہانوں نہیں لہنا۔ تسیں قیامت تک لڑدے ای رہسو۔ سکندر گو میرا  
 دشمن ہے پر ایڈا قابل ہے کہ ایس نوں بادشاہ من لینیو تہی امن نال وس سکدے  
 ہو۔“

واہ ماریا پیا ہے پر مخلوق دی بھلائی کان۔ سکندر اوہدی گل سُن لئی ہائی۔ اوہ  
 بھٹا ہے تے اوس دارے دا سر اپنی جھولی وچ رکھیا ہے تے روون لگ پیا  
 ہے۔ آکھیوس، ”چاچا! مینوں ایہہ علم ناہی کہ توں ایڈے پائے دا آدمی ہیں۔ میں  
 تینوں نہ مراونا۔ مینوں ماف وی کرتے کائی مت وی دتی جا۔ پوتیاں مرگیا ہے توں وی  
 پو بن۔“ دارے آکھیا، ”میری پہلی مت ایہہ ہئی کہ کسے ویری دے مٹھے کلام تے وس  
 کے انج نہ کریں جیویں میرا سر جھولی وچ گھتیا ہئی۔ میرے کول ہتھیار کوئی نہ نہیں  
 تاں تینوں مار لیندوم۔ دُونی مت ایہہ وے کہ ایہہ قوم جیہڑی میری ہے، ایہہ تینوں  
 شاہی نہ کرن دیسی تے نہ ای میں ایہناں نوں بھلنا ہاں۔ توہیں ایہناں دے ہتھوں  
 مری جاونا۔ توں، دھی میری نال شادی کریں تاں توں ایس قوم اُتے شاہی کرسکسیں۔  
 تریئی مت ہئی، جیہناں دو وزیراں مینوں ماریا ہے پتہ ہئی ایہہ کون ہن تے کیوں  
 ماریا ہے؟“ اکھے، ”نہیں۔“ اکھے، ”جییس ویلے میں جاوا ساٹرا اُتے دھاوا کیتا ہے، ایہہ



دوویں وزیر ہائن اوس بادشاہ دے جدی۔ ایہناں لکھ روپیہ میتھوں لے کے اپنا جدی بادشاہ مار لیا ہا۔ جیہناں دے پیڑھیو پڑھی وزیر لگے آئن، اوہناں دی نمک حرامی کر سکدن تے میری کیوں نہیں۔ میں اتنی ندانی کیتی تے ایہناں نوں نیڑے لے آندا۔ اج ایسے نیڑتا چکھے ماریا گیا۔“ سکندر دوواں قاتلاں نوں بلایا۔ اوہ آگئے۔ اوس آکھیا بھئی روپیہ لکھ جیہنوں دیونائے، دے لوو۔ ایہہ تاں میری زبان جو ہے۔ ”جلادا!“ اکھے، ”جی۔“ ”دوواں دے ہر لہا چھڈ۔“ اجن تائیں دارا جیندا پیا ہائی کہ اوہناں دے ہر توئیں توئیں کریندے وتدے ہائن۔ دارا سکندر تے بہت خوش ہوکے مویا ہے۔ سکندر ایران دی شاہی وی یونان نال رلائی۔

سکندر دا اُستاد ہویا ہے ارسطو۔ بڑا سیانا بندہ ہویا ہے۔ اوہ ارسطو نوں سکندر وزیر چاں کیتا ہے۔ نوشاہ ناں دی ہک سوانی یونان وچ ہوئی ہے۔ آہدن: دُنیا وچ اوس دا اُسن نیا ہویا ہائی۔ اوہ سکندر دی بیلانی ہا۔ سکندر ایران فتح کیتا ہے تاں اوہنوں وی یونان چوں سدوا لیا ہے۔ شاہ دارے دی دھی ارسطو نوں سدوا لیا ہے۔ اوس آکھیا، ”سکندر دا اُستاد ہیں۔ پیو مر گیا ہے۔ میرا وی پیو ہیں۔ گل ایہہ وے کہ عورت ایہہ بے عزتی تاں سہہ سکدی ہے کہ سکندر میرے پیو دا قاتل ہے تے میں اوہدی سوانی ہاں، پر سوکا عورت نہیں سہہ سکدی۔ ایہہ گل سکندر نوں سمجھا۔ ایس نوں بہادنا ہے سو تاں اودائیں مقدونیہ بہائے۔ میرے روبرو میرے شہر وچ نہ وے۔“ ارسطو آکھیا، ”غلطی میری ہے میں اوہنوں ہوٹیا نہیں، پر ہُن توں اگانہ ساہ نہ کڈھیں۔ جے سکندر تائیں ایہہ گل اپڑی تاں شاید تینوں اوکھیاں کرے۔ میں کائی کریناں۔“ ارسطو سوچن لگ پیا ہے، ”میں ایہدے نال کیہ کراں؟“

سکندر دا ارادہ بنیا ہے کہ ہند اُتے دھاوا کراں۔ سکندر دا ایہہ دعویٰ ہائی کہ دُنیا اُتے ہکو بادشاہ ہوونا چاہیدا ہے۔ سکندر دربار خاص کیتا ہے۔ چیدہ چیدہ آدمی

بلائے سو۔ ارسطو وی وِج بیٹھا ہے۔ سارے فوجی افسر اوتھائیں بیٹھن۔ سکندر چکھیا،  
 ”میں ہند اُتے دھاوا کرو ہاں۔ تئیں مینوں اپنے وچار دسو کہ کراں یاں نہ کراں۔“  
 سارے وزیر دلیلاں دیندے رہے کہ دھاوا ضرور کر کیوں جو تیری طاقت ہے۔ سکندر  
 آکھیا، ”اُستاد جی تئیں نہیں بولے۔“ ارسطو آکھیا، ”بچیا! ایہہ آپو آپ ہن خیال لوکاں  
 دے۔ ایہناں دا خیال ہے توں دھاوا کر۔ میں تینوں ہوڑیناں۔ توں دھاوا نہ کر۔“  
 ”کیوں؟“، سکندر چکھیا۔ ارسطو اگوں آکھیا، ”جیس قوم راجپوت نال توں متھا مارو ہیں،  
 توں اوس قوم نوں نہوں جاندا۔ کدی موقع بنیا تاں میں تینوں دکھساں۔ راجپوتاں وِج  
 جیہڑے جتی ستی ہوسن اوہ ساری عمر شادی نہ کریں۔ اوس قوم نال توں متھا مارو ہیں  
 تے کھیڈا چھوہریں نال ہیں۔ جیہناں نال توں متھا لاؤ ہیں اوتھے فورے خون دے  
 اڈوں تے جیہڑے تیرے کر توت ہن: اتھے شراب، راگ تے ناچ ہے۔ میں تینوں  
 آہناں لڑائی نہ کر۔ کافی ہئی مُلک اپنا تے استھائیں کھاپی۔ سوچ سوچ کے سکندر ڈھیر  
 ڈھل چکھوں بولیا، ”اُستاد جی! ہور میرے وِج کوئی بھید نہیں، پر نوشابہ واسطے میں قسم  
 چیناں کہ اوہدا پیا رچھڈ دیاں۔“ اوہ چاہندا ای ایہو گجھ ہا، اوہدی گل منی گئی۔

دربار چوں اٹھی کے گھر گیا تاں نوشابہ ہار سنگھار کر کے اوہدے کول جا  
 اڑی۔ سکندر مُونہہ پھیر لیا۔ سکندر دا مُونہہ پھیر نا کہ اوہدے دل تے ٹھو کر لگی۔  
 حافظ برخوردار آہدا ہے:

اج یار نہ ملیا ہس کے، کائی بھاری بنی مُصیب  
 کسے دوتی پکڑ رنجانیا، میرا مرزا یار غریب  
 میں نچ جمدی گھر مایاں، یاں ہوندی نیک نصیب  
 بچن محال آزاریاں، جدوں روگی ہون طیب

آہدا ہے:

اودے ہتھیں مہندی رنگی، اوہ آئی ہے میلڑے ویس  
 جٹ دے کے وٹ سریر نوں، پیا غُصے نال تکیس  
 نیہسوں نظر مہر دی بھالدا، پیا طعنیاں نال سڑلیس  
 سانوں نت اڈیکاں تیریاں، لے جا راوی دے دیس

نوشابہ روون لگ پئی ہے کہ کیہ قصور ہے میرا، توہیں مُونہہ پھیر لیا ہے؟ سکندر  
 آکھیا، ”تیرا قصور کوئی نہیں۔ میں اپنے اُستاد ارسطو اگے قسم چائی ہے کہ کسے سوانی آل  
 نہ ویکھساں۔“ نوشابہ آکھیا، ”ارسطو اُستاد دی اتسی سال عُمر ہے۔ ارسطو میں نہیں ڈٹھا  
 ہویا تے اوس مینوں نہیں ڈٹھا ہویا۔ میرے نال لگا آ۔ میں سُنیا ہویا ہے کہ اوہ باغ  
 دے وِچ رہندا ہے۔ جے اوہ ویکھ کے ایمان وِچ رہ جاوے تاں تیری قسم۔ جے اُستاد  
 ہو ریں آپ ڈھے جاوون تاں وت تیری قسم کاٹی نہ۔“ سکندر نوں پک ہے کہ ہو سکدا  
 ہی نہیں کہ اتسی سال عُمر اوس دی تے اُلٹا مینوں متیں دیون آلا۔ نوشابہ آکھیا، ”چل۔“  
 ٹر پے۔ سکندر نوں نوشابہ بُوٹیاں وِچ چاہایا ہے۔ ارسطو دی ماڑی بہوں اُچی ہے، وِچ  
 باغ دے۔ مطلب کیہ کہ میرا دماغ مُعطر رہوے۔ کُتب خانہ تِنیا پیا ہے کتاباں نال  
 تے اوہ ساریاں کتاباں وِچ مغز دے۔ ساہویں تِلاں ہائی، نوشابہ اوتھے کھلو کے گیت  
 گانویا ہے۔ تکیا ہے ارسطو یاں بہشت دی حور بھلیں پے کے آگئی ہے یاں پری  
 پرستان توں اُتر آئی ہے۔ آدم ذات تاں ہے نہیں۔ ماڑی توں لہی آیا ہے۔ جدوں  
 کول آیا ہے تاں کچھ یوس، ”آپ دی تعریف؟“ نوشابہ آکھیا، ”میں تاں پک بد نصیب  
 جیہی سوانی ہاں، میرا ناں نوشابہ ہے۔“ ”اوہ نوشابہ یونان والی؟“ اکھے، ”جی ہاں۔“  
 اوس آکھیا، ”سکندر جوانی ہو گیا ہے۔ میں ہُن کسے ہور نال یاری لائیں تاں ٹھاہندی  
 نہیں۔ گھدی دی گل ہے۔ میں آکھیا، چلو عورت مرد اک دُوئے توں سوا رہ نہیں  
 سکدے۔ اوہ ناتا توڑاں تاں میں سکندر دے اُستاد نال یاری لائیں۔ گھٹیا بندے نال

وی ہن کیہ لاونی ہوئی۔“ بابا ہسیا تے پیلیاں ہوآں اخیر آلیاں وی نکل آلیاں۔  
 پھداں دے وچوں تندوں وی اٹھیاں۔ اوس آکھیا، ”زوئے قسمت، اڈھوں اُتے میں  
 کیہ منگدا ہاں جے تُوں آویں تاں۔“

پانہوں پیر سوریندی ہے جج یارے دی آوے  
 ارسٹو آکھیا، ”چل۔“ اکھے، ”مینوں چالا۔“ ارسٹو آکھیا، ”پیراٹھل جاوی،  
 دیکھن والا کوئی کیہ آکھسی؟“

ع: عشق جیہناں دے خیال پیا، سوئی چکدے چکدے چک گئے نی  
 رتی ماس نہ ہا تن عاشقاں دے، اوہ سکدے سکدے سک گئے نی  
 دکھاں آن کے سکھاں نوں زیر کیتا، سکھ لگدے لگدے لگ گئے نی  
 علی حیدراوے دھوئیں عاشقاں دے، ایویں دھکدے دھکدے دھکھ گئے نی  
 نوشاہہ آکھیا، ”میں دیکھو ہاں کہ تُوں محبت کرواں کہ ایویں ڈانگھ لاؤاں۔“  
 اوس آکھیا ہے، ”توہیں ٹھیک آکھیا ہے۔“ بابا جھک گیا ہے تے اوہ اُتے چڑھ گئی ہے۔  
 آہدا ہے۔

عشق نہیں گھر گاڈواں، نہیں بازار دکا  
 عشق اٹھیندا اندروں، جیویں بارود چوں بھاہ  
 عشق پٹیندا ایریو، دیندائے دھوڑ دھوا  
 عشق علم سٹاوے عالماں، تحت سٹن بادشاہ  
 عشق پاڑے بُرقے ستر دے ، لاپے شرم حیا  
 نت عاشق گوچے یار دے ، ٹلڑے کرن گدا

استھے علم گھل ہو جاندن۔ بابا نیوں گیا ہے تے اوہ پلاکی مار کے چڑھی ہے

تے آکھیا سو، ”چل میرے گھوڑے۔“ سکندر ویہدا پیا ہا۔ سکندر دا رنگ ہو گیا ہے  
جیویں:

تپ پھالا ہوندائے لال وچالے اگ دے  
”مینوں کیہ آہدا ہا!“

من مُنڈیا تے مُونہہ ملوانا دِلوں خورندہ راگ دا  
بافندہ بردہ ٹھسریاں ، کیا رستہ جانے باگ دا  
نہ پہنچیا جا رنگریز تے نہ مِلپوس شالا لاگ دا  
گُٹا بھریا مُوتر دا کیہ لاون سوانن تے جاگ دا

سکندر اگے آ گیا ہے۔ اوس زمانے دا چالا ہائی کہ اُستاد نوں سلام کرن ہا  
تاں سچا گوڈا بھونیں اُتے رکھ کے کریندے ہائِن، پر سکندر اوس ویلے سلام ادب توں  
نہیں چرٹ توں کیتا ہے۔ کیا کہنے داناواں دے۔ اچھے موقعے تے وی کھلوتیاں  
آکھیوں، ”سکندر بچیا! اجے وی تینوں مت نہ آوے تاں افسوس ہے تیرے واسطے۔  
میں ایسے توں تینوں آکھیا ہا، جیہڑے ایہناں نال کھیڈن اوہ سُرے نہیں ہوندے۔  
ہُن کوئی مینوں اپنی قوم دا آگو پئے تاں میں بن جوگا ہاں؟ جیہڑے ایہناں نال پیار  
کرن اوہ کھج ہو جاندن۔“

سکندر بولیا، ”اُستاد جی! تہاڈی مت اتنا اثر نہ کیتا جتنا تہاڈی ایس مثال کیتا  
ہے۔ بالکل توہیں ٹھیک آکھیا ہے۔ زمانے دا اُستاد ہو کے ایس تیرا عقل کڈھ لیا ہے۔“  
تے آکھیوں، ”میرے واسطے اوہی قسم ہے۔“

نمانی نوشاہہ ترلا تاں کیتا ہا سکندر واسطے، نہیں تاں ارسطو جیہاں نوں اوہ  
کدوں نیڑے آون دیندی ہائی۔ گل اوتھائیں دی اوتھائیں رہی۔ سکندر کولوں پُچھیا ہے  
نوشاہہ، ”پک گل تاں مینوں دس۔ ہند اُتے جوں دھاوا کرُو ہیں، کوئی اچہا راجا وی

اوتھے ہے جیہدا تینوں کوئی بھو ہووے؟“ ”ہاں“۔ اوس آکھیا، ”راجا پورس جیہڑا  
بھیرے دا سردار ہے اوہدیاں گلاں میتھے پہنچدیاں رہندین، اوہدا خیال آوند اے تاں  
پھپھر تھر کدا ہے۔“

نوشابہ سوداگر دا لباس چاں کیتا ہے، نال کروان لدوا لئے سوسامان دے۔  
ایرانی سوداگر بن کے ہند چاں تکیا سو:

بھادیں جانے تے مول نہ جانے  
میرا ڈھول جوانیاں مانے

سکندر اے تیاریاں پیا کریندا ہائی کہ نوشابہ پنجاب اپڑگئی ہے۔ نوشابہ پنجاب  
آئی ہے تاں اودوں پندرھویں ساون نوں ہائی۔ جیس شہر کولوں لگھدی ہے عورتاں سنب  
سنگھار کے پیگھاں پنیاں چڑھیندین۔ نوشابہ کچھیا ہے، ”کائی عید ہے؟“ ہندو  
سوانیاں آکھیا، ”جی، اج رکھنی دا دیہاڑ ہے۔“ ”رکھنی کس نوں سدیندیاں ہو؟“  
اگوں اوہناں سوانیاں آکھیا، ”جدوں پندرھواں ساون نوں ہووے تاں ایہہ ہند دی عید  
ہے۔ جیہڑیاں بھیناں دے بھرا جیندے ہن نا، اوہ اوہناں نوں گانے بھندین تے  
اوہناں توں لاگ لیندین۔ مڑ خوشیاں کریندین۔ کپڑے پیندین، کھانے پکیندین  
تے پیگھاں چڑھیندین۔ جیہناں بھیناں دا بھرا کوئی نہیں اوہ اج کالے کپڑے پاکے  
پک دُوئی نوں مکاناں دین تے کائی خوشی نہ کریں۔“

شالا زندگی ہووے دراز تیری، بھیناں جیندین بھانیاں دے بھار اُتے  
نوشابہ کچھیا ہے، ”راجے پورس دیاں کتیاں بھیناں ہن؟“ اوہناں آکھیا،  
”اوہ دھی جاوئی نہیں چاہندے، بھین کدوں ہووے؟“ ”کائی نہیں سو؟“ اکھے،  
”نہیں۔“

نوشابہ بہہ کے نوڑیا گانا چاں بدھا ہے۔ جیس وچ یاقوت ہان جیویں راجے

دی شان ہائی۔ زرق برق لباس پاکے، گانا ہتھ وچ نپ کے راجے پورس دی حویلی وچ آوڑی ہے۔ راجا پورس اپنے شاہی محل وچ بیٹھا ہے۔ سکندر دا اعلان جنگ آپکا ہے۔ پورس میز اُتے ہند تے ایران دا نقشہ رکھیا ہویا ہے۔ اوہ ویہدا بیٹھا ہے ایس رستیوں آونا سو۔ ایہہ دریا جھاگنے سو۔ ایہہ پہاڑ لگھنے سو۔ ایدوں ہو کے آوسی۔ پورس دا حکم ہے کہ کوئی جی ایس ویلے میرے آل نہ آوے۔ نوشاہہ جیس ویلے محل نوں وڑی ہے، پہریداراں دی جرات ہی نہیں پئی کہ کچھن چاں کہ تُوں کون ہیں تے کدے جاونا ہے۔ حُسن اک اجیہی خُدا داد چیز ہے کہ ایہنوں ڈٹھیاں ہر پک دا دل پگھر ویندا ہے۔ بیگمات والے محل وچ آئی ہے تاں جتیاں رانیاں، مہارانیاں پٹھیاں ہاں سبھ نے اُٹھ اُٹھ کے سلام کیتا ہے۔ پتہ کوئی نہ کہ ایہہ کون ہے۔ نوشاہہ کچھیا ہے، ”راجا؟“ اکھے، ”محل وچ بیٹھا ہے۔“ تے ایہہ اگانہہ ٹردی رہی ہے۔ اوہ پک دُوئی توں چُھدیاں ہن کہ ایہہ کون ہے؟ ایس نوں پک ہے کہ جیس ویلے پورس میرے آلوں ویکھنا ہے مردتاں اجیہا ہے کوئی نہ جیہڑا عاشق نہ ہو جاوے۔ میں بھرا بناون پئی وینی آں شالا بچ جاواں۔

جیس ویلے پورس دے محل اگے اپڑی ہے تاں پچھاواں پیا ہے تاں پورس اُتانہہ سر کر کے تکیا ہے۔ ویکھ کے پورس مُڑ پٹھاں مونہہ چاں کیتا ہے۔ اوہدی زندگی وچ پہلا مرد ہا جیس ویکھ کے مونہہ پٹھاں چاں کیتا ہے۔ اوس ویلے حُسن مات ہو جاندا ہے۔ جیہڑا وی کسب کسے دا ہووے، جتھے پرواہ نہیں، جتھے نیاز نہیں اوتھے ناز نہیں ہوسکدا۔ ناز ہوندا ہے جتھے سچے۔ ایہہ کھلو رہی ہے۔ ڈھیر چر گزر گیا ہے پر اوس ایہہ نہیں چُھیا کہ تُوں کون ہیں تے کیویں آئی ہیں۔ غمگین ہو کے آکھیا سو، ”میں پک عرض کرنی ہے۔“ راجے ایہہ نہیں آکھیا کہ حکم کر۔ اوس آکھیا کہ کریندی رہو عرض۔ نوشاہہ آکھیا، ”میں پک ایران دی سوانی ہاں تے ہُن پنجاب وچ آگئے ہاں۔ نوشاہہ

میرا ناں ہے۔ میتھے بھرا کوئی نہیں۔ جدوں رکھنی دا دہنہہ آوے تاں سارا چا پہرا روندی رہندی ہاں۔ اج میرا کوئی بھرا ہوندا میں اوس نوں گانا بٹھاں ہا، اوس توں لاگ منگاں ہاں۔ اوہ لاگ مینوں دیوے ہا۔ میں سُنیا ہے، راجا پورس تے بھین کائی نہیں تاں مینوں ایہہ خیال آیا ہے کہ مینوں ایہہ تَس رہندی ہے کہ کوئی بھرا ہوندا تاں اوس نوں وی تاں تَس رہندی ہوسی کہ کائی بھین ہوندی، گانا بنھے ہا، لاگ لے ہا۔ میں اوہ بھین ہاں جیہدا بھرا کوئی نہیں۔ توں اوہ بھرا ہیں جیہدی بھین کائی نہیں۔ میرا ہاڑا ہی توں ہتھ اگانہہ کر۔ میں گانا بٹھاں۔ توں مینوں لاگ دے۔“ پورس دیاں ہنوں وڑھیاں ہن۔ پورس آکھیا، ”وچار یوں بھینوں! مہانوں تاں ایہہ سِک رہندی ہوئی تے اسان مرداں نوں تاں ایہہ سِک ہوندی کائی نہیں تے خاص کر کے راجپوت قوم نوں پر میرے بُو ہے تے کوئی سائل آیا ہے تاں میں خالی ہتھ بھنویا کدی نہیں۔ ایہہ ہتھ ہی، گانا بنھ تے لاگ منگ۔ بھین تاں بھین ہی سہی۔“ اوس گانا بدھا ہے۔ اکھے، ”لاگ منگ۔“ ”مینوں حیا آوندائے۔“ اکھے، ”لکھ کے پیش کر۔“ نوشاہ لکھیا ہے: سکندر یونانی تیرے اُتے دھاوا پیا کریندا ہے۔ اوہنوں قتل وی مہوں کرنا تے قید وی مہوں کرنا۔ پورس دیاں اکھیں لہو وانگ ہو گئیں۔ اوس آکھیا، ”بھین تاں نہ مہوں، جاسوسہ بن کے آئوں۔ پر چلو، میں راجپوت ہاں۔ راجپوت زبان کرے تاں اوہدی او تھے موت ہے۔ میں اوس توں بھین نہیں سکدا۔ میں نہ قید کریساں نہ قتل کریساں پر توہیں ہُن بہنا اتھے ہے۔ باہر مہوں نکل سکدی۔ توں پورس دی بھین ہیں۔“

سکندر ایرانوں دھاوا چاں کیتا ہے۔ کابل، قندھار دے امیر نوں آکھیا سو، ”مینوں رستہ دے۔“ اوس آکھیا، ”رستے منگدے ہن ترائے شرطیں نال بادشاہ۔ ایس شرط نال کہ جیہدا مُلک اگوں فتح ہو یا اوہدے وچوں حصہ دیونا۔ حصہ دیسیں؟“ اکھے، ”نہیں۔“ ”دوئی شرط ایہہ ہے جیہڑی اساڈی واہی وگڑے یاں باگ اُجڑن تاں



اوہناں دا تاوان ادا کر یسین؟“ اکھے، ”نہیں۔“ ”تریمی گل ہمت آلی ہے۔“ اکھے، ”میں ہمت نال لیساں۔ جرات ہی تاں لڑ پؤ۔“ اوس ٹلایا اپنیاں فوجاں نوں۔ آکھیوس، ”بڑی بے عزتی ہے اوس بادشاہ دی، جیہڑا مُکان ہی نہ دیوے تے دُشمن نُقصان وی کر جاوے۔“ وزیر آکھیا، ”نہ لڑیے سکندر نال۔ ایہدا بھار نہیں چایا جا سکدا۔“ سکندر دی تک ہے ہندوستان اُتے تے ایہدی ٹکر راجپوتاں نال ہے۔ سکندر جدوں اوڈوں ہٹنا ہے تاں ایہہ رنگت نیہسوں ہوونی۔ ہٹے ہوئے نوں اکھسائیں جھہ دے یاں لگھن نیہسے دیندے۔ آمدن ایہدی نہ کھا۔“ اوہناں ہتھیار سٹ چھڈے۔ جیہڑا راجا مہاراجا اگوں ادا گیا، ہتھیار سٹیندا گیا۔

سکندر ٹیکسلے اُتے آ گیا ہے۔ راجا امبھی ہو یا ہے ٹیکسلا دا راجا۔ اوس باجھ لڑائی دے ہتھیار سٹ وُتن۔ امبھی دا ہتھیار سٹنا کہ سکندر دی تک سومنات تے جا کھلی ہے۔ مینوں ہُن کوئی ڈک نہیں سکدا۔ سکندر ویہت دے لہندے آلے پاسے رُکیا ہے۔ اپنی گھلیا سُو پورس آل کہ میں سندا رہناں ہاں کہ توں وڈا ضدی جیہا راجا ہیں۔ میں جاونا سومنات اُتے۔ ہتھیار سٹ جیویں امبھی سٹن۔ مینوں لگھن دے۔ پورس ولدا گھلیا، امبھی راجا ہے پر راجپوت نہیں۔ نسلی نہیں۔ نسل مجبور کریندی ہے لڑن کان۔ پہلا نسلی راجپوت میں پیا شروع ہوناں۔“ راجپوتاں دیاں اٹھ نسلاں ہن:

راجپوت، ڈوگر، چوہان، راٹھور و تنوارے

بھٹی، چدھرڑ، برس، راج دھانی برے؟

تخت حسن پور، بسرا پر فرماں روا رہے

پورس آکھیا، ”میں راجپوت ہاں۔ توں نکلے منگسین میں انکار کریاں۔ قُربانی منگسین تاں میں اتنی قُربانی دیاں کہ بھیرہ رڑی ہو جاسی، اوس ویلے پہلا پیر رکھسین۔ سومنات تینوں دُور نظر آوسی۔ تُوں پیا جاننائیں گھوڑے دے سُنباں پٹھ ہے

لڑائی شروع ہوئی۔ چار مہینے گزر گئے۔ سکندر نوں ویہت نہیں لگھن دتا پورس۔ سکندر سنہو گھلے کہ ہتھیار سٹ۔ پورس آکھے، ”سنوائیں تاں شٹاں۔ کدی راجپوت انجیں ہتھیار سٹن۔“ ایہناں دیہاڑیاں وچ جھڑپاں ہوندیاں رہیاں۔ کدی یونانی ویہت ٹپ آون تے پنجابی دو چار مار لین۔ کدی پنجابی دریا ٹپ کے یونانی مار لین۔ ایہناں جھڑپاں وچ پورس دا پتر مری گیا۔

سکندر سوچیا، جیہڑے ایلچی میں پورس آل گھلیناں راجا با رعب ہے ایہہ گل نہیں کرسکدے۔ کیوں نہیں میں ایلچی بن کے جاواں۔ اوہدے نال رنج گلاں کراں۔ ہتھیار اوڑک سٹ چھڈنے سو۔ ایڈا گھاٹا ہور کیہڑا سو کہ پتر مری گیا سو۔ وزیر، امیر ہوڑ بندے رہ گئے، سکندر نہ جا۔ سکندر ایلچیاں آلے کپڑے پائے۔ کھڑا جیہی تلوار لئی سو۔ تھیلے تئے ہوئے کاغذاں دے۔ سکندر بھیرے نوں آوڑیا ہے۔ سنہیا گھلیا سو کہ میں سنہو ہاں سکندر دا۔ راجا پورس نوں ملنا چاہوناں ہاں۔ پورس عوام اٹھادتی تے دربار وچ صرف راجپوت رہ گئے۔ اڑتلی آکھیا، ”لگھ آ۔“ لگھ آیا۔ سلام کیتا۔ گرسی پئی ہا بہہ رہیا۔ تھیلے وچ ہتھ ماریا سو تے چٹھی کڈھی۔ اکھے، ”سکندر دی طرفوں لکھیا ہویا ہے۔“ پورس دا پنڈت وزیر ہویا ہے، اوہنوں آکھیا سو، ”چٹھی پڑھ کے سنا۔“ پنڈت آکھیا، ”جی، سکندر لکھدا ہے کہ تیرے واسطے ایہا گل کافی ہے کہ پتر ہانیا، اوہ مری گیا ہے۔ توں ہتھیار سٹ گھت۔“ پورس تکیا ہے ایلچی آلوں۔ اکھے، ”سنہو؟“ ”جی۔“ ”کسے زمانے ایہہ غلام رہ چکن، سکندر دا خاندان؟ مینوں ایہناں لفظاں وچوں غلامی دی بو آئی ہے۔ میرا پتر زنا چکھے ماریا گیا ہے؟ بے غیرتی چکھے ماریا گیا ہے؟ چوری چکھے ماریا گیا ہے؟ قوم تے دھرتی کان مرنا راجپوت دا گہنا ہویا تے اوہ مینوں آکھدا ہے کہ تیرے کان نصیحت دا وقت ہے۔ پتر دی لاش ای تاں مینوں آہدی ہوئی، بابا!

جیس راہ تے میں مویا ہاں توں وی مر۔ وڈا کمینہ ہے تیرا بادشاہ۔“

اپلجی اٹھیا ہے۔ تلوار میان وچوں چھک کے گُرسی اُتے ٹھوکی سُو۔ آکھیوں،

”ہُن سدیا ای۔ میں ہاں اوہدا نمک خوار۔ میرے ہوندیاں مت کمینہ سدیں۔ میں حلق

کولوں زبان چھک لیساں۔“ راجپوت بل اٹھن، ”ایہہ کون ہے؟“ پورس وِرسی کڈھ

کے آکھیا، ”میں سکندر دی کنڈیوں چچھے تاں کمینہ نہیں سدیندا۔ میں سکندر دے مُونہ

اُتے پیا کمینہ سدینداں۔ کمینہ نہیوں تاں ہور کیہ؟“ وزیراں ہائے ہائے کیتی۔ ایہہ تاں

اپلجی ہویا۔ اوس آکھیا، ”اپلجی میرے کول اگے دی آوندے رہندن۔ ایہہ شاہی اگ

ہے جیہڑی اگوں کھانندی ہے۔ اگ ڈکیندی پئی ہے اگ نوں“ اوس ویلے سکندر ہتھ

ماریا ہے۔ عمامہ کھولیا ہے۔ بناوٹی داڑھی ہائی۔ سر اُتے ایران دا تاج ہا۔ راجپوتتاں

تلواریں نوں ہتھ ماریا ہے۔ پورس آکھیا ہے، ”خبردار، سکندر ہے تے آیا ہے اپلجی بن

کے۔ اپلجی مارنا راٹھی کائی نہیں۔ مُرتاں میرے جیڈا کمینہ کوئی نہیں کہ سکندر آوے اپلجی

بن کے تے میں اپلجی مروا گھتاں۔ جا سکندر چلا جا۔ بھیرا کیتا ہی کہ ناہیا آونا۔“ دستہ

فوج دا نال گھلیا سُو کہ ایہوں دریا پار کروا آو متاں کوئی راجپوت ایہوں مار لے۔

راجا پورس مٹھا پیا ہے کہ سکندر نوں احسان نال ہٹایا ہے تے ہُن اوس لڑنا

کوئی نہیں۔ رات نوں سکندر دیاں فوجاں دریا لگھ آئین۔ لڑائی پے گئی ہے۔ لڑدیاں

لڑدیاں پورس دی فوج گھیرے وِج آ گئی ہے۔ فوج وِج اچھوں پے گئی ہے۔ فوجی بھجن،

نسن لگ پے۔ پورس دربار لا کے بیٹھا ہے تے اپلجی آیا ہے کہ سکندر دیاں فوجاں دریا

ٹپ آئین۔ ویہت دی من آ لے فوجی گھیرے وِج آ گئیں۔ پورس ہاتھی اُتے چڑھ کے

آیا ہے۔ ”نادر دی پوڑی“ آلا آہدا ہے:

چڑھے چوغطہ بادشاہ، دھرگیس دھکارے

گھوڑا ساڈھے ست لکھ، رجواڑے سارے  
 جو گھٹ اے بگلا، نقیب پُکارے  
 جیویں ساون جھڑی بمبہا، رت سماں چتارے  
 بھیریں بدل گجے، گھڑیاں نگارے  
 پیگھاں فرنے بیرکاں، رنگ کرن نظارے  
 باگیں بولن کونلاں، تریاں کہکارے  
 ساز ثقیلے جھکیاں، دیون لِسکارے  
 ہاتھی آون جھولدے، وچ دلاں سنگھارے  
 مار مُہاوت چلدے، سر گنڈے بھارے  
 نو گز ہلاں ڈنگیاں، سونڈ لین جھلارے  
 اژدہا پہاڑ دے، دم پیون ہارے  
 دند چٹے دین دکھالیاں، کہہ رکت انھارے  
 جیویں قبراں دے دسدے، سفید منارے  
 جو گھن اڈے مکڑی، دل بے شمارے  
 ہاتھی زور چھاڑدے، گھوڑیاں ہنکارے  
 گرد چڑھی اسمان تے، پے گئے غبارے  
 چن سورج نہ دسدے، نہ امبر تارے  
 چڑھیاں دو بادشاہیاں، مل گٹھاں چارے  
 ڈیرے پائے چوغطیاں، آ توی کنارے

جدوں پورس میدان اچ وڑیا ہے تاں اوس لکریا، ”ہلا سکندر، سکندر، سکندر۔“  
 سکندر گھوڑے اُتے چڑھ کے آیا ہے۔ پورس ہاتھی اُتے ہا۔ پورس ہتھ اُلا ر کے سٹواں

برچھا مارن کان برچھا تولیا ہے۔ شست تھہراون لگیاں گانے تے نظر پئی سو۔ ہنوں  
 ٹپیاں سو۔ ہائے زبانی، تینوں وڈھ سٹاں۔ ہن راجپوت نیموں رہندا جے سکندر  
 ماراں۔ برچھا مار کے سکندر دا گھوڑا ڈھاہ لیا سو۔ سکندر دُوئے گھوڑے اُتے مڑ چڑھ کے  
 آیا ہے۔ ایس دُو آوی برچھے نال ڈھاہ لیا ہے۔ اتنے تائیں چوگردوں انھیر تیراں  
 دے گھل گئیں۔ تیر وٹھن تاں راجا پورس بے ہوش ہو گیا ہے۔ فوجاں راجے دیاں نس  
 گئیں۔ راجا پورس نوں سونے دا ججیر مار کے سکندر اپنے تمبو وچ لیا ندا ہے۔ سکندر  
 آکھیا ہے اُستاد ارسطو نوں، ”اُستاد جی! ایہو جیہا انسان دُنیا توں مٹنا نہیں چاہیدا۔ لکھ  
 مرے لکھ پال نہ مرے۔ ایہو جیہے راٹھ جیندے ہی رہن۔ ایہدا علاج کر۔“ ارسطو نبض  
 تے ہتھ رکھیا ہے و ت دوا بنایا جس۔ سکندر اٹھا کے پورس نوں دوا دتا ہے۔ پکے واریں  
 ارسطو آکھیا ہے کہ ہن ہوش وچ ہے۔ پورس بھٹیں کے تکیا ہے تاں جدوں ویہدا ہے  
 گل یونانی تے ایرانی سپاہی ہن۔ آپ نوں ویکھیا سو ججیر وگی ہوئی ہے۔ اوس ویلے  
 سمجھ گیا ہے کہ میں قید وچ ہاں۔ سکندر بولیا، ”ویہدا پیا ہیں کہ قید وچ ہیں؟“ اکھے،  
 ”ہا۔“ ”تیرے نال میں ہن کیہ سلوک کراں؟“ پورس آکھیا، ”جد دا میں جمیا ہاں ایہہ  
 کنھی کسے دشمن اگے جھکائی نہیں۔ زبان میری منت دی عادی نہیں۔ توں اوہ سلوک  
 کر جیویں بادشاہ بادشاہواں نال کردن۔“ تاں لشکر وچ ہاکر وگی ہے۔ ”شابش جوان  
 دیا بچیا! کیا کہنے۔“ سکندر بولیا ہے، ”میں دُنیا دے بادشاہ وٹھن پر تیرے جیہا بہادر  
 نہیں وٹھا۔“ پورس آکھیا، ”میں وی دُنیا دے بادشاہ وٹھن پر تیرے جیہا کمینہ کوئی نہیں  
 وٹھا۔“ سکندر آکھیا، ”میں کمینہ کیوں آں؟“ اکھے، ”کمینہ نہ ہوندوں تاں اپلی بن کے  
 میرے دربار وچ کوئی ناہیا آونا۔ شیرنوں گدڑ بنا مہنا ہے۔ میرا حق ہاتینوں عمر قید کرنا  
 یاں قتل کرنا پر میں تینوں چھڈ دتا۔ ایہہ دُو آکھین پنا ہے جیہدا ہٹ کے لڑ پیا ہیں۔“  
 سکندر آکھیا، ”تیری پہلی گل دے وٹے میں تیری جان بخش دتی ہے تے دُوئی گل

دے وٹے سچ میں تیرا مُلک وی بخش دتا ہے تے میرے نال رسائی کر۔“ اوس ویلے  
 ہسایتے آکھیوس، ”رسائی تاں ہے جے توں میری روٹی کھاویں۔“ سکندر آکھیا، ”منظور  
 ہے۔“

پورس گھر آ گیا ہے۔ کھانے دانے پک گئیں۔ رات دی روٹی کان سکندر نوں  
 شاہی محل وچ بلایا گیا ہے۔ سکندر کھانا کھاندا بیٹھا ہے جوں بیگماں آلے محل وچوں  
 رانیاں، مہارانیاں، نوکریں، چاکریں نکلیں تے اوس دے اُتے گنگو دی کٹوری پٹی نیں۔  
 اودوں طبل تے شادیا نے وجن لگ پئے ہن۔ سکندر پچھیا ہے پورس دے وزیر کولوں،  
 ”ایہہ کیہ گل ہے۔ میں تاں نہیں سمجھیا۔“ اوس آکھیا، ”مبارک ہئی۔ راجا پورس بھین دا  
 ساک تینوں آکھی بیٹھا ہے۔ راجپوت جیس اُتے گنگو پلٹن اوس نوں دھی دا ساک  
 دیدن۔“ سکندر نوں تاں عید دے چن چڑھ گئے۔ بھئی راجپوتی ڈھیوے تاں ایس توں  
 اُتے میں ہور کیہ منگناں ہاں۔ سکندر جنج چاڑھی تے پورس جھلی ہے چاں۔ سکندر نوں  
 سنیہا ڈھیہا ہے کہ ایہہ شاہی محل ہے جیہدے وچ تہاڈی رانی بیٹھی ہے۔  
 سکندر محل نوں جا وڑیا ہے تاں کڑی رانیاں دے لباس وچ بیٹھی ہے گھنڈ کر  
 کے، جیویں پنجابی عورتاں بہندین۔ سکندر گھنڈ اٹھایا ہے۔ شکل، صورت وکھ کے سکندر  
 دا ٹھڈھا ساہ نکل گیا ہے۔ رانی پچھدی ہے، ”مہاراجا رات خوشی دی ہے۔“

اج دی رات سہاگ والی بھلکے پتہ نہیں کیہڑا رنگ ہو سی  
 کتھے تُوں ہو سیں کتھے میں ہو ساں، کتھے شمع تے کتھے پتنگ ہو سی  
 کائی گل دسو جیہڑی یاد رکھاں، جدوں تِساں باجھوں دل تنگ ہو سی  
 تِساں باجھ پیاریا جانیا وئے اساڈا کیہڑا بھلیر ڈا سنگ ہو سی  
 میرے کناں نوں بُندے سر چھتیاں دیاں تھہیاں  
 مینوں رتجھ متکلیدے دی پئے گڈھیں ہن گنیاں

مینوں مُڑ پرنائیں بابلا داج ویکھن آ ستیاں  
 ستیاں پیگھ وٹائی ہے گل جھوٹن پیاں  
 جدوں آیا تتی دا وارا خزٹ لاہاں گتیاں

”ایہہ گل دس توہیں ٹھڈھا ساہ کیوں بھریا ہے؟“ سکندر آکھیا، ”میں دساں  
 چاں سہی پر تیرے دل اُتے ٹھوکر لگسی۔“ اکھے ”گل کر۔ ٹھوکر کیوں لگنی ہے۔“ سکندر  
 آکھیا، ”میری پک بیلانی ہا۔ صرف ٹھاڈی زبان دا فرق ہے۔ لباس دا فرق ہے۔ شکل  
 عُمر، قد بُت سبھ اوسے آر ہے۔ مینوں اوہ وچاری یاد آئی ہے کہ اوہنوں ٹھوکر مار کے ٹریا  
 ہام۔“ ایہہ گل سُن کے اوبدیاں ہنوں پیاں۔ اکھے ”مُڑ توں رو پئوں۔“ اوس آکھیا،  
 ”میں رُنی ایس توں ہاں کہ میرا وی پک بیلی ہا، تیری شکل اوسے آر ہے۔“ سکندر تلوار  
 نوں ہتھ ماریا، ”میں تاں خوش ہو یا ہام کہ راجپوتی پئی ہتھیں آوندی ہے تے ایہہ تاں  
 اگے بیلیاں آلی ہے۔“ سکندر سوچیا، ایس توں کچھ تاں لواں اوہ کون ہا؟ سکندر کچھیا،  
 ”تیرا بیلی کون ہا؟“ نوشابہ آکھیا، ”توں دس تیری بیلانی کون ہا؟“ سکندر دسیا، ”اوہ  
 تاں یونان دی بہت مشہور عورت ہے۔ نوشابہ اوبدا ناں ہے۔ زمانہ اوہنوں جاندا ہے۔  
 ہُن توں دس تیرا دوست کون ہے؟“ نوشابہ آکھیا، ”فیلقوس دا پُتر ہا، مقدونیہ دا رہن  
 والا ہاتے سکندر ناں ہاسو۔“ سکندر آکھیا، ”گڑا پوی توں تاں ہیں نوشابہ۔“ نوشابہ  
 آکھیا، ”گل سُن میری میں نہ ہوندیم تاں توہیں ہُن تاں قتل ہو جاونا ہا یاں قید ہو  
 جاونا ہا۔ ایہہ بٹن بٹن میں کپتن تاں تیری جان بچی ہے۔“ اوس ویلے سکندر اوہنوں  
 اپنی سوانی سمجھ لیا پر نی تاں اگے وی گیا ہا۔

بھیریوں جا کے سکندر ملتان اُتے دھاوا کیتا ہے۔ شور کوٹ لتاڑ کے گیا  
 ہے۔ ایہہ بھڑ اوس ویلے دے ہن۔ ملتان فتح ہو گیا تے آپ پھڑ ہو گیا تے باقی  
 دے پنجاب نوں کجھ نیہسوں آکھیا۔ ڈھڈھوں بھیرا پے گیا ہے تے پچھانہہ دیس

نوں پرتیا ہے۔ بابل اپڑیا ہے تاں چند نکل گئی سو۔ پورس دی اولاد وچوں پچھے وی  
وڈے وڈے سورے تے کجاک جمدے رہن۔



## راجا کرنال

راجا اشوک بنارس دا راجا ہويا ہے۔ ہر بادشاہ یاں راجے نُون اعظم دا خطاب نہیں ملدا۔ اشوک اعظم سدایا ہے جیویں اکبر اعظم سدایا ہے یاں سکندر اعظم سدایا ہے۔ اعظم دا خطاب اوہناں بادشاہاں نُون ملدا ہے، جیہناں دے پٹھ کئی راجے نکلے تار رہے ہون۔ اشوک بنارس دے وچ بہہ کے ٹیکسلا تائیں شاہی کیتی ہے۔ گویا کہ سارا ہندوستان اوس دا ہا۔ راجے اشوک تے پتر کوئی نہ۔ باغ دی سیر کریندا آ وندا ہے۔ مالی توں چکھیا ہے کہ ایس بوٹے پھل کیوں نہیں لیا؟ اوس آ کھیا، ”مہاراجیا! ایہہ قدرت ہے اوس ذات دی، جیویں تینوں اولاد نیہسوں دتی۔ انجییں ہار ایس نُون وی ہو رکھی کائی نہیں۔ زمین وی اوہا ہے۔ پانی وی ہے۔ محنت وی ہے۔“ راجے دے دل تے ٹھوکر لگی ہے۔ ہر بندے دا کم نہیں ہوندا مثال دیونا۔ کنیں کنیں بندے مثال دیون تاں دوئے دا بیڑا بوڑ چھوڑیندن۔ راجے دے دل تے ٹھوکر لگی ہے بھئی سارے باگ وچوں میں وی دنیا تے انجییں آیا ہاں، جیویں ایہہ بوٹا ہے۔

☆ راجا کرنال

راجا لگا آیا۔ اوس قوم اپنی اکٹھی کیتی۔ اوس آ کھیا، ”ایہہ تخت، ایہہ تاج، اوہ

خزانے تے ہر شے قابو کرو۔ اساڈا دُنیا اچ حصہ کوئی نہیں۔“ ہر بندہ مالی نُوں کجھ آکھن لگ پیا ہے۔ کیڈا بے وقوف نکلیا ہیں۔ کیڈی گندی مثال دیتائی۔ اوس ویلے لوکاں آکھیا ہے: راجیا! ہر شے اُمید تے زندہ ہے۔ خدا دی رحمت توں بے اُمید نہیں ہوونا چاہیدا۔ اُمید تڑٹ جاوے تاں انسان دی زندگی ختم ہو جاندی ہے۔ ہر چیز دا علاج ہے۔ ہر کم دی کوشش ہے۔ توں انج کر، بک سادھو فقیر ہے، جنگل دے وچ واسا ہے اوس دا۔ دُنیا توں تارک ہے۔ گھاہ، پتا کھا کے اوہ رب دی عبادت وچ رہندا ہے۔ اکھے، اوہدے کول لگے جاویے۔ اوہدے کولوں دُعا منگواویے۔ مت اللہ پاک تینوں سنبھالے چاں۔ راجے نُوں لے کے سادھو فقیر کول چلے گئے۔ چار کتاباں ہین ہندو مذہب دیاں، چار وید ہین۔ اوہ چونہہ دا حافظ ہو یا ہے۔ اوہدے کول گنن۔ جا کے گریہ زاری کیتی نیں: اے فقیر اللہ دیا! دُعا کر راجے دے تحت دا کوئی والی بنے۔ ایہدی اولاد ہووے زیندہ۔ اوس آکھیا، ”خدا بدھا ہو یا اساں فقیراں دا وی نہیں ہوندا۔ آؤ سارے رل کے گریہ زاری کریے۔ مت کسے دی منظور چاں کرے۔“ فقیر ہتھ دُعا دے اٹھان۔ گڑگڑا کے دُعا منگی ہے بڑی عاجزی نال۔ رُتے ہین دوئے لوک دی۔ کجھ دل نُوں تسکین آئی ہے راجے دے نُوں کہ انشاء اللہ فقیر دی دُعا مستجاب ہے۔ آگنن گھر۔

دیہاڑیاں دے بعد اللہ پاک راجے نُوں پتر دتا ہے۔ اوس دا ناں راجا کرنال رکھیا ہے۔ ہندوواں دیاں مذہبی کتاباں دسیندیاں ہن کہ اوس لڑکے دی سوا انج اکھ ہوئی ہے، آنہ۔ بے مثال آنہ ہو یا ہے اوس دا۔ بڑا خوبصورت۔ جیس ویلے پنج سال دا پچھ ہو یا ہے تے اوہنوں آن کے سادھو دے کول کھلاریا ہے بھئی ایہنوں علم پڑھا۔ اوس آکھیا: ”راجیا!

جھان آہلنے چھوڑ ہوا لتی، وت اُنھاں نُوں اندریں واڑنا کیہ

جیہڑے دُنیا چھوڑ فقیر ہوئے، وت اُنھاں دا پڑتتا پاڑنا کیہ  
 میں آبادیاں چھوڑ کے جنگل ملّیا ہے۔ میں آبادی تہاڈی دے وِچ آ نہیں  
 سکدا۔ تینوں طاقت ہے اتھانیں اپنے پتر کان سامان مہیا چاں کر۔ نوکر نوکریں رکھ  
 دے۔ میں پڑھیسوں۔“ راجے انجیں کیتا ہے۔ پہلے دیہاڑے جیس ایلے بچہ آیا ہے  
 پڑھن کان۔ اوس آ کھیا، ”بچیا! علم پین دوئیں۔ ہک روحانی ہے۔ ہک زبانی ہے۔ پہلی  
 بات ایہہ ہئی کہ توں ایہہ نہ جان کہ میں راجا ہاں یاں راجے دا پتر ہاں۔ انسان توں  
 موت اگوں اڈکیندی کھلی ہے۔ جیڈی وی ہستی دا ہووے، اوس مرنا ضرور ہے۔ ایس  
 دُنیا دے مال مگر دُنیا دار اپنا مال تباہ کر رہن۔ بچیا! ایہہ خیال کریں، ایس دُنیا دے مگر  
 دین نہیں ونجانا چاہیدا تے پڑھ الف۔“ جیس ویلے بچہ سبق لین آوے۔ پہلے اوہنوں  
 موت دے اُتے نظر دیوائے کہ توہیں مر جانا ہے۔ توں راجا کوئی تونہہ۔ مخلوق اللہ دی  
 نال اچھا ورتیں۔

رب دو گلاں دے کان، ہے بندہ خلقیا  
 ہک حمد پڑھے سُبْحان، صبح تے شام توں  
 نہ سورے کوئی غیران، خدا دے باجھ اوہ  
 نہ سمجھے غیب دان، بشر جن ملک توں  
 ہر نفع تے نقصان، خدا دی طرف تھیں  
 رب قادر ہے رحمان، ہر ہر چیز تے  
 دوآ۔

ورتے وِچ جہان، تے نال انصاف دے  
 انسان دا کم کرے احسان، وِچ بھیر دے  
 راہ خدا دے جان، بچاوے کسے دی

بھٹکھیاں دیوے نان، تے آب پیاسیاں  
 جند، عزت، مال، امان، رہے وچ فضل دے  
 ثابت نال ایمان، وچ بہشت سدھاوسیں  
 پڑھ کلمہ مسلمان، ایہہ ساتھی ہی توڑ دا

لڑکا پڑھن لگ پیا ہے۔ تعلیماں اوس نوں دو دیون لگ پیا ہے اُستاد زبانی  
 علم وی، رُوحانی علم وی۔ اکی سال دے وچ اوس جا کے تحصیل علم دی طے کیتی ہے۔  
 اتنے تائیں جیہڑی اوس دے وچ ہائی نا دُنیا داری، ایہہ فقیر کٹ کے سٹ گھتی ہائی۔  
 اوہ مجسم فقیر ہو چکا ہا۔ جیس ویلے ایہہ آیا ہے راجے بڑیاں خشیاں منائیاں ہن۔ گل  
 ہند دے راجے نوں دعوت دتی ہے۔ اوہ آگئے۔

ایس زمانے دے وچ راجے اشوک شادی کیتی ہے۔ رانی شکتلا، اوس دانان  
 ہويا ہے۔ شکتلا جیس ویلے ڈٹھا ہے راجے کرنال نوں، اوہ عاشق ہو گئی۔ اوہ حرکتاں  
 کرن لگ پئی ہے۔ ایہہ مجسم فرشتہ ہا۔ ایہہ حیران ہووے بھئی ماں ہے میری۔ کیہ  
 حرکتاں کریندی ہے میرے نال۔ اوس آکھیا، ”گل سُن۔ اول تاں گل ایہہ وے کہ میں  
 ہر عورت نوں دھی بھین جاندا ہاں۔ توں تاں ہونیوں میری ماں۔ ایہہ حرکتاں کرنیاں  
 چھڈ دے۔“ اوہ مُوی ڈڑھی رہی۔ راجے اشوک کرنال کان ساک چاں منگیا قلعے قنوج  
 دے راٹھور راجپوتاناں توں۔ ساک آدری گیا۔ گڈھیں پے گنیاں۔ خوشیاں منادان لگ  
 پین۔ جیس ویلے جنج ایہدی چڑھن لگی ہے تاں رانی شکتلا ایس نوں وکھریاں سدیا  
 ہے۔ اوس آکھیا، ”گل سُن ایہناں اکھیں تیریاں میرا دھرم، شرم ہر شے کھس لئی ہے۔  
 میرا اکھیا من چاں۔ جے نہ منسیں تاں جیہناں اکھیں میرا دھرم کھسیا ہے، ایہہ اکھیں نہ  
 کڈھائیں، تینوں پتہ ہے کہ راجے اشوک اُتے میرا بڑا قابو ہے۔“ اوہ ہس پیا۔ اوس  
 آکھیا، ”رائے! اکی سال میں تعلیم لئی ہے اپنے سادھو اُستاد کولوں، جیہڑے پردے

میرے دماغ دے ہاں دُنیا داری دے، اوس کٹ کے پرانہ سٹ گھتن۔ مینوں اوس  
پہلے دیہاڑے آکھیا ہا، ایہہ اکھیں وکھ کے تیریاں آدم عاشق ہوویندا ہے۔ ایہہ اکھیں  
تیریاں ٹونہ رہنا۔ توہیں آپ وی نہیں رہنا۔  
سَلجی خانے دل بناونے  
کوٹ قلعے محکم پاونے  
سبھ موت سگھر بھتن جاونے  
باقی رب ستار ہے

کوٹ قلعے جندوں کر گئے  
تدبیراں ڈھالاں دھر گئے  
موت کے مارے مر گئے  
باقی رب ستار ہے

اوہ وکھ پنیاں آوندیاں گڑیاں نی  
ہتھ پکڑ ڈنگورے اڑیاں نی  
چر جوہ سر بانیوں مڑیاں نی  
باقی رب ستار ہے

بھئی میری توں ماں ہیں۔ میں تیرا آکھیا نہیں من سکدا۔ توں اکھیں کڈھوا

”چھڈ۔“

جج چڑھ گئی۔ ایہہ پرنی کے گھر آ گیا۔ رانی توں بار بار اوہ گل سٹ مارے  
کہ میں وعدہ کیتا ہو یا ہے۔ جیہیں ایلے راجے دے کول شکایت کرن دی کوشش کرے۔

راجا آکھے، ”گل سُن ایس کرناں جیہا ساڈی جد اچ کوئی نہیں ہو یا نہ ہونا ہے۔ ایڈا پاک بندہ ہے۔“ قابو اچ اوہ آوے ای نہیں۔ تاں جے ٹیکسلا دے وچوں پیغام آ گیا۔ راجا! جیہڑا گورنر توں ٹیکسلا تے بہایا ہے اوہ باغی ہو گیا ہے۔ ساری سندھ اوس دے نال رل گئی ہے۔ سارا مُلک اوس بدراہ لیا ہے۔ راجا اشوک بڈھا راجا ہے۔ تخت دے اُتے کھڑا ہو گیا ہے۔ اوس تقریر کیتی ہے۔ اے راجپوتو! کیہڑا راجپوت ہے، جیہڑا میتھوں انعام لے تے اوہدا سرکٹ کے پیش کرے۔ اجے راجپوت کوئی نہ بولیا رانی شکنتلا اُٹھی ہے۔ اوس آکھیا، ”چودھویں مدھیں ندھان ہے۔ سوکھیں بندیں ثابت ہے۔ پُتر ئوں چاڑھ۔ شے تہاڈی ہے لڑیندا میلکھ ئوں ہیں۔“ راجا رو پیا ہے۔ اوس آکھیا، ”اچن تاں میں پُتر دے پورے لاگ ای نہیں دے چکیا۔ کل ایہدی شادی پئی ہوندی ہے۔ چھیواں مہینہ ایہدی شادی ئوں ہے۔ توں ایہنوں مروانا چاہتی ہیں۔“ اوس آکھیا، ”معلوم ہوندا ہے تسیں نسل راجپوت نیے۔“ راجا بولن لگا ہے تاں کرناں اُٹھی کھلوتا ہے۔ کرناں آکھیا، ”گل سُن راجیا! حکم ہوندن دوئیں۔ یاں ماں دا یاں پیو دا۔ پیو میرے حکم نہیں دتا۔ ماں میری مینوں حکم دتا ہے جنگ دا۔ میں ایہہ داغ کیوں جھلاں۔ کیوں خاندان میرے دے اُتے لفظ آوے۔ میں تیار ہاں۔ توں مینوں اجازت دے۔“ راجے اشوک ہاں نال چاں لایا ہے۔ ”شباباش بچیا! حلالی دی ایہہ تعریف ہے۔ تینوں غیرت آئی ہے۔ سامان آلوں کمی نہ ہوتی۔

ہار جیت وس خدا دے، راٹھاں ایہو کچھ کرنا

اگا نہہ ہُن بھاویں ہار آوی یاں جیت آوی۔ ایہہ رب دے وس ہے۔“  
 ٹیکسلا دے گورنر دے نال اعلان جنگ ہو گیا ہے۔ تیاری ہو گئی۔ جیس ویلے ایہہ چڑھن لگا ہے تاں ایہہ پہلے آیا ہے ماں مترتی دے کول۔ ”گستاخی کوئی ہوئی وی ہے ماف چاں کر۔ ماں بن کے اچ ہتھ پھیر۔

بیگم کہندی ہے ماں تُوں، سُن ماں پیاری  
 بچے دے چاں کپڑے، چھبویں پھلکاری  
 ہاتھی دے چاں جھولدا، کوئی سنے امباری  
 اج سیر کرن دے باغ دا، ماے جاندی واری  
 اساں مُڑ نہیں آونا پیکیاں، بہہ عمراں ساری

کیہ پتہ ہے میری موت ہووے۔“ اوس آکھیا، ”توں آیا ہیں میرا رگڑا کرن  
 کان۔ میرے سرتے پُونڈا ہے۔ میں وی راجپوت دی لڑکی ہاں۔ میں تیری اکھیں نہ  
 کڈھائیں تاں توں آکھیں۔ نہیں تاں اج وی آکھیا منیں چاں تاں میں راجے تُوں  
 روک لیندی ہاں۔“ اوس آکھیا، ”تیرا ماریا ای میں وطن چھوڑو ہاں۔ نہ تیرے متھے  
 لگساں۔ نہ گندیاں گلاں سُنساں۔“ اوتھوں چل کے اپنی ماں کول آیا ہے۔ ”اماں جی۔“  
 اکھے، ”جی۔“ ”میں جا رہیا ہاں۔ توں مینوں اجازت دے۔“ اوس آکھیا، ”بیٹا! تیری  
 میں موت تے وی خوش ہاں، جیہڑا توہیں داغ نہیں جھلیا تے آپ تیار ہو گیا ہیں۔ نہیں  
 تاں ایس سوکن میری مینوں ہمیشاں ایہہ طعنہ دیونا ہا۔“ اوس ویلے اپنی رانی راٹھور کول  
 آیا ہے۔ راٹھور تُوں آکھیا بیس ”لے۔“

الف : اللہ آن ملایا تاں آن ملساں، اج قسمت چاں نکھوڑیا ای  
 ساڈا دل ناہیا اتھوں تُوں نے تے، رب ڈاڈھے نے بنھ کے تورا ای  
 تئیں خوش وسو پیارے مکھ والے، اساں دیس تساڈڑا چھوڑیا ای  
 وقت سخت دوپہر دے جان محمد، جاندیاں جہناں تُوں کہیں نہ موڑیا ای

میں جا رہیا ہاں۔ اللہ تُوں سوچی ہیں۔ جیندے ہو یا سے تاں وت  
 ملسائیں۔“ اوہ روون کڈھ ڈڑھی۔ اوس آکھیا، ”گل سُن۔ میں اوس قوم دی، اوس نسل

دی عورت ہاں، جیہڑیاں خاوند دے مُردے تے مرویندین۔ نال جل ویندین۔ ستی  
ہو جاندین۔ میں جیندا خاوند کیوں چھوڑاں۔

توں ٹر چلیاں ہیں، ہو کے راہ پدھانو  
میں کجھ نہ کھٹیا، بن کے ٹدھے دا جانو  
اج کر یہاں وانگ بھار چوائے نی، اساڈی ہک وی نہیں ساہنو  
نشے وانگ شراب دے، رہیا ہیں من توں لاہنو  
میں تیرے نال۔“ اوس آکھیا، ”بیڑا ٹھل جاوی توں ستریں دی پئی ہوئی  
شہزادی ہوئیوں۔ اگانہہ جنگ ہویا۔ جنگل دے سفر۔ دریا عبور کرنے۔ اگانہہ مُرداراں  
دیاں بوئیں۔ توں نہ آ۔“ اوس آکھیا، ”ہر گل منظور ہے تیری جدائی نہیں۔ میں نال آونا  
ہے۔“ ”چلو۔“ اوس آکھیا۔

ایہہ جی چڑھ پئے ہن لشکر۔ اگانہہ تکیا ہے تاں فوجاں، مدان۔ اوہناں دا  
وی اکھ ہے۔ تمبو ایہناں دے وی لگ گئے۔ صبح دا وقت ہے کرنیل، جرنیل، فوجاں آن  
کے دروازے تے کھلو رہن، تمبو دے تے۔ ”راجیا! حکم دے اسیں حملہ کریے۔“ راجا  
چپ ہے۔ اوہ حیران ہے۔ مینوں پیر بچپن اج آکھیا ہا، بچیا! دُنیا دے مگر دین تباہ نہ  
کریں۔ اتھے ندی لہو دی واہنا ہے انسان دی۔ مگروں پیو دی آکھ ہے۔ اگوں ایہہ باغی  
ہو یا کھلا ہے۔ میں کیہ کراں میریا اللہ۔ کوئی ایسی میرے دل اج گھت میں ایس گناہ  
توں کیوں بچ جاواں۔ بار بار جرنیل پچھدن: جی حکم دینو، ایہہ مراقبے بیٹھا ہے۔ اپنے  
رب نال گلاں پیا کریندا ہے۔ آخر کار ایہدے دل اج ہک گل آگئی ہے۔ ایس  
آکھیا، ”ٹیکسلا دے گورنر توں آکھو رزم گاہ دے وچ آکے میری گل سُنے۔ ہتھیار نہ  
اوہ لائے نہ میں لائیں۔ اتھے آکے گل میری سُنے۔“ اوس آکھیا، ”نہیں، ہتھیار توں  
وی لا کے آ۔ میں وی لا کے آونا ہاں بھئی ہک دوئے توں خطرہ رہے۔ ہو سگدا ہے



میں ہتھیار نہ لائیں تیرے کول خفیہ ہتھیار ہووے یاں میرے کول ہووے۔“ راجے  
 کرنال آکھیا، ”ٹھیک ہے۔“

دوویں راجے ہتھیار لا کے آگئیں، جیہڑا سا جھا میدان ہا۔ جتھے جنگ ہوونا ہا  
 اوتھے۔ ”ہلا دس۔“ اوس آکھیا، ”خدا تُوں منا ہیں۔ ایس تُوں منا ہیں قیامت آونا ہے  
 تے خدا سوال کرنن اساڈے تے۔“ اوس آکھیا ”ہا۔“ ”جیہڑی ایہہ مخلوق آپس اچ  
 لڑن کان آئی بیٹھی ہے، ایہناں دا آپس اچ کوئی جھگڑا ہے۔ اوہناں لڑنا ہے تیرے  
 حکم نال۔ ایہناں لڑنا ہے میرے حکم نال۔ استھے ندی لہو انسان دے دی واہنا ہے۔ کئی  
 بچے یتیم ہو جاسن۔ بہتر اُنجیں ہے کہ جھگڑا تیرا میرا ہے۔ ایہناں دا جھگڑا کوئی نہیں۔  
 توں مینوں لکھ دے۔ میں تینوں لکھ دیواں بھئی جے توں مینوں مار لئیں تاں ہر شے  
 تیری۔ جے میں تینوں مار لئیں تاں ہر شے میری۔ جھگڑا مک جاسی۔ یاں توں مری  
 یاں میں مریناں۔ ایس مخلوق دا تاں قصور کوئی نہیں۔“ اوس آکھیا، ”مینوں تھوڑا جیہا  
 وقفہ دے۔ میں صلاح کر لئیں۔“ اوہ واپس ہٹ گیا۔ جا کے اوس اپنے مددگاراں تُوں  
 بلایا ہے بھئی میں حیران ہو گیا ہاں۔ راجے اشوک دے اُتے اسانوں ہزار شکایت ہا۔  
 ایہہ کوئی ولی اللہ ہے۔ ایہدے نال لڑائی کفر ہے بھئی اپنی موت چائی کھلا ہے ملکہ  
 دے بچاون کان۔ جے تَسیں آکھو تاں میں ہتھیار رکھ دینا ہاں۔“ اوہناں وی آکھیا،  
 ”ٹھیک ہے۔“ گورنر ہتھیار اُتار کے آ گیا ہے۔ اوس آکھیا، ”راجا کرنال! پیو دے  
 پیش کرنا ہئی زندے تُوں تاں قید کر لا۔ جے میرا سر پیش کرنا ہئی تاں سر کٹ لا۔ میں  
 تیرے نال لڑدا ہی نہیں۔ تیرے نال لڑنا کفر ہے۔“ کرنال اٹھیندا لگا آیا ہے۔ اوس  
 ہاں نال چاں لایا۔ اوس آکھیا، ”توں بھائی ہیں میرا۔ چچھلی شاہی اوس کرنی ہے،  
 اشوک۔ ایہہ شاہی میں تینوں دینا ہاں۔ میں تاں شاہی کرنی کائی نہیں۔ میں تاں رب  
 رب کرنی ہے۔ گل ایہہ کر۔ نکا دیونا منظور کر۔ اُنجیں ہار رعایا ہو کے بہو۔ میری بیوی

تے مینوں ہک کٹیا پا کے چاں دے۔ سادہ لباس تے سادہ روٹی۔ ایہہ اسانوں دوویں  
 نائم مل جاوے۔ ایہہ شاہی توں کر۔ کچھلی اوہ کر لیسے۔ بڑا خوش ہو گیا۔ رسائی ہو گئی۔  
 ایہہ ہُن او تھے رہندا ہے۔ ٹیکسلا دا گورنر اتنا عاشق ہا ایس دا کہ سوا ایس دے کول پنج  
 منٹ بیٹھے دے، اوہ تخت نہ لیندا۔ ہر صبح نوں ایہنوں وقت دیونا۔ ایہدیاں گلاں  
 سنیاں۔ بنارس دے وچ خبر آ گئی۔ رسائی ہو گئی ہے۔ کاکا تارنا منظور کر لیا نہیں۔ راجے  
 بڑیاں خوشیاں منائیاں بھئی بغیر لڑائی دے میرے پتر ٹیکسلا فتح کیتا ہے۔ گل پہنچی شکنتلا  
 تے۔ اوہنوں اگ لگ گئی بھئی گھلیا تاں ہا مری جا سی۔ ہُن رات دہنہہ گڑھدی رہے  
 بھئی میں جوں اکھیں آکھیاں ہاں، کڈھاونیاں ہین، اوہ گل پوری نہ ہوئی۔ ہر ویلے اوہ  
 سوچیندی ہائی۔

اوس زمانے مہر تے راجے وسدے ناہن۔ راجا آیا ہے۔ رانی تارٹی رکھی  
 ہے۔ اوس مہر اتار کے قندیل دے وچ رکھی ہے۔ راجے کھانا کھادھا ہے۔ سیں پیا  
 ہے۔ اوہ مٹھیں مٹھیں بھرن لگ پئی ہے۔ پیار کرن لگ پئی۔ جیس ویلے سمجھیا ہے راجا  
 سمرا ویندا ہے۔ اوہ اٹھی ہے مہر چاون کان۔ قندیل کول اپڑی ہے تاں راجے ہائے  
 ہائے کیتی ہے۔ ”کیہ ہئی راجیا؟“ اوس آکھیا، ”خواب بڑا بُرا آیا ہے۔ میں ویہناں ہک  
 بدماش جیہی عورت ہے۔ میرے پتر آل انگل دا اشارہ کیتا ہے۔ اوہ ڈھے گیا ہے۔“  
 اوہ ہسدی ہسدی ڈھڈھ تے لیٹ گئی۔ اوس آکھیا، ”راجیا! ایڈا بہادر جوان ہے تے  
 عورت دے اشارے نال ڈھے گیا ہے۔ ایہہ خواب خیال ہے۔“ تھہک کے سنوایا  
 ہے۔ رانی مڑ اٹھی ہے۔ قندیل کول پہنچی ہے تاں راجے ہائے ہائے کیتی ہے۔ ”کیہ ہئی  
 راجیا!“ اکھے، ”میں ویہناں میرا پتر ہے۔ ہک سیاہ رنگ دا انسان ہے۔ اوہ اوس دیاں  
 دوویں اکھیں پیا کڈھدا ہے تے دھوتن خون دے پئے وہندن۔“ اوس آکھیا، ”راجیا!  
 اج کیہ کھادھا ہئی؟ کھانا ہضم نہیں ہو یا۔ جیہڑے بخار ہین، ایہہ دماغ نوں چڑھ

رہن۔“ اوس آکھیا، ”شیں تان گنیدیاں ای نہیں۔“ تھک کے وت سنوایا سوں۔ اتنے ئوں قندیل دے وچوں مہر کڈھ کے اوس ہک کاغذ اُتے مارلئی ہے۔ راجے حال حال چاں گھتی ہے۔ ”راہیے! پتہ نہیں اج دے خواب کیہ پئے کریندن۔ میں دیہناں نوہہ میری تے پتر ایہہ نگریاں دا گدا کریندے آوندن۔“ اوس آکھیا، ”راجیا! مڑ سچی دساں تان توہیں کوڑی جاونا ہے۔ میں تیریاں پڑپوتریاں جیڈی ہاں۔ نہ دل رہیا۔ نہ دماغ رہیا۔ نہ گردے رہے۔ نہ عمر رہی۔“ اوس آکھیا، ”ایہہ ٹھیک ہے۔ واقعی ایہہ گل سچی ہے۔ شاید ایہہ وجہ ہووے۔“

صبح رانی کاغذ دے اُتے لکھیا ہے۔ گورنر ٹیکسلا! مالے اساڈے گھر دے ہن ایہہ خط پہنچے، کرنال دیاں دوویں اکھیں کڈھ لیں۔ اگر توں ایسا نہ کریسیں، چالھی بندہ ہونسیں پرواردا، میں چالھی ئوں موت سزا کریاں۔ ایہہ راجے اشوک دے ناں تے اوس خط بھیج دتا ہے۔ شتراں تے ڈاکاں چلدیاں ہان۔ ڈاک چلدی چلدی ٹیکسلا دے گورنر تے پہنچ گئی۔ اوس خط پڑھیا۔ اوہ حیران ہو گیا۔ ایڈا نیک ہے تے پیو سکا پیا خط لکھدا ہے۔ اوس آدنا چھڈ دتا کرنال کول۔ اٹھویں دیہاڑے کرنال بندہ گھلیا۔ اوہ آیا۔ آن کے بہہ رہیا ہے۔ ”یار! اٹھ دیہاڑے تینوں گزر گئے ہن تے توں میرے کول نہیں آیا۔“ اوس انج تکیا ہے اکھیں آلوں تے ہنوں شپ شپ کہتی ہے۔ ”کیہ ہئی؟“ اکھے، ”ایہہ کائی مرض ہے اٹھویں دیہاڑے دی جیس توں میں نہیں آسکیا۔ میریاں اکھیں چوں پانی وہندا ہے۔“ کرنال ہس پیا۔ اوس آکھیا، ”جیہڑا سادھو فقیر میرا اُستاد ہا۔ اوس مینوں حکمت وی سکھائی۔ مریض بندہ اُتلی ہوا تے کھلار تے میں تینوں دسیاں، ایہوں ایہہ مرض ہے۔ ایہہ کوئی دل دا درد ہے، جیہڑا ہنچ لیا رہیا ہے۔ ایہہ پانی نہیں۔“ اوس ویلے اوس آکھیا، ”کھلو وٹونہ۔ ایہہ خط تیرے ناں آیا پیا ہے اٹھویں دنہہ دا۔ چالھی بندہ کوپساں میں، تے میں تیریاں اکھیں کیوں کڈھیاں ہن۔ پیو

تیرے ظلم کیتا ہے۔“ کرنال اوہ خط پکڑ کے پیو دا اکھیں تے لایا ہے۔ اوس آکھیا، ”اگانہہ بکواس مت کریں میرے پیو دے حق ارج۔ ایہہ ہزار واری وی اکھ پیدا ہووے، پیو دے حکم تے کیوں نہ کڈھائیں۔ میں اکھیں دوویں کڈھینا ہاں۔“

اوس ویلے اوہ آیا ہے رانی کول۔ اوس آکھیا، ”راہیے! رانی شکنتلا کسے ڈھنگ نال میرے پیو توں ایہہ خط لکھوایا ہے۔ حکم میرے باپ دا ہے۔ جے میں اکھیں نہ کڈھائیں، ایہہ چالھی بندہ مری جاسی تاں میں بک دیاں دو اکھیں گنیاں چنگیاں ہن۔ چالھی بندہ بچدا ہے نالے پیو دا حکم منی جاسی۔ توں بیکیاں تے چلی جا۔ رانی شکنتلا دا مطلب ایہہ ہے بھئی انھا راج تے نہیں بٹھایا جاندا۔ ایہہ قانون ہے ساڈا۔ اوہ اپنی اولاد کان رستہ صاف کر رہی ہے بھئی مینوں کوئی بھلکے ڈھہیوے تاں اوہ راجا بنے۔ توں وگ جا۔ جیس ویلے انھیاں ہو جاونا ہے، راج رہنا نہیں۔ میں گداگر ہو جاونا ہے۔“ رانی روون کڈھ ڈڑھی۔ اوس آکھیا، ”راجیا! تینوں میں اوس دیہاڑے دسیا ہا کہ میں اوس خاندان دی لڑکی ہاں، جیہڑیاں مُردے خاندان دے نال جل کے مردیاں ہن۔ سستی ہو جائدین تے میں جیہدا خاندان چھوڑ جاواں۔ میں کون ہاں۔ میں تینوں مت دینی ہاں پیو دا آکھیا من جوں لوگ جانن کہ پیو ظلم کرے، اولاد کتھوں تائیں سہہ سکدی ہے تے میں وی عورتاں توں مت دیواں کہ متھاج خاندان دی خدمت کیویں کریندی ہے۔ میں تیری انج خدمت کراں جیویں توں راج تے بیٹھا ہوں۔“ ”اچھا۔“ اوس آکھیا۔

اوس ٹیکسلا دے وچ ہوکا دیوایا ہے کہ آؤ لوکو ارج تہانوں تماشیا دکھائیے بھئی پیو دے ایسے حکم دے اُتے اولاد عمل کیویں کریندی ہے۔ مخلوقاں اکھیاں ہو گنیاں۔ فقیری لباس بنا رکھے۔ آکھیا ہے بھئی جیہدا میریاں اکھیں کڈھے، جیہدا شاہی لباس میں پائی کھلا ہاں، ایہہ اوس دا۔ عورت آکھیا، ”جیہدا زیور میرا ہے ایہہ وی اوس دا ہے۔“

میرے خاوند دا آکھیا منو کیوں کہ چالھی بندہ تہ بچدا ہے۔“ ساریاں جلا داں انکار کیتا ہے بھئی ساتھوں تاں ایہہ کم نہیں ہوندا۔ ہک جلا وِج کجھ ول ہا۔ اوس آکھیا، ”میں کڈھداں۔“ عورت اپنی ٹوں کرنال آکھیا ہے، ”جیس ویلے آنہ میرا نکل رہے، ایہہ دوئی گھتیں۔ میرا درد تے خون کھلو رہسی۔“ جیویں ایس آنہ پٹ کے باہر کڈھیا ہے۔ مخلوق روون آلی ہے۔ عورت اٹھی ہے۔ اوس دوئی وگائی ہے درد تے خون کھلو رہیا۔ انج (تھہ دی تلی ول اشارہ) تھہ دے وِج آنہ پکڑ کے، ”آئے (اے) مخلوق اللہ دی جدوں تائیں ایہہ اکھ اپنی جگہ تے ہا، ساری دُنیا وی کوئی ایہدی قیمت آکھے تاں میں کائی ناہی دیونی۔ ہُن ایہہ آنہ نکل گیا ہے۔ میں آکھاں ہک پیسے توں وی لے لوو تاں لیسو؟“ اکھے، ”اساں ایہدی جڑھ کڈھنی ہے۔“ اوس آکھیا، ”ایہا بات ہے۔ جیس دُنیا دے مال دے مگر اپنا ایمان وِج رہے ہو۔ دہنہ قیامت دے ایس آنے دی قیمت دا وی ایہہ نہیں۔ ہاں بھئی دوئی کڈھ۔“ اوس دوئی کڈھی۔

آبدن: اوس زمانے ایس اپنے سادھو کولوں بین سکھیا ہا۔ بین پہلا ساز ہے ایس علاقے دا۔ ایہہ سارے ساز سارنگیاں وغیرہ کچھے بنے ہین۔ ایہہ سارے ساز بین چوں بنائے گئے ہین۔ بین سادھو وگیندا ہا، جیہدے کولوں ایہہ سکھیا۔ بین تھہ وِج ہے۔ مخلوق ہٹ رہی ”رہو۔“ اوس آکھیا، ”نہیں ایس دیس تے میں نہیں رہن لگا۔“ عورت اپنی ٹوں آکھیا، ”لے چل۔ موت دی انتظار ہے، پر نہ اپنے پیکیاں تے جاونا ہئی نہ میریاں تے۔“ ایہہ اوتھوں ٹر پئی۔

روندی تے ٹر چلی تھلاں ٹوں، ویکھن لوک تماشا

بین ایہدے کول ہے۔ جیس شہر وِج آوندا ہے ایہہ بین وچیندا ہے۔ کوئی کپڑا دیندا ہے، کوئی آٹا، کوئی پیسہ۔ واہ انھیا کمال کیتا ہئی۔ رانی اوتھوں بنارس چاں تکیا ہے بھئی میں اپنے سوہرے توں پکھیاں۔ ایہدا قصور کیہ ہائی جیس توں ایہدیاں

آکھیں نکلیاں ہین؟ ایہوں کوئی علم نہیں کہ مینوں کدے لے کے جا رہی ہے۔ کنیں  
جنگلاں دے وچ راتاں آوندین۔ قدم قدم تے موت ہے۔

نازک پیر ملوک سسی دے، شوڈھی کیہ جانے پدھ کر کے  
اگے سچوں لہہ آب نہ پیتا، کدوں ٹری پب دھر کے  
تھل مارو دیاں تتیاں ریتوں، پنچھی چھوڑ گئے سبھ ڈر کے  
آ سسیہ کر ہوت ٹوں گھولے، کیہ لینا ہی تھل وڑ کے  
آہدا ہے اکھے۔

عزرائیل تھلاں دے اندر، لین آیا سسی دی جان ہے  
جان سسی دی لہدی نیہوں، ایس گل تے ملک حیران ہے  
سسی آکھیا ”اوہ جان میری، اگے لے گیا ہی کچ دا خان ہے  
مویاں ٹوں مارن دا، نہیں رب دا کوئی فرمان ہے

منکر تے نکیر سسی توں، وچ قبر دے پچھن آئے  
اوہ لین حساب کتاب قبر دا، سسی رو رو حال سنائے  
وے کون ٹسیں کیہ نام ٹساڈا، دسو کچ ولوں کد آئے  
واہ واہ صدق یقین سسی دا، جیس ہوت نہیں منوں لاہے

جنگلاں دے وچ فاقیاں دیاں راتاں آوندین۔ بینہ برسدن تاں غاراں  
دے وچ رہندن۔ قدم قدم تے موت ہے مگر سنگت خاوند دی نہیں چھوڑی۔ ترائے  
سال ایہناں ٹوں ایس رستے دے وچ لگے۔ ٹاکیاں ٹوں پرٹاکیاں لگیاں ہوئین۔  
تلیاں پیراں دیاں اڈگنیں۔ رنگ اڈگن۔

شام دا وقت ہے ایہہ بنارس ٹوں آ وڑن۔ شہر دے وچ پھرن لگ پئے

اسانوں رات رہائیو۔ رات رہائے کوئی نہ۔ اودوں بارش لہہ پئی۔ اودوں سرد علاقہ ہے۔ سردی بے بہا ہے۔ جتھے راجے دیاں رتھاں کھلوندیاں ہان، اوس مکان دے وچ آوڑن۔ پالے دی ڈک کائی نہیں۔ مینہ دی ڈک ہے۔ ہک سپاہی لگا آیا اوس ہڈھاں مار کے اٹھایا ہے۔ اکھے، ”رات نہیں رہتی۔“ رانی روندی ہے بھئی سُبْحان اللہ۔ واہ خدا دیاں حکمتاں۔

رانجھا جا لگھیا ہے گلی چوچک والی، بچی پیڑ کلیجیوں دھاوندی ہے اوہو جھنگ تے جھنگ دیاں گلیاں نیں، ہکا ہیر نہ نظریں آوندی ہے محل ویکھ کے تے اوہ بابل والے، کیوں جان نہ نکل اج جاوندی ہے بھیں بھیں کے ویکھے چوغٹیا اوئے، اورے نکراں توں ہیر بھجاوندی ہے

اوہو شہر ہے جیہدے وچ میری ڈولی لٹھی ہائی۔ ایہا رعایا ہے جیہڑی سانوں سلام کریندی ہائی۔ اج اوہو شہر ہے سانوں رات رہن کوئی نہیں دیندا۔ کرنال اوس نوں آکھدا ہے۔ ”راہیے! اج تاں ہرگئی ہیں۔ بیڑا ٹھل جاوی خدا دی رحمت توں کدی وی بے اُمید نہیں ہونا چاہیدا۔ خدا کوئی سبب بناونا ہے ساڈا۔“ جیہیں ویلے ہڈھاں مار کے کڈھن لگ پیا تاں کرنال بولیا: کیوں بھایا تیرا بال بچہ کوئی نہیں؟ اوس آکھیا، ”کیوں؟“ اوس آکھیا، ”دیگر دا وقت ہا جدوں اسیں ایس شہر اج آئے ہاں۔ ٹلر اسان منگیا کسے توں نہیں۔ سانوں سر لکاؤن دی جگہ کسے نہیں دتی۔ ایڈے ظالم لوگ ہین۔ سانوں توں کڈھسیں ایس سردی وچ، اسیں مر جساں۔ ایہہ یقین کر ایس نگری نوں اگ نہ لگے تاں انجیں جانیں فقیر کوڑ ماریا ہے۔“ اوس آکھیا، ”فقیر پلو تے نہ دے۔ اگانہہ رُ آ۔ میں تسانوں اچھی جگہ تے بہائیں۔ جتھے نہ مینہ ہوسی، نہ پالا ہوسی۔“ اوہ لگا آیا۔ جتھے جنگی سامان راجے دا پیا ہوندا ہا، اوس دروازہ چاں کھولیا۔ اوس آکھیا، ”ایس وچ وڑ جاؤ تے کسے شے نوں ہتھ نہ لیائے۔“

کرنال لیٹا ہے گودڑی وچھا کے۔ آکھیوس: رائے! وکھ لاکھیں دے محل  
ہن۔ کرڈ ہا بھر کے اوہناں بنائن۔ اللہ پاک ساڈے اُتے کیڈی مہربانی پیا کریندا  
ہے۔ میں تینوں پہلے دیہاڑے آکھیا ہا توں ایہہ بھار نہ چا۔ تیتھوں نہیں چویندا۔ توں  
ہیں ہرگئی۔ کل دے آئے ہاں توں ہیں روون لگی۔ ہُن تائیں روندی پئی ہیں۔ میں  
جے راجے دا پُتر ہاں، دیو بھرے تیرے میرے پھٹن دا وقت ہے۔ میں تینوں گھل  
چھڈنا ہے۔ توں مینوں تنگ کرینی ہیں۔ رانی پیراں تے ڈھے پئی۔ ”خدا دا ناں ہی  
ایہہ قسم نہ چا۔ میں تینوں سچی گل دسینی ہاں، جیس توں میں روئی ہاں۔“ اکھے، ”دس۔“  
اوس آکھیا، ”کل دا میرا دل ہا میں بین سناں۔ میں کیہڑی ماں دی جی ہوئی ہاں کرنال  
راجے تے حکم کراں۔“ کرنال آکھیا، ”جا رائے! مینوں توہیں بڑا درد دیوایا ہے بھئی  
میں چنگی آئے دی دے مگر بالاں توں سُنیدا ودا ہوندا ہاں تے بھیرے توہیں میرے  
مگر پیکے وسار چھڈے۔ راج وسار چھڈیا۔ گداگر بنوں۔ میں تینوں بین کیوں ناہی  
سُنادنی۔ آ تینوں میں اوہ بین سُنائیں، جیہڑی اج تائیں میں تینوں سنائی ای کدی  
نہیں۔“ کرنال اُٹھی بیٹھا ہے۔ بین اوس مونہہ نال چاں لائی۔ اوہ الکھ جگاؤن لگ پیا  
ہے۔ رانی توں بھی درد آون لگ پیا ہے۔ ایہہ بین دا آواز روشندانناں دے وچوں  
ٹپ کے شاہی محل دے وچ پہنچ گیا۔

راجا سُنا ہویا ہے۔ اوہ جاگ گیا ایس بین دے آواز اُتے۔ اوس آکھیا،  
”جاگو نا ساریاں گل گولیاں، بانڈیاں، رانیاں، شکنتلا۔“ اُٹھا بہا یوس۔ ”ساریاں جاگو  
کوئی میرے پُتر آر بین و جا رہیا ہے یاں پُتر ہے میرا یاں اوس دا کوئی اُستاد بھائی  
ہے۔ سگویں اوسے آر و جا رہیا ہے۔“ ساریاں اُٹھ پیٹھین۔ راجا روون لگ پیا ہے۔  
راجے آکھیا، ”اج ترائے سال گذر گئے میرے آل تاں بھیرے خط ای نہ لکھیا۔“  
شکنتلا آکھیا، ”جنگل وچ پلایا ہے۔ جنگل وچ رہیا ہے۔ اوہنوں ساک سین دے نال



کیہ؟“ اکھے، ”رائے! ہمیشاں توں بُرا بولینی ہیں۔ دراصل اوہدا لگاؤ خدا نال ہے، جیہناں دا اودے لگاؤ ہو جاوے، اوہ دُنیا داراں تُوں ایڈا کوئی نہیں چنگیاں جاندے تے ایس جیہتاں اساڈی پوری وڑھی وچ کوئی نہیں۔“ اتنے تُوں راجے بلایا ہے ”دربان کھلا ہیں؟“ اکھے، ”جی کھلا ہاں۔“ اکھے، ”جاویں نا ایس بین آ لے تُوں اتھے لے آ۔ ایہدی بین سُنپے۔“ اوہ گیا ہے۔ اوس آ کھیا، ”او بین وجاوں آلیا۔“ اوہ ڈر گئے ہن۔ اسانوں پالا ہے۔ مئے کڈھدا ہے۔ اکھے، ”جی۔“ اکھے، ”بھئی میرا مہاراجا تہانوں یاد فرما رہیا ہے۔ چلیں نا اوتھے چل کے بین سُنا۔“

کرناں اٹھیا ہے تے ہسیا ہے۔ اوس آ کھیا، ”وکیہ لے رائے قدرت خدا تعالیٰ دی اسانوں بھگوان کائی شے لے دیواؤ ہے۔“ رانی بھی رُنی ہے بھئی ساک بن کے جا رہیا ہے پیو آل۔ میں تاں ایس تُوں دسیا ہو یا کوئی نہیں۔ ایہہ آ گئے۔ تکیا ہے رانی راٹھور تاں پلنگ اُتے، سیج اُتے بیٹھی ہے شکتلا۔ کئیں نوکریں اُتے دھاوندیاں کھلین راجے دے اُتے کئیں۔ ایہہ جئیں ویلے لگھ آیا ہے تاں شمع دان جاگ رہے ہان۔ راجے آ کھیا، ”او ہونمانیا! توں تاں اٹھا ہائیں۔“ اکھے، ”جی آ۔“ ”اچھا بھئی بین سُنا۔ میں تینوں انعام بڑے کریساں۔“ ایہہ دروازے اچ بہہ رہیا ہے جیویں منگت بہندن۔ دوویں پیر جوڑ کے ایس بین مونہہ نال لائی ہے۔ رانی راٹھور گنڈا نپ کے کھلی ہے۔ اوتھے بھی اوہنوں درد ہے بھئی میرے نالوں تاں ایہہ گولیاں چنگیاں ہن، جیہڑیاں گُریاں تے پیٹھیاں ہن۔ ایس بین شروع کیتی۔ جیویں جیویں النکھ جگیندا ہے، راجا روندا ہے۔ راجا شکتلا آل مونہہ کر کے روندا ہے۔ ”تمام اوسے آر بند اٹھا رہیا ہے۔ سُن لے۔“ راجے آ کھیا، ”بھئی بک واری بین بند کر۔ گلاں کرے۔ توہن بہوں رووایا ہے۔“ اوس بین بند کیتی۔ اکھے، ”جوگی ہیں؟“ اکھے، ”جی نہیں۔“ ”سناسی ہیں؟“ اکھے، ”جی نہیں۔“ ”اُداسی ہیں؟“ ”نہیں۔“ ”پیراگی فقیر ہیں؟“ اوس آ کھیا،

”سچ پچھو تاں میں فقیر ہاں نہیں۔“ ”کون ہیں توں؟“ اوس آکھیا، ”میں وی ہک راجے دا پتر ہاں۔“ ساریاں ہسن کڈھ ڈڑھیاں۔ اکھے، ”مونہہ وی راجیاں آر ہے۔“ راجا وی پسا۔ کرنال جوش اچ آ گیا۔ اوس آکھیا، ”راجیا! ہس پیا ہیں۔ میں آکھیا ہے راجے دا پتر ہاں ایس واسطے۔ خدا دی قسم میں ایڈے راجے دا پتر ہاں، توہیں جیہے اوہدے اگے ٹکا تاریندے ہوئے۔“ تاں راجا بہوں ہسیا۔ ”میں جیہے اوہدے اگے ٹکا تاریندن۔ کیہ ہے اوس راجے دا ناں؟“ اوس آکھیا، ”جی اوس ٹوں دُنیا جاندی ہے۔ اوس ٹوں اشوک اعظم سدیندن۔ بنارس دا والی ہے۔“ راجے آکھیا ”کیہ پیا آہنا ہیں۔ بیٹھا بنارس دے وچ ہونیوں۔ میں اشوک ہو یوم۔“ اوس، ویلے رانی انج ٹری ہے راجے آل۔ راٹھور رانی آکھیا:

مگر جانے کا ظالم نے نرالا ڈھنگ نکالا ہے

ہمیشہ پوچھتے ہیں تجھ کو کس نے مار ڈالا ہے

او راجیا! میں نونہہ ہاں تیری راٹھور۔ ایہہ پتر ہے تیرا کرنال۔ ایہہ خط ہے تیرا۔ ایہدے اُتے ایہدیاں اکھیں کڈھائیاں گئیاں ہن۔ مینوں ترائے سال ایس سفر اچ گزر گئے ہن۔ پن پن کے، گدا کر کے اسیں لگے آوندے ہاں تے ہن توں پچھنا ہیں کہ توں کون ہیں۔“ راجے انجیں سمجھیا ہے کہ میرے سر اچ بمب پھٹ گیا ہے۔ راجا اپنی مسہری توں چنویا ہے تے زمین تے آلتھا ہے۔ راجے اشوک دی برک نکلی ہے۔ سارے محل وچ کہرام مچ گیا ہے۔

راجے حکم دتا ہے بگل بجائیو۔ ایسے وقت ہر کوئی آوے۔ دربار لگ گیا ہے۔ ایہناں دوہاں دی بانہہ نپ کے راجا آ گیا دربار دے وچ۔ اوس آکھیا، ”او وزیر، صدی، ڈھیر سارے بیٹھے ہو۔ دسو ایہہ کون ہن؟“ اوہناں چوں کنھاں آکھیا، ”پتہ نہیں جی کل پندے ڈٹھے ہن۔ اسانوں تاں کوئی پتہ نہیں۔“ اوس آکھیا، ”ایہہ پتر ہے

میرا۔ ایہہ نونہہ ہے میری۔ ایہہ خط ہے میرا۔ ایہدیاں دوویریں اکھیں کاہیں کڈھوایاں  
ہین؟“ مخلوق روون کڈھ ڈڑھی ہے۔ اوہناں آکھیا، ”راجیا! اسانوں تاں کوئی علم نہیں۔“  
اوس آکھیا، ”نہیں مینوں علم لگدا ہے۔ وزیر؟“ اکھے، ”جی۔“ ”اوہ ترائے خواب مینوں  
آئے ہاں۔ یاد ہئی۔“ اکھے، ”جی آ۔“ ”میں آکھیا ہا بھی ایہہ خواب نامے جاندا ہے۔  
کرناں آل لکھو بھی مینوں خواب انج آیا ہے۔ اگوں وزیرا توہیں مینوں ہوڑیا  
ہے۔ خواب اوسے دے بارے ہین تے بھیڑے خواب ہین۔ اوس ویلے خواب نامے  
وچ میں ایہہ درج کروائے ہین۔ تاریخ ویکھو۔ اوس دیہاڑے دے خواب دی گل تے  
ابس خط دی تاریخ رل جاوے تاں میری چورھٹنلا ہے۔ کیوں کہ میں جاگدا ہام، ایہہ  
قتدیل کول کھلوتی ہوندی ہائی۔ مہر قندیل دے وچ ہا۔“ ملائی تاں تاریخ مل گئی۔

اوس ویلے راجے حکم دتا ہے ھٹنلا ٹوں ملرم بنا کے میرے پیش کرو۔ پھدھی  
آئی۔ راجے آکھیا، ”لے گل دس۔“ اوس گل اول کولوں لے کے اخیر تائیں دسی۔ میں  
عاشق ہو گنیم۔ ایہہ غلطی میں کر بیٹھی ہاں۔ میں مانی منگنی ہاں۔ راجے آکھیا، ”میں تینوں  
اوہ سزا کریساں، جیہڑی دُنیا کن نیسی۔ توہیں میری لگ کر چھڈی ہے۔“ اوس ویلے  
کرناں اٹھیا ہے۔ اوس آکھیا، ”حکم ہوندا ہے ماں دایاں پیو دا۔ ایہہ ماں ہے میری۔  
میں اللہ واسطے ماف کرینا ہاں۔ چلو تیرے حکم نال نہ کڈھائیاں ماں دے حکم نال کڈھا  
چھڈیاں۔ ہتھ نال توہیں وی نہیں کڈھیاں اوس وی نہیں کڈھیاں۔ حکم گیا مینوں اوہ مننا  
پیا بھی چالھی بندہ بچدا تاں ہے، جے میں اپنیاں اکھیں کڈھائیں تاں۔ چالھی بچا کے  
میں اپنیاں اکھیں کڈھائیں تے میں اللہ واسطے مانی منگنا ہاں بھی تیرا حکم نہ سہی، میری  
ماں دا سہی۔ ہُن ایہہ فرق پیندا ہے۔ میں مُر ماں تاں نہ سمجھی۔

جیہڑے ہوندی طاقت نلدے

نالے خیر فقیراں چلدے

اوہناں کارن باغ محل دے

باقی رب ستار ہے

راجیا! ماف کرن آلے ئوں رب بہوں چاہندا ہے۔“

اوس ویلے شکنتلا اٹھی ہے۔ اوہ پیراں تے ڈھے پئی ہے۔ اوس آکھیا،  
”توں گئی اُتے رحم کر رہیا ہیں۔ ہک سُورنی اُتے رحم کر رہیا ہیں۔ خدا تیرا بھلا  
کرے۔“ راجے آکھیا، ”بھادویں قانون نہیں نا اٹھے راجے ئوں تخت دیونا، توں تخت دا  
وارث بن۔“ اوس آکھیا، ”میں ہکو ساتھ کیتا ہے دُنیا دارنال۔ ایہہ حالت ہوگئی ہے۔  
جے تہاڈے آل آیا ہاں تے ایس حالت ئوں پہنچ گیا ہاں۔“ دُعائیں دیندا اوہ چلا گیا۔  
جیس ویلے او تھے گیا ہے تاں رانی تے راجا دوویں گئے ہین بھئی اوتر پے ویندے  
ہاں۔ ساڈے حق اِچ دُعا کر۔ اوس ویلے دُعا واسطے ہتھ اُٹھائے ہین۔ میریا اللہ! جے  
کدی ایہہ عمل منظور ہے تاں میری ماں دی گود ہری کر دے۔ اوہنوں مُڑ پُتر ڈھیہا۔  
ایہہ مُڑ ڈھیہر تائیں بادشاہ لگے آئَن۔

## ملاں دو پیازہ

ملاں دو پیازہ نجد دا آدمی ہے۔ ایہدا ناں محمد عمر ہے۔ جیس ویلے شیر شاہ سُوری چکیا ہے نا ہمایون، پتر بابر دے نوں تے طہاسپ بادشاہ کول ایران جا پناہ لئی ہے۔ ملاں دو پیازہ دی ماں مرگئی مترئی ماں ہاس۔ اوہ بڑے ظلم کریندی ہا ایس نال۔ ایہہ ایس ماں توں بڑا تنگ ہا۔ پیو ایس دا ڈردا ہا مترئی ایہدی ماں توں۔ یمن دی ہک عورت نجد دے وچ پندی ودی ہے۔ گروی بڑی ٹھکی ہوئی ہے۔ ایس نوں ماں نال ویر ہا بھئی ہمیشاں پیو کولوں مریندی ہے۔ جھڑکیندی ہے۔ ٹکر نہیں دیندی بھئی ایس توں ویرتاں لئیں ہا۔ اوس یمن دی عورت نوں آکھیوس، ”پندی کیوں ودی ہیں؟ اوہراں ٹر آ۔“ مترئی پیکیاں دے گھر ہاس گئی ہوئی۔ اوس نوں لئی آیا۔ اوس نوں آکھیوس، ”ایہہ غُسل خانہ ہئی تے تھاویں نا۔“ مترئی دے کپڑے اندروں لئی آیا ”ایہہ پاویں نا۔“ گہنے وی چاں پائیوس۔ ”اتھہ ٹکر پکا اساڈے۔ آرام کرتوں۔“ اوہ پکاون کڈھ ڈڑھی۔ ایہہ بھج وگیا مترئی نوں جا کے گل چاں لائیوس تے روون کڈھ ڈڑھا۔ ”میرا پتر کیہ ہئی؟“ اکھے، ”قہر گھتیا ہے میرے پیو سوانی کائی پر نالے آندی ہے۔ سارے گہنے تے زیور تیرے پوا چھوڑے بیس۔“ اوہ چھٹا کو جیہی تے کوڑیل ڈاڈھی۔ اوہ بھج وگی۔ اوہ آن کے اوہدے ہتھیں پے گئی تے مارن کڈھ ڈڑھی۔ ملاں آکھیا، ”توں کیوں بیٹھی

ہیں؟ تیتھوں ہمتال ہے توں وی ماروس۔“ اوس آکھیا، ”مینوں ہے اُتوں نہ کوئی آ جاوے۔“ اوس آکھیا، ”ماں ہے سوئی کسے دی؟“ اوس پھدھ کے چاں ڈھائی۔ چھٹا کونوں پچ پچ کے ..... - ایہہ دروازے دے اُتے بہہ رہیا۔ جیہڑا بھج کے آوے آکھے، ”او بھائی! اساڈی گھر دی گل ہے کسے دا حق نہیں۔“ وڈھ وڈھ کے اوس چھوڑ دتی۔ اوتھوں ایہہ نس پیا تے اللہ تیری یاری۔ ایہہ ایران آنکلیا ہے۔

جیس ویلے ایران آیا ہے تاں ہمایون وچ مسجد ایران دی وچ بیٹھا ہے۔ ایہہ وی مسجد ال آیا ہے۔ ہمایون اوس نوں اپنے کول بلا لیا۔ جیس ویلے طہماسپ بادشاہ ایہناں دی امداد کیتی تے دلی اُتے حملہ ہویا، مُلاں دلی آ گیا۔ مُراکبر بادشاہ تخت تے بہہ گیا۔ چھ ماہ کر کے ہمایون تاں فوت ہو گیا۔ زمانہ اکبر دا آ گیا۔ ایہہ مُلاں نورتن وچ داخل ہے۔ ناواں رتن ایہہ ہے۔ اوس زمانے مغلاں آل ہک چٹنی بندی ہائی جیس نوں دو پیازہ سدیندے ہائِن یعنی دو وصلان آلی۔ جیویں اسیں آہنے ہاں مرچ چاں بناو وچ ہزار شے ہور ہوندی ہے۔ اوہنوں دو پیازہ سدیندے ہائِن۔ مُلاں اوس چٹنی نوں بہوں پسند کریندا ہا۔ ہر دعوت وچ آہدا ہا دو پیازہ لیاؤ۔ جیس توں اکبر ایہدا ناں مُلاں دو پیازہ رکھ چھوڑیا۔ ناں ایہدا محمد عمر ہے۔

بیربل تے مُلاں دی نگر رہندی ہا کیوں کہ بیربل برہمن قوم ہویا ہے۔ اوہ چاہندا ہا ہندو عروج پکڑے۔ ایہہ چاہندا ہا شاہی مسلمان دی ہے ہندو کیوں عروج پکڑے۔ ایس وجہ توں ایہناں دی آپس وچ نگر رہندی ہا۔ بادشاہ اکبر جیہڑا ہے ایس نوں لے کے بیربل باغ وچ پھر دا ودا ہے۔ بیربل مصور بڑا ہویا ہے۔ بیربل اگے وچ باغ دے دو تصویراں بنا گیا ہا۔ ہک مسلمان ہے اوہدا لہندے مُونہہ ہے تے وَٹ پکیندا کھلا ہے تے اودوں نگر کھاوندا پیا ہے۔ اوہنوں ساہنے ہندو کھلاریا ہے۔ ہندو دے گل مالا ہے تے اوہ ہتھ جوڑ کے گنگا آل مُونہہ کر کے تپسیا کر رہیا ہے۔ اکبر اُتوں آیا ہے۔

اودھوں آکھیا پيس، ”دیکھو جی! اپنا مذہب وی تے اساڈا مذہب وی۔ اوہ پرستش کر رہیا ہے تے جدے سجدہ کریندن اودا نئیں مونہہ کر کے وٹ پکا رہیا ہے تے اودوں ٹکر کھاوندیا پیا ہے۔“ اوتوں مٹلاں شپ کیتی۔ ”بادشاہ سلامت حیران ہوئے کھلے ہو۔“ اوس آکھیا، ”یار! ایہہ تماشا ویکھیا ہے۔“ ”نہیں، تساں سمجھیا نہیں۔ ایس تہانوں سمجھن نہیں دتا۔ ایہہ لدھی جیہی قوم ہے، جٹ ٹکر کھاوندیا کھلا ہے۔ ایہہ ہتھ جوڑ کے ٹکر منگدا پیا ہے۔ اوہ پیا آہدا ہے ایہہ لے لا۔“ بادشاہ ہسدا ہسدا کدائیں گیا۔ اوس آکھیا، ”بالکل ٹھیک ہے۔“ انج ہو کے ایہناں دی ٹکر رہندی با۔

بادشاہ دے ایہہ نورتن ہن۔ گنگا دی سیر کرن گنن۔ دریا گنگا دا پانی مٹھا ہے۔ صاف ہے، شفا یاب ہے۔ اتنیاں صفتاں دا مالک ہے اوہ پانی۔ ہندو دا مذہب ہے بھئی بہشت توں آیا ہے ایہہ دریا۔ جیس توں اوہ تپیا کریندن۔ گنگا دریا دے کنارے کنارے ایہہ ٹردے آوندن۔ گنگا چنگی طاقت دے وچ کھلا ہے۔ پچن بک بوٹی ہے جیہدے پھل گنگا دے اُتے تر رہن۔ اوتوں سورج چمک رہیا ہے۔ بادشاہ ایہہ تماشا ویکھدا آوندیا ہے تاں جوں دو جٹ بھرا ہن۔ پار اوہناں ٹھلنا ہے۔ اوہناں بادشاہ دا سلام کیتا ہے۔ بادشاہ آکھیا ہے، ”ٹھل کے جاؤ ہو۔“ اکھے، ”جی۔“ اکھے، ”گنگا طاقت اچ کھلا ہے۔ ایہوں دھرک مارو میں تہاڈے ٹھلن دا تماشا ویکھنا ہے۔“ دوواں بھراواں دھرک چاں ماریا ہے۔ آدھی پادھی گنن تاں نکرے لکریا ہے وڈے نوں ”مینوں کپر پھلکیندا ہے۔“ اوس آکھیا، ”ترکڑا ہو۔“ اوس آکھیا، ”میں بولیا اوس ویلے ہاں جدوں میں کمزور ہو گیا ہاں۔“ جتھے پیا ویندا با اوہ ہٹ آیا ہے تے بھرا نوں اوس کندھیاں تے سٹیا ہے تے ٹھلن لگ پیا ہے۔ بیرل تے بھرا کوئی نہ۔ بیرل دیاں ہنجوں ٹپیاں ہن۔ ”ویکھنا بادشاہ سلامت۔“

واہ گنگا کا پانی واہ پچن کے پات

واہ سورج کیاں لاٹاں، واہ بھائیوں کا ساتھ

بادشاہ دیاں وی ہنہوں ٹپیاں ہین۔ ”بہت خوب۔“ مٹلاں سڑ گیا۔ دُشمن بھاویں چنگی وی کرے۔ اوس آکھیا، ”سبحان اللہ! جتھے اکبر بادشاہ تے بیربل رن اوتھے سچ نمانا کنڈ کر کے لگھ ویندا ہے۔“ بادشاہ آکھیا، ”اوہ کیوں؟“ اکھے، ”ایس بیربل نوں گوڑ مارن دی عادت ہے۔ بادشاہ دستخط چاں کرے تاں گوڑ نوں گوڑ کاہیں آکھنا ہے۔ ہر کہیں واہ واہ چاں کرنی ہوئی۔“ بادشاہ آکھیا، ”ایس گوڑ ماریا ہے؟“ اکھے، ”ہک نہیں چار مارن۔“ ”اوہ کیوں؟“ اکھے، ”ایہہ آہدا ہے، واہ گنگا کا پانی، چھیاں تے کھلیاں ہویاں ترہنہہ لگے تاں گنگا تلاش کریندیاں تاہیں بندہ مرنہ جاوے۔ پانی واہ جیہڑا بغل وچ ہے۔ واہ پٹن کے پات۔ ایس نمک حرام توں چچھ توں وواڑھ دے پتر دی تعریف کرنی ہاس۔ جھنے توں مرنے تاہیں کفن وی اوسے دا بندا ہے۔ نگیج کھیندا ہے۔ پالے توں بچیندا ہے۔ گرمی توں بچیندا ہے۔ عبادت دے کم آوندہ ہے۔ پٹن کیہ صرف بل چھوڑ بندہ ہے۔ وواڑھ دی تعریف نہسوں کیتی۔ ترپئے نمبر تے ایہہ آہدا ہے، واہ سورج کیاں لاٹاں۔ انھے نوں ٹھٹھ دا پتہ ہے اُبھریا ہے یاں لہہ گیا ہے۔ لاٹ اکھ دی ہے جیہڑی رات نوں وی کم کریندی ہے۔ چوتھے نمبر تے آہدا ہے، واہ بھائیوں کا ساتھ۔ شادی کریندن تاں وکھرے کیوں ہو جاندن تاں معلوم ہوندا ہے ماں پیو چھڈاون آلی عورت ہے۔ عورت جیڈا ساتھ کوئی نہیں۔ بھراواں بھائیاں سبھ نوں چھڈوا دیندا ہے۔ ایس آکھنا ہا:

واہ بغل کا جل واہ کپاس کے پات

واہ نیناں کیاں لاٹاں واہ مہری کا ساتھ

ساک تاں عورت دا ہے۔“ بادشاہ ایہنوں انعام دتا ہے۔ بیربل نوں سڑن



رات نوں اکبر بادشاہ سُنا ہے۔ سُتیاں بادشاہ نوں خواب آیا ہے بھئی ہک تھالی ہے۔ اوس دے اُتے سر پوش ہے۔ وچ اوس دے رینڈی ہے۔ رینڈی سچے چکر تے بھیں رہی ہے۔ ہک پاسیوں بادشاہ وبہدا ہے تاں ڈلیاں لہندیاں جاندین۔ دُوئے پاسوں وبہدا ہے تاں ثابت۔ حیران ہے بھئی ایہہ کیہ؟ ہے پھر دی پئی۔ ایدوں ثابت ایدوں ڈلیاں۔ فجر بادشاہ وزیراں نوں بُلایا۔ ایس خواب دی تعبیر۔ بیرل آکھیا ہے، ”خواہاں دیاں تعبیراں دیونیاں اہل قرآن دا کم ہے۔ قرآن روحانی کتاب ہے۔ اودے وچوں روحانی چیزاں لہندین۔ ایہہ کسے عالم توں چُکھوں۔“ ریڈھ ہاس بھئی مُلاں توں چُکھن۔ بادشاہ مُلاں نوں بُلایا ہے۔ ”ایہہ خواب دی تعبیر دس۔“ اوس آکھیا، ”جی سال دا عرصہ دیو میں پتہ کر آونا ہاں۔“ سال دا عرصہ لے کے اوہ گھر آ گیا ہے۔ عورت اپنی نوں آکھیا پئس، ”ایہہ ہر شے تے امر اللہ داتے میں سفر تے جا رہیاں۔ سال دا عرصہ تے ایہہ خواب ہے۔“

مُلاں رُ پیا۔ چلدا ویندا ہے تاں بندے کسے نوں آکھیا پئس، ”اُڑیہ دا مینوں راہ دسو۔“ مگروں ہک بندہ بولیا ہے۔ ”میں اُڑیہ دا وسنا ہاں۔ آمڑ رل کے سنگ کریے۔ میں دی اودائیں پیا جاندا ہاں۔“ چُکھیا ہے بھئی توں کون ہیں؟ اکھے، ”میں صیقلی گر ہاں۔ اُڑیہ دے راجے دیاں توپاں ڈھالنیاں تے صیقنل کرنیاں۔“ ”توں۔“ اکھے، ”میں درویش ہاں۔“ رُ پئے۔ راہ دے وچ ہک جھونپڑا ہے۔ اوس جھونپڑے دے وچ ہک بڈھا بیٹھا ہے۔ تھوڑی جیہی واڑی ہے۔ جیہدا راکھا اوہ بیٹھا ہے۔ اودے کول آن کے پانی پیتا نیں۔ مُلاں چُکھیا ہے ”بابا! دور ہیں کہ نیڑے؟“ اکھے، ”بچیا! نیڑے ہاں۔“ ”دونہہ تے ہیں کہ تہنہیں تے؟“ اکھے، ”تہنہیں تے۔“ ”واہی چُکھیز دی ہانیا اگیز دی ہانیا؟“ اکھے، ”چُکھیز دی۔“ اکھے، ”اللہ چنگی کریسی۔“

صیقلی گر آکھیا، ”بابا! تساں تاں گل کر لئی تے میں بدھو بن کے بیٹھا ہاں۔ کیہ ایس آکھیا ہے؟“ اکھے، ”بندہ کوئی دانا معلوم ہوندا ہے۔ میتھوں پچھدا ہے نظر دور پوندی ہا یاں نیڑے۔ رنگاں نوں سہارا تریئے سوٹے دا دینا ہیں یاں رنگاں نال ٹرسکنا ہیں۔ اولاد جوانی دی ہئی یاں پچھیرے آ کے ڈھبھی ہئی۔“ اوس آکھیا، ”بھت خوب۔“ صیقلی گر یقین کیتا کہ بندہ کوئی دانا ہے۔ ٹرے پے۔

اگانہہ آئن تاں ہک جٹ بی وگیندا ودا ہے۔ مٹاں آکھیا ہے، ”السلام علیکم۔“ ”وعلیکم۔“ ”بی کھاہدا ہو یا ہئی کہ کھانا ہئی؟“ صیقلی گر آکھیا، ”کھاہدا ہو یا کیوں وگانا ہاس، کھاہدا ہو یا کدی جمیا ہے۔“ جٹ آکھیا، ”نہیں تو ہیں گل نہیں سمجھی۔ ایہدا مطلب ہے جے قرضے دا بی ہئی تاں اگے کھا چکا ہیں۔ جے گھر دا ہئی تاں کھانا ہئی۔“ تاں صیقلی گر سر ماریا۔ ”بہت اچھا۔“ ٹرے پے۔ جیس ویلے شہر اڑیہ دا آ گیا ہے۔ مٹاں پچھیا ہے، ”کوئی فرزند ہئی؟“ اکھے، ”ہٹ مر گیا ہو یا ہے۔ پتر ہے کوئی نہ۔ ہک لڑکی ہے نوجوان کنواری۔“ مٹاں آکھیا ہے، ”گھر جاویں تاں دستک کر کے وڑیں۔ اطلاع دے کے جاویں۔“ صیقلی گر آکھیا، ”توہیں میری دھی نوں بد چلن سمجھیا ہے تیری بھین نوں۔“ اوس کڈھ کے اٹ ماری۔ سپ تے طالب علم ایہناں وس نال سٹ کدی نہیں جھلی۔ اُستاداں دیاں سٹاں چکا ون دی ایہناں دی ورزش ہوندی ہے۔ اوس اٹ ماری۔ ایہہ جھک گیا۔ اٹ اگانہہ لگی گئی۔ ایہہ مل گیا۔

اوسے طیش وچ صیقلی گر گھر لگا آیا۔ اوس لت ماری۔ بُوہا کھل گیا تاں دھی گُرائی کیہڑا ہیں میں تنگی نھا رہی ہاں۔ ایس بُوہا بند چاں کیتا بڑا شرمندہ ہو یا۔ اوس کپڑے کیتے لگھ آیا۔ ”ابا جی! اج مونہہ تہاڈا بھیرا ہے۔“

نہ لگے مت دلال دی مُس گئے انجان

اوس آکھیا، ”بچیا! راہ دے وچ انج انج گلاں ہوئیں۔ میں اٹ ماری ہے

شکر ہے لگ نہیں گئی۔ راہ دے وچ اوس بڑیاں سونہیاں گلاں کیتین تے ہُن میں شرمندہ ہويا بیٹھا ہاں۔ ایس آلی تاں حد مُکا دتی سوں۔“ اوس آکھیا، ”بابا! معلوم ہوندا ہے بندہ سیانا ہے۔ جا اوس توں مانی منگ تے نالے روٹی آکھ۔ میں پکینی آں۔ توں اوہنوں لے آ۔“ اگانہہ آیا تاں ہک مسیت وچ صلواتاں منڈی کھلا۔ درویش جوں ہا۔ جھاکا اگے لتھے ہويا ہاس۔ ”کیہ مائی باوا کائی روٹی۔“

چار دیہاڑے دُنیا دے اوڑک ہر کوئی مردا  
 بھل ولسن گلزار چن جد ڈٹھا مُونہہ قبر دا  
 بے پرواہ تے غالب حاکم جیس دا ہیں بردا  
 توں سمجھ اِلہ دے مسئلے نوں پہلا سبق فقر دا  
 نیکیاں طرف دھیان کریں بدکار کدی نہیں تردا  
 حرام حلال دا فرق کریں سخت حکم پرور دا  
 نال مومن دے رنج آوی پیویں جام صبر دا

صیقلی گر آکے پیر چاں پنے۔ ”مانی دے مسلمان بھائی ہاں۔“ اوس آکھیا، ”یار! پردیسی توں کیہڑیاں مافیاں منگنیاں ہوئیاں۔ بھلا ہووی ایہہ وی تیری نیکی ہے۔ نہیں تاں میں تیرا کیہ ونجا سگدا ہام۔ پر ہک ہُن کریں۔ مینوں ہُن نہ لے جا۔ روٹی ہُن دی دیوا گھلیائے۔ صبح مینوں لے جاویں۔“ نوکر دے ہتھیں صیقلی گر دی لڑکی روٹیاں بنا دیتاں۔ چودھاں پھلکے اوس دتے۔ ڈوٹکا گوشت دا بھر کے دتا تے ایہہ اوس نوں آکھنا، ”چنوں چودھویں تارے بے شمارے دریا کن کنارے۔ ایہہ آکھ بجھارت بُجھ۔“ نوکر خیال کیتا بھئی ہک بندہ ہے۔ چودھاں پھلکیاں دی اوس جڑھ کڈھنی ہے۔ انجیں جُٹھا ویسی۔ ہر شے ونجا ویسی۔ اوس ست پھلکے رکھ لئیے۔ ادھا گوشت پلٹ لیا۔ لے آئی۔ اوہنوں دتا۔ اکھے، ”گھر دی سائن آہدی ہے چنوں چودھویں تارے بے شمار

دریا کن کنارے۔“ مٹاں آ کھیا“ اوہنوں آ کھیں، چنوں ستویں تارا کوئی کوئی تے دریا ترپ ہے۔“ اوہ بھجدی آئی تے اوس آ کھیا“ اوہ پیا آہدا ہے، چنوں ستویں تارا کوئی کوئی تے دریا ترپ ہے۔“ اوس پھدھ کے چاں ڈھاہی تے اوس چکھیا“ توہیں لیا وچوں کتنا ہے؟“ اوس من دتا وچوں ادھ لیا ہے۔ اوس آ کھیا“ ابا جی! اساڈے ملک دا رواج ہے لڑکی ڈٹھا ور لے سکدی ہے۔“ اکھے“ میں ڈٹھا تاں کوئی نہیں۔ نہ پتہ ہے عمر کتنی ہے۔ نہ پتہ ہے کوڑھا ہے سوہنا ہے۔ کالا ہے گورا ہے۔ امیر ہے غریب ہے۔ اوس دے علم دی خوشبو آئی ہے۔ علم آلی لڑکی جاہل دے نال عمر نہیں پٹا سکدی۔ میری شادی کرنی ہا تاں ایہدے نال کر۔ ایہدے نال نہ کریں تاں میری شادی دامڑ ناں نہ لئیں۔ میں تیریاں کدھاں نال لگ کے مرجاساں۔“ اوس ویلے آندا سوں۔ جییں ویلے ڈٹھا ہے عورت۔

مرگئی بن ماریوں جان جہان گواہ ہے

صیقلی گر آ کھیا، ”ایہہ لڑکی ہے میری جے توں رضا وند ہو جاویں تاں میں تینوں نکاح کر دینا ہاں۔“ ایہہ نمانے اگے حوراں کان مردے ودے ہوندن۔ اوہ ڈھڈھ ہو گیا۔ اوہناں دی شادی ہوگئی۔ اوس نوں چچھلی گل ساری وِسِرگئی، جیہڑے ویلے عورت دی محفل وچ آیا۔

وِسِرگئے مسکین نمانے بیٹھا عدل کماوے

یاد وی کائی شے نہ۔ خواب وی یاد کوئی نہ۔ دیہاڑیاں دے بعد آ کھیا، ”میری عورت میرے نال گھل۔“ اوس آ کھیا، ”لے جا۔“ ایہہ لے کے گھر آ وڑیا۔ جوں سوانی تکیا ایہہ چھوہر جیہی ولا لے آندی بیس۔ اوس پٹ ڈنڈا لیا تے شابش بھئی جا جا ڈٹھا ہے۔ اوس دُھر کڈھے دوویں۔ ایہہ وزیر ہا ہور مکان وی ہان اودے لگھ گیا۔ نوکر نوکریں وی ہان۔ اوہ نمائی سڑے پیٹھی۔ سوکا۔ ایہہ جناب چُچارے

وچ پٹھن۔ بزار نالوں پیا لگھدا ہے۔ تکیا ہے تاں اکبر بادشاہ ہے نال وزیر پيس۔  
 اوس ویلے خواب یاد آیا۔ دیہاڑے گنے پيس تاں سال چوں دیہاڑ بکو رہندا ہا۔  
 دیو بھرے حاضری پيس۔ ایہہ روون کڈھ ڈڑھا ہے۔ عورت نوں آکھیوس، ”سواری دینا  
 ہاں۔ پیسے دینا ہاں۔ نوکر نوکریں۔ توں پیکیاں تے چلی جا۔ دیو بھرے میں مری جاونا  
 ہے۔“ اوہ وی رووے۔ ”گل تاں دس کیہ ہے؟“

میں لاہی ہے لنگی مجھ بدھا وچھونا  
 میریاں تلیاں نوں مہندی چڑھ چوکی تے نھاونا  
 ویلاں دین سہیلیاں اوہناں نمھا نمھا گاونا  
 میں سنب کھلوتی ہاں چونہ کہاراں ہے چاونا  
 میں پرنی جانی ہاؤں ڈھولیا مڑاودوں کاہیں لیاونا

پھلاں دی سیج ہے آن سستی ہاں باگے  
 سستی نوں ڈھول پیا ملدا ہے خوابے  
 میں ماراں سد وراگ دے کول ہووے تاں جاگے  
 میری لگی پریت دے اج تروڑی جانداے دھاگے

سستی پئی ہاں لے کے ڈھول کلاوے  
 دھم نہ دھیمیے ڈھول اٹھی نہ جاوے  
 او کگڑا! دیویں نہ بانگاں تیری ستیا جاوے  
 میرا یار پردیسی ہے گھر خیریں آوے  
 باگ لوینی آں وچ لوینی آں گوندی

نینہہ کدی نہ لیندی مینوں خبر وچھوڑے دی ہوندی  
 میں پپنیاں دے وٹاں دھاگے ہنجوں ہار پروندی  
 وکھی تاں پھڑ بہانہ ڈکھ ڈھولے دے روندی

اوہ آکھے، ”گل دس مینوں۔ ہر مرض دا علاج ہے۔ ہر کم دی کوشش ہے۔“  
 اوس آکھیا، ”انج انج خواب آیا بادشاہ نوں۔ انج اوس بھارت گھتی ہے میتھے۔ میں  
 سال دا عرصہ لیا۔ اگوں توں جھل گئیوں۔ ہر شے وسرگئی۔ اج سال دا ایہو دیہاڑا  
 ہے۔ دیو بھرے میری حاضری ہے۔“ ”خواب کیہ ہے؟“ اوس آکھیا، ”تھالی ہے، اُتے  
 سرپوش ہے، وچ رینڈی ہے۔ اوہنوں چکر ہین۔ ہک لاسے ڈلیاں لہندیاں ہین ہک  
 لاسوں ثابت ہے۔“ اوس آکھیا، ”فسوس! پہلے دیہاڑے دسیں ہاں میں سوال دے مگر  
 ودا ہام۔ تینوں دساں ہام چاں، پر تیرے نال شادی کائی ناہی کرنی۔ مینوں سمجھ آگئی  
 ہے توں ذہین ہیں۔ ذہین تو تا وی ہوندا ہے۔ دانا نہیں۔ دانا اوہ ہوندا ہے جیہڑا سبھی  
 گل وی پٹ کے مارے۔ ایہہ کوئی خواب ہے جیہدے مگر بھٹا وٹنا ہیں۔ روندنا ہیں تے  
 چھوچھ بنیندا ہیں۔“ اوس آکھیا، ”تھال زمین ہے۔ سرپوش اسمان ہے۔ رینڈی خلق خدا  
 ہے۔ چکر اوس دا رتیں دا پھرنا ہے۔ جیہڑیاں ڈلیاں لہندیاں جاندین، کئی مردے  
 جاندن۔ ثابت ہوندی جاندی ہے، اوہ حمدے جاندن۔ نہ جیندیاں دا مونییاں نوں پتہ  
 ہے نہ مونییاں دا جیندیاں نوں پتہ ہے۔“ اوہ اٹھیا اوس سرچم لیا۔ خوش ہو گیا۔

وزارت دا لباس پہن کے دربار بادشاہ دے وچ۔ بادشاہ بڑا ملیا بھئی ملاں  
 تیرے کان تاں بڑا دل اودریا ہو یا ہے تے بڑے دیہاڑے کدائیں لائے نی۔ بادشاہ  
 نوں گل وسری ہوئی۔ بیر بل آکھیا، ”خوش تاں انج ہے جیویں تہاڈے خواب دی تعبیر  
 آندی سوں۔“ اوہ یاد دیواؤ ہا۔ بادشاہ آکھیا، ”جی بیان کرو۔“ اوس بیان کیتا۔ بادشاہ  
 آکھیا، ”اتنا انعام دیو۔“ بیر بل آکھیا، ”نہ جی ادھوں دوگنا۔“ ”اوہ کیوں؟“ اکھے،

”ادھا ایس داہے۔ ادھا اوس دا ہے جیس ایس نوں دسیا ہے۔ دراصل حقدار تاں اوہ ہے۔“ مُلاں آکھیا، ”میں آپ کجھیا ہے۔“ بیربل آکھیا، ”جدوں بادشاہ تیتھوں پچھیا ہے اودوں ہوویں نابالغ تاں من ویندے ہاں۔ بھیڑیا! کیوں اوس شخص دا احسان وُجھندا ہیں، جیس تینوں دسیا ہے۔ اوہدا ناں مہوں لینا چاہندا۔“ بادشاہ تے ایہہ سارے جُٹ ہوگئے۔ اخیر اوہنوں دسناپیا۔ بادشاہ انعام دتا۔ بیربل پچھے آکھیا، ”ایس عورت دے وچوں بچے جمن تاں ہند دا ملک سمھال سکدن۔ ایس مُلاں چوں جیہڑے جمنے ہین ایہناں آدم نوں وڈھ وڈھ کے کھا چھڈنا ہے۔ ایہہ شاہی محل دے لائق دی عورت ہے۔“ بادشاہ آکھیا، ”گل تاں ٹھیک ہے پر ایہدا اثر مسلماناں وچ بہت ہے۔ مُلک وچ غدر پے جاونا ہے۔“ اوس آکھیا، ”میں ایسا وٹ دیساں غدر پوے ای نہیں۔ ایہہ عربی باشندہ ہے جنگجو قوم چوں ہے۔ ایہنوں فوج دا جرنیل چاں کر۔ قندھار یا کی ہویا کھلا ہے۔ ایہدا دھاوا چاں کر۔ ہر شے کمزور چاں دیس۔ ایس ویندیاں مری جاونا ہے تے عورت تیری۔“

بادشاہ بلایا بھئی اٹھارھاں ہزار سپاہی دا تینوں منصب دار کیتا گیا ہے۔ قندھار تے دھاوا کر۔ جاندا ایہہ کجھ نہیں۔ ہر شے کمزور دتی پئس۔ ایہہ گھر آیا ہے۔ ”اللہ اللہ! میں قندھار تے دھاوا کیتی ویناں۔ اللہ نوں سوئے او۔“ ایہہ چڑھ پیا۔ بیربل بادشاہ نوں آکھیا ہے: ایہہ ہے اڑیہ دی عورت۔ ایس اچانک سُننا ہیں گھر والا مری گیا ہے۔ ایس ہے گھر ویندیاں رہنا۔ راجپوت بچے بچے گو ہا چھڈیسن تینوں اوہناں دیونی کائی نہیں۔ مئے قابو کر۔ بادشاہ پیغام بھیجے شروع کر دتے۔ بادشاہ پیغام عشقیہ لکھے۔ اگوں اوہ قیامت دے حوالے لکھے۔ بادشاہ آکھیا، ”میں تیتھوں مسئلے نہیں سُننے۔ میں تینوں بے عزت کریساں۔ نہیں تاں توں میرا آکھیا من۔“ اوس آکھیا، ”میں کجھری نہیں ہاں۔ توں کھانا میرا منظور کرتے رات آ رہو۔“ بادشاہ کھانا منظور کیتا۔ اوس ست

کھانے تیار کیئے۔ بادشاہ دے پیش کیئے۔ سناں دی رنگت آپو آپ ہے۔ خوشبو آپو آپ ہے۔ جنس آپو آپ ہے۔ پہلے کولوں لگ کے ستویں تا میں ساء ہو ہے۔ بادشاہ وجہ چکھی۔ اوس آکھیا، ”جی! اگے وی عورتاں ہین تہاڈے گھر۔ ساڈی شکل دا فرق ہوسی۔ عقل دا فرق ہوسی۔ بولی دا فرق ہوسی۔ لباس دا فرق ہوسی مگر میں وی اوہا عورت ہاں۔ خدا ایہہ حُسن کدی نہ دیندا مینوں۔ اج ہک بیگانے مرد دا ہتھ مینوں جھلنا پوندا ہے۔ جیہڑی عصمت میں بچائی رکھی ہے اج اوہ تباہ ہو رہی ہے۔“ عورت روون کڈھ ڈڑھی۔ بادشاہ نوں رحم آ گیا۔ بادشاہ آکھیا، ”توں میری دین دُنیا دی بھین تے واسطہ خدا دا ای۔ آہنی ہیں رات کئیناں نہیں تاں لگا جاناں۔“ اوس آکھیا، ”بھرا بن کے ساری عمر بیٹھا رہو۔“ تیج وچھا دتی اوس مٹاں دی۔

نجر بادشاہ قاصد دوڑا تے بھیجے شے اوہدے کول کائی نہیں۔ جے جنگ شروع ہوگئی تاں اوس مری جاونا ہے۔ بادشاہ لکھیا کہ میں جنگ دا ارادہ ملتوی کر دتا ہے۔ واپس ہٹ آؤ۔ مٹاں حیران ہے بھیجی بیربل کائی چال چلیا ہے۔ میں عہدے توں کیوں گرایا گیا ہاں۔ اپنے گھر آیا ہے تاں تکیا ایس اپنی تیج تے دو چھلے نیلم دے، بادشاہ دے ہتھ دے پئے نیں۔ کدائیں لاہے بادشاہ تاں یاد نہ رہے۔ اوہ چھلے پکڑ کے عورت آلوں ڈٹھوس۔ باہر نکلیا۔ آواڈھ گواڈھ توں چکھیا۔ اوہناں دسیا۔ بادشاہ رات رہیا ہے۔ ایس نوکریں نوکر، ہر شے چوا کے اگلی کول۔ اوہ بندے بندے نوں آکھے، ”ہن جھل کے لتر آیا کھلا ہی۔ اساڈے نال ریاں۔ موندہ نہیں ڈٹھا۔“ صیقی گرنی بندے گھلن لگ پئی بھیجی گوڑے دا بیان تاں سُنیدا ہے چاں۔ ہک واری میرے بیان سُنے چاں۔ اوس آکھیا، ”میں تینوں ویکھنا ای نہیں چاہندا۔ تیرا کلام سُننا ای نہیں چاہندا۔ توں میری ہے ای نہیں۔“ شے ہے اوہدے کول کائی نہیں۔ فاقیاں توں فاقے آون لگ پئے۔ رات نوں ارادہ کرے بھیجی میں صبح نکل کے سوال کراں۔ میں بھکھ تے مرنی ہاں۔ صبح



آکھے پیو دے گھر پُتر جھپوئی کوئی نہ۔ ہونیوں توں۔ پیو تیرے سُننا ہے بھئی میری لڑکی  
 پردہ چاک کیتا ہے۔ بیٹھے دی چند نکل وینی ہے۔ مر جا پیو نوں ذلیل نہ کر۔  
 جد اپنی ول دھیان کرنا خاندان نوں داغ لوادنا نہیں  
 باہر کسے مجبور یوں پوے جاونا پردہ شرم دا مول اُٹھوانا نہیں  
 سمجھیا ہے اج میری موت ہے۔ رڑھ کے چڑھی ہے بھئی توڑا ہک واری  
 پیکے وطن دی ہوا میں لے لئیں۔ پیکے وطن آل مونہہ ہے۔ ہنجوں دے نیر چلے ہوئے  
 میں۔ ”اے بابا! تینوں کون دسے تیری لاڈلی دا اج کیہ حال ہے؟“

سوس دے مونہہ دسن لگے یاد آیوسے ماواں

راوی دے لڑ دسن لگے رہ گیاں دور چھواواں

ایہہ روندی بیٹھی ہے تاں جوں ہکے واری اُٹھ رڑیا ہے۔ ایس تکیا ہے اُڑیہ  
 دا راجا ہے۔ بادشاہ دا سلام کر کے اوہ ایسے گلی چوں پیا لگھدا ہے۔ ایس آکھیا ہے،  
 ”مہا راجا! تسلیمات عرض۔“ اوس اُٹھ ڈکھیا ہے۔ بڑے غصے نال اوہ بولیا ہے۔ اوس  
 آکھیا، ”مینوں بدماش توہیں سمجھیا ہے۔ کیوں سلام کیتا ہئی؟ میں راجپوت ہاں۔“ ایہہ  
 بھڑوے وی اودوں انج ہوئیں۔ اوس آکھیا، ”مہا راجا! توں اُڑیہ دا راجا ہیں تاں میں  
 فلانے صیقلی گر دی لڑکی ہاں تے اتھے میری شادی ہوئی ہے۔“ راجپوت دیاں ہنجوں  
 پٹیاں۔ ”او نمائیاں دھیاں او! تہاڈا وطن جوں کوئی نہیں ہوندا۔ مینوں کیہ پتہ میری دھی  
 اتھے پرنی ہوئی ہے۔“ اوس جیب وچ ہتھ ماریا جتنے پیسے ہاں ”بیٹی! ایہہ روٹی ہے تیری  
 جے پیو آل گجھ آکھنا ہئی تاں دس۔“ اوس آکھیا، پیو میرے نوں آکھیں:

اے راہیا راہ جاندا میرا لئیں سنہیڑا سُن

اکال نوں کھادھا مکڑاں، لکڑاں نوں کھادھا گھن

میرا ان پانی نہیں تھویا پر قسمت گئی ہے تھڑ

ساہے پئے موت دے کہ دن جاسن ٹر

صیقلی گر اوتھوں بھج وگیا۔ لڑکی نوں آن ملیا ہے۔ اوس ساری کہانی چاں

سُنائی۔ انج ایس انعام لے دتا۔ انج ایس دی جان بچائی۔ انج ایس دی عزت بچائی۔

ہٹ تے آیا تے ایہہ کار۔ اوس آکھیا، ”پچیا! ایہہ اوہدا قصور نہیں۔ ایہہ تیرا ہے یاں

بادشاہ دا۔ بادشاہ جوں بھین سدھی ہائی تاں کجھ تاں تیرا پتہ کرنا ہاس۔ توں اوہنوں دسیں

ہاچاں ایہہ ایہہ واقعہ ہے۔“ اوس آکھیا، ”میں تاں حیا توں نہیں دسیا۔“ صیقلی گر بادشاہ

کول لگا گیا۔ اوس آکھیا، ”میری لڑکی نوں بھین سدیا ہئی؟“ اکھے ”ہا۔“ اکھے،

”اوہناں دا ایہہ ایہہ حشر ہے۔ توں صفائی نہ دیویں تاں اوہناں دا گھر برباد ہے۔“

بادشاہ تے صیقلی گر، صیقلی گرنی دے مکان وچ آگئے۔ اگانہہ آئے تاں

مُلاں دو پیازہ دیاں کئی کتاباں رہ گئیاں ہان اوہ چیندا ودا ہا۔ عورت دا کدھ آل مُونہ

ہے۔ اوہ رو رہی ہے۔ نہ اوس اوہنوں بلایا ہے۔ نہ ایس اوہنوں بلایا ہے۔ اُتوں بادشاہ

وڑ پیا ہے۔ بادشاہ نوں وکھ کے اوہدے تن بدن نوں اگ لگ گئی ہے بھئی گل ہُن حق

تے پہنچ گئی ہے۔ بادشاہ دا سلام کیتا بیس۔ بادشاہ آکھیا، ”مُلاں۔“ اکھے، ”جی۔“

”ایہہ تیرا سوہرا ہے۔“ اکھے، ”جی آ۔“ اکھے، ”ایہدے نال بازی شطرنج دی

کھیڈیے۔ آہن: ایہہ شطرنج بڑی کھیڈ دا ہے۔“ صیقلی گر آکھیا، ”شطرنج تے تاں

سال سال وی لگ جاندا ہویا تے میں مزدور آدمی ہاں۔ تُساں چالا میرا ویکھنا ہے چوہڑ

گھتوں۔“ چوہڑ پے گئی۔ بادشاہ آکھیا، ”مُلاں تے میں آں۔ توں دوہری وار لیندا

رہیں۔“ صیقلی گر آکھیا، ”نہیں جی میری لڑکی میتھوں سرسا کھیڈ دی ہے۔“ مُلاں بھی

سڑ گیا۔ ایڈا کنجڑ ہے بادشاہ دے مقابلے تے ہُن دھی بہاؤ ہے۔ پر چلو میری تاں ہے

جوں نہ۔ اوہ پو دھی ہو گئے۔ ایہہ وزیر تے بادشاہ۔ صیقلی گر انج ڈالیاں نپ کے

جھولیاں۔ اوس آکھیا، ”ہلا بھئی۔“

لئی توں رتجھ سوجھ کس اوگن چھوڑی  
نکلیوں رنگ محل چوں وت دید نہ موڑی  
ڈُھل وے پاسیا ڈُھل

عورت ڈالیاں اٹھائیاں۔ اوس آکھیا:

چرخہ پونی کتدیاں میری کدی نہ تڑٹی ہے تند  
کیہ جاناں کیہ لکھیا کنت چاں کیتی موم کنڈ  
ڈُھل وے پاسیا ڈُھل

اوس ویلے مٹلاں سمجھیا ایہہ چوہڑ نہیں۔ مٹلاں ڈالیاں پیاں۔

جتھے شیر پانی پی گیا بکری تے مرند  
لھے اوس نوں پانی کیوں کردی ہے سنگ

اوس ویلے بادشاہ ڈالیاں پیاں۔ بادشاہ آکھیا:

بھائی کالے کالے کیورے کالے جھیس کے نین  
تم اپنا دھرم بچھا دو ہم بھائی وہ بھین

اوس ویلے مٹلاں بادشاہ دے پیر پٹن لگا۔ بادشاہ آکھیا، ”بے مانی مٹگنی ہا

تاں اوسے عورت توں منگ جھیس میں جیہے توں بھین سدایا ہے۔“ اوہ رس گئے۔

## گامن سچیار

زمانہ اورنگ زیب بادشاہ دا ہے۔ اوس زمانے اِچ جھنگ تے ٹھٹے ماہلے  
دے درمیان، دریا دے کڈھے تے بوہڑ کورائیں دی ہوئی ہے۔ کورائی بلوچ  
قوم ہے۔ پنج منھے بلوچ دے سدے جانن۔ لاشاری، لغاری، هوت، رند، تے  
جتوئی۔ ایہہ کورائی ایہناں دی شاخ وچوں ہین۔ بہیل خان بلوچ ہويا ہے، ایس  
بوہڑ کورائیں دی دے وِچ۔ سوانی اوس دی دے ناں کالی ہويا ہے۔ ایہہ بہیل  
خان، حضرت دیوان علی شاہ صاحب دا مُرید ہا، اُچ سید جلال دی دا۔ ایہہ پیر  
دے اگے جھکھیا، ”جوں جھکھ کھا گئی۔ کنک گڈیندا ہاں، بھکاٹ اُٹھی کھلوندا  
ہے۔“ زمین اُنج وی ویہدے پئے ہان۔ ایڈی لائق زمین نہیں ہوئی۔ حضرت  
دیوان علی شاہ سید فرمایا، ”توں اتھے اُچ اِچ آ جا، میرا کارندہ بن کے۔ اتھے  
کم کر۔ تیرا گزارہ چنگا ہو جا سی۔“ ست اُچاں ہن بخاری، امام حسین دی اولاد  
دیاں۔ ستویں اُچ سید شیخ جلال دی ہے۔ جیہیں سید دا شجرہ اِچ وی اتھے نہ لہے  
اونہوں سید ساک نہیں دیندے۔ ایہہ گل سادات دے پیر سدیدن۔

بہیل خان ایہتوں اپنا بال بچہ لے کے ٹر پیا ہے۔ عورت ایس دی دا  
ناں کالی ہويا ہے۔ پتر ایس دا گامن ہويا ہے، جیہنوں گامن سچیار آہدن۔ اُچ

دے وچ درس پڑھایا جاندا ہا۔ اوس زمانے وچ کتاباں وی ناہن لکھدیاں تے  
 اُستاد وی ناہن لکھدے۔ ایہہ خوش قسمتی دی گل ہائی گامن دی، ایہہ اُچ وچ  
 پڑھن لگ پیا ہے، درس وچ۔ اج دے بندیاں کائی بے حیائی دی گل کرنی  
 ہووے تاں آپدن: گامن سچیا آکھی ہے۔ ایڈے وڈے گھرانے دا مُرید گامن  
 تاں بہوں وڈا بندہ ہویا ہے۔ تحصیل علم دی ایس اوتھے طے کیتی ہے۔

چار پُتر ہون سید دیوان علی صاحب سید دے۔ دُر لعل، دُر جمال، دُر  
 کمال تے دُر پیر شیخ سید جلال۔ حضرت دیوان علی سید جیس ویلے فوت ہو گئے،  
 ایہہ چارے بھرا گدی دے دعویدار اُٹھی گئے۔ چارے بھرا مخالف ہو گئے۔ کیوں  
 جوں ایہہ بادشاہت ہائی۔ ایہہ چھوٹی موٹی گدی ناہی۔ گامن سوچیا جیس بھرا  
 دے نال میں تُراں باقی ترہیں دی میں بے حیائی کرنی ہے۔ میں نمک خوار وی  
 ایہناں دا، مُرید وی ایہناں دا تے علم وی ایہناں دی وجہ توں سکھیا۔ ایہہ بے  
 ادبی ہے۔ ماں پیو میرا اگے مر گیا ہے۔

وارث چھڈ چلیے ایس نگری نوں، ایسی طبع فقیر دی شان دی اے  
 مڈھوں میں ایتھے رہاں ہی نہیں۔ گامن بے چارہ ایتھوں تُر پیا ہے تے  
 ایس ڈیرا غازی خان دا تاں تکیا ہے۔

غازی خان ہوریں چار بھرا ہون۔ غازی خان، اسماعیل خان، لیہ خان  
 تے دادن خان۔ ایہہ دریے خان دے پُتر ہون۔ مُڑ ویکھ لیو کتھوں لاتے کتھوں  
 تائیں سرداری ہائی ایہناں دی۔ غازی خان نوں اٹھارھاں ہزار سپاہی رکھن دی  
 اجازت ہا، نواب ہا۔ اورنگ زیب دے ماتحت ہے۔ غازی خان تے اسماعیل  
 خان ہک کلڑے زمین دے اُتے لہون لگ پئے۔ واہراں شہراں ہمیشاں اوہناں  
 دیاں لڑائی بھڑائی رہے۔ اسماعیل خان بندہ گھلیا ہے ایہہ لڑائی بھڑائی چھڈ

دیویے۔ دیو بھرے دریا سندھ تے آویں، اوس زمین دے ٹکڑے اُتے کھلو کے، جتھوں تائیں توہیں آکھی اوتھوں تائیں زمین تیری ہوگئی۔ لڑائی تاں نکلدی ہے۔ غازی خان خیال کیتا بھئی میں نکڑا ہام، حق میرا ہا، ایہہ لفظ آکھنے۔ اوس سنیہا دتا بھائیے نوں اکھیائے، ”میں وی آ جاساں توں وی آ جاویں۔ نہ تیرے نال بندہ ہووے نہ میرے نال، نہ تیرے کول ہتھیار ہووے نہ میرے کول۔ جتھے توہیں چاں آکھیا میں اوتھائیں کھلو رہساں۔“ اسماعیل خان نوں کوئی صلاح گیر ”چنگا“ ملیا۔ اوس آکھیا، ”ہمیشاں بھرا انج وِس کے نہیں آوندے۔ جے اوتھے خفیہ ہتھیار تیرے کول ہووے تے توں اوہنوں مار لئیں تاں ہر شے تیری ہوگئی۔“ صیقلی گرنوں اسماعیل خان حکم دتا ہے۔ اک گندھک فولاد دا تیار کر جیہڑا بوجھے وچ آ جاوے۔ دل دلاں نوں جاندن۔ غازی خان نوں وی ایہو خیال آیا ہے۔ زہر دیاں پاناں کٹاراں نوں لگیاں ہونیاں ہن۔ استغفار دیاں تسیاں اج دیاں وانگ ہتھ وچ ہن۔ اودوں اوہ وی سانھ گھوڑے اُتے اسوار ہے۔ ایہہ وی سوار ہے۔ پارٹپ کے سین دا فیصلہ کرنا ہانئیں۔ ملاح نوں اکھوئیں، ”بیڑا چھوڑ۔“ اوس آکھیا، ”دریا طاقت بچ کھلا ہے۔ کوئی ہور ملاح آون دیو۔“ ملاح نوں وت تنگ کیتوئیں۔ ”بیڑا چھڈ اسانوں دُھپ پئی چڑھدی ہے“ ایہہ دوویں بھرا وی چڑھ آئیں۔ گھوڑے وی چاڑھ لے نیں۔ ہک جٹی ہے، سر دے اُتے تھوہ روٹیاں دا ہے، پار اوس دے ہالی کھلن، اوہ وی آ گیا۔ چار سوار ہو گئے۔ ملاح بیڑے نوں دھکا چاں دتا ہے رب دی آس تے۔ جیہیں ویلے بیڑا اولی من دے قریب آ گیا ہے تاں ایدوں گامن وی بیڑے چڑھنا ہا۔ ایہہ وی من تے آ گیا ہے۔ جیہیں ویلے بیڑا من دے نیڑے آیا ہے تاں پٹھوں کپر چھک چاں دتی ہے۔ وجھ مریندا رہ گیا ہے، سمجھیا ہے ملاح بیڑا قابو نہیں آوند

کپر لیدنا پیسوں۔ اوس زنجیر وچ سٹ چھڈیا۔ زنجیر وزنی ہوندا، بیڑا اوتھے پھرن لگ پیا ہے، بھمبیری آر۔ ملاح بولیا ہے، کسے داعیب پیا پکڑیدا نہیں تے بیڑا پیا بڈدا نہیں۔ میرا ضان ایہو ہونا ہے کہ بیڑی بڈنی ہے میری، تے میں تاں ٹھل کے نکل جاونا ہے، تاں بڈ کے مرونجنا ہے۔ اپنے گناہاں توں توبہ کرو۔ اسماعیل خان دیاں ہنجوں ٹپیاں ہن۔ اوس آکھیا، ”مولا توں عالم الغیب ہیں، کوئی غیب نہیں جاندا سوا تیری ذات دے۔ توں دلاں دے بھیت توں واقف ہیں۔ ایہہ گناہ پکڑیا ہے میرا۔ ارادہ ہابھرا نوں قتل کرن دا۔“ جیب وچ ہتھ مارپوس تے کلمہ شریف پڑھ کے، اوتھائیں ہتھیار سٹ چھڈیا۔ بیڑے پھیر چکر کھادھا۔ ملاح وت لکریا۔ غازی خان جیب دے وچ ہتھ ماریا۔ اوس آکھیا، ”میرے مولا توں دلاں دے بھیت جاندا ہیں۔ ارادہ میرا وی ایہو ہا، پر واسطہ ای اپنی پاک ذات دا توبہ کر گئے ہاں۔“ اوس وی ہتھیار پھینک دتا۔

بیڑے وت چکر کھادھا۔ ملاح مُر لکریا۔ جٹی بولی، ”پار میرا گھر آلاتے ویر کھلن تے بلی ایہہ روٹیاں دتیاں ہم تے وچ ساریاں دے زہر ہے۔ میرے مولا! میں وی اپنے گناہ توں توبہ کر گئی ہاں تے ایہہ روٹیاں وچ پیناں نی تے اسانوں بچا۔“ بیڑا اچھک کے مُر چکرایا ہے۔ ملاح لکریا ”کھتری سُر دیا بچیا! توں وی سدھی نیت کر۔“ اوس آکھیا، ”اوہ جوں جانی جوگ ہو یا تے دلاں دے بھیت جاندا ہو یا۔ ایہناں وہیاں وچ سچ دا پیسہ ہک وی نہ تے میرے بھگوان میں وی توبہ کر گیا ہاں۔“ اوس وی وچ چاں وگائیاں۔ بیڑا کجھ کھلو کے پھیر چکرایا تاں ملاح آکھیا، ”اللہ توں وی نہ دا کھلوو ہیں۔ کل میں ایہہ راوٹا ہک مسافر دے سرتوں چھکیا ہاتے اپنا ناں من تے ایہہ وی وچ پیا ہئی تے سانوں کدھی لا۔“ گامن من تے کھلا ہا۔ اوس پنجاں نوں سد کے آکھیا، ”بے

ایماناں دا سالم پور میں تاں اج ٹپدا پیا ویہدا ہاں۔ ملاح دونیاں نوں لکرنیندا  
ہے تے آپ کجھ نہیں کریندا۔‘

تن ساگر من بھجا سکندری ہوڑے آپ نہ بھاگے

غرقا بے آلا ہتھ دونیاں نوں ہوڑیندا ہے تے آپ وچ کھلا ہے۔ دوویں  
نواب چپ کر گئے رنگ سُرخ ہو گیا، پر پچی ایڈے ہوئے کھلے ہاں، ایہہ نہ  
چکھوینیں کہ کون ہیں تے اسانوں انج کیوں آکھیا ہئی۔

اوہ لتھے گامن بیڑی چڑھ گیا۔ گامن جا پہنچیا ہے ڈیرے غازی خان۔  
دوپہر ڈھل گئے ہون۔ بھکھا ہے۔ اوس زمانے ہوٹل ہا کوئی نہ۔ مسافر بے مل  
دی کھاوے ہا تاں اوہ ماچھیاں دے تندور تے ویندا ہا۔ ’’دائی۔‘‘ اکھے، ’’جی۔  
میں مسافر ہاں تے بھکھا ہاں روٹی پکا دے۔ پیسے اپنے لے لینے نی۔‘‘ اوس  
آکھیا، ’’تندور تھار بیٹھی ہاں۔ میں تینی ہاں۔ اوہ منجی پئی آ، پچھاویں تے گھت  
کے پے رہو۔‘‘ دائی تندور چاں تایا ہے۔ گامن گھوک سیں گیا، تھکا ہو یا ہا۔ چار  
نوکر غازی خان دے، اوہناں ککڑ چکھیا ہو یا ہے تے ککڑ آن کے گامن دی منجی  
پٹھ وڑ جاوے۔ اوہ پیٹھوں چکن تے ککڑ بھج کے مڑ آونجے۔ گامن بلارے تے  
جاگ گیا ہے۔ جیس ویلے تریں واریں ککڑ پیٹھ منجی دے وڑیا ہے تاں گامن  
آکھیا، ’’تریں وار ہے ککڑ میری پناہ منگدا ہے میں بے غیرتی توں کم لئی رکھیا ہے  
بھئی پردیسی ہاں، جیہڑے پیسے بھرے نیں میٹھوں لے لیو تے ککڑ نہ نیو۔ ایہہ بے  
چارہ تریں وار ہے میٹھوں پناہ منگدا ہے۔‘‘ اوہناں آکھیا، ’’پتہ نہیں توں کون  
ہیں بے وقوفا! غازی خان دی روٹی پکاوون واسطے اسیں جیہدا نپ لیئے، چکھن دی  
کیہڑی لوڑ ہے؟‘‘ گامن آکھیا، ’’غازی خان ایڈی ریاست دا مالک ہو کے حرام  
کھاوندا ہے۔‘‘ اوہناں آکھیا، ’’دھر ایسا تے تینسا توں غازی خان نواب نوں پیا



آہنائیں۔“ بُلاریں آ گئے۔ تلوار گامن دے کول ہا۔ ترائے اوس ڈھاہ لے چوتھا مل گیا۔ دائی پیٹی چا کے کڈھ ڈڑھی پلو تے دیون، ”وے گڑاپوی، وے تہر پوی، میرے بوہے تے قلام چاں کیتا ای۔“

نواب غازی خان آ گیا ہائی اودوں۔ چوتھا نوکر بھج کے گیا۔ اوس جا کے گل کیتی انج انج بندہ ہے تینوں گاہلیں کڈھیندا ہے تے ترائے پھٹے پین۔ غازی خان حکم دتا ہے بارھاں سپاہیاں نوں، اوہ آوے نہیں تاں سر قلم کر کے لے آؤ۔ ایس ملنا غازی خان نوں ہا۔ ایہہ سوچیندا بیٹھا ہا کہ کس طریقے نال غازی خان نوں ملاں بھتی میں اوہدی فوج دے وچ بھرتی ہونا ہے، جوں ٹکر حلال دا کر کے کھاواں۔ اتنے نوں بارھاں سپاہی وڑ آئے۔ اوہناں آکھیا، ”غازی خان دا حکم ہے جے توں آویں تاں اساڈے اگے لگ، نہیں تاں تیرا سر لاہ کے لے جاونا ہے۔“ گامن اُٹھیا ہے۔ اوس لگو کچھ دے وچ گھت لیا ہے تلوار خون آلودہ ہتھ دے وچ ہے۔ اوس آکھیا ”چلو“۔

دربار غازی خان دے وچ آ گئے۔ ”السلام علیکم۔“ اکھے، ”وعلیکم السلام۔“ غازی خان آکھیا، ”کون ہیں تے کیوں ماریا ای میرے نوکراں نوں تے مینوں کیوں لام کاف آکھیا ہی؟“ اوس آکھیا، ”نواب! میں ٹریا تاں ہام تیریاں تعریفاں سُن کے، ارادہ ہا تیری فوج وچ میں بھرتی ہوواں۔ مینوں ایہہ پتہ کوئی نہ کہ چند خوشامد گویاں تیری کہانی بنائی ہوئی ہے کہ بندہ چنگا ہے۔ بندہ توں چنگا ہاؤں نہیں۔“ اکھے، ”اوہ کیوں؟“ اکھے، ”پرندہ ہک ہوا دے وچ اُڈ کے روزی کما سکدا ہے۔ ہک کیڑا مکوڑا ہے۔ اوس کیڑے دے مونہہ وچوں اوہ روزی کھس لوے، اوہدے جیڈا وی کوئی کمینہ ہے۔“ اوس آکھیا، ”تیری اوہ مثال ہے اوس پرندے آلی۔ ایڈی ریاست نال نہیں رجدا تے

ایہناں غریباں دے لکڑ نپا کے کھاونا ہیں۔ دن قیامت دے رب دے دربار وچ کیہ آکھسیں؟“ وزیر مسدّی بولے، ”ایہدی زبان کٹو۔“ غازی خان آکھیا، ”زبان کٹیے؟ ایہنوں کُرسی دیو۔ میں جد دا جمیا ہاں اج تاں میں اپنے خلاف کوئی لفظ تہاڈے مونہوں نہیں سُنیا۔ بھادیں سچ آکھیا ہے بھادیں گوڑ آکھیا ہے، تُساں اُتوں واہ واہ کہتی ہے۔ اج پہلا بندہ میرے دربار وچ جیہڑا حق پیا آہدا ہے۔ میں ایس نوں داد دیندا ہاں۔ بہو۔“ بہہ رہیا۔ کُچھیا، ”کون ہیں؟“ اکھے، ”بلوچ۔“ ”کون بلوچ؟“ اکھے، ”کورائی بلوچ۔“ ”کتھوں تڑیا ہیں؟“ اکھے، ”اُچ پیر شیخ سید جلال توں۔“ اکھے، ”ناں کیہ ہئی؟“ اکھے، ”گامن۔“ ”بہت خوب، گامن سچیا۔“ اکھے، ”سچیاں تاں ناں خُدا دا ہے۔ سچیاں تاں آدم مگر چاں لایا ہے۔“ غازی خان آکھیا، ”میرے کول بندہ کوئی نہیں تے میں تینوں اتالیق بنا کے رکھینا ہاں۔“ اوہ رو پیا، ”ہلا۔“ اکھے، ”مشورے دے۔“ گامن آکھیا، ”پہلا مشورہ ایہہ ہئی وڈھی دی جڑھ پٹ، ایہہ ہر گناہ دا مُڈھ ہے۔ دُوا نذرانے لینے چھڈ دے تے ونگار دا کم نہ لے، کم محنت دے کے لے۔ ایہہ دو چیزاں چاں کر، ملک تیرا سکھی ہے۔“ غازی خان اوس دے آکھے لگا، جدوں ایہہ حکم صادر ہو گئے کہ مت کوئی نذرانے لے۔ مت رشوت لے۔ ہر پاسیوں سکھ صدائیں ملن لگ پیاں، جیہڑی مخلوق ہائی رعیت رعایا، اوہ گامن نوں دُعائیں دیوے۔ درباری سبھ خلاف ہو گئے۔ جاگیردار خلاف ہو گئے۔ بڑا بُرا بندہ ہے، جیہڑا آیا ہے۔

گامن آکھیا، ”جی! میں وی ویہلا نہ بیٹھا رہاں، توڑا مُرنی خانہ میرے سُر دکر دیو۔“ مُرغیاں پالنا اوس اپنے ذمے لے لیا۔ سال دے بعد نواب غازی خان آکھیا، ”ہاں بھائی! حساب دے، کتنے کھلوار توہیں لین مُرغیاں پالن

کان؟“ اوس آکھیا، ”میں تاں ہک رتا پیسہ وی نہیں لیا۔ ہک پڑوپی وی نہیں لئی۔“ ”کیویں پالیا ہی؟“ اوس آکھیا، ”لنگر دیاں دیگاں نوں دم دتا جاندا ہائی آٹے دا۔ میں اوہ آٹا اپنے کٹرول وچ لیا ہے۔ جدوں اوہ آٹا پک رہے تاں میں اوہدے نال مُرنے پالے۔“ نواب بھی حیران۔ ”اوہ کاں، گتے کھا چھڈ دے ہائِن۔ میں سوچیا بھئی ایہہ نواب دا ضائع ویندا ہے۔“ نواب، گامن دا عاشق ہو گیا۔

گامن سُندا رہے کہ وزیرستان آ لے پٹھان پویندن تے ڈیرے غازی خان دے نوں لٹیندن۔ اوہدا دماغ نہ منے بھئی اتھے اٹھارھاں ہزار سپاہی جوان رہندا ہے تے جنگ ای کسب ہے اوہناں دا، لئیرا سو ہوندا ہوسی، پنج سو ہوندا ہوسی۔ اٹھارھاں ہزار تاں لئیرا نہیں نا پے سکدا۔ وٹ کیہ اے؟ پیٹھن دربار وچ تاں اچانک اُتوں اسوار دھروڑ کے آیا ہے تے اوس آکھیا ہے بھئی وگ نواب غازی خان دے ڈیرے دا وزیر یے مار کے لئی جاندن۔

آئے کٹکاں دے دھرلاٹ، اُٹھ گرد چڑھی ہے اسمان  
 للکریا ہے۔ فوجاں چڑھیاں۔ بگل وچ گئے۔ فوجاں نکل گئیاں۔ گامن  
 پچھیا ہے نواب غازی خان توں، ”اسیں؟“ اکھے، ”ایہہ لڑ بھڑ کے سُنے آ  
 جاندن۔“ ”نواب اج مینوں سمجھ آئی ہے توں کھادھ ایسے توں بنیا ہو یا ہیں۔  
 جیس جج دے وچ ولگھا نہ ہووے۔ اوہ جج کدے سوہی ہے؟ توں گھر بہیں۔  
 مال تیرا ہووے ایہناں کیویں لڑنا ہیں۔ اُٹھی اُتا نہہ۔“

خاں دوراں کرے سوال، سد سپاہ نوں  
 اج بنیا ہے حشر زوال، دلی دے تخت نوں  
 منصوبہ ایہو کمال، ہرے تے کڑ کیا

زر فرزند تے مال، نہ ویسی نال کوئی  
کیہ ہو یا ہک سال، کچھیرے جیونا  
اج کرو نمک حلال، محمد شاہ دی

گامن آکھیا، ”مرسر پر جاونا ہئی۔ انج لکا نہ رہو۔ مال تیرا ہے تے  
لڑے میٹھ۔“ نواب توں اوس ہتھیار لوا کھلارے۔ نواب وی چڑھ پیا تے  
گامن وی۔ جیس گلی بزار وچوں لگھن تے رنوڑھ جیہڑا ہے، ”ہائے ہائے وے  
گڑا پوس تے ساڈے نواب نوں، ساڈے پنن دی پیری لئی جاندا ہے۔“ گامن  
ہٹ کھلا۔ اوس آکھیا، ”نواب موت حیاتی وی نال ہے او خدا دی قسم ہے جدوں  
تا میں رب آپ چند نہیں نہ لینی۔ توکل رکھ۔“

دُشمن کدی نہ ماردا، جے رب آپ نہ مارے

اوس آکھیا، ”گامن! میں تینوں اُستاد جاندا ہاں توں میرا دُشمن نہیں۔

چل۔“

ایہہ مری گئی کے فوجاں، گائیاں کھساں کے ہٹیاں آوندیاں ہن، جوں  
غازی خان داسر نکلیا نہیں تے ہٹ کے وت لڑ پیاں ہن۔ گامن آکھیا ہے نواب  
نوں ”توں اتھے پہاڑی نال کھلو۔ اساڈا تماشا وی ویکھ۔ میں وی بلوچ ہاں۔“  
گامن پوں اسوار بڑا ہو یا ہے۔ سانگ اوہدے ہتھ وچ ہے۔ سانھ گھوڑا پیٹھ  
ہے۔ گامن تانا چاں لایا ہے۔ بندہ ڈھاہ کے اگانہ نکل جاوے۔ مُڑ ڈھاہ کے  
ہٹ آوے۔ مُڑ انج ہو کے۔ غازی خان واہ واہ کریندا کھلا ہے۔ ”شابش کیا،  
کہنے جوان دے۔ میں تاں صرف گلاں دا کرو جاندا ہام۔“ سو بندہ وزیریا مری  
گیا ہے۔ وزیریے نس پئے۔

وزیریاں جا کے صلاح کییتی ہے بھئی ایہہ وٹ کیہ ہے؟ پیڑھیاں دی

اساڈی کھادھ ہائی۔ اوہناں نوں پتہ لگا کہ گامن ناں بلوچ دے ہے تے اوس ڈیرے دی کایاں تبدیل کر لئی ہے۔ عدالتاں، غریباں دیاں دعائیں، تئیں ہُن غالب نہیں آسکدے ایہناں اُتے۔ وزیریاں سوچیا! کائی ایسی طرز چلیے، نواب سانوں میلا وی کرے تے سو بندے دا بدلہ وی بھرے تے ساڈی اگے توں رسائی ہو جاوے۔ کیوں جوں ہُن ایہہ اساڈی مار نہیں رہے۔ کسے مہاراجے نواب غازی خان ال ہک کنیر گھلی ہائی بڑی حسیند۔ اوہدا عاشق ہا غازی خان۔ اوہ باغ دے وچ آ کے نھاوندی ہائی، صبح دے وقت۔ وزیریاں صلاح کیتی بھئی اوہ چاویے۔ نواب تاں سانوں میلا کر کے منیسی۔ وزیریاں صبح دے وقت حملہ کیتا ہے۔ اوہ نھاوندی پئی ہائی اوس نوں چالیا ہے۔ گامن گھر ناہی۔ فوجاں کوئی بھیری سوڑی لڑائی کیتی۔ وزیریے اوہ لے کے وگ گئے۔

نواب غازی خان دربار لایا ہویا ہے تے جیہڑا آوندا ہے تے آہدا ہے، ”دسو جی! ایس گامن دے تہانوں رہائے دا کیہ فائدہ ہویا۔ گامن رہیا ہے تے اوس تہانوں بے دانستے بندیاں دے گل گھتیا۔ ایہدا نتیجہ ایہہ نکلیا ہے تیری اتنی بے عزتی ہو گئی ہے تے ایہہ گامن دی وجہ توں ہوئی ہے۔“ غازی خان وی غصے نال بھریا بیٹھا ہے۔ ایہہ ٹھیک آبدن۔ رعایا دے بندے بڑے خوش ہان، گامن دے اُتے۔ اوہناں آپت اپت ایچ صلاح کیتی کہ گامن اج دربار وچ آونا ہے تے اوس قتل ہو جاونا ہے تے جد دا آیا ہے، ساڈے سراں وچوں ایس پولا ہٹایا ہے۔ ونگاراں بند کرائیاں پئیں۔ عدالتاں شروع کرائیاں پئیں۔ کیہ کریے؟ اوہ اوس راہ اُتے بہہ رہن جدوں گامن آونا ہائی۔ گامن نوں آکھے، ”توں اج ڈیرے وچ نہ آ، نہیں تاں مری جا سیں۔“ سر دوپہر ہن جوں تکلیا ہے نیں تاں گامن سچیاں۔ پٹھ گھوڑا ہے سانھ۔ کمر نال تلوار ہے، موڈھے نال ڈھال ہے۔

اگے سانگ رکھی ہوئی ہے۔ اٹھارہاں آگریاں بانس ہے چھڑ۔ سواگزنیزہ فولاد  
 دا ہے۔ پاپکے دے پھممن نال سانگ دے لکدے آوعدن۔ گامن چائی آوند  
 ہے۔ اگوں اوہ اٹھے ہن۔ اکھے، ”گامن۔“ جنے، ”ہاں“

اڈ جا کالیا کاوا! سڑیا ماس نہ کھا  
 پھلاں ورگیاں صورتاں، دوتی دیندن خاک رلا  
 بڑ بڑ موئیاں سوہنیاں، کنہیں خون دے بھرے دریا  
 تینوں واسطہ گھنتاں رب دا، اج چھڑیاں پٹھ نہ آ

”گامن! اج رنگ دربار دا ہور ہے۔ ایہہ قصہ ہو گئیے۔ کنیر چالی  
 ہے وزیریاں تے کُل بندے درباری جیہڑے ہن، اوہ تیتھے بھریاں پلٹ رہن  
 تے توں نکل جا۔“ گامن بولیا، ”تھاڈا تاں بھلا ہووے کمال کیتا نیں، میری  
 تاں خیر خواہی پے کریندے او، پر ہک خیر خواہی ہوندی ہے تے ہک دشمنی ہوندی  
 ہے خیر خواہی دے وچ۔ تئیں میری تباہی کر رہے او۔“ ”کیویں؟“ اوس  
 آکھیا، ”کل تائیں میں پیوسدیا ہے غازی خان نوں۔ اوس مینوں پڑس دیا ہے۔  
 مینوں اُستادس دیا ہے۔ اج ایڈی بے عزتی دے وچ میں چھڈ کے وگ جاواں نا  
 تاں میرے جیڈے تاں بُرا بندہ کوئی نہیں۔“

دوویں راہ محبت والے، یاں ملساں یاں مرساں  
 جاساں کچج نہ رہساں نی، ہر نذرانے دھرساں

گامن آکھیا، ”ہک نیک میرے تے چڑھیائے۔ میں غازی خان دے  
 ڈیرے وچ نہیں وڑدا۔ میں ایتھوں وینا ہاں۔ میں گیوم وزیریاں دے مگر۔  
 نواب نوں اکھیائے دیگر تائیں گامن واپس نہ آوے تاں گامن دی لاش  
 وزیرستان دے پہاڑاں وچوں لہسی تے زندہ ہو یوم تاں انشاء اللہ کنیر میں لے

کے آوساں۔“

اتنی گل کر کے گامن گھوڑا اُتوں ولایا ہے۔ گامن نوں دس پے گئی ہے  
بھئی وزیریاں پنجاں بندیاں دے مگر بہائی ہے تے آکھیا ہے نیں فلانے قلعے  
پہاڑ دے وچ ایس نوں بہاونا ہے تے ایہدے آل ہتھ مت کرنا۔ اساں کرنی  
ہے رسائی نواب نال۔ ایہہ امانتی لے جاوئی ہے۔ پنج بندے لئی جانن۔ ہک  
دے مگر چڑھی ہوئی ہے تے چار سوار نال ہن۔ گامن چاں تکیا ہے۔ جیس ویلے  
گامن پہاڑاں دے وچ پہنچیا ہے تاں ایہہ مل پین۔ اوس للکریا ہے، ”ہاں  
بھئی میں آیا۔“ لڑ پین۔ نچے مار گتھے پيس۔ جیس دے مگر چڑھی ہوئی ہے اوس  
دا سر وڈھ کے کنجے نال بنھ کے ایہہ چڑھیا ہے تے مگر کنیز نوں چڑھایا ہے۔

دیگر دا وقت ہے اوہ بندے سنیہا پے دیندن، ”نواب صاحب! گامن  
اُتوں ولا گیا ہے۔ سدھا گیا وزیریاں تے۔ ٹہانوں آکھ گیا ہے کہ دیگر تائیں  
میں نہ آواں تاں میری لاش وزیرستان دے پہاڑاں وچوں ڈھونڈیائے۔“ تاں  
تاڑی وگ گئی ہے سارے دربار دے وچ۔ گامن گیا جدوں دا ہا، نواب وی ہسیا  
ہے پر زہر دا ہاسا بھئی ایہہ ٹھیک آہدن۔ تھوڑی جیہی ڈھل ہوئی ہے تاں ہکے  
واری گامن زندہ باد، درباریے بمبا اٹھن۔ سر جھکائی بیٹھا ہا نواب۔ سر اٹھایا  
پيس۔ ”کیہ گل ہے؟“ اکھے، ”جی! اوہ گامن موڑ پیا ولیندا ہے تے جیڑے  
پٹھان کنیز اٹھائی ہائی اوہدا سر کنجکے نال بدھا ہو یا پيس تے کنیز مگر پيس۔  
تاں غازی خان دیاں ہنجوں ٹپیاں۔ غازی خان تحت توں دھرک مار کے لتھا  
ہے۔ اوس آکھیا، ”گامن۔“ اکھے، ”جی۔“ ”میڈا بچوڑا! میڈے گوڈے دے  
اُتے لت دے کے لاہنائی۔ ایہہ سور دے نچے ہن تائیں تیریاں شکایتاں  
کریندے رہن تے ہن نعرے مریندن۔“ گامن آکھیا، ”اتنی عزت کافی ہے۔“

اکھے، ”نہیں۔“ گامن نوں گوڈے اُتے لت رکھا کے نواب لہایا ہے۔ گامن اُتے اتنا اعتماد نواب نوں ہو گیا ہے کہ اوس آکھیا جدوں گامن گھر ہوسی اودوں پہریداراں دے پہرے کوئی نہ ہوسن۔ مینوں بکو کافی ہے۔ نواب آکھیا ہے، ”ایس کنیرنال نکاح توہیں کرنا ہے۔ میں رکھنی کائی نہیں تے ہور دیونی کسے نوں نہیں۔“ گامن ہتھ چاں جوڑے۔ ”اپنے آلوں توں انعام پیا کرینا کیں پر مینوں توں دُنیا دے قید خانے وچ پیا وگیندا ہیں۔ ہک عورت بندہ لے لوے تے جتنے جہان دے لوازمات ہین سارے اوہنوں اندر لیاونے پوندن۔ بوکھر آلے دی ضرورت ہے۔ بھانڈے گچن آلے دی، گئی چاڑھن آلے دی، سواری، مکان دی! ہزار شے لینے تاں عورت رکھ سکیدی ہے۔“

وطن دم دے نال تے ذات جوگی، شینہہ، سپ، درویش دا دیس کیہا جیہدا دُنیا نال پیوند ہووے، دُنیا دار ہے اوہ درویش کیہا ”میتھوں ایہہ کھپانے نہوں چیندے تے خُدا دا نا من تے ایہہ انعام نہ کر۔“ گامن نواب نوں گھر بولیندا ہا۔ گامن توں کنھیاں پچھیا ہے کہ نواب دیاں بیویاں کتنیاں ہین؟ اوس آکھیا، ”قسم ہے اوس ذات دی جیہدے قبضے وچ جان ہے۔ ہک اوس پیڑھی دا پتہ ہے جیس اُتے میں بہناں۔ ہک اوس تھلہی دا پتہ ہے جیس اُتے پئی ہوندی ہے۔ نہ کدی اکھ اُٹھا کے تکیا ہے تے نہ پتہ ہے کہ عورت بیٹھی ہے یاں مردیاں چھوہر بیٹھی ہے یاں کون؟“

گامن کیہ کریندا ہے؟ ہک نوکر رکھی ہوئی بیس تے مختصر جیہا سامان۔ ڈاچی اُتے سوانی نوں وی چڑھا لینا، نوکر نوں وی چڑھا لینا تے اوہ بھانڈے وی اگے رکھ لینے۔ قصور واہ ہک پھاٹ ہے سندھ دریا دی، اوس توں پار آلی زمین اسماعیل خان ال ہائی۔ اک ککھاں دا جھونپڑا بنایا ہو یا بیس۔ اوہ نوکر،



سوانی تے بھانڈے استھے رکھ جاوے۔ میں کچھری پیا دینا ہاں۔ مینوں عادت ہے  
 سچ آکھن دی تے وڈیاں آدمیاں نوں عادت ہوندی ہے کڈھ ولیوا۔ میرا اگے  
 نکلیا پیا ہووے بھئی مینوں آئج ہی نہ رہے کہ میرا ولیوا نکلتا ہے۔ سچ آکھن توں  
 میں نہیں لٹنا۔ اگلے پہر ڈاچی اُروار ٹپدی ہائی تے پچھلے پہر مُڑ پار ٹپدی ہائی۔  
 جیس توں اج تائیں اکھان ہے بھئی فلانا قصور واہ ٹپدا ودا ہے گامن دی ڈاچی  
 آر۔ ایس طرز نال درویش دی زندگی گُزر دی ہے۔

تیریاں مجھیں چریندیاں وچ نیلے، پک بھینڈ دا بھنڈا میں وی سہی  
 تیریاں گھوڑیاں کردیاں تھیا تھیا، پک کھوڑا مُنڈا میں وی سہی  
 تیرے شیراں دے گل زنجیر لٹکے، پک گُتے دا ڈنڈا میں وی سہی  
 علی حیدرا وے تیرے دربار اندر، پک مسخرا بھنڈا میں وی سہی  
 انج ہو کے گامن اپنی زندگی گزار گیا ہے کیوں جوں دُنیا دار بے چارہ  
 ایس تے مردا ہے تے دین دار جیہڑے ہن اوہناں نوں ایس توں نفرت ہے۔  
 حضورؐ فرمایا ہے، ”میں سارے آدم دا سردار ہاں۔ فخر نہیں کیتا پر پک فخر میں  
 کریناں۔ فقر میرا فخر ہے۔ لو کو بھکھ توں ڈرے نہ کرو ایہہ اللہ دی نعمت ہے۔“  
 نواب غازی خان شکار چڑھیا ہے۔ اٹھارھاں ہزار پلٹن نال ہے بلوچاں  
 دی۔ نواب دی اوہناں سلامی کیتی ہے، پلتھا کھیڈ کے۔ معلوم انج ہوندائے کہ  
 سپاہی دے انج انج وچوں تلوار ٹپ رہی ہے۔ اتنی تیزی دا پلتھا ہے۔ نواب  
 جوش وچ آ گیا ہے تے آکھیا بیس، ”اج تاں میڈا بھار ماما رنگا وی نہیں چا  
 سکدا۔“ اورنگ زیب نوں سدیا بیس ماما رنگا۔ جٹ دے مغز وچ شالسی نہ  
 پھٹے۔ گل امیر، وزیر بولن، ”کہیں دی جرات ہے۔ کون اٹھا سکدا ہے تیڈا  
 بھار۔“ گامن پچھیرے ہا۔ گھوڑا دھڑک کے نال کئی دے آن لایا بیس۔

آکھیا پیس، ”غازی خان! مینوں قسم ہے خُدا واحد دی۔ ایس زمین تیرے جیسے کنیں مردود پیدا کیتن تے وت کھاگئی تے اوہناں دا اج تائیں ڈکار وی نیسوں ماریا۔ جیس قدم تے توں ہُن پیا اٹھیناں ہیں ایسے قدم تے شیطان چلیا ہے تے تباہ ہو یا ہے۔ تکبر صرف اوس بک ذات نوں مچدن۔ ہو ریں کسے نوں نہیں مچدن۔ کر وی نہیں سگدا۔

ایتھوں لد گئے دل دارے دے  
 سُن ڈنکے گُوج نگارے دے  
 سٹ گئے کاغذ زارے دے  
 باقی رب ستار ہے

ایتھے کر سرداریاں سَنگھ گئے  
 اوہ سڈھیاں وانگوں رنگ گئے  
 پر چڑیاں وانگوں کھنڈ گئے  
 باقی رب ستار ہے

سلحی خانے دل بناونے  
 کوٹ قلعے محکم پاونے  
 سبھ موت سگھر بھتن جاونے  
 باقی رب ستار ہے

گامن آکھیا، ”ایس گل توں توبہ کر۔ جدوں اورنگ زیب تے گل پہنچی،

اچ اوہ بونجا صوبیاں دا مالک ہے تے توں آکھیں ماما رنگا۔“ اوس ویلے غازی خان آکھیا ہے، ”توں بے لگام ہو چکا ہیں۔ نوکرنوں لگام چاڑھنی چاہیدی ہے۔ میں کسے ویلے تیری زبان کٹ لیاں۔“ گامن آکھیا، ”زبان کٹاون نوں تیار ہاں پر سچ آکھن توں رُک سکدا ہی نہیں۔“ جاسوس اورنگ زیب دے فوج دے وچ ہن۔ اوہناں دوہاں گھراں دیاں گلاں لکھ لئیاں تے سدھے دلی دربار دے وچ اُپڑ گئے۔ اوہناں آکھیا، ”نواب غازی خان اچ یاکی ہووے یاں کل تے ایہہ بغاوت کریندا ہے۔ ایہہ ایہہ گلاں ہونیاں ہن۔“ اوہناں ساریاں دسیاں۔ زمانہ اورنگ زیب بادشاہ دا ہے۔ بادشاہ شاہ دارے نوں ماریا، سکے بھرا نوں۔ شاہ دارے نال جنگ ہوئی اورنگ زیب دی۔ شاہ دارا نٹھا، ایہہ جا وڑیا کمالیے، شہادت خان لکھیرے دے کول۔ اوس نوں آکھیوس، ”میں دارا ہاں۔ میرے واسطے دُنیا اتنی ہو چکی ہے کہ کدائیں لگن دی واہ نہیں۔ جے انعام لئیں تاں مگر جاسوس چڑھے ہوئے ہن انعام بڑے ملسنی۔ میں باغی بادشاہ دا ہاں۔ جے اللہ واسطے چاں بہائیں تاں دن محشر دے خدا دے دربار توں درجہ لے لوں۔“ شہادت خان لکھیرے آکھیا، ”میں لکھیری دے جے ہوئے تیریاں لتاں دے وچ کوہا جھڈیاں۔ بہہ جا۔ بادشاہ نال لڑنا میری طاقت نہیں پر قُربانی ایڈی دیاں بھئی لوک یاد رکھسن کہ قربانی لکھیرے دتی ہائی۔ توں کل تائیں ساڈا بادشاہ رہیا ہیں۔ اچ توں مہاجر بن کے آیا کھلا ہیں میں تینوں پناہ کیوں نہ دیواں؟“

ایہہ بہہ رہیا ہے اوہدے کول۔ بیٹھے نوں پتہ لگا ہے کہ ایہدی تاں ہستی بہت تھوڑی ہے۔ اورنگ زیب دی ایہہ ٹکر کھا نہیں سکدا۔ ایتھوں نٹھا۔ ایہہ مُلتان چوں گُزر دا، بڑیاں تکلیفاں نال بے چارہ بلوچستان اُپڑیا ہے۔ جیون خان

بلوچ ہویا ہے بلوچستان دا۔ اوہ ٹکیاں دے وچ بچھ کے آیا ہا، شاہ جہاں بادشاہ دے کول۔ ایس شاہ دارے سفارش کر کے اوہنوں چھڈ وایا ہا۔ شاہ دارے دا ایہہ خیال ہائی بھئی میں اوس کول پہنچساں، اوس پنے بلوچ کول۔ اوہ مینوں قندھار اڑائے تے قندھار یاکی ہے تے میں بچ جاساں۔ نالے وطن ہے اساڈا۔ ایہہ اتھے پہنچیا۔ انعام ایس دے دے اشتہار چھپے ہوئے ہاں۔ بلوچ ایس نوں بہا کے اورنگ زیب نوں خبرایا۔ دارا تیرا دشمن میرے کول ہے۔ شاہ دارا قتل کیتا گیا۔ جیس ویلے شاہ دارا دربار دے وچ آیا ہے۔ اورنگ زیب بادشاہ ایہدے توں پچھیا ہے، ”کتھے کتھے رہیا ہیں؟“ ایہہ لوک گور نہیں مریندے۔ اوس صاف گل کیتی۔ لکھیرے مینوں رنج آکھیا ہے تے ایس بلوچ مینوں بہایا ہے۔ مڑ پیش چاں کیتا سوں۔ بادشاہ جیون خان اُتے خوش ہو گیا تے لکھیرے اُتے رنج ہو گیا۔

بادشاہ جیون خان آل پیغام بھیجیا ہے کہ توں انعام لے۔ جیون خان او تھوں رُیا ہے۔ نال بندے اپنے لے رُیا ہے بھئی میں تہا نوں ملازمتاں لے دیویاں۔ عہدے لے دیاں۔ کمالیے اورنگ زیب بندہ گھلیا ہے ہاں لکھیریا پیش ہو جا نہیں تاں میں کمالیے تے حملہ چاں کریاں تے میں کمالیے دی اٹ اڈا کے رکھ دیاں۔ جیہڑے ویلے ایہہ پیغام کمالیے آیا ہے۔ اوس ویلے لکھیرے، وٹو، ویہنی وال، کاٹھیے، ڈب، سنپال، کھیلے، پیروکے، وسیر، چرہیڑے گل قوم کھل اکٹھی ہو گئی ہے۔ اوہناں آکھیا، ”رل کے مسائیں توں پیش ہو ای نہیں۔“ شہادت خان ایڈا راٹھ ہویا ہے۔ اوس آکھیا، ”گل سُو میری۔ ایدوں میں ایڈی بہادری دکھائی ہے کہ اورنگ زیب دا مفروز جیہنوں دُنیا وچ کسے نہیں بہایا۔ میں بہایا ہے تے مینوں یقین ہے کہ میں اورنگ زیب بادشاہ دا

بھار نہیں اٹھا سکتا تے میں اپنی ہک جان دے پچھے قوم دے بچے کو ہا چھڈاں  
 تاں میرے جیڈا وی کمینہ کوئی نہیں۔ نہیں مینوں اللہ نوں سو نیو میں پیش ہوونا ہے۔  
 میں دوئی دُنیا نوں کیوں مرا ئیں؟“ شہادت خان جیس ویلے کمالیے چوں نکلیا  
 ہے اِنج برادری کڈھیا ہے جیویں لاش کڈھیندی ہے۔

پنجرے وچ تقدیر دے، گئے بعض مُسافر پھاس  
 اِنج نکل گئیاں نیں دو الیاں، چاں کیتے وطن اُداس  
 وت نہیں چھاویں آونا، نہیں وسنا کھیوے واس  
 نہیں بہنا رل سہیلیاں، نہیں کرنے عدل تپاس

ایہہ فوج دی حراست وچ ہے۔ قید ہو کے آ گیا ہے۔ جیون خان بڑی  
 دھوم دھام نال آیا ہے۔ قُدرت اللہ تعالیٰ دی ہے غیب اوسے دے کول ہے۔  
 پردہ غیب دا تاں اوہو جاندا ہے اگانہہ انجام کیہ ہے؟

اورنگ زیب بادشاہ دے پیش ہک کیس ہو گیا ہے۔ اوس مُقدمے دے  
 وچ ترائے بندے۔ اوہناں بندے کنیں قتل کیتے۔ بادشاہ تریئیں نوں موت سزا  
 سنا چھڈی۔ ہک عورت اوہناں دی وارث، اوس اپیل کیتی۔ اکھے، ”بادشاہ توہیں  
 عدالت ٹھیک کیتی ہے۔ دن قیامت دے عدالت ہو رہنی ہے، عدالت دے اُتوں  
 رحم دی اپیل کرنی ہے، گل مُجرم۔ مولا گھس گئے ہاں مانی چاں دے۔ شہنشاہ  
 سلامت! ترائے موت سزا کیتے نی، میں رحم دی اپیل کرینی ہاں۔ خُدا وی  
 اساڈے گناہ وکھ کے ماف کر چھوڑیندا ہے۔ ایہناں تریئیں وچوں ہک اللہ واسطے  
 مینوں دے چھڈ۔ ہک میرا پُتر ہے۔ ہک میرا بھرا ہے۔ ہک میرا گھر آلا ہے۔  
 نہیں تاں مینوں وی موت سزا کر مُد میری تاں زندگی چچھے کائی نہیں۔“

اورنگ زیب سخت آدمی ہو یا ہے پر اوس عورت دیاں گلاں وچ اورنگ

زیب نوں ترس آ گیا ہے۔ بادشاہ آکھیا، ”چلو پک اٹھالے۔“ گھر آلا جوان  
 پیس، پُتر چھو کرا پیس، بھرا بڈھا پیس۔ عورت آ کے بڈھے دی بانہہ نپ لئی۔  
 ”اٹھی اُتانہہ۔“ بادشاہ پُچھیا، ”کیہ لگدا ہیہی؟“ اکھے، ”بھرا۔“ اوس آکھیا،  
 ”بڑی بے وقوف ہیں۔ پُتر جگر دا ٹگڑا ہا۔ اوہنوں مہیوں اٹھایا۔ گھر آلا رفیق  
 حیات ہا۔ اوہ وی مہیوں اٹھایا۔ بھرا وی کائی شے ہوندی ہے تے بڈھا بھرا نپ  
 لیا ہیہی۔“ عورت بولی، ”بھرا تیری نظر نال شے کائی نہیں بادشاہ سلامت! توہیں  
 دارا مروایا ہے، مراد مروایا، شجاع مروایا، سلیمان شکوہ مروایا۔ توہیں تختہ چا دتا  
 اپنیاں دا۔ میری عمر ہے جے میں شادی کراں تاں گھر آلا بن جاسی۔ میری عمر  
 ہے جے بچہ جائیں تاں پُتر ہو جاسی۔ نہ ماں پیو اکھیاں ہودنا ہے نہ بھرا جمن  
 ہے۔ اج میں پیکا بوہا اپنے ہتھ نال بند کراں۔ ساری دُنیا پک لاپے چاں کر۔  
 میں میلکھ دیاں پیڑھیاں ودھائیں تے اپنے پیو دا ناں برباد کراں۔“ بادشاہ  
 دیاں ہنجوں فر فر کیتی۔ ”ہائے! میں کیہ کیتا؟“ اوس ویلے پچھو تاء لگا سوں۔  
 بادشاہ وارٹاں نوں گھروں راضی چاں کیتا تے اوہدے تریہیں بری کر  
 چھڈ یوس۔

گنگا اُلٹی ویہہ گئی۔ جیون خان انعام لین کان آوندا پیا ہے۔ لکھیرا سزا  
 ہون پیا آوندا ہے۔ جیون خان آیا ہے۔ اگلے بادشاہ طواف کرویندے ہان  
 تخت دا، پھیری لینی پوندی ہائی تخت دے آل دوالے۔ اورنگ زیب دا قانون ہا  
 السلام علیکم توں اُتے مت کوئی مینوں خطاب نال بلائے۔ جیون خان صرف سلام  
 دے کے بہہ گیا۔ ”ہلا بھئی دارا گیا تیرے کول؟“ ”جی گیا۔“ ”اوہ کیہ چاہندا  
 ہا؟“ ”اوہ چاہندا ہا کہ مینوں قندھار پہنچا۔ میں سوچیا بادشاہ دے پنچے وچوں نہ  
 نکل جاوے، میں اوس دیاں بڑیاں مہمانیاں کر کے وساہ کے سنانوں خبرایا ہے۔“

”اچھا، بیٹھ جا۔“ بہہ گیا۔ ایدوں سنگلاں دے کڑکار آئن۔ تکیا ہے تاں بیڑیاں وگیاں ہونیاں ہین۔ ہتھکڑیاں لگیاں ہونیاں ہین۔ گل دے وچ طوق ہے۔ سینہ بہ سینہ روایت ہے شہادت خان بہوں اُچے قد دا بندہ ہويا ہے تے اکھ بہوں موٹی ہوئی بیس۔ جھک کے آکھلو رہیا۔ اکھے، ”السلام علیکم۔“ ”وعلیکم السلام۔“ بادشاہ پُچھیا، ”کیوں لکھیریا تیرے کول گیا دارا؟“ اکھے، ”گیا۔“ ”اوس کیہ آکھیا؟“ ”اوس آکھیا، میں سائل ہو کے آیا ہاں بھکھیا منگنا ہاں اپنی جان دا بے پیش چاں کریں تاں انعام لے لے۔ تے رب داناں منیں تاں مینوں بہا لے۔“ ”توہیں کیہ آکھیا؟“ میں آکھیا، میرے واسطے توں انجیں ہیں جیویں تخت تے بیٹھ ہويا ہیں۔ بادشاہ نال میں مقابلہ نہیں کر سکدا پر لکھیری دے جے ہوئے تیری لت پٹھ نہ کوہائیں تاں مینوں لکھیرے دا خون نہ آکھیں۔“ ایہہ سگوں لفظ اگے دربار وچ دارا سنا چکا ہا۔ بادشاہ آکھیا، ”ایہہ گُوڑ کیوں مریوئی۔ توہیں کوئی اِنج کرنا ہا جے میں دھا کے آواں ہا؟“ اوس آکھیا، ”شہنشاہ سلامت! توہیں ہر بندہ حرامدا سمجھیا ہويا ہے، ایس پنے بلوچ روک۔ ایس توں نہ جوں بھار چیندا تاں اگا نہہ تاں جاوَن دیندا۔ کدی مہمان دی کسے حلالی پھدھ کے پیش کیتن۔ شہشاہ سلامت! عدالت نہیں رہی ہوئی۔ نہیں تاں ایہہ تیریں لیکھ کرن دے قابل ہے، مہمان پیش کریندا ہے۔ دارا مینوں ہُن چاں وکھاتے وت اوس تے ہلا چاں کروا۔ جے میں سبھ توں پہلاں جان نہ دیواں تاں مینوں لکھیری دا پچہ نہ آکھیں۔“ تاں بادشاہ دیاں ہنجوں شپ شپ کیتی ہے۔ بادشاہ آکھیا، ”جیون خان موت سزا۔ مینوں سمجھ آگئی ہے کہ بھراواں تے ایہہ وقت وی آوند ا ہے، جیہڑا ہُن اساتھے آیا کھڑا ہے۔ جییں ویلے مادری خون چھکے تاں ایہہ وقت بھائیاں لڑیاں ہوياں تے وی آوند ا ہے۔ بھیریا توہیں اوس موقعے تے پیش کیتا

ہے۔“

”شہادت خان۔“ اکھے، ”جی۔“ ”میرے پُتر دے گھر ہے شاہ دارے دی بچی۔ اوہ مینوں آہدی ہے ہک واری چاچا مینوں ملا چاں۔“ شہادت خان آکھیا، ”شہشاہ سلامت! میں چاچا اکھواون دا حقدار تہ ہام جے دارے دے نال میری لاش چچی کے آوندی۔“ ”نہیں۔“ بادشاہ آکھیا، ”میں تینوں حکم دینا ہاں توں جا۔“ ایہہ اوہناں پردیاں وچ جا رہیا ہے جیہناں دا کوئی غیر مرد گھرا نہ وکھ سکدا۔ حلالی دیاں پیڑھیاں کھاوندیاں ہن تے حرامی دے اٹھ پہر ہوندن، اتنا فرق ہے۔ ایہہ آ گیا ہے ستریں۔ مغلیہ محلاں نوں وڑیا ہے تاں آہدن گہرام مچ گیا ہے۔ کہا پئے گئی ہے۔ انجیں جاتا شہزادیاں کہ شاہ دارے دی لاش ہُن آئی ہے۔ گل شہزادیاں نکل آئیں۔ شاہ دارے دی دھی سر نوایا ہے تے آکھیا، ”تسیں جوں غریب ہائے تے شاہ دارا مغللاں وچوں امیر ہو یا ہے۔ اوہ کھاندا کیہ ہوسی؟ سوندا کیویں ہوسی؟ بہندا کیویں ہوسی؟ رہندا کیویں ہوسی؟ تہاڈے کول تاں اوہدے مرتبے دے مکان وی ناہن؟“ اوہ روکے پچھدی ہے۔ ایہہ روکے دیندا ہے۔

جیس ویلے لکھیرا گل ختم کر رہیائے تاں جیب وچ ہتھ ماریوس تاں تھوڑے جیسے پیسے نکلے اکھے، ”بچہ! ایہہ روٹی ہے تیری۔“ تاں ہک نور کر چالاک جیہی بولی ہے اکھے، ”شودھا جٹ جوں ہو یوں توں اُلٹا کائی شے منگ۔ توں ایہناں نوں کیہ دیون جوگا ہیں؟“ اوس ویلے بولیا ہے لکھیرا، ”بھین جی! تسیں ٹھیک پے آہدے او۔ بھاویں پکے بھکھے ہوون تاں وی دیون حق ہے دھیال نوں، تے لینا ایہناں دا حق ہے۔ میں تاں لاگ ادا کر رہیا ہاں۔ ہور کیہ دیون جوگا ہاں؟“



شالا زندگی ہووے دراز تیری،  
 بھیناں جیندیاں ہن بھانیاں دے بھار اُتے  
 دھیاں ہمیشاں پیکے بھار تے جیندیاں ہن تے میں تاں اوہ وکھا رہیا  
 ہام۔ ایہہ روٹی ہے تیری۔“ شہزادی روون کڈھ ڈڑھی ہے تے کاوڑی ہے اوس  
 نوکر نال۔

م۔ مُدت گزری راہ نکدیاں نوں، اجے تیک نہ یار دلدار آیا  
 جینناں بیلیاں دے نکھڑ جان بیلی، اوہناں کدی نہ چین قرار آیا  
 سڑے باغ کدی نہ ہرے ہوندے، بھائیں جیڈا وقت بہار آیا  
 گھر پٹھری نوں کوئی آن آکھے، علی حیدرا اوہ تیرا یار آیا  
 ”بھیڑیے مُدت ہوگئی ہے تے پیکے گھر داناں اج میں سُنیا ہے تے  
 توں بھولن کڈھ ڈڑھی ہیں۔“ اوس بسم اللہ کر کے پیسے لے لئے۔

لکھیرا نکلیا ہے۔ اورنگ زیب آکھیا، ”انعام منگ۔“ اوس آکھیا، ”میں  
 موت سزا ہونا ہائی، ایہہ انعام تھوڑا ہے۔ اودوں آکھیا ای دھی نوں مل آ۔ ہُن  
 دھی سُنے کہ میرے پیو دے قتل دا انعام میرا چاچا لیندا کھلا ہے۔ بس میں ویندا  
 ہاں تے میرے اُتے پک ٹکا لینا وی سُر ہے۔“ ایڈا راٹھ ہويا ہے لکھیرا، ہٹ  
 کے گھر لگا گیا ہے تے انعام نیسوں لیا۔

بادشاہ اجے بیٹھا ہائی تے اودوں اپلی اڑن۔ نواب غازی خان تینوں  
 ماما رنگا سدیندا ہے اوہ اج بغاوت کرے یاں کل۔ بادشاہ ایسے غصے وچ اٹھیا  
 ہے۔ محلاں اپنیاں نوں آوندا پیا ہے۔ پہلا گل جوں ہاس تاں اوہ بہادر شاہ دا۔  
 بہادر شاہ اپنی سوانی نوں ہاسے محول اچ چاٹ مار کے دروازے آل بھٹتا ہے  
 تے مگروں اوس شہزادی زیور لاه کے وگایا ہے۔ اوہ وزنی زیور ہا۔ بہادر شاہ دی

کنڈ اچ لگا ہے ڈاڈھا۔ بہادر شاہ بھائیں کھلا ہے۔ اوس آکھیا، ”اچ تاں پیو دا ویر یاد دیوایا ہئی۔“ شہزادی روون کڈھ ڈڑھی ہے تاں بہادر شاہ کجھ گھٹیا ہے۔ اوس آکھیا، ”میرا پیو نہ۔ تئیاں دا ہا۔“ ”نہیں روندی ایس توں ہاں، مرتوں وی گیا ہیں۔“ ”میں کیویں مر گیا ہاں؟“ اکھے، ”بادشاہ اورنگ زیب دروازیوں وڈا پیا ہا تیرے ایہہ لفظ سُن کے پچھا نہہ ہٹ گیا ہے۔“ اورنگ زیب اسی سال جیویا ہے پر کسے ہسدانہیں ڈٹھا۔ ایہہ گلاں کریندے کھلن کہ باہروں جلاداں آن کے آواز دتی ہے، ”بہادر شاہ حاضر۔“ محلاں دے وچ کہا پئے گئی ہے کہ ایہہ مری گیا ہے۔ بہادر شاہ نوں گرفتار کر کے جلا لے کے تڑپین، دربار نوں۔ تاں شہزادی خواجہ سرا نوں بلایا ہے۔ شہزادی رُقہہ دتا ہے کہ چورگلی چوں جا کے جلدی دربار وچ پہنچ، بہادر شاہ دے آون توں پہلاں۔ خواجہ سرا دوڑ کے آیا ہے تے آ کے بادشاہ دے اگے رُقہہ رکھیا ہے۔ شہزادی لکھدی ہے:

اے شہنشاہ سلامت!

میرا پیو مریوئی، بھرا مریوئی، ماں میری سفران وچ مرگئی۔ رہندا ایہو پک ہے جے ایس نوں مارنا ای تاں مینوں پہلے موت سزا کر۔ میرا ہور دُنیا وچ کوئی نہیں۔ ایس تاں صرف مینوں یاد دیوایا ہے کہ میرے پیو تیرے پیو نوں ماریا ہا۔ توں خود مارن آلا ہیں تینوں سزا کائی نہ ہووے تے بہادر شاہ نوں سزا ہووے۔ ایہہ کتھوں دا قانون ہے؟

اتنے نوں بہادر شاہ پیش ہو گیا۔ بادشاہ آکھیا، ”بھراواں نالوں مینوں توں پیارا کوئی نیہوں۔ میں تینوں کدی ماف نہ کراں ہا، پر ایس غریب تے مینوں ترس آ گیا ہے۔ ایہہ وی مردی ہے۔ ہُن مریندا نیہوں۔ میں تینوں مُہم گھتتاں ہاں۔ غازی خان نواب نوں بے فوجاں تے بے وزیراں دے قید کر کے لے

اودوں لکھاں دی پلٹن لے کے چڑھیا ہے، تے ایہہ مُغلاں دے بائیں  
 ہتھ دا کھیل ہا۔ جا کے اوس سارا دربار بچے غازی خان قید کر لیا ہے۔ گرفتار کر  
 کے حُکم دتا ہے۔ اکھے، ”گامن کبھڑا ہے؟“ اکھے، ”جی! میں ہاں۔“ بہادر شاہ  
 گھوڑے توں اُتریا ہے۔ بہادر شاہ آکھیا، ”ایس دے اُتے سوار ہو جا۔“ اوس  
 آکھیا، ”ایہہ گھوڑا تے میری جگہ دیہو چاں، چند دیہاڑے کلڑا کھادھا ہے ایس  
 بلوچ دا۔“ اوس آکھیا، ”میں نہ اِنج کر سکدا ہاں نہ اِنج کر سکدا ہاں۔“ ایہہ  
 نمانا گامن بڑا پریشان بھئی غازی خان قیدیاں دے وچ ہے تے ایہہ شاہی  
 مہمان مگر مجبور ہے۔ ولی دربار نوں آ وڑن تاں بادشاہ نے آکھیا، ”غازی خان  
 دا ڈیرا ضبط۔ نوابی توں معزول تے ایہہ گل ہے کہ میں ایہوں ویکھنا ہی نہیں  
 چاہندا۔ عمر قید سزا۔ تُو وچ جیل دے۔“

گامن وی دربار دے وچ بیٹھا ہا۔ پچھیا ہے بادشاہ، ”گامن کون ہے؟“  
 اکھے، ”جی، میں ہاں۔“ اکھے، ”تیری مشہوری کیوں ہے؟“ اوس آکھیا ”جی،  
 ترائے تعریفاں ہن میرے وچ۔ میں بولنا چنگا جاندا ہاں۔ کھاونا پیونا جاندا ہاں  
 تے اُٹھنا بہنا جاندا ہاں۔“ بادشاہ آکھیا، ”ایہہ ترائے چیزاں ہر کوئی جاندا ہے  
 تیرے وچ وکھریاں ہن۔“ اوس آکھیا، ”جی ہاں، بولنا سچ دا تے بندے گُوڑ  
 مریدن۔ کھاونا حلال تے حرام کھاویدن۔ بہنا تمیز دا ہاتے بد تمیز ہن لوک۔  
 اپنی جگہ نہیں سیہاندے۔“ بادشاہ ایہوں غالیچے اُتے جگہ دتی ہے۔ بادشاہ آکھیا،  
 ”غالیچے چھنڈو۔“ ہر کوئی کھلا۔ گامن بیٹھا رہیا ہے۔ بادشاہ آکھیا، ”توں نہیں  
 اُٹھیا بھائی؟“ اوس آکھیا، ”میںوں پتہ ہے پرانی شے منگیدی ہے۔ میں غالیچے  
 اُتے لت دتی ہی کدی نہیں۔ ہمیشاں میں اپنی لت اُتے غالیچے دے بہنا آں۔“

بادشاہ آکھیا ”چلو تینوں شاہی دربار دی گرسی دا حقدار کیتا جاندا ہے۔“ شاہی دربار دی گرسی دا معنا ہوندا ہے، اوہنوں شاہی دربار وچ بولن دی اجازت ہوندی ہے۔

گامن نوں ڈھیہونا گرسی دا تے شالا جٹ دا جھا کا نہ لہے۔ درباریا کوئی امیریاں وزیر گل کرن لگے فلانی جگہ تے ایہہ واقعہ ہو گیا ہے۔ گامن آکھے، ”ڈٹھا ای؟“، اکھے، ”نہیں۔“ ”جھوٹھ وی تاں ہو سکدا ہے۔“ کوئی گل کرن لگیاں آکھے چونکہ یاں پُٹنا نچے۔ گامن آکھے، ”ایس گل کیہڑا فائدہ دتا ہے عبارت نوں، ایویں فضول گل کر کے بادشاہ دا وقت ضائع کیتا ہی۔“ بادشاہ خود ایسے طبیعت دا ہا۔ آن درباریاں دی تباہی کیتی اوس۔ اخیر درباریے تنگ آ گئے۔ کوئی بندہ گل نہ کرے۔ کچھری چُپ بھئی گامن بیٹھا ہے۔

گامن روٹی کھاووندا ہا وچ لنگر شاہی دے۔ لنگر شاہی دے وچ مریلا خان پہلوان ہا بادشاہ دا۔ اوس چوتا وٹیا ہووے۔ مالشیا ہويا ہووے۔ اوہ لگا آوے کسے دے اگے، دوویں ہتھ ہک ہتھ نال نپ کے اوہدے اگوں کھانا کھا لوے۔ کھانا کھا جن دی تاں ایڈی کائی ناہی، اوس دے پچھے چاگھ لگ جاوے۔ گامن ویکھدا رہوے تے آکھے خُدا یا بچائیں ایس توں۔ ہک دیہاڑے بادشاہ اشارہ کیتا مریلے خان نوں۔ گامن دے اگے آ کے اوہ بہہ رہیا ہے۔ گامن ہٹدا ویندا ہے تے کھانا اگانہہ کریندا ویندا ہے۔ مگروں اوس نوں بچ ہائی۔ اوس دوویں ہتھ گامن دے نپ لئے۔ گامن آکھیا، ”پہلوان! میری پک گل سُن۔ میں فوجی آں توں پہلوان ہیں کشتی دا۔ جتھے تیرا دنگل ہوندا ہے اوتھے دُھوڑاں اڈدیاں ہن۔ جتھے میرا دنگل ہووے اوتھے فوارے خون دے چلدن۔ جتھے تیرا دنگل ہووے اوتھے تاڑیاں دے کڑکار ہوندن۔ جتھے میرا دنگل ہووے اوتھے

بھیریں نوں سٹاں وگدیاں ہن۔ جتھے تیرا دنگل ہووے اوتھے عطر چھڑکائے  
 جاعدن۔ جتھے میرا دنگل ہووے اوتھے مُرداراں دیاں بوئیں آوندیاں ہن۔  
 تیرے میرے کسب دا بڑا فرق ہے۔ میں تینوں آہناں ہاں کھانا کھا۔ توں میرے  
 ہتھ نپ گیا ہیں۔ ہُن ترکڑا رہیں، میں ہتھ چھڑاؤنے ہن۔“ گامن بھٹھا ماریاتے  
 اوس ہتھ چھڑا لے۔ اوس خونی خفا گردن نوں ہتھ گھتیا۔ گامن دی تلوار پئی ہائی،  
 میان وچوں پھک کے اوہدا پٹ اپنے پٹ تے چاڑھیا تے اُتوں دھسی تلوار۔  
 اوہدے پٹ وچوں لگھا کے اپنے وچوں وی لگھا کھلاری۔ بادشاہ وی بیٹھا ہا۔  
 جوں مار کے تکیا تاں جیویں ایہہ چھوہر پھلیتے کھیڈن۔ دوہاں پٹاں وچوں تلوار  
 باہر نکلی تاں اوہ چیکیا تے گامن کھاوے بیٹھا تے آکھے، ”کھا، کھج دی کھج، میں  
 تینوں پہلے آکھیا ہے جتھے میرا دنگل ہووے اوتھے خون دے فوارے اُڈدے  
 ہوئے تے جتھے تیرا ہووے اوتھے دھوڑاں اُڈدیاں ہن۔ تیرا میرا ہک میدان  
 ہے۔“ بادشاہ دوہاں نوں ملہم پٹیاں کرائیاں تے مریدا لنگر چھوڑ گیا تے وت نہ  
 آیا۔ مار کے آکھیا، ”شکر ہے رب دا ایہہ بلوچ آیا ہے نہیں تاں اسیں تاں اُڈ  
 گئے ہاسے۔“

گامن نھاون ویندا ہاکھوہ تے۔ درباریاں ساریاں نوں ایہہ بھئی ایہدا  
 گُوڑ کڈھیے۔ کھوہ آ لے نوں اکھیونیں، ”جدوں نھا کے ہٹے کھوہ چھڈ دیویں۔“  
 ”گامن نھاون گیا ہائیں؟“ اکھے، ”ہا۔“ ”کھوہ وہندا ہا؟“ ”نُریا ہام تاں  
 وہندا ہا۔ ہُن اللہ جانے۔“ مطلب ہے اوہدی فطرت وچ گُوڑ نہ۔ درباریے  
 بڑے تنگ بھئی نہ آپ کائی گل کریندا ہے نہ کرن دیندا ہے۔ بادشاہ نوں  
 درباریاں آکھیا، ”ہک پنجاب دا جٹ آیا ہے تے سارے دربار دلی دے نوں  
 ہنگال گیا ہے۔ آپ ایہہ گل کریندا کوئی نہیں۔ ایس توں کائی گل سُن۔ اسیں

ایہوں پکڑیے۔“

بادشاہ آکھیا، ”اج رات نوں دربار لیندے ہاں۔ میں آکھساں اج میرا کہانی کان دل ہے۔ میں اوس ویلے تسانوں آکھساں۔ تسانوں ننگ گھوڑ مریائے۔ گھوڑ توں ایہہ کڑپدا ہے۔ ایس تسانوں ٹوکنا تے میں آکھنا توں سنا۔“ اوہناں آکھیا، ”ایہہ بھی ٹھیک ہے۔“ بادشاہ حکم دتا اج رات دربار لاونا میرا کہانی کان دل ہے۔ گامن وی وچے۔ ”ہلا۔“ وزیر نوں بادشاہ آکھیا، ”کائی کہانی سنا۔“ اوس آکھیا، ”جی دیو ہویا ہے جی ہک دیو۔ کھوہ جیڈا مونہہ۔ تندور جیڈیاں ناساں۔“ تاں گامن آکھیا، ”لاحول ولا..... سوہریا کیڈا گھوڑ دکھیا ای۔“ ”اچھا۔“ بادشاہ آکھیا، ”توں نہ کر۔“ دُوئے نوں آکھیا، ”توں کر۔“ اکھے، ”ہک شہزادی پنج پھلاں رانی، سبحان اللہ۔ گل کرے ہاتاں مونہہ وچوں پھل پنج ڈھاہندے ہاں۔“ گامن آکھیا، ”پھل سد بندا ہے سوہنیاں گلاں نوں۔ سوہنیاں دے مونہوں رپھوں ڈھاہندیاں ہن۔ کدی پھل وی ڈھٹھن۔“ بادشاہ آکھیا، ”مڈھوں گل توں سنا، گامن۔“ اوس آکھیا، ”جی میں تاں کہانی کہتی کدی نہیں۔“ بادشاہ آکھیا، ”میں سن کے چھوڑنی ہے۔ دوہیاں نوں کرن نہیوں دیندا۔“ ”چلو جی میں سنیندا ہاں۔“

گامن آکھیا: جی اللہ تعالیٰ اپنی پہچان واسطے ہک قلعہ تیار کیتا ہے۔ جیس داناں بدن کوٹ رکھیا ہے۔ حکم دتا ہے رُوح بادشاہ نوں کہ ایس دی جا کے آبادی کرے۔ پنج مہینے دا بچہ پیٹ وچ ہووے تاں آبدن روح پوندا ہے۔ بچہ جدا ہے مگر اوہنوں ہوش نہیں مورتاں وچ ودال دھدا ہے۔ گامن آکھیا، اللہ تعالیٰ حکم دتا ہے عقل وزیر نوں کہ ایہدے نال توں رل، تاں آباد ہوندا ہے بدن دا کوٹ۔ عقل وزیر آ گیا ہے۔ بدن کوٹ دا قلعہ رونق پکڑ گیا ہے۔ دیہاڑیاں

توں بعد رُوح بادشاہ نوں لڑکا ڈھیہا ہے، جیس دا ناں دل بادشاہ رکھیا گیا ہے۔ کنھاں دناں دے بعد عقل وزیر نوں لڑکا ڈھیہا ہے، اوہدا ناں نظر وزیر رکھیا ہے۔ رُوح بادشاہ حکم دتا ہے۔ ”نظر وزیر۔“ اکھے، ”جی۔“ ”توں میرے پُتر دل بادشاہ دے نال جا۔ شرع دی مسجد ای وچ شعور قاضی بیٹھا ہے۔ اوہدے کولوں علم فقر دا پڑھو۔“ ایہہ دوویں لڑکے آگنن پڑھن کان علم فقر دا۔ شعور قاضی اوہنوں علم فقر دا پڑھایا ہے۔ جیہڑے ویلے تحصیل علم دی طے کر گئے۔ اوس ویلے شعور قاضی رُوح بادشاہ دے دربار وچ آ گیا ہے کہ مینوں انعام دیوے۔ لڑکے تْساڈے پاس ہو گنن۔ رُوح بادشاہ شعور قاضی نوں اسرار ربی دیاں خلعتاں عطا کیتیاں ہن۔ اوہ خوش ہو کے دُعائیں دیندا چلا گیا۔ رُوح بادشاہ حکم دتا ہے، ”ہلا تسانوں پتہ ہے علم فقر دا کیوں پڑھایا گیا ہے؟“ اکھے، ”تْساں دوواں جا کے توبہ دا قلعہ آباد کرنا ہے۔“ اوہناں دوہاں پچیاں آکھیا: پھیر سانوں سامان سفر تاں دیو۔ ”ہاں لوو۔“ ہوا دا گھوڑا آتش دا کوڑا۔ آبرو دے کپڑے عزت دے ہتھیار دے کے اوہناں نوں بندگی دے رستے اُتے لایا ہے کہ ایہہ سدھا وچ توبہ دے قلعے وچ جاسی۔

ایہہ چلدے چلدے توبہ دے قلعے وچ آ گئے۔ جوں تکیا ہے تاں توبہ دا قلعہ ہے۔ استغفار دا دروازہ ہے۔ خوف دا تخت ہے۔ حیا دی گُرسی ہے۔ نیکیاں دی آبادی ہے وچ۔ دل بادشاہ آ کے خوف دے تخت تے بہہ گیا ہے۔ نظر وزیر حیا دی گُرسی اُتے۔ رعایا اکٹھی کیتی ہے بھئی میری شاہی وچ خوش ہو۔ اوہناں آکھیا، ”تھیں مر گئے ہاں۔“ ”کیوں؟“ اکھے، ”نستر (شیطان) کو توالتے فساد (نفس) پیادہ سن نہیں دیندے اسانوں۔“ دل بادشاہ غضب وچ آ گیا ہے۔ اوس آکھیا، ”ہمت پیادہ۔“ اکھے، ”جی“ اکھے، ”دوہاں نوں گرفتار کر کے

میرے کول لے آؤ۔“ نستر کو تو ال نس گیا۔ ہمت پیادے جا کے فساد پیادے  
 نون نپ لیاندا۔ حکم دتا ہے دل بادشاہ، ”مار ایس نون جھانبر سلوک دی۔“ جیس  
 ویلے ہمت پیادہ اوہنوں سلوک دیاں جھانبر اں مارن لگ پیا ہے تاں اوس حال  
 حال دھک دتی۔ اوہناں آکھیا، ”اگے توں فساد گھنڈا رہیا ہیں تے اج سزا توں  
 حال حال۔“ اوس آکھیا، ”میں کوئی پڑ توں نہیں پیا گھنڈا حال حال۔“  
 ”ہلا۔“ ”حال حال تے ایس توں کریناں ہاں کہ ایس دربار وچ انصاف کوئی  
 نہیں۔“ دل بادشاہ پچھیا، ”انصاف کیوں نہیں؟“ ”جے ایہہ تیرے کجھ لگدے  
 ہوندے، ایہہ توبہ دے قلعے آلی رعایا تاں حسن بادشاہزادی کول شیشہ آب  
 حیات دا ہے، ایہہ تینوں اوس کولوں لے دیویندے تاں جوں تینوں موت نہ  
 آوے۔“ دل نما نا دو شہیں دا بہت شوقین ہے۔ حُسن دا وی تے ہمیشاں زندہ  
 رہن دا وی۔“ دل بادشاہ آکھیا، ”ہمت پیادہ جا کے اوہنوں آکھ تینوں دل  
 بادشاہ آہدا ہے کہ شیشہ آب حیات دا دے۔ نالے میرا سلام دیویں۔“

ہمت ٹر پیا۔ دروازے دے وچ آیا ہے تاں زُہدی فقیر رب رب کریندا  
 بیٹھا ہے، آونا ہے جینے میرے نال، عشق دے قلعے وچ، حُسن بادشاہزادی کول۔  
 اوس آکھیا، ”دل نال ہوندا آواں ہا۔ پر تیرے نال تاں نہیں آویندا۔“ ٹر پیا۔  
 رستے اُتے آیا ہے تاں مشقت فقیر بیٹھا ہو یا ہے۔ آونا ہے میرے نال۔ اکھے،  
 ”کدے؟“ اکھے، ”عشق دے قلعے وچ حُسن بادشاہزادی کول۔“ ”دل نال  
 ہوندا تاں آواں ہا پر تیرے نال نہیں آویندا۔“ اگانہہ آیا ہے تاں تکیا ہے کہ  
 سرحد ہے جیہڑی توبہ تے عشق دے قلعے دے درمیان ہے۔ اک دریا پیا لگھدا  
 ہے۔ اکھے علامت دی ندی وچ ملامت دی کشتی ہے۔ سولاں دے وجہ ہن۔  
 آہیں دے چپے ہن۔ وسوسہ ملاح ہے۔ ہاں بھئی جیس چڑھنا ہے۔ ہمت چڑھ



بیٹھا ہے۔ جیس ویلے پارٹین تاں صبر دیاں چوہتریاں آکھیا، ”ہلا بھئی ونوار دے کے جا۔“ ہمت آکھیا، ”بھلا کدی ہمت وی ونوار تے آیا ہے۔“ ”ونوار دے دے، میں بادشاہ دا گھلیا ہو یا ہاں۔“ صبر دے چوہترے اٹھے تے اوہناں ہمت نوں چاں ڈھاہیا تے آدمیت دے کاٹھ چاں مارے۔ اوہ رووے پیا۔

صُح دا وقت ہے کہ حُسن شہزادی دے دو بھائی ناز تے نیاز ایہہ علامت دی ندی دا شکار ہڈھے آدین۔ اگوں تکیا نہیں تے ہمت روندنا پیا ہے۔ اوہناں نوں ترس آیا۔ اوہناں اوہدی آدمیت دی کھی چاں کڈھی۔ ہمت بھج وگیا۔ عشق دے قلعے دے باہر وار تکیا ہے تاں درداں دا کھوہ ہے۔ آپہں دے لوٹے ہن۔ وچھوڑے دی ماہل ہے۔ فراق دی گادھی ہے۔ نیناں دی جوگ ہے۔ عشق ملنگ گادھی اُتے تردد دے باغ نوں پانی دے رہیا ہے۔ تردد دے باغ وچ مُراداں آراہن ہے۔ اوہ پھل چندی ودی ہے شہزادی کان۔ ہمت اوس کول آیا ہے تے آکھیوس، ”میںوں دل بادشاہ گھلیا ہے آب حیات دا شیشہ لین کان۔“ اوس آکھیا، ”میں کیہ جاندی ہاں دل کتھے ہوندا ہے؟“ دل ہمیش مُراد دا مُتھاج ہوندا ہے کہ میری مُراد بچے۔ ہمت جھگڑا کریندا پیا ہے تے حُسن بادشاہزادی اپنے محل وچ بیٹھی ہے۔ عشق دے قلعے وچ اوس سد ماریا ہے۔ سہیلیو، چھ سہیلیو۔ سکھ، خوشی، سلامتی، حیرت، صحت تے غیرت ایہہ بھج کے آگئین۔ اکھے، ”درداں دے کھوہ توں پانی بھر لے آؤ۔“ گاگراں اخلاق دیاں اوہناں دے سراں اُتے ہن۔ اوہ چلدیاں درداں دے کھوہ تے وگ گئین۔ اگانہہ اوہناں تکیا ہے تاں ہمت جھگڑدا کھلا ہے مُراداں نال۔ شہنشاہ صاحب! گامن آکھیا، غیرت نوں غیرت آئی ہے اوس ہمت نوں درداں دی ماہل نال بھہ کے وچھوڑے دے کھوہ وچ لکا دتا۔ پانی بھر کے گئیاں ہن تاں شہزادی پچھیا، ”حیرت کیوں حیران

ہیں؟“ اوس آکھیا، ”کیڈا غلط کیتا ہے؟“ ”کاہیں؟“ اکھے، ”ایس غیرت۔  
 ہمت نما نال بادشاہ دا بھہجیا ہو یا مراداں نال لڑدا کھلا ہا۔ ایہہ گئی ہے، اوہنوں  
 درداں دی ماہل نال بنھ کے درداں دے کھوہ وچ لکا چھڈیا سوں۔“ شہزادی  
 آکھیا، ”گھوہ وچوں کڈھ لے آ۔“ اوس کڈھ لیاندا۔ بلا ”گل دس“۔ ”جی، دل  
 بادشاہ بھہجیا ہے شیشہ ہے تیرے کول آب حیات دا۔“ اوس آکھیا، اوہنوں جا  
 کے آکھیں:

وٹھن والی دی کائی چال اوٹی  
 بنھ کے ٹلا ٹھیل پئی ہکلی  
 اگوں پتن، سیساراں، شینہاں چنڈ جا ملتی  
 آپ توں آویں وے ہور کوئی نہ گھلیں  
 ساڈی سک نہیں لہندی باجھ کیتیاں گلیں

سُنی وتی ہاں بھٹری دا ڈھول ٹراؤ ہے  
 دسی نہ جاندا دیس کیہڑے نوں جاؤ ہے  
 ودا ودعے کریندا ہے وت نہ دا آؤ ہے  
 تیر وچھوڑے دا تن میرے نوں لاؤ ہے

جے توں چلیا ہیں تاں ہنجوں نالے موں چلیاں  
 میں درد رنجانی دیاں، نہیں رہندیاں ٹھلیاں  
 میں آتن موہرا ہے، سُنج دسن گلیاں  
 کدی پرت مہار نوں سیجاں مان سکھلیاں

گھوک وے رنگلا، تیرا کاٹھ کویہا  
ایدوں کوئی سد مریندا، میرے سجاں جیہا  
پک ہور چاں ماریں، اگلا من تے رہیا  
عشق ڈھولے دا ہے، مول نہ ہوندا بیہا

گھوک وے رنگلا، تیرے مئے ہن بیت دے  
میتھے وی آئے پراہنے، کسے ملکھ ولایت دے  
پر سیو کرو چاں داعی، کول وسن دے لائق دے  
بھیڑی تے کدوں پے رہندن، جالو جھٹ تے سیت دے  
جا اوس آکھیا، ”سد لے آ۔“ ہمت خوشی نال آ گیا ہے۔ دل بادشاہ  
نوں آکھیا پس، ”اوہ سدیندی ہے۔“

میں مچھلی دریا دی، وے توں بگلا بن کے آ  
دل بادشاہ تڑ پیا ہے، نظر وزیر تڑ پیا ہے۔ مُشقت فقیر تڑ پیا ہے، سارا  
قلعہ تڑ پیا ہے۔ دل جوں تڑ پیا ہائی۔

جت دل آپ ڈولاندی، چانن لے گئے نالے  
ایہہ آئن جی۔ وسوسے ملاح ہوریں نال ہن۔ صبر دے چوہترے وی  
نالے ہن۔ ناز و نیاز وی نال ہے۔ آن کے درداں دے گھوہ تے ڈیرا لا دیتا  
نیں۔ پیغام بھیجیا ہے۔

سیاں مہندی آندی گھول کے، ہن صاحبان ہتھ لا  
تیرے کال گاؤن سہیلیاں، توں ہتھیں لاگ دوا  
توں نت اڈکیں کھرل نوں، اج بُوہیوں بیٹھا ای آ

جٹ پاسا جھل دا چیریا، کوئی خوف خطر دا راہ  
 ڈردا ناہیا موت توں، ہئی مرنوں بے پرواہ  
 جاؤ، اونوں آکھو آجاوے۔ اوس دروازے کھول دتے۔ تکیا ہے عشق  
 دا قلعہ ہے۔ محبت دا دروازہ ہے۔ شہرت دے بزار ہن۔ طمعے دیاں دوکاناں  
 ہن۔ ہر نام سیٹھ سودے تول تول دیندا بیٹھا ہے۔ دل بادشاہ آکھیا ہے، ”میں  
 شہزادی کول جاونا ہے، کجھ تھے پیش کرنے ہان۔ کائی شے ہئی؟“ اکھ، ”بڑیاں  
 چیزاں کام، کرودھ، لوبھ، موہ، ہنکار، خودی، تکبر، ٹہمت، بہتان۔“ دل بادشاہ  
 آکھیا، ”دشئیں بہوں گنیاں ہے نی، میرے کول پیے نہیں۔“ اوس آکھیا، ”ایہناں  
 چیزاں دا پیسہ میں کوئی نہیں لیندا۔“ ”ہور۔“ اوس آکھیا، ”یقین لے لینا تے ہر  
 شے دے دیونی۔“ آکھدن : گامن گل کریندا بیٹھا ہے تے دربار وچ ہر بندے  
 دیاں ہنجوں فر فر پیاں کریندن کیوں جوں اوہ پنچے کھلے ہان۔ اعتراض کاہیں  
 کرنا ہا۔

گھرے دماے عشق دے، مارو وگیا ہے دؤوں  
 تیرا واسا ہے کھیوے شہر وچ، جیس دروازے نوں  
 توں گھلیا ہیں کیہڑے کم نوں، بیٹھا ہیں راوی رَوں  
 تینوں چڑھ گئے کھوپے گرد دے، گیوں دلیوں بھوں  
 کر وعدہ یاد مسیت دا، توں سکھی نین نہ سوں  
 رو رہی ہے ہر شے۔ شہشاہ پچھیا ہے، ”ہاں پھیر گامن۔“ اوس آکھیا،  
 ”شہزادی خوش ہوگئی ہے۔“ اوس آکھیا، ”غیرت! جا کے حقیقت دے جالے  
 وچ شیشہ آب حیات دا پیا ہئی اوہ چالے آ۔“ مطلب کیہ ہے گل کرن آلے  
 دا بھئی اتھے آ کے بچ جاوے تاں وی گل حقیقت تے اپڑ ویندی ہے۔ غیرت

نوں آئی غیرت تے اوس آب حیات پی چھڈیا تے شیشہ توڑ چھڈیا۔ ایسے گلوں  
 اج تائیں جیوندی ہے۔ تاں اودوں حیرت حیران ہو گئی۔ حیرت آکھیا، ”اوہ  
 ویکھو کیڈا قہر کیتی کھلی ہے۔ شیشہ توڑ چھڈیا سوں تے آب حیات پی چھڈیا  
 سوں۔“ اتھے آ کے گامن آکھیا، ”دل بادشاہ تے حُسن شہزادی دیاں واگاں  
 اختیار دیاں تڑٹ گئیاں۔“ کھیت ایمان دا شیطان مردود اُجاڑ گیا ہے مطلب کیہ  
 اوہ بُرا کر بیٹھے۔

بادشاہ روکے آکھیا، ”گامن۔“ اکھے، ”جی۔“ ”منگ انعام۔“ ”غازی  
 خان چھوڑ دے تے ڈیرا اوہدے ناں بحال کردے۔“ بادشاہ آکھیا، غازی خان  
 میں عمر ساری نہیں چھوڑنا تے ڈیرے دا مالک تینوں بنا چھڈیا ہے۔“

جوں داغ دورارڑا پینڈا، وچ کوساں پندھ ہزار  
 ایہہ دُنیا بیلا حرص دا، وچ عزازیل سردار  
 اتھے گھوڑے دوڑے نفس دے، جیہڑے بہت تیز طرار  
 اتھے بلعم بعور وی ڈھے گیا، بن رنڈی دا یار

”میں تاں دُنیا نوں ایڈیاں چنگیاں ای نہیں جاندا پر ایہہ آہدا جاساں  
 بادشاہ بندہ چنگا ہا پر زبان دا کچا ہا۔“ بادشاہ آکھیا، ”گامن میں ایہہ جیہڑی کیتی  
 ہے تینوں تولن کان کیتی ہے بھی کتنے پانی وچ ہیں۔ میں غازی خان دے ناں  
 ڈیرا بحال کر چھڈیا ہے تے اوہنوں آزاد کر دتا ہے۔“ ایہہ غازی خان نوں  
 چھڈا کے گھر آیا ہے۔

## جکھتیار ہرل

جیس ویلے ہوئے نیں نا ایہہ جھنگ آ لے سیال، بھکھر، منکیرے توں  
لے کے شیخوپورے تیکر ایہناں دی ریاست ہائی۔ نواب ولی داد خان دا زمانہ  
ہویا ہے۔ نواب ولی داد خان اگے رجوعے آلیاں نکلے نہ تارے۔ نواب ولی  
داد خان دھاوا چاں کیتا۔ حضر، علی خاں دا بھٹی جیہدی اولاد خضرانے ہن، ایہہ  
سجا بازو ہویا ہے سیال دا۔ ایہہ وی نال ہویا ہے۔ رجوعے نوں ویڑھ آ گئیں۔  
ہاتھی جھومدے کھلن۔ رجوعہ پیا او بھاناں کولوں لگ کے ساڑ مُراد آ لے تیکر۔  
ایہہ رجوعے دی رعیت ہے۔ اسوار دھروڑ گئیں۔ رعایا نوں پتہ لگا۔ قوماں  
اکٹھیاں ہوں لگ پئیاں۔

جکے کیاں دے وچ بندہ گیا ہے بھئی رجوعے نوں اج ویڑھ ہے۔ جکے  
کیاں دے وچ ڈھول وگ گیا ہے۔ جکھتیار ہرل ہویا ہے۔ ایہدی شادی نوں  
ترینا چوتھا دیہاڑا ہائی۔ جکھتیار بھج کے اندر آ وڑیا ہے، ہتھیار چاون کان۔ سوانی  
جکھتیار دی ٹورنی نار ہے۔ اٹھی ہے تے اوس باہروں جنڈرا چاں ماریا ہے بھئی  
نہ جاوے۔ دوئے نکلے جانڈن۔ ڈھول وگدا جاندا ہے۔ جکھتیار دی ماں بھج کے  
آئی ہے تے اوس نونہ توں پچھیا ہے، ”ہرل نکلے وینڈن تے جکھتیار کدے

ہے؟“ اوس آکھیا، ”پُچ کر اندر وڑیا ہے تے میں باہروں جنڈرا چاں دتا ہے۔“  
 ہرل ایدوں پیا ہے ملنا۔ اوس ماریا ہے تے جنڈرا ٹڑٹ گیا ہے۔ اندر وڑگئی  
 ہے تے پُتر نوں دھکا دے کے باہر کڈھیاں تے آکھیاں، ”رجوعے اج  
 دھاڑیں ہن، تے میں تینوں رجوعے دی فُربانی کان جایا ہو یا ہے۔ سوہریا!  
 سیداں دے لنگاں نوں ہتھ پے کھلن تے تُوں اتھے اندر وڑیا پیا ہیں۔ ونج وی  
 سہی تے جے کنڈ وچ ہک وی جھلیائی تاں میں بتری دھاراں ماف نہ کریاں۔“  
 جکھتیار چڑھیا ہے۔ اگانہہ آیا ہے تاں رجوعے نیت بنائی ہے ساریاں رل  
 کے بھئی قرآن مجید میلا کرینے آں۔ نالے ٹکے تارے نالے مانی مگیے۔ جکھتیار  
 آیا۔ اوس آکھیا، ”مینوں ماں گھر نہیں وڑن دیندی۔ میں لڑائی کرنی ہیں۔ تُسیں  
 تاں اج رجوعے دا اڈا لاہو او۔“ ہک بندے آکھیا، ”سوہریا! ایہہ فوجاں  
 وکھ۔“ اوس آکھیا، ”ایہہ ون ون دی لکڑ ہے۔ تنخواہی بندے ہن۔ جتھے اسان  
 یک مائیاں کھلیاں ہوونا ہے ایہناں کوئی ساڈے اگے تگنا ہیں۔“

سچ مائیاں دے بیٹے، جیہڑے مرد کہاوں  
 جتھے چے چیکن سار دے، دھرک اوتھے لاوں  
 جتھے وسے جھمب تلوار دی، نہ قدم ہٹاوں  
 جتھے بگن شیر مریلوے، لگھ اوتھے جاوں  
 وانگ پتنگاں جان نوں، چاں گھول گھماوں  
 مر جانڈے ہک بات نوں، لچپال دکھاوں

ہک بندے آکے لڑائی کرنی ہے۔ قُدرت خُدا دی جیویں جکھتیار آکے  
 الایا ہا، کنک سیال دے چل پئے۔ نواب والی داد خان سیال تمبو دے بوہے اگے  
 کھلا ہے۔ نال خضر بھٹی کھلا ہے علی خاں دا، بھوڑانی آلا۔ ایہہ ہُن اپنے ساہ

گندے کھلن بھئی اودوں ہٹنا نہیں تے اساں مری جاونا ہے۔ اوہناں نوں چک کے بٹن تاں جکھتیار اگے لگا ہویا ہے تلوار ہتھ دے وچ پيس۔ مگر دھاڑ رجوعے دی ہے۔ اوہوں جکھتیار الایا ہے، ”ہلا نواب ولی داد میں آیا ہاں۔“ خضر سجھیا مری تاں گئے ہاں دوویں پر میرا حق انجیں ہے میرا سر وڈھ کے نواب ولی داد آل ہتھ کرن۔ خضر، علی خاں دے موڈھیوں نپ کے دھکا دتا ہے تے ولی داد نوں اندر کیتا ہے تے بوہے اُتے کھلو کے تلوار چھپی سوں۔ ”ہلا بھئی مارکا! مینوں دھچھ کے جاونا ہے۔“ تاں جکھتیار تلوار اُلا ری ہے تے مگروں کسے رجوعے دے بندے سد کے آکھیا، ”سر دے وچ چائیں، ایہہ خضر، علی خاں دا بھٹی ہے تے سجا بازو بنیا ہویا ہے سیال دا۔“ تلوار اُلا ری ہوئی ہا جکھتیار۔ ایہہ خضر، علی خاں دا بھٹی بھوڑانی آلا۔ اُلا ری ہوئی تلوار اوس میان وچ سٹ لئی ہے۔ ایس آکھیا، ”خضریا! وڈھاؤں سر ہا جوں اساڈے دشمن نال آیا ہیں پراج توں مری جاویں تاں تیں چھھاں توں سخیاں دا ناں بڈ دا ہے۔ لکھ مرے لکھ پال نہ مرے۔ تیرا مارنا نہیں چُجدا۔ ساڈی نہیں نوں ایہہ لاج لگدی ہے۔“ ایڈا سخی ہویا ہے۔ حالاں کہ اوہ کوئی منگدا تاں نہ رہندا۔ صرف ایہہ بندیا ئی ہے بھئی ایڈا آدمی مارنا ساڈی نہیں نوں گھاٹا ہے۔ خضر آکھیا، ”مینوں بچاؤنا ہئی تاں سیال بچاؤنا پوسی۔ میرا سر تاں سیال نال ہے۔“ مڑ رسائی ہو گئی۔ پیسے دے چھڈیا نہیں۔ ایہہ ہویا ہے جکھتیار ہرل۔

ایہہ جکھتیار برادری نال لڑیا۔ جکھتیار گھر دا ہے تے لطیف فتیانہ ہویا ہے گڑھ فتیانے دا، راوی تے۔ اوہدے نال ویر بن گیا۔ اوس مگروں دھاڑ دتی۔ اوس آ کے جکھتیار دیاں مجھیں مار لئیاں تے کئی وی نہ چھوڑی۔ ہرلاں دھر نہ کیتی جوں لڑے ہوئے ہائے۔ آپ گھر کوئی نہ۔ مجھیں لے کے اوہ لگا گیا۔ جکھتیار گھر



آیا ہویا ہے۔ کچھلی رات ہووے تاں جکھتیار دی سوانی اُٹھیوے۔ مدھانی ہتھ وچ  
نپ کے وین کرے تے جھیں نوں سدے:

جھیں کُے نُور دے، ڈاڈھا سر جہان دا  
مویاں ہتھ نہیں آوندیاں، پر کھڑیاں وی گھاٹا جان دا

جکھتیار آکھے سوانی نوں، ”توں جیون تاں دیندی نہیںوں۔ نال میرے  
ہے کوئی نہ۔ میں مرنا آں۔“ جکھتیار او تھوں چڑھ بیٹھا ہے جکے کی توں۔ جھنڈے  
کی بَرُج وچ اسالت گلوتر بیللی ہویا س۔ اوس کول گیا ہے۔ اسالت جھکھن لگ  
پیا۔ فلانے بندہ ماری پٹھن تے نہیں پیا اپڑیندا۔ اوہ مال ماری پٹھن نہیں پیا  
اپڑیندا۔ جکھتیار آکھیا، ”چنگا میں تاں دینا ہاں۔ میں تاں آیا ہام ایس کم کان  
توں میتھوں وی لتھا پیا ہیں۔ میں تینوں کیہ آکھنا ہیں۔“ اسالت بولیا، ”نہیں  
جکھتیار توں بیللی ہیں۔ میں جد دی پگڑی سر تے ولی ہے، ایہہ سر میں سجھاں کان  
رکھیا ہویا ہے۔ میتھوں اپنے لیون یاں نہ لیون توں تک آیا ہیں، اُٹھی۔“

ایہہ دوویں چڑھ بیٹھے۔ رجوعے توں لگھن پئے۔ اسالت آکھیا، ”ایتھے  
ہک گنگا ٹھا کر کا کراڑ ہے۔ میرا بیللی ہے تے ایہہ سداں تے پوڑیاں وچ گانویا  
ہویا ہے۔ آکھیں تاں آکھاں چاں۔“ اوس آکھیا، ”آکھ۔“ گنگے نوں  
اکھیونیں۔ اوہ تڑ پیا۔ ترائے ہو گئے۔ رجوعے توں اُتاناہہ ٹھٹی آسیاں دی کھلی  
ہے۔ اوہدے وچوں لگھن لگے تاں گنگے آکھیا، ”جرا ترائے کانے ہونداں۔ جے  
آکھو تاں ایتھے اک حامد آسی میرا وی بیللی ہے، آکھیے چاں۔“ حامد نوں  
اکھیونیں اوہ تڑ پیا۔ چار ہو گئے۔ چار بندے ہن تے دھاڑ راوی نوں ہے۔  
جیٹھ دے دیہاڑن۔ آہن: بار ساندڑ دی وس جاوے ہا تاں ایہہ سیرگاہ ہوندی  
ہائی۔ بار وٹھی ہوئی ہے۔ ڈیہلا تے پیلھ انج چمکدے پین جیویں نورنی نار سو ہے

کر کے کھلوتی ہووے۔ سبز چادر فُدرت نے فرش زمین دے اُتے وچھا دتی ہے۔ گھاہ ای گھاہ۔ راہیں دا پتہ کوئی نہیں پیا لگدا۔

کچھلی رات دا وقت ہے۔ اگوں رونگڑو آئی ہے ڈاچیاں دی۔ ڈاچیاں پھڑیاں ہونیاں ہن۔ جکھتیار آکھیا، ”کھلو جاؤ۔ ایہہ رونگڑو سنی نیں۔“ اکھے، ”ہا۔“ ”ایہہ لطیف فتیانے دیاں ڈاچیاں ہن تے ایہناں اُتے اسیں آئے ہاں۔ تیاری کرو۔“ اسالت گلوتر آکھیا، ”تیاری وکھری کیہڑی کرنی ہے۔ ایہا موت جیہڑی من کے آئے کھلے ہاں، پر میں ہک گل پچھنی ہوں، ہک واری کھلو جاؤ۔“ ”دس۔“ اوس آکھیا، ”قوم تے قوم لڑدی ہے تے اسیں چارے آپو آپ توماں دے ہاں۔ بیلی تے بیلی لڑدا ہے تے اسیں ساہویں بیلی وی نیں۔ اگانہہ بیلیاں دے بیلی ہاں۔ مذہب تے مذہب لڑدا ہے پر اساڈے وچ ہک ہندو وی ہے۔ اسان راوی دی من تے مال مارنا ہے تے رجوعے دے جانڈیاں تائیں ساہ کڈھن دی تھاہر وی کائی نہیں۔ میں تہا تھوں ایہہ پچھنا ہاں، لڑائی پے جاوے تاں تہاڈے وچ کیہ صفتاں ہن۔ کیہ کریندے او؟“ گنگا ٹھا کر کا بولیا، ”میرے جیڈا ہیرو (ہے + رو) کوئی نہیں۔ دہاں کوہاں تے دھاڑ پئی آوندی ہووے دشمن دی، میں نقشے زمین دے دیکھ کے آہناں ایدوں دھاڑ ہے۔“ حامد آسی بولیا، ”میرے وچ ایہہ صفت ہے بھئی رات کالی ہووے، مڑ بدل بن جاوے تے سفر جنگل دا ہووے ترکلے وچ ول آسکدا ہے میں اج تائیں دھاڑ نوں بھلی پون ای کدی نہیں دتا۔“ ”ہلا۔“ جکھتیار بولیا، ”میں دساں؟“ اکھے، ”ہا۔“ ”جیس دھاڑ وچ میں ہوواں، لڑائی پے جاوے جیویں بڈدی پئی نوں وجھ دے کے ملاح بئے لا چھوڑیندا ہے میں کدھی لا چھوڑیناں۔“ اسالت آکھیا، ”میں دساں؟“ ”ہا۔“ ”ہلا، میں مری گیاں۔“ ”کیویں؟“ اوس آکھیا، ”ایہہ گنگا

ٹھا کر کا ہیرو ہے ایس لڑنا کوئی نہیں۔ ایہہ حامد آسی راہاں دا سونہا ہے ایہہ بڑیاں ڈولاں کڈھسی۔ بھج جاسی۔ گڈھ لڑائی دی ہا جکھتیار دے سر اُتے، ایہہ خدائی دعویٰ کیتی کھلا ہے بھئی میں بڈدی نوں بنے چاں لیندا ہاں۔“ جکھتیار آکھیا، ”بلا توں کیہ کرینائیں؟“ اسالت آکھیا، ”نہ میں ہیرو، نہ میں راہواں دا سونہا، نہ میں وجھ دیون آلا۔ لڑائی پئے جاوے۔ اساڈی دھاڑ چل پوے۔ میرے نال دا سنگی ولی جاوے۔ مینوں پتہ لگ جاوے۔ چلی توں ہٹ کے میں بیلی تے لڑ پوندا ہاں۔ میں کدی نہیں چھوڑیا بیلی۔“

ایہہ گلاں کر رہے تاں ڈاچیاں نیڑے آگیاں۔ چھیڑواں نوں جکھتیار بلایا، ”بھئی جھہ ہے نیں تے لڑو۔ نہیں تاں سائیاں نوں خبرایو۔ میں جکھتیار ہرل ڈاچیاں ماری لے جانا ہاں تجھیں دے بدلے۔“ چھیڑو پچھانہ بھج وگے۔ حامد آسی ٹیرا گے لالئی۔ دو کنیاں تے ہو گئے۔ اک مگر ہو گیا۔ ڈاچیاں نوں چھوڑ توہاں دے وسدے آوندن۔ گردنیں اوہناں لمیاں چاں کیتیاں تے بھج پٹیاں۔ حامد آسی آکھے، ”ہُن سبے بھیں آؤ۔ ہُن کھبے بھیں آؤ۔“ اتنے تائیں ککڑ بانگ چاں دتی ہے۔ بے تکیاں تاں پو پھٹ گئی ہے۔ ”حامد! ایہہ کیہڑی تھاہر ہے؟“ ”کائی نہیں سیاپ؟“ اکھے، ”نہیں۔“ ”ایہہ ککڑ دی بانگ سنی نیں؟“ اکھے، ”ایہہ حمین تپے دا دربار ہے تے اوہ رُکھ رجوعے دے ہن۔“ ”ڈاچیاں پدھ نوں تاں کٹ کے سٹ چھڈیا ہے۔“

چالھی کوہ پیٹ ہے ساندڑ دا۔ اوہناں آکھیا، ”بلا اسیں دربار توں حقے دی واری لے لوئے تے توں ڈاچیاں نوں اتھے چھوڑ جنڈونیاں تے، ایہہ کجھ چر لین، نماںیاں بھکھیاں ہن۔“ اوس اپنی ٹیر ڈھنگ کے چھوڑ دتی ہے تے آپ ٹانگو تے بہہ رہیا۔ ”فقیراں او! حقہ بھکھا یو۔“ اوہناں آکھیا، ”تما کو بھیرا ہے۔“

جکھتیار آکھیا، ”ایہہ تماکو کل تائیں نہ ہلسی۔“ حقا چھکدن پئے۔ رتن ہو گئی۔  
 دینہہ چڑھن آلا ہو گیا۔ اوس ویلے ایہناں آکھیا، ”اٹھیو۔“ اگے آئے تاں  
 گنگے دی ئیر رجدی ودی ہے۔ اکھے، ”سوہریا! اسانوں وی رجاون دے۔“ ایہہ  
 تراہے وی بہہ رہن تے گنگا وی۔ ایہناں وی ئیریں ڈھنگ کے چھوڑ دتیاں  
 ہن۔ مگروں ایہہ ویہہ اسوار چڑھن۔ پکھوں اوہ آئن تاں اوہناں آکھیا: اوہ  
 رجوعے وڑگنن۔ آؤ فقیر دے دربار تے حقے دی واری لینے تے چچا نہہ بیٹے۔  
 اوہناں آکھیا، ”فقیر! ٹھا بھکھا۔“ فقیر آکھیا، ”جکھتیار ہرل تماکو دتا ہے تے  
 ہلدا نہیں پیا۔“ ”ہورنال کون پیس؟“ ”اسالت گلو تے حامد آسی۔“ اکھے،  
 ”ایہہ ہن اٹھن۔“

اوہناں دا شکار لگ گیا۔ اوہناں واگاں چاں پرتیاں۔ گنگا ٹانگو تے بیٹھا  
 ہو یا ہا۔ گنگے دی نظر اوتوں تردی رہی تے گلے وچوں اسوار لگھ آئے۔ گنگے دی  
 نظر پی اوس دھرک ماریا۔ ”کیہ دھاڑ پی نہیں؟“ گنگا کئیندا ڈھنگا تے اوس  
 رجوعے چاں تاڑیا۔ حامد آسی ئیر کھلی چھوڑی تے اوہ بھج کے جھاڑاں نوں وڑ گیا۔  
 دورہ گئے۔ ایہہ وی چڑھ ئیریں تے گئے تے دھروڑ رکھیاں۔ مگروں سواراں  
 پھک دتی تے جکھتیار ولی گیا تے جکھتیار بلایا ہے، ”کیہ اسالت! بلی تے ہندا  
 ہاؤں تے میں ولی گیا ہاں۔“ جتھے جٹ جاندا پیا ہا زخمی شیر وانگوں پھریا۔ آن  
 کے ماری ہے سانگ تے ہک اسوار ڈھاہ لیا ہے۔ دھاڑ گلی چاں دتی ہے تے  
 وچوں کڈھ لیا پیس۔ تھوڑا جیہا بھنے ہن تاں جکھتیار وت ولی گیا ہے۔ جکھتیار مُڑ  
 بلایا ہے۔ ویندا جٹ ہٹیا ہے۔ اوس مُڑ سانگ ماری ہے تے ہک اسوار مُڑ ڈھاہ  
 لیا پیس تے گلی وچوں جکھتیار نوں کڈھ لیا پیس۔ تریئی واری جکھتیار وت ولی  
 گیا ہے تے اوس آکھیا، ”کیہ اسالت میں ولی گیا ہاں۔“ اسالت ہٹیا وی ہے

تے اوس آکھیا ہے، ”جکھتیار یار تینوں تریسی وار ہے۔“ اوس آکھیا، ”میر چواہاں پیراں وچوں کھلوگئی ہے۔ نہیں لے نکلدی۔“ اکھے، ”وت انج کیوں نہیوں آہدا میر دی کر۔“ انج مُڑ آیا۔ ہک چنگی گھوڑی دے اسوارنوں جاسانگ ماری بیس۔ اوہ ڈھے گیا تے کبے ہتھ وچ اوس دا جھگُو نپ کے لئی آیا ہے تے سچے ہتھیں جکھتیار ہے تے اپنی گھوڑی ادھ وچ ہے تے جکھتیار دے ڈولے وچوں نپ کے پچھک کے وگایاں اپنی گھوڑی توں ٹپا کے وچ زین دے۔ جیس ویلے جکھتیارنوں جکا ماریوس تاں اپنا سجا پیر رکاب چوں نکل گیا بیس تے آپ پھر کدا بھونیں تے آ پیا ہے۔ جکھتیار سر چھڈ گیا۔ اسالت گلو تر نوں تیر جھمب آر وسن لگ پین۔ کوئی ہتھ تے لیندا ہے کوئی ڈھالے لیندا ہے۔ کوئی لگ ویندا ہے۔ کیہ راوی دے راٹھاں اولہہ کے لڑو:

لگے داء ویری نہ رہندن، کون چھوڑیندائے بھٹے  
 تیر وسن لگ پئے۔ اوس ویلے جکھتیار نوں سد ماریا بیس۔ ”کیہ جکھتیار  
 آہدا ہوندا ہائیں میں بڑدی نوں وچھ دیندا ہاں۔ ہُن بڑدی پئی ہا۔ مینوں چڑھا  
 چاں اساڈے نیڑے کسے نہیوں آونا۔“ جکھتیار نہیں ہٹیا۔ اخیرا تیر اسالت گلو تر  
 نوں کھوپڑی اچ لگا ہے جتنا تیر دا پھل ہائی لہہ گیا ہے۔ ڈھبندی واری اوس  
 دے مونیوں بلارا نکلیا ہے، ”جا جکھتیار یا گوڑ کیتی آ یاری۔ ایہہ یاراں دا حق  
 نہ۔“

میراٹی پیا آہدا ہے:

اکھے تیر لطیف فتیانے دے وٹھ گنن کیاڑی  
 جکھتیار یا توں تاں پنج پنج ہنھنا ہائیں، توہیں ہک نہ ماری  
 بھویں جکھتیار ہُن تیری ہے واری

اسالت گلو تر تے وس گئی، تیراں دی جھمب گڑا قہاری

اوانے جاکھتیار یا گوڑ کیتی آ یاری

اسالت مری گیا ہے۔ جکھتیار آن کے بندے کڈھے تے آکھیا، ”لاش  
لے جاؤ تے میں نال و نجن جوگا کجھ نہیں۔ ترانے واری جٹ میتھے پھریا ہے۔  
ویروی میرا، سدوی میرا تے میتھوں نہیں بھویں آیا۔“ آبدن: جیس ویلے گلو تر  
مرا یا ہاس اوس ویلے پھر ہک دینہہ داہا۔ ہٹی تے لگا گیا تے کراڑ نوں آکھیوس:  
ایتھے دوسیر شیرینی دے۔ بالاں نوں سد کے آکھیوس، ”میرے مگر ہوکرا لایو۔  
جیون دا میں رہیا کجھ نہیں تے ایہہ شیرینی نیں۔ بال مگروں ہوئے وی  
کرن۔ جکھتیار اگے بھجے تے رووے وی تے آکھے، ”جاکھتیار یا گوڑ کیتی آ  
یاری۔“

چھیویں دیہاڑے گھر بیٹھے دی چند نکل گئی۔ ایسے شرم وچ مر گیا۔

## خضر، علی خاں دا بھٹی

نواب ولی داد خان سیال جھنگ دا ہویا ہے۔ نواب احمد خان توں جھنگ فتح کیتا ہا مہاراجا رنجیت سنگھ۔ احمد خان، نواب کبیر خان دا ہویا ہے۔ کبیر خان، نواب ولی داد دا ہے۔ ولی داد خان، سعد اللہ خان دا ہے۔ سعد اللہ خان، جلال خان دا ہے۔ ایہہ جھنگ آلے سیال جلال خنانے سدیندن۔ نواب ولی داد خان جیہڑا ہے ایس دی شاہی ریاست اوس ویلے بھکھر، منکیرے توں لے کے شیخوپورے تیکر سیس آوندی ہائی۔ ایس زمانے وچ پنجاب وچ ایڈا نواب کوئی نہیں ہویا۔ ایسے نواب ولی داد خان دے زمانے نواب لال خان بلوچ ہویا ہے ساہیوال دا نواب۔ اوہ وی نواب ہان پر ساری راوی، ساری چھاں ادھی ویہت ایہہ سیال کول ہائی۔ بھروانے، بھٹی سارے رعیت ہون۔ بھٹی

فخر نال آبدن:

بھٹیاں عمر ساری سلام نہیں کیتا سردار دا،

کب سلام کیتا ہے جلال خنانا

نہنگ جیہڑے ہین مڈھ کھڑے ہین ساہیوال دے۔ ایہہ نہنگ جھنگ آل ہا۔ گروٹ آل پرانہہ بلوچ نکل ویندے ہان، ایدے تھل آل۔ مینہ وٹھن۔ بارشی زمانہ ہویا ہے، نہراں تاں ہونیاں نہیں۔ کھوہ کھلڑاں دا وقت ہے۔ نواب لال خان بلوچ حکم

دتا ہے کہ سیال دی سین بھن کے گڈ لوو۔ ترائے کوہ سین اوہناں بھن کے گڈ چھڈی۔ ہوندی طاقتے سیال وٹن۔ نواب ولی داد خان نوں دس پئی ہے اوس بندے چاڑھے کہ بھائی لال خان نوں آ کھو انج کیوں کیتا ہئی؟ نواب لال خان آ کھیا، ”مینوں تاں سمجھ نہیں پئی تے مارکا گڈ پیٹھن تے زمین تاں تینیاں دی ہوئی۔“ چلو اوس آ کھیا، ”چالوو۔“ دوائے سال اوہا مُر گڈی گئی۔ تریئے سال مُر گڈی گئی۔

اوس ویلے سمجھیا ہے نواب ولی داد بھئی ایہہ تاں قبضہ کرو ہے۔ نواب ولی داد آ کھیا ہے، ”ہُن بلوچ نوں بلائیو نہیں۔ نہنگیں قلعہ تیار کرو۔ قلعہ تیار ہو رہیا تاں اعلان جنگ کریاں۔“ نہنگیں کچا قلعہ تیار ہو یا ہے سال دے وچ۔ لکھ روپیہ سیال دا خرچ آ گیا ہے اوس زمانے۔ کیوں؟ قلعہ نواب کان، کھوہ زمیندار کان تے تھگی غریب کان، ایہہ تن ہلا دینی ہے۔ تریئیں اوکھیاں ہن۔ قلعہ تیار ہو رہیا تاں نواب لال خان سوچیا، سیال لڑو ہے ہمیں ویلے یقینی لڑائی ہو جاوے تاں اوس ویلے انسان دشمن دی طاقت دا اندازہ لیندا ہے کہ میری ودھیک ہے کہ اوہدی۔ لال خان دلوں ہر گیا بھئی ہستی اوہدی ڈھیر ہے اوس اپنے بچن سیوا ہوا کٹھے کیتے۔ وزیر، مُسڈی سدے پيس۔ دسو بھئی ایہہ لڑائی کیوں ڈکے؟ اوہناں آ کھیا، ”وادھا تیرا ہے توہیں لکھ ضائع کروایا ہے۔ اوہنوں ضرورت اتھے قلعے دی کائی ناہی لکھ تاوان ادا چاں کر، اسیں تہاڈی رسائی چاں کریندے ہاں۔“ نواب لال خان آ کھیا، ”لکھ کڈھاں کدوں؟“ اوہناں آ کھیا، ”مڑ ہک ہور تجویز ہے۔“ ”کیہڑی؟“ ”جن دا سردار بھراونا چاں سد، گنڈ دا والی لالی چاں سد، تلکے دا سردار بھٹی چاں سد۔ ایہناں تریئیاں بندیاں نوں اتھے چاں سد۔ اوہ ہوڑن تاں سیال کھلوندا ہے۔“ بھروانا وی سدیا گیا۔ لالی وی سدیا گیا۔ بھٹی خضر، علی خاں دا ہو یا ہے۔ خضر، علی خاں دا سخیاں دا سر ہو یا ہے۔ ایہہ ترا ہے جا وٹن ساہیوال۔ بلوچ توں پچھیا، ”ہاں جی کیوں سدیا نیں؟“ اوس آ کھیا، ”وادھا میرا ہے۔“



سیال لڑدا ہے۔ میری طاقت نہیں لڑن دی۔ کوئی ایسی تجویز کرو۔ ایہوں ڈکو۔“ لالی تے بھروانے دوہاں آکھیا، ”اسیں اوہدی رعایا دے بندے ہاں۔ اسیں اوہنوں کیویں ڈک سکدے ہاں۔ اوہ لڑے تاں اسماں نال لڑنا ہوویا۔“ خضر، علی خاں دا پکا یار ہوویا ہے نواب ولی داد دا۔ کنیں واری نواب ولی داد بچے فوجاں بھوڑانی گیا۔ ایہہ سجا بازو، گنیا ویندا ہا نواب دا۔ خضر، علی خاں دا سخی مرد ہوویا ہے۔ سخی وچ ترس دا مادہ ہوندا ہے۔ خضر، علی خاں دے آکھیا، لالی تے بھروانے نوں، ”اساڈی وجہ نال اتھے بچ جاسن جاناں۔ بچے یتیم ہون توں بچ جاسن۔ سوانیاں بیوہ ہون توں بچ جاسن۔ جیس اُمید تے ایس اسانوں سدیا ہے، ایہہ ناہی پیا ویہدا اوہدی رعیت ہاں۔ کائی اُمید تے ایس نوں وی ہا۔“ لالی تے بھروانے آکھیا، ”سچی چٹھناں ہیں تاں ہرے بیٹھے ہاسے توں ڈھیر لگدا ہیں۔ توں اگے لگ جا۔ اسیں نال ہاں۔“ راء خضر آکھیا، ”دعا خیر آکھو۔“ دعا خیر آکھی نیں۔ اوس ویلے نواب لال خان توں پچھیا ہے خضر، ”کائی تیاری وی ہے تہاڈی؟ سیال دی میرے نال صلاح ہے پرسوں کٹک سیال دے نہنگاں آلے قلعے دے وچ آن لہسن۔ پیلے دیہاڑے تیرے نال لڑائی ہو سی۔ ارادہ سیال دا ہے میں ساہیوال بھڑ کر کے جاونا ہے۔ بچ دروازے ہن ساہیوال دے میں پنجاں نوں اگ لا کے آونا ہے۔“ تلی آلوں پگھر نکل گیا ہے بلوچ دا بھئی میری تاں تیاری کائی نہیں۔ ”ہن؟“ خضر آکھیا، ”لکھ بھروایے تاں وی اسماں تینوں فائدہ کوئی نہ دتا۔ کوڑھا میلا کروایے تاں وی گل کائی نہیں۔ پک آکھیا من چاں۔ پرسوں جیس ویلے کٹک سیال دے آ لہسن۔ نہنگاں آلے قلعے تائیں اساڈے نال لگا آ۔ صرف سیال نوں آکھ، السلام علیکم۔ نہ گل کر نہ منت کر۔ گلاں اسیں کرسائیں۔ سیال کھلو جاوے تاں واہ بھلی۔ نہ کھلووے تاں اسماں تریپیاں دے سر تیریاں لتاں وچ لتھے پئے ہون۔“ بلوچ ہسیا ہے۔ ”شکر ہے تہاںوں سدیا ہے۔ جے تئیں ترائے گھر نال رل جاو تاں میں مُقابلہ

کرناں۔“

پرس دا روز ہويا ہے جیویں بدل ساون دے گجبن، بھیریں دی گٹ پئے گئی۔  
اگے آئے نہزگاں آلے قلعے دے وچ۔ تیبو نصب ہوئَن۔ فوجاں لتھیاں پئین۔ پچھیا  
نیں، ”نواب صاحب؟“ اکھے، ”اوہ چڑھیا آوندا ہے۔“ ڈٹھا نیں نواب ولی داد خان  
سیال گھوڑے تے اسوار ہے۔ پچھئی اسوار تنگیاں تلواراں آلے اگے، پچھئی چکھے، پچھئی  
سجے، پچھئی کھے۔ چونہ اسواراں اُچیاں سانگاں تے چھتر چایا ہويا ہے جیں چھاں پیٹھ  
گھوڑا لایا ہويا ہے۔ بگل وجدے پین۔ ”وکیھ۔“ لال خان آکھیا، ”اسیں سداؤ نواب  
ہاں۔ نوابی ایس دا ناں ہے بھئی ہاڑ دے دیہاڑے ہن۔ دُھپ وی نہیں جھلو۔ رونق  
وی نہیں ونجاؤ تے دُشمن دے علاقے وچ پیا آوندا ہے۔ قلعہ فولاد دا بنائی آوندا ہے۔  
گولی وی نہیں جھلو۔“

ایہہ چارے گھوڑیاں توں اُترن۔ گھوڑے نوکراں نپ لین۔ ایہہ چارے نواب  
ولی داد خان سیال آل ٹر پین۔ وجیدا سر دا نوکر ہويا نواب ولی داد خان دا میراٹی۔  
نواب ولی داد خان آکھیا، ”وجیدا۔“ اکھے، ”جی۔“ ”ایہہ کون ہن جیہڑے اگوں لگے  
آویند؟“ اوس آکھیا، ”جَن دا سردار بھروانا، گنڈ دا والی لالی ہے تے تلکے دا سردار  
خضر، علی خاں دا بھٹی ہے۔“ ”چوتھا؟“ اکھے، ”نمونہ لال خان آلا ہے، پر لال کیوں  
آونا ہا، اوہ تاں دُشمن ہويا۔ بندہ کوئی ہور ہے۔“ نواب ولی داد آکھیا، ”ہے وی لال  
تے آیا وی میلا کھلا ہے تے آندا وی میرے سچاں ہے۔ گھوڑا نیو! میں وی لہناں۔“  
”توں کیوں لہنا ہیں؟“ اکھے، ”خدا جبار قہار ہے۔ میرے جیڈا سردار ہے۔ منت کرن  
میلا آیا کھلا ہے۔ میں آکڑیا رہواں۔“

خودی تاں نہ بھاوے رب نون، سر دیونا ہی درکار ہے

مت میں قہر الہی وچ نہ آجاواں۔ میرا حق ہے میں اوس نون منت کراں۔

اوس نون میں بولن ہی نہیں دیونا۔“ خضر، علی خاں دا اوس دی طبیعت دا واقف ہا۔ خضر آکھیا، ”مارکا مُہارک۔“ ”کہی؟“ اکھے، ”سیال رس گیا ہے۔“ ”کیوں؟“ اکھے، ”اوہ لتھا کھلا ہے۔“ اکھے، ”پیشاب تے لتھا ہوسی؟“ اکھے، ”نہیں ایہہ لتھا ہے لال خان نون وکھ کے۔ ایہدی طبیعت دا مینوں پتہ ہے۔ ایہہ کڑکدا وی تھبدی ہے۔ رسدا وی تھبدی ہے۔“ اوبا گل بنی اوہ رُدا آیا۔ بھٹی ہتھ کیتن اوس وی دتن۔ بھروانے وی کیتن۔ لالی وی ہتھ دتن۔ چوتھے نمبر تے لال خان انجیں کجھ شرمندے ہو کے ایس ہتھ اگانہہ کیتا ہے۔ نواب ولی داد خان آکھیا ہے، ”لال خان اوہ بجن ہان۔ بجنوں دے ڈٹھیاں رج جویندا ہے۔ بھوویں ہتھ دیویے بھوویں نہ دیویے۔

بجن اوہے جیہڑے وکھ کے رجیں  
گھوڑے اوہے جیہڑے میداناں بچ بھجیں  
بدل اوہے جیہڑے وس کے بگنیں

توں تے میں ڈٹمن توں دوست پئے بندے ہاں تے پڑھیں ناکلمہ نبی دا۔“ اتنی گل کر کے سیال تھبا بھریا ہے پھک کے ہاں نال چاں لایا ہے۔ دیکھن آلیاں دیاں ہنجوں ٹپن لگ پئین۔ شابش جوان دیا بچیا! اوہنوں آکھنا وی نہیں گھتیا۔ مل کے جیس ویلے ہٹ پئے تاں ولی داد خان آکھیا، ”کیوں بھیریا لال! انج کرنا ہایا تاں میرا لکھ ضائع کیوں کروایا ہئی؟“ خضر، علی خاں دا بولیا، ”نواب صاحب! لال دی قیمت لکھ ہے۔ کدی مُفت وی لعل ہتھیں آئن۔ لکھ لایا ہئی تاں لعل پایا ہئی۔ ادھوں ودھ کیہ منگنا ہیں؟“ اج دیاں رسایاں ترائے سال بھلکن رہندین وت تروں پئیاں۔ کیوں؟ وچلیاں رساون آلیاں پڑھیں کھوٹیاں ہوندین۔

ایہہ ہٹ کے تمبواں وچ بہہ رہن۔ گلاں ہور ہل پئیاں۔ تھوڑی دیر دے بعد باورچی خانے دے وچوں باورچی نکلیا ہے، نواب ولی داد خان دا۔ ”نواب صاحب

کھانا تیار ہے۔“ ولی داد خان اُٹھیا ہے۔ اوس آکھیا، ”اُٹھی لال خان رسائی دی شرط ہے کھانا رل کے کھاویے۔“ اوس آکھیا، ”تسیں جُلو میں آندا پیا ہاں۔“ اوہ ٹر پیا۔ خضر آکھیا، ”اُٹھی۔“ اوس آکھیا، ”اُکا نہ اُٹھا۔ ویری ہو یا۔“ خضر آکھیا، ”اندر اوس پُچو خانہ بنایا ہو یا ہے؟ رسائی جیہڑی ہائی اوہ ہو گئی۔ توہیں کھانے تے نہ جاونا، اوس سمجھنا ہے ایہہ وسیا نہیں۔ سامان لے کے اوہ آیا بیٹھا ہے۔ لڑائی دامڈھ پیا بھدا ہیں تاں نویں سر یوں۔“ اوس آکھیا، ”تاں وینا ہاں جے توں نال آویں تاں۔“ خضر خیال کیتا ہے بھئی ہُن میں اپنی عزت بنائی ہے، ہن چُھیاں نہیں جاونا۔ ایہہ تاں لڑائی پو ہے۔ اتھے بندیاں قتل ہوونا ہے۔ او جھانے ایہہ ٹر بانی وی للہ ہے۔ اپنی عزت نوں تباہ کر۔ ”اُٹھی۔“ ٹر پین۔ جیس ویلے دروازے تے آئن تاں نواب ولی داد خان سیال آکھیا ہے، ”او وجیہ! بھٹی، بھروانے تے لالی نوں روٹی کھوائی۔“ اوس آکھیا، ”جی آ کھو بندے پئے ہاں۔“ نواب ولی داد خان آکھیا، ”راء خضر تے لال خان نوں اوہراں چاں گھل۔“ روٹی کھا رہے تاں خضر، علی خاں دے آکھیا لال خان بلوچ نوں، ”ایس تیرے اُتے ایڈا دیہاڑا چاڑھیا ہے تے ہُن ایس فوج دا ڈنگ دا ٹکر پکا۔“ بلوچ آکھیا، ”میری گنجائش توں باہر ہے ایہناں نوں ٹکر دیونا۔“ بھٹی آکھیا، ”تیرے بو ہے تے ٹکر میں دیساں تے پک واری سیال نوں آکھ۔ تیرا خرچہ نہ ہوسی۔“ بلوچ آکھیا سیال نوں، ”اج دی روٹی تہاڈی اساڈے آل ہے۔“

خضر، علی خاں دے آکھیا، ”نواب صاحب! تسیں ساہیوال جاؤ۔ میں فروکیں ویناں۔ اوتھوں میں سامان لے آوساں کھانے دا۔“ فروکیاں دے وچ اوس زمانے بڑے بڑے سیٹھ ہوئیں۔ تجارت دا مرکز ہو یا ہے ویہت پنچھاں دا۔ فروکیاں دے آن کے ہندو سیٹھ سبھ اکٹھے کیتے۔ راء خضر آکھیا، ”کھانا دیونا پے گیا ہے سیال نوں۔ بھوڑانی چوں جے خرچ انوائی تاں پہنچدا نہیں۔ کھیرے تائیں میں خرچ گن کے دیساں۔ مینوں

راشن دیوے۔“ ہندو بولن، ”راء خضر! جے لڑائی ساہیوال وچ ہووے ہا تاں اسیں کھاڈ دے پٹھ ہاسے۔ نہ اساڈی رن رہنا ہا، نہ کن رہنا ہا، نہ دھن رہنا ہا۔ کائی شے نہ رہنا۔ اسیں گلاں ساریاں سُنی بیٹھے پیسے۔ بھلا ہووے توہیں بندے دا آیا ہیں تے لڑائی رُک گئی ہے۔ اسیں بچ گئے ہاں۔ اساڈا سردار ہے پُچھل تاہیں کوئی نہ۔ ایس تینوں کھانا کیوں گھنتا ہا۔ کھانا اسیں دینے ہاں مگر تیرے ہتھوں کر کے دینے ہاں۔ کسے بندے تے تاں نیک ہووے۔ راء جی! توں جا کے ساہیوال بہہ رہو۔ اٹھاں دا تانا لگ جاسی۔ جیہیں ویلے اکیوئی بس چاں کریا نہیں۔“ آہدن: اٹھاں دا تانا لگ گیا ہا۔ جیہیں ویلے راء خضر سچھیا ہے دو ڈنگاں دا خرچ ہو گیا ہے۔ مت دیو بھرے دی وی دیونی پے جاوے۔ اوس ویلے آکھیا، ”بند کر دیو۔“

سیال آ کے اُتریا ہے۔ سوتے دا وقت ہے کھانے دا ہوکا مل گیا۔ ”کوئی کھاوون آلا؟“ کوئی آواز نہیں آیا۔ ولی داد خان حیران ہو گیا۔ اوس آکھیا، ”وجیدا! کھانے دا ہوکا جئے مل گیا ہے۔ اڈھی رات اساڈے کول ہو ویندی ہے کھانیاں۔“ اکھے، ”جی آ۔“ اکھے، ”جا کے پتہ کریں نا جے کچا رسد ودھ گیا ہے تاں ایہہ خضر، علی خاں دا ہوونا ہے، روٹی دیون آلا کیوں کہ ایہہ جد دیوے اپنے گھر نوں اگ لا کے دیندا ہے۔“ وجیدا گیا ہے۔ اوہ ہٹ کے آیا تے اوس آکھیا، ”جی، پکا وی ودھ تاں ڈھیر گیا ہے پر کچا وی سالم ڈنگ دا پیا ہے۔“ اکھے، ”راء خضر نوں سد۔“ خضر آ گیا، ”سو جی۔“ آہدن: کچا رسد بہوں ودھ گیا ہے۔ اکھے، ”جی آ۔“ ”قابو کر۔“ اکھے، ”تساں صُح جاونا ہے تھل شکار تے۔ ایہہ تساں نال لے جاونا ہے۔“ نواب ہس پیا۔ اوس آکھیا، ”وجیدا! جے بلوچ دا خرچ ہوندا تاں ایس کوئی آکھنا ہا نال لے جا۔ تینوں آکھیا ہے ایسے دا خرچ ہے۔“ خضر آکھیا، ”اللہ دیاں سنواریاں او۔ دِن بھولے ہو وچوں پیڈے ہو۔ ایہہ، آہے توں تاں گل کراؤ ہائیں۔“ ہسن لگ پین۔ تاں جوں اُتوں نواب لال خان

اوہناں نوں کھا کے دند کھوتریندا وڑ پیا۔ اکھے، ”نواب ولی داد خان۔“ اکھے ،  
 ”جی۔“ اکھے، ”کوئی حکم حکام ہووے تاں بے تکلفی نال اکھیائے۔ اپنا گھر سمجھیائے۔“  
 نواب کاوڑیا بیٹھا ہا۔ اوس آکھیا، ”جی آ۔ کل ہزار بیڑا میں گروٹ آ لے پتن تے  
 لینا ہیں اوہ دے۔“ بلوچ سمجھی بیٹھا ہا، ہُن کیہ منگنا بیس۔ بلوچ چُپ کر گیا۔ خضر ارک  
 ماری، ”آکھ۔“ اوس آکھیا، ”میں ہزار کڈھاں کدوں؟ ایہہ تاں بادشاہ ہو یا۔“ خضر  
 آکھیا، ”گننے بیس۔ فوج ٹپاؤنی بیس۔ دینہاں جی دیسائیں۔“ سیال نوں سنوا کے خضر،  
 علی خاں دے اوسے دی فوج لئی ہے۔ آؤ بیڑے اکٹھے کریے۔ گروٹ آ لے پتن تے  
 آئے تاں فُدرت خُدا دی سو بیڑا تاجراں دا کھلا ہے۔ خُدا سخی دے پردے آپ رکھدا  
 ہے۔ ساری دُنیا دا رزق دھرتی تے ہے۔ سخی دا رزق عرش تے ہے۔ سخی نوں علم تک  
 نہیں ہوندا مگر خدا اونوں تھڑایا کدی نہیں۔ بیڑیاں نوں زنجیراں بندی کر کے پُل چاں  
 بنایا نیں۔ دیوبھرے لشکر سارا رُدا لگھ گیا ہے۔

ٹپ کھلن تاں اوس ویلے نواب ولی داد خان آکھیا ہے، ”نواب لال خان!  
 تئیں پچھا نہہ ہٹو۔ اسیں اگانہہ جاویے۔ ایہہ ترائے بندے نہ ہوندے تاں میرا ارادہ ہا  
 میں ساہیوال بھڑ کر کے جاونا ہیں، پر غیب اللہ صاحب جاندا ہے۔ ایہہ ہو سکدا ہے  
 میری موت ہووے۔ بھلا ہووے ایہناں بندیاں دا ایہناں قتلہام توں بچایا ہے۔ میں  
 ایہناں ترنیاں نوں انعام دیونا ہے۔ پہلا انعام خضر دا ہے منگ توں خضر۔“ اوس آکھیا،  
 ”نہ بھئی اسیں بھٹی بھٹیر توں کل پئے آوندے ہاں۔ پہلا انعام بھروانے دا ہے۔ ایہہ  
 بجن دا سردار ہے۔ دُوا انعام ہے لالی دا۔“ نواب آکھیا، ”منگ بھئی بھروانیا۔“ اوس  
 آکھیا، ”جیہڑا چڑھی اپنی دا ماہرا ہئی مینوں چاں دے۔“ اوس آکھیا، ”لے لے۔“  
 ”راضی؟“ ”جی آ، راضی۔“ اوس آکھیا، ”ہاں بھئی لالی۔“ اوس آکھیا، ”اپنا گھوڑا مینوں  
 چاں دے۔“ ”ہلا خضر۔“ خضر آکھیا، ”جی، پنجاہ بندہ تہاڈے دورے سپرد ہے۔ رات

اللہ تعالیٰ آرام کان بنائی ہے۔ رات نوں ایہناں پنجاہ بندے نوں اُٹھے کاٹھ وگے ہوئے ہوعدن۔ متھے ایہناں دے زمین تے ہوعدن۔ عرش گوکاں ہوندین۔ اُتوں تلواریں دے جھنکار۔ سپاہی گاہلیں کڈھدے کھلے ہوعدن۔ ایہہ بندے کون ہین؟ ایہنا تھے کیس کیہ ہین؟“

نواب ولی داد خان آکھیا، ”ایہہ راوی دے راٹھ ہین کاٹھے، ڈب سنپال، وٹو، کھل، ویہنی وال، وسیر، بگھیلے، لکھیرے، پیروکے، چرہیڑے، توماں دے سردار ہن۔ ایہناں دے ال تَرنی بندی ہے۔ اوہدے وچ چھیویں مہینے دے بدھے ہوئے۔“ خضر آکھیا، ”اساڈیاں وی کنیں واریں تھردیاں ہن۔ گھر طاقت ہووے اتی بے عزتی کوئی وی منظور نہیں کریندا۔ سردار ہین توماں دے۔ بے متھے بخشش کرنی ہاتاں ایہناں نوں اللہ واسطے ماف کر، چھڈ دے۔“ سیال دا سر چکرا گیا۔ اوہناں دے آل رقماں بہوں بندیاں ہان۔ سیال آکھیا ہے، ”جم دیا کڑمیا! نہ کائی شے اپنے گھر چھوڑی ہوئی ہانہ میلکھ دے گھر بھوندی ہا۔ ایس گھوڑا لیا ہے تھان سو پوسن۔ دشمن توں نکھسی۔ کھڈیاں وکھسی۔ لیندا کجھ نہوں پیا اُلٹا میری جڑھ پیا کڈھدا ہین۔“ خضر بولیا، ”خدا دی قسم ہے مینوں پتہ ہوندا ایہناں اُٹھ تے گھوڑا منگنا ہین تاں میں پہلا انعام کدی وی نہ دیواں ہا۔ مطلب میرا ہا بھئی بھرا ہن اساڈے۔ ویہدے پین کنیں ہک چھوڑیسی۔ کنیں دوا چھوڑیسی۔ باقی دے میں تاں چھوڑیسیاں۔ مینوں کیہ پتہ ہا سارا بوجھ میتھے آونا ہا۔ مرگھوڑے وی جاونا ہے۔ مر اُٹھ وی جاونا ہے تے نواب صاحب! میرے انعام دا قیامت نوں پتہ لگنا ہے۔“ نواب دیاں ہنجوں ٹپیاں ہن۔ اوس آکھیا، ”خضر! اسیں وی مُسلمان ہاں۔ اسانوں وی قیامت دے خوف ہن۔ چلو پنجاہ بندے دے کاٹھ پٹو۔ میں اللہ دی راہ تے ماف کرینا ہاں۔“ پنجاہ دے کاٹھ پٹا کے خضر گھر آیا ہے۔ چھوہریں بھٹیوڑ دیاں اوس ویلے گاؤں گاوندیاں ہان:

جیوے بچڑا علی خاں دا  
بندی وان چھوڑائے علی خاں دا



## نارنگ ساہی

دانا باد دے کھل ساہی سدیندن۔ مرزا وی ساہی کھل ہويا ہے۔ اڑل ہے ایہہ۔ مرزا مرگیا ہويا ہا۔ ماہنی ایہناں دے دشمن ہان۔ سرجاناں دا کھل ہويا ہے، ایہہ مرزے دے بھرا توں کچھے ہويا ہے۔ پہلی شادی اوس کیتی کھلاں آل۔ اوس دے وچوں پُتر ڈھیہا۔ اوہا ناں نارنگ ہويا ہے۔ نارنگ دی ماں مرگئی۔ دُونی شادی اوس کیتی رجوکیاں آل۔ رجوکی دے وچوں دو پُتر ہون۔ یار بیگ تے عزت بیگ۔ دیہاڑے ہوئے تاں اوہناں دا پیو مرگیا۔ رجوکی خیال کیتا اتھے چوگُوٹ اساڈا دشمننا ہے۔ ایہہ پُتر میرے مری جان۔ ہووے نہیں تاں ایہہ دیہاڑے میں کسے سجن دے بُو ہے تے گھتاں۔ ترائے سوار لے کے ٹُ پئی۔ اوتھوں ایہہ بھوڑانی بھٹیاں دی وچ آ گئی۔ راء خضر، علی خاں دا بھٹی ہا، اوس کچھیا، ”کون ہے بھائی؟“ اوس آکھیا، ”جی، میں رجوکی ہاں کھلاں دے گھروں تے تئیں اساڈے لگدے بندے او۔ چند مصیبت دے دیہاڑے ہن، اوہ میں تاں کٹن آئی ہاں۔“ اوس آکھیا، ”ٹھیک ہے بھین ہوئیوں، جی آئی۔ بہو۔“ ترائے سوانیاں ہوئیں راء خضر دے گھر۔ دو بھٹیایاں تے پک بھرت۔ جیس حویلی وچ اوس رہائی ہے نا اوس حویلی وچ سال بھر خضر نہیں آ وڑیا۔ ساون دی رُت ہے۔ خضر، علی خاں دے بھٹی کول پھیس لگی ہوئی ہے۔

ڈیرے تے پٹھن۔ کھرل چھوہر ترائے تے بھوڑانی دے چھوہر کھیڈ دے ودن۔ جیہڑی آوی کھلی ہے بھوڑانی دے اُبھر دے، ایس دے اُتے۔ اچانک بدل چڑھیا ہے۔ اُبھر دیوں، بدل گھنگھور گھتی آوند ہے جیویں بدلاں دی طرز ہے۔ ساون دی رُت وچ ایہہ وسدن۔ ہوا پُرے دی چھٹی کھلی ہے۔ بدل بولیندین پئے۔ پکے واری راء خضر ہائے ہائے کیتی ہے۔ ”کیہ راء خضر؟“ اکھے، ”ایہہ ترائے کھرل چھوہر مری گنن۔ دُوئے چھوہر کھیڈ دے کھلن۔ راوی آل گھڑ بدھی کھلا ہے بدل۔ اوہناں ترینیں دے مُونہہ اودائیں ہو گنن تے تمب ہو کے کھلن۔ ایہناں وُٹن تے جاونا ہے بندے ایہناں دے دُشمن ہین، ایہناں مری جاونا ہے۔“ اوہا گل بنی اوہ ہٹ کے لگے آئے۔ اکھے، ”اماں۔“ اکھے، ”جی۔“ اکھے، ”راوی وس پئی ہے۔ راوی آل بگلے اُڈ دے نظر آئیں۔“ بگلا اودوں اودائیں اُڈا ہے جدے بارش ہووے، پانی تھوڑے ہوندے ہان۔ چھوہراں دی ماں آکھیا، ”راء خضر! اسانوں رخصت کر۔“ خضر آکھیا، ”جتنے تائیں ایہہ ترا ہے چھوہر کبھو نہ ہو رہے میں تہانوں کوئی نہیں جاون دیونا۔“ چپ کر گئی۔ راء خضر کماں آلا بندہ ہا، نکلیا اوہنوں دیہاڑے پونے ہان۔ رجوکی ترا ہے چھوہر لیندی تے نس گئی۔

ناہلی مگنی آلا پتن پار پئی ہے تے اگوں مگنی دیاں کدھاں تے ماڑیاں تکیاں ہن۔ پچھیا ہے ”کیہڑا تھینہ ہے؟“ اکھے، ”مگنی ہے چدھرڑاں دی۔“ رجوکی ڈری ہے بھئی صاحبان منگ طاہر خان چدھرڑاں دی ہائی تے متاں اوس وجہ توں کوئی مینوں ہتھ چاں لائے۔ اسیں اج ہر توں کمزور ہاں۔ اوس مگنی راہ پاہ چھڈ دتا تے لمیوں چاں دلایا ہے۔ اگوں پے بارنوں گئی ہے۔ آہدن: اوس ویلے ساندڑ بار انج ہوئی ہے بھئی بندہ بندے دا پگڑا لاه کے ہک جھاڑ دلائے ہا نا چاں مُد لیمہدانہ۔ انج گھاٹی بار ہوئی ہے۔ اوہ بارنوں وڑی راہ دے سے کوئی نہ۔ بندہ ملے کوئی نہ۔ اودوں ترینیاں چھوہراں نوں

تسا لگا ہویا۔ اوہ نمائی بھجن لگ پئی ہے۔ چھوہر پانی پانی کرین۔ اوہ بھج کے ہک ون تے چڑھی ہے بھئی کائی وسوں ولایت دے۔ تکیوس تاں اگوں پرا کیتی آویدن شکاری۔ باز تے بندوقاں تے تیر تے پیادے لگے آویدن۔ اوس ٹھکر کیتا۔ اودائیں ٹر پئی۔

شکار چڑھیا آوندا ہا صاحب خان ماہنی کھیوے دا سردار۔ ایس نمائی نوں کیہ پتہ ہے بھئی میں بلا تے پئی پوندی ہاں۔ ایس آکھیا، ”بھائی پانی۔“ اوہناں آکھیا، ”پانی ہے۔“ اوس ویلے مشکیزے لے کے ٹردے ہاں۔ پانی پیوایا ہے۔ ایس آکھیا، ”دانا باد جاونا ہے اسانوں راہ دسو۔“ دانا باد دا اج وی کھیوے ناں چاں لیوے اوہناں بندیاں نوں سرتائیں کاوڑ چڑھ جاندی ہے۔ صاحب خان آکھیا، ”کون ہیں توں؟“ ”رجوکی ہاں۔“ ”اودے کیہ کرنا ہے؟“ اکھے، ”اساڈا گھر ہے تے فلانے کھرل دے گھروں ہاں۔“ ”ایہہ ترائے چھوہر؟“ اکھے، ”اوسے دے ہن۔ ایہہ وڈا متریا ہے تے دو نکڑے میرے ہن۔“ اوس آکھیا، ”تراپے چھوہر نپ لیو تے ایس سوانی نوں راہ دکھایو۔“ اوس آکھیا، ”چھوہر کیوں نپ لین؟“ اکھے، ”توں مینوں جاندی نہیںوں تے میں صاحب خان ماہنی ہاں، کھیوے دا سردار۔“ اوس ویلے ایہہ نواب ہوئن۔ ماں ترائے کھسا کے کدے جاوے ہا؟ اوہ مگر واسطے گھتی آوے۔ بال نپ کے پچھانہہ ٹر پئے۔ خاؤ آنے شہر چوں آ لگھیا ہے۔ خاؤ آنیاں تے کھرلاں دی برادری، تے کجھ علیک سلیک ہا۔ خاؤ آنیاں قرآن مجید میلا کیتا ہے۔ بال چھڈ دے۔ اوس آکھیا، ”میلا میں من لیا ہے۔ ڈیرے اپنے تے جا چھوڑیساں۔ اتھے میں چھڈاں تاں میرے مگر گل لگدی ہے بھئی خاؤ آنیاں چھوہر کھس لین۔“ اوہناں آکھیا رجوکی نوں، ”لے جا ہن چھڈ دیسی۔“

جیہیں ویلے ڈیرے تے جالتھا ہے اوس آکھیا ہے، ”رتے! میں چھوڑنے ہوندے تاں میں پنے کیوں ہاں۔ توں اپنی دانت نہ لہا۔ توں جا۔“ رجوکی بھج کے

ماہنیاں دی حویلی نوں جا وڑی ہے۔ سوانیاں دے پیرن لگ پئی ہے مہرپٹیاں دے۔  
 مینوں پُتر چھڈوا دیوے۔ پھڑی دا پتہ او سے نوں ہوندا جدے پھڑی دا مُونہہ ہووے۔  
 جدوں کنڈ ہووے اوہنوں کیہ پتہ۔ اوہ ہس پون مرداں دی گل ہے اسانوں کیہ پتہ۔  
 باہروں بھج کے ہک سوانی وڑ پئی ہے۔ اوں آکھیا، ”اوہناں تریہیں دی ماں ہیں توں؟“  
 اکھے، ”جی آ۔“ اکھے، ”تراہے گُسدے پئے نی۔ مُونہہ ویکھنے نی تاں ہُن ویکھ لا۔“ اوہ  
 بھج وگی۔ بھج کے جیہیں ویلے دروازے وچ آئی ہے تاں نواب صاحب خان ماہنی پیا  
 آہدا ہے نوکر نوں: ”اندروں تلوار لے آ تریہناں دے سر وڈھ۔“ تلوار لے کے  
 اندروں نکلیا ہے۔ سوانی آ کے پیراں تے ڈھے پئی ہے۔ ”صاحب خان! تراہے نہ  
 کوہ۔ مینوں ہک اللہ واسطے دے چاں۔ انجیں جانی وڈھ چُنیا پیس تے تریہنا جھہ وڈھ  
 چُن آلی دا ہوندا ہے۔ ہک کانہہ مینوں دے چاں۔“ جیہیں توں اج تاں سوانیاں  
 آہدیں میتھے تاں اتنے کانہہ ہین۔ ایہہ کانہہ دا لفظ رجوکی آکھیا ہویا ہے۔ صاحب  
 خان آکھیا، ”ہک اُٹھائے۔“ دوہاں سکلیاں ماں دے مُونہہ آلوں تکیا ہے۔ نارنگ دی  
 مترئی ہائی۔ نارنگ جھولی اِچ چاں مُونہہ گھتیا ہے۔ سانوں کاہیں اُٹھوانا ہے۔ یار بیگ  
 بولیا ہے اکھے، ”عزت بیگ بھیڑیا! راٹھ دا پُتر ہیں۔ موت آ کے رہنا ہے:

صفتاں تیریاں ماکا اسانوں وی آسرے تیرے

راٹھ اوتھے ٹھلڈن جتھے کپر کڑکن پون سار بہیرے

راٹھاں باجھ نہیں وگدیاں تیغاں،

پر سخیاں باجھ نہیں پکدے ڈیرے

جیہڑے ویلے اماں نوں حکم ہویا ہے ہک اُٹھا لا۔ توہیں وی تکیا ہے۔ میں وی  
 ڈٹھا ہے۔ نارنگ دا جھولی آل مُونہہ کرنا میرا کلینا پاڑ کے سٹ گھتیا ہے مر جانا سیں،  
 اماں نوں توں وی آکھ تے میں وی، نارنگ نوں اُٹھائے۔“ دوہاں بھراواں آکھیا ہے،

”اماں! مر اسماں مُڑ وی جاونا ہئی تے اج خُدا توں عِزت لے تے متریا اُٹھاتے  
 اسانوں کُسن دے۔“ بھراواں نوں آسان ہے گل کرن۔ متری نوں متریا پُتر اُٹھاوناتے  
 سکے کوہاؤ نے بہت مُشکل ہن۔ ایڈے راٹھ دی بیچی ہوئی ہے۔ اُٹھی تے اوس نارنگ  
 دی بانہہ نپ لئی ہے۔ ”اُتانبہ اُٹھی۔“ نارنگ اُٹھیا ہے تے دوہاں چھوہراں تے تلوار  
 وُٹھی ہے۔ پیٹھ تلوار دے اوہناں دیاں بکاٹیاں نکلیاں ہن۔ سِر ڈُک کے دور جا پین۔

بھنے ہن ساہی کھل، بھج کے وڑے کھیوے

اگے صاحب خان ماہنی ہے، بھرتنگ شراب دی پیوے

اوس وڈھ اڈاؤن راوی دے ڈیوے

لکھ لعنت ہے ماہنیاں، جاں تا میں جیوے

لاشاں تڑپن لگ پینن۔ نارنگ دی ڈھاہ نکلی ہے۔ ماں رکھ کے اُلتھا مُونہہ تے  
 ماریا ہے۔ ”میں تینوں رواون کان اُٹھایا ہے۔ بیجا! رویندا اوتھے ہے جتھے کائی حد کھلی  
 ہووے۔ جیس ویلے ظلم دی حد تڑٹ جاوے اوتھے روون حق کوئی نہیں۔ پھر پوس تاں  
 بھلکے ویر چاں لئیں۔ اُتانبہ اُٹھی، اُڑ۔“ اوس آکھیا ”اماں! ایہہ اوہ بھرا ہین جیہناں  
 میری موت لئی۔ میں دوہاں دیاں لاشاں راوی لے جاویناں ہن۔ میں کُتیاں کاواں اگے  
 کیوں سٹ جاواں؟“ اوس آکھیا، ”سٹھ کوہ دانا باد ہے۔ جنگل دا سفر ہے۔ دو میت لے  
 کے اُرن۔ میں عورت تے توں بال۔“ اوس چادر تاں کھلاری۔ ہک پاسے ہک لاش  
 چاں بدھی تے دوئے پاسے دُوئی۔ موڈھا دے کے اُٹھیا ہے۔ پہلے قدم تے تھڑ بکیا  
 ہے۔ تک سٹھ کوہ تے۔ دو لاشاں ہن۔ آپ وی ایڈا گھرو کوئی نہیں۔ ماچھیاں دا گھر  
 باہر وار ہويا ہے کھیوے توں۔ اوتھے آ کے ساہ کڈھیا بیس۔ مچھانی بڑی رُنی ہے۔ پانی  
 پویا بیس۔ ست پُتر مچھانی دے ہوؤن۔ اوس آکھیا، ”بتری دھاراں تہ خنخیشاں ایہہ  
 لاشاں اپڑاؤ۔ ایس غریب توں چیندیاں ہن، جیہدے دو کُسن گنن۔ ایس توں لاشاں

دانا باد نہیں جانندیاں۔“ ماچھی ٹر پین۔ لاشاں چالندیاں ہن۔ راہ دے وچ جیویں جیویں  
 خلقت سُندی گئی ہے بھئی رجادے کے کھرل ہین۔ ایہہ ایہہ کار ایہناں نال ہوئی ہے۔  
 آدم آپے اللہ واسطے نال رن لگ پیا ہے۔ دانا باد جالاشاں دُن کیتیاں نیں۔  
 نارنگ ہوریں صاحب جاسیدا ہوئِن۔ پگڑی ایہناں دی ہائی۔ اوہ شریکاں لے  
 لئی۔ کنھاں نارنگ نوں آکھیا، ”توں دعویٰ کر، اسیں گواہیاں دیندے ہاں۔ اسیں تیری  
 مدد کریندے ہاں۔“ او بھٹریاں او۔“ اوس آکھیا:

باگ لوینی آں وچ لوینی آں دھائیں  
 کھڑیائے چنبا پھل چنبن آرائیں  
 پھل اوہ پیندیاں ہن جنھاں دے ویر اتھائیں  
 ساڈے ویر پردیسی ہن، بھاہ پھلاں نوں لائیں

”میں جڑھ کڈھنی ہے پگڑیاں دی۔ میں کوئی پگڑیاں جوگا رہیا ہو یا ہاں۔“  
 نارنگ ہک وچھیرا نسلی وکھ کے رکھیا ہو یا ہا۔ صبح شام اوہدی حفاظت۔ اوہ مگر  
 ٹُدا ہا لیلیاں وانگوں۔ بندیاں نارنگ دا ناں واہیات رکھیا ہو یا ہا۔ نہ رعیت دا چکھے نہ  
 برادری دا۔ دیہاڑے لگھدے رہے، جیہڑے ویلے اوہ چڑھن دا ہو گیا، نماز ویلے اوس  
 تے کاٹھی گھتے، دوئیں پہر ڈیگ راوی دی من اُتے اوس توں دو کم لے۔ ہک دوڑ دا،  
 ہک جھال ٹپاون دا، ترٹ دا کم۔ گھر آوے تاں ماں مونہہ کچی بیٹھی ہووے۔  
 بھراواں نوں تاں سمھالیا وی کدی نہیں ویر تاں نہیں لے سکدا۔ دیہاڑے گزردے  
 جاوے۔ جیس دیہاڑے نارنگ سمجھیا ہے نا ج میرا گھوڑا ہک پہر وچ سٹھ کوہ کریندا ہے۔  
 آیا ہے نماز ویلے کاٹھی گھتی ہیس۔ ماں سمجھیا ہے اگے آر ویندا ہے پیا۔ تو برا ہتے دے  
 وچ سٹیا ہیس۔ میرا ہتھ پے جاوے تاں ماں نوں نواب صاحب خان دا سر وکھائیں  
 تاں اوہ دیہاڑا لاہندا ہے۔

دانا باد چوں نکلیا ہے۔ نکل کے مُونہ پھیریا پیس گھوڑے داتھینہ نول۔  
کیہ پتہ میں مُہٹ کے آونا ہے یاں نہیں۔ آخری دن ہے۔ پک واری دیس اُتے  
نظر تاں مار لئیں۔ نظر ماری پیس تاں ہنجوں ویہہ آئیاں پیس۔ ”میرے اللہ! میری  
حیاتی تاں مُہ تیرے وس ہوئی۔ اوس بڈھڑی دا چکھے کوئی نہیں جے میں مری جاواں۔“  
گھوڑا سٹیا پیس۔ پھر دینہہ دا آیا کھلا ہے اگوں ماڑی کھیوے دی نظر آئی پیس۔  
گھوڑے نوں تھکی ماری پیس، شاوا۔ چُکھیا پیس کسے بندے توں نواب صاحب خان  
ایس ویلے کتھے لہسی؟ اوس دینہہ آ لوں ویکھیا ہے۔ انج لہندیوں ولائی آ۔ لہندے آلی  
چُٹ اُتے کھوہ ہی۔ اوتھے ایسے ویلے نھاوندا ہے۔ اوس آ کھیا، ”خُدا یا! انج باہر کڈھ  
کے دیویں تاں۔“ اگانہہ آیا ہے تاں اولو دے چوگر دے کدھ اُسری ہوئی ہے۔ نساہ  
اُچی ہے۔ گدھیال کُٹا بھکھا کے انج گادھی آل ٹُریا ہے۔ ایس سلام دتا ہے۔ ”کُٹا  
ہی؟“ اکھے، ”ہا۔“ ”ہلا اوہراں کر۔“ شکل چنگی، لباس چنگا، ہتھیار چنگا، گھوڑا چنگا۔  
ایہہ شمس رل جاون تاں ان جاؤ وی سلام جھلیندا ہے۔ اوہ کُٹا نپ کے آ کے کھلور ہیا  
ہے۔ کُٹا چھکن لگ پیا ہے۔ ایس چُکھیا ہے، ”نواب صاحب خان سُنیا ہا اتھے۔“  
اکھے، ”نوکر نکلے آوین تے اوہ وی مگروں گرودا آوندا ہوسی۔“ لکھے دے بعد جوں  
بھائیں کے تکیا تاں صاحب خان اوووں نکلیا ہے۔ صاحب خان نوں ایس ڈٹھا ہے۔

ویری ڈٹھے ویریاں، مُونہہ کوڑھے اکھیں گہریاں

ایس سٹ ماری ہے ہویزے وچ اگ بلی ہے۔ اکھے، ”لے جا۔“ گدھیال  
آ کھیا، ”وچ سُر چھڈیا ہی۔“ اوہ کُٹھدا گادھی تے جا بیٹھا۔ صاحب خان نوں ویکھ  
کے جیہڑیاں سوانیاں وچ اولو دے ہان، اوہ نکل آئیاں۔ صاحب خان وچ جھلا بدھا  
ہے۔ اولو وچ وڑ آیا ہے۔ اوس ویلے ایس گھوڑے دا تنگ گوڈا چھکنا شروع کر دتا ہے۔  
چھک کے دھرک مار کے لتھا ہے۔ ایس آ کھیا، ”نواب صاحب خان! میں اوہ نارنگ

سہا ہی ہاں، جیہدے دو بھرا کٹھے ہوئے نی۔ اج دے کے جا۔“ ایس ماری ہے چنگ کدھ تے آ بیٹھا ہے۔ یقین ہاس گھوڑا چھڈ کے نہیں ویندا۔ ایس تلوار ماری ہے نِسار اُچی ہائی نواب صاحب خان پٹھ ہو گیا۔ گوکاں وگ گنیاں۔ حال حال پے گئی۔ تھینہہ دا مڈھ ہا۔ آدم نکلن لگ پیا ہے۔ ویکھن ایڈوں آدوں لگ پیا ہے۔ ست تلواریں ایس ماریاں ہین ستے نِسار تے لگیاں ہین۔ ایہہ پیا جاندا ہے اوہنوں پیاں لگدیاں ہن۔ اتنے تائیں آدم نیڑے آ گیا ہے۔ ایس چنگ چائی ہے تے گھوڑے تے بہہ رہیا ہے۔ ارمان اگے نالوں ودھ گیا تے دھروڑ گیا۔ جتھوں تائیں سانگے ہان نواب صاحب خان دے پرچاونی کان آئے۔ اوہناں صلاح دتی انج ویسرا ہو کے ہن نہ نکلیں ایس بندے تیتھے مُر آونا ہی۔ اوہ باہر نکلے تاں فوج نال ہووے۔ ڈیرے دے وچوں دو کدھی گلی چھکوائی پيس۔ صاحبان آلی مسیت نوں آئی تے اوٹھے حوض ٹوٹیاں لوایاں تے باہر نکلنا چھڈ دتا۔

چھوایں ایس گل دی کٹ پے گئی ہائی تے راوی تے پتہ کسے نوں نہ۔ ایہہ پیا رہے۔ ماں چُھوس: پُڑا! گھوڑا کدی نیہوں ٹوریا؟ اکھ، ”اگلے دیہاڑے ڈھاہیا پيس۔ ہاں سچ بیڑ ہے۔“ اوہ نمانی کاڑھے ماڑھے بنا کے لے آوے۔ ایہہ نظر بچا کے ویٹ چھڈے۔ ماں چُھوس تاں آکھے کسر ہے۔ ڈھیر دیہاڑے جال گیا بھنی گل کجھ ویر لے۔ ڈھیر ناں دیہاڑیاں دے بعد چڑھیا ہے۔ اوہو توہرا کول پيس۔ کھیوے آیا ہے۔ چُھیا پيس، ”نواب صاحب خان؟“ اوہناں آکھیا، ”ایس ویلے ڈیرے تے بیٹھا ہے۔“ کچھریاں سد بندیاں ہان اوہناں دیاں۔ ”کچھری لائی بیٹھا ہے۔“ دروازے نو ہون کھیوے دے۔ دروازیوں وڑ پیا ہے۔ جیس ویلے اگانہہ آیا ہے تاں چُھیا پيس، ”نواب صاحب خان؟“ اکھ، ”تھاون گیا ہے۔“ ”سدے؟“ اکھ، ”ایس دو کدھی گلی وچ۔“ اودائیں رُ پیا ہے۔ بندیاں کچھے آکھیا ہے۔ ”دہنہہ دیریں



ایس موہل کیوں ماری ہوئی ہے؟“ کنھیاں آکھیا، ”بھین دے بھراؤ! ایہہ گھوڑا تاں اوہو نہیں جیہڑا اوس دیہاڑے نارنگ ساہی دے پیٹھ ہا۔“ بندے اٹھی کھلوتے۔ اُتنے تائیں ایہہ پہنچ گیا ہے۔ نواب صاحب خان دہی سرتے دگا کے ٹوٹی کھولیندا پیا ہے کہ بُوہویوں ایہہ وڑ پیا ہے۔ ایس گھوڑے توں دھرک چاں ماریا۔ ”صاحب خان جیویں ہوونا ہی ہولا میں آگیاں۔“

لکھی بھٹی تکیا ہے شہادت لک نوں، پشمیں دیدرلا کے  
 لکھی آہدا ہے: شہادت میں دیواں رت رت پائے، ہک تیری چاہ تے  
 لک دی سار دی کوٹھی ہے، نہسوں رکھیا قدم بھنوا کے  
 لکھی عنایت دے دی سانگ ہے کائی، آندی اُستاد بنا کے  
 اوہدا چھڑتاں بانس بریلی ہے، پھٹمن لٹکے چڑھ ہواتے  
 اوس ماری ہے شہادت لک نوں، اوہ لگھی ہے پنجر کھا کے  
 جیویں گنگا نہاتی ہے باہمی، رام جپدی ہے نہا کے  
 یاں بیگم نکلی ہے شیش محل چوں، سجا سبیس گندا کے  
 اوہ ٹاہ ٹاہ کر کے ہسی ہے، جد لیا پیس کونت مرا کے  
 اوس دیہاڑے لکھی، عنایت دے بھرا وٹیا ہے،  
 پرتول کنڈے دے بھاء تے

والاں چوں نپ کے ایس تلوار چھکی، سر وڈھ لیا پیس۔ سر وڈھ کے گھوڑے تے چڑھ گیا ہے۔ اگوں پچھوں آدم۔ گھوڑا نچن لگ پیا ہے، اتنا موقعیا نہیں کہ تو برے بچ سر سٹ لوے۔ ہک ہتھ بچ سر ہے ہک ہتھ بچ تلوار ہے۔ گھوڑا پٹاں بچ ہے۔ دروازے آلوں کدھ اُسرگئی ہے تلوار دی تے مگروں وی۔ گھوڑا نچن لگ پیا۔ ایہو کجھ آکھے، ”بجو حوصلہ۔“ جیس ویلے دروازے دے کول آیا ہے تاں اگوں ڈانگاں اُلریاں

ہن۔ گھوڑے نوں ایس لت ماری ہے۔ ”کیہ سورا تینوں اج دے دیہاڑے کان  
 سانبھیا ہا۔“ گھوڑے ہاٹھ دے وچوں چنگ چائی ہے تے دروازیوں باہر جالتھا ہے۔  
 چنتے تائیں چنھاں دی حد رہی ہے، سر کھل دے ہتھ بچ رہیا ہے۔ اج ہر  
 کوئی وکھ لے۔ جیس ویلے راوی دا لڑ چڑھیا ہے تاں سر تو برے بچ سٹ لیا ہے۔ دل  
 ٹھڈھا ہے۔ خوش ہے۔ پہلا گھوہ دانا باد دا آیا ہے اوتھے تھھا ہے، پہلے خون دے دھبے  
 دھوتن۔ پٹ، پٹھے گھوڑے دے ملے ہن۔ مونہہ بچ پانی جھگایا ہے۔ اپنے اُتے  
 جیہڑے دھبے خون دے ہان اوہ دھوتن۔ ننگ ڈھلوا کیتا ہے۔ ساہ کڈھیا ہے۔ اگے  
 دوپہریں گھر جا وڑدا ہا۔ دینہہ اوس دیہاڑے ڈھل گیا ہے۔ دُورتوں تکلیا پیس تاں ماں  
 چُبارے تے کھلی پیس۔ جدے پُتر نوں نکلدا ڈٹھا ہاس اودائیں مونہہ پیس۔ ”میرے  
 اللہ! امان میری تیرے حوالے، اگے دی مٹھی ہوئی ہاں خیر کریں۔“ نارنگ اودوں تکلیا  
 ہے ماں آلوں تاں پنجوں ویہہ آئیاں پیس۔ نارنگ ہورتاں تیری خبر لین آلا ہے کوئی  
 نہ اوہ تاں نمائی کھلی ہے۔ جیہڑا کجھ ہوندا پیس۔ خیال آیا پیس اچانک ماں نوں دساں  
 تاں متاں اوہدا ہارٹ فیل ہو جائے۔ بڑھی عورت ہے دکھاں دی ماری ہوئی ہے۔ دل  
 اپنے نوں ترکڑیاں کریندا گھوڑے توں لٹھا ہے۔ اوہ وی لہہ آئی ہے۔ گھوڑے نوں کائی  
 شے گھستی ہے۔ کاٹھی لای ہے۔ تو برا ٹنکلیا ہے۔ اگاڑیاں پچھاڑیاں لا کے ہتھ مونہہ دھوتا  
 پیس۔ آن بیٹھا ہے۔ ماں آکھیا پیس، ”روٹی لے آواں؟“ اکھے، ”جی۔“ اکھے،  
 ”نارنگ۔“ ”جی۔“ ”اج توں مینوں بہوں پیارا پیا لگنائیں۔ کیہ وجہ ہے؟“ اکھے،  
 ”پُتر جوں ہو یوم تیرا۔“ ”پُتر تاں اگے وی ہائیں؟“ اکھے، ”آکھیں تاں میں تینوں کھتا  
 بھکھا دیواں؟“ اکھے، ”اماں میں اگے کدی تیتھوں بھکھوایا ہے؟“ اکھے، ”میرا جوں دل  
 ہے۔“ نارنگ نوں گوت آوندا ہے بھئی ایس غریب دیاں آندراں ٹھرگیاں ہن۔ چلو  
 اوس آکھیا، ”بھکھا۔“ اگ چاں بالی ہے۔ اکھے، ”تماگو لے آ۔“ اوس آکھیا، ”ایس

توبرے دے وچ میں تماکو چنگا آندا ہے ایس چوں گھت۔“ جوں اوس ہتھ ماریا ہے  
 تاں سر بندے دا۔ اوس آکھیا، ”ہائے ہائے نارنگ! ایہہ تاں سر ہے بندے دا۔“  
 اوس آکھیا، ”اماں! سیہان متاں صاحب خان ماہنی دا نہ ہووے۔“ اوس آکھیا، ”پچوا!  
 میں تاں ایڈی کرماں آلی ہاں ای نہیں بھئی صاحب خان ماہنی دا سر اتھے ویکھاں۔“  
 اوس آکھیا، ”حرام دا میں وی نہیں، توہیں میرے مگر دو کوہائے ہوئے ہن۔ پگاتے  
 ویکھ۔“ جوں اوس والاں چوں نپ کے سر چایا ہے:

صورت ڈھول دی سانوں کدی نہ بھلسی  
 ساڈا رُوح سیلانی ہے بُت گلیاں وچ رُسی  
 سانوں پتہ نہ غیب دا ہے، بھلکے واء کیہڑی گھلسی

سر پھدھ کے ماریا ہے تے کدھ تے جا لگا ہے تے سوانی حال حال چاں گھتی  
 ہے، ”اماں ایہہ کیہ بیڑا چاں بوڑیا ہئی؟“ اوس آکھیا، ”پپ کر میرے گل ڈھول کوئی  
 نہیں۔ ایڈی خوشی میں پچا سگنی آں۔“ آدم اکٹھا ہو گیا۔ ”بھیڑیا! کیوں ماریا ہئی ماں  
 نوں؟“ اوس آکھیا، ”میرا خانہ کعبہ ہو یا۔ انجیں منڈی کھلی ہے حال حال۔ میرا دماغ  
 خراب ہے۔ میں تاں کجھ نہیں آکھیا۔“ ”بڈھڑیے کیہ ہئی؟“ اوس آکھیا، ”اج میرا  
 دیہاڑا لہ چھڈیا پس تے ایہہ صاحب دا سر ہے۔“ ڈھول چاں اوہناں مارے۔  
 جیہناں پگ لئی ہوئی ہائی اوہناں اپنے ہتھیں دے چھڈی۔ ”نارنگ! آپت ایج تلوار نہ  
 گھتیے۔ اگے جوں ٹسیں سردار ہائے۔ ایہہ پگ۔“

ہُن ہر شے ایہدے مگر ہووے۔ نارنگ چڑھے، کوئی بندہ جھل جاوس کھیوے دا۔  
 ”کتھے ہئی گھر؟“ ”کھیوے۔“ ”ہُن ہُن آ بیٹھے او؟“ ”نہیں جدی ہاں۔“ مارے تلوار  
 ، سر وڈھیندا تے نکل جاوے۔ مینوں ہک کھیوے دے بندے دسیا ہا: کھیوے دے  
 اُبھر دے آ لے کھوہ ڈالاں ہو گئے ہان۔ کوئی پراہنا آونے ہاں تاں آکھدے ہان،

ایدے نہ نکلیں اوہدا ویلا کو یلا کوئی نیہوں۔ ہوا بن گیا۔ بندے مارن لگ پیا۔ ماں میلا چاں کیتا پیس بس کر۔ ”توں جوں مری جاسیں، میں کدے جاساں؟“ خلقت آئی بیٹھی ہے۔ ”میلا آئے بیٹھے ہاں۔ ایہہ بھیناں تے ایہہ پھٹھیاں۔“ نارنگ آکھیا، ”کھلاں او! تئیں آہدے او اوہناں تیرے دو گٹھے ہوئن تے توہیں اتنے مارے ہن۔ میرے اوہناں گٹھے ہوئے ہن بچے، مسافر، ماں میری پیراں تے ڈھاہندی ہائی تے اوہ پیر چھنڈیندا ہا۔ بھری کچھری وچوں کسے نہ آکھیا، ظلم نہ کر۔ میرے ہن ایہہ سارے قاتل۔ ماں نوں میں آکھیا ہویا ہے شادی میں نہیں کرنی۔ میں مرنا ہے کیوے دے راہ تے۔ میرا ارمان لگا نیں تاں مینوں دھاڑ چاں دیو گل مک جاسی۔ نہیں تاں میں اوس دیہاڑے کھلو دنا ہے، جیس دیہاڑے ماہنی دی قوم کیوے وچ نہیں لبھنا۔ ہک بندہ ہاں میٹھوں ایہو کجھ ہوندا ہے۔“ آہدن: ماواں پتر اں نوں آکھیا ہے بتری دھاراں تہ ماف کرنیاں ہن جے نارنگ دی دھڑ کرو۔ نارنگ نوں کھلاں آکھیا ہے: نارنگ! آئے تاں ہاسے تینوں کھلارن، پر ایہہ بلائیں ساڈے گل پے گئی ہے۔ اٹھیو دھاڑ دیو۔ کھل دھاگئے۔ کیوے دس پے گئی۔ اگے تاں آوندا ہا، ہکارا چوری۔ ماہنی وی نکل آئے۔ لڑائی پے گئی۔ کھل چل پئے۔ نارنگ وی دھروڑ گیا۔

نارنگ جا کے اکھ کیتا ہے دانا باد وچ۔ ”گپڑی میری وی سٹ آئے ہوتے اپنیاں وی۔ کیتی کرتیائی میری وی تباہ ہوگئی۔ دھاڑ دیو جیویں میں آکھاں۔“ اکھے، ”کیویں؟“ اکھے، ”ایہہ گھوڑے ہوون تاں اسانوں گھر لے آوندا۔ سڈھیاں تے چڑھ کے جاویے۔ یقین ہو سی اسانوں گھر تاں نہیں اپڑیندے۔ اسیں وی بندیاں وانگوں لڑسائیں کیوں جوں سڈھے وی چار تلواریں جھل کے ہک قدم پٹنا ہے۔“ آہدن: نارنگ راوی دی ڈیگ دی من اُتے بھج پیا ہے۔ جتنی راوی ہے کاٹھے، ڈب، سنپال، ویہنی وال، وٹو، وسیر، بگھیلے، بیرو کے، چرہیڑے، گل کھل قوم دھڑ چاں کیتی

ہے نہیں دی۔ کٹک چاڑھے سوں پر بڑے۔ آ کے لڑن لگ پین۔ اوس دیہاڑے نو  
دروازے ہان کھیوے دے۔ نواں نوں پھوک کے اگ چاں لائی بیس۔ مسیت سڑی  
ہوئی میں دی ڈٹھی ہے۔ ایہہ مڑ آ کے مہاجراں چھتی ہے۔ اج تائیں ماہنی دی قوم  
کھیوے بچ کائی نہیں۔ نارنگ آ کھیا، ”جیہڑا ماچھیاں دے گھر وڑ جاوے مت جھاتی  
گھتو بھاویں ماہنی ای کیوں نہ ہووے۔ اوہ مچھانی مینوں ماں توں گھٹ کائی نہیں۔“

## نور، کندر دا سپرا

نور، کندر دا سپرا مالکیاں دے وچ ہويا ہے۔ ایہہ مالکے سپرا سدیندن۔  
آبدن: ایہہ کندر دا پتر ہے۔ کندر نوں اوس ایلے کندری سدیندے ہان۔ ساک کسے  
سپرا نہ دتا۔ پٹھانی ہک مئل لے کے کندر نوں دیتا نہیں۔ ایہہ پٹھانی دے وچوں ہے  
نور۔ نورا وڈیرٹا ہو پیا۔ دو آہنے دے وچ ایڑ بہایا ہويا ہے کندر۔ نورے نوں دی نال  
لے جاندا ہے پیار توں۔ جھڑی لہہ پئی پوہ دی۔ اوہ اودائیں ڈھپر دے وچ ہے۔  
پٹھانی نہ اپڑی ٹکر لے کے۔ خیال آیا ہے کندر نوں بھئی چھوہر بھگھا بیٹھا ہے۔ میں  
ایہناں دی جڑھ کڈھنی ہے۔ اوس بھید چاں کٹھی چنگی پک بھئی ودھدی گھر لئی  
ویسائیں۔ نورے نوں کھواون لگ پیا ہے۔ اوہا مڑ او جھری شو جھری تے سری کھراوڑے  
آن بچے۔ فجر کندر آکھیا، ”جے ایہہ لائق ہويا تاں ایس جیڈا لائق کوئی نہیں ہوونا۔  
جے بھید ہويا تاں ایس جیڈا بھید وی کوئی نہیں ہوونا۔ ایس ایہہ ایہہ کار کیتی ہے۔“  
ہمیشاں نور سپرا نوں پیو دسیندا ہا: مجھ اساڈی ہا چکا، اوہ سعی کے ہرلاں لکا لئی  
ہائی۔ ناہنے دتی۔ نورا گھرو ہو گیا۔ نورے چاں تکلے سعی کے ہرل۔ ہکلے۔ چاننی رات  
ہائی۔ سعی کے گھر جا سوندے ہان۔ اوہناں نوں یقین ہائی اسانوں کون لگدا ہے۔ مجھ  
پک چوٹی دی ہائی۔ اوہ نورے چک لئی۔ نورا جہڑے ایلے اوہناں آ لے سٹھ تے آیا

ہے، من دریا دی تے وگیا آوندا ہا، شینہہ بکے۔ مجھ ترٹھی۔ مجھ داسنگ نپ لیوس۔ بے ہتھوں آ کے شیر حملہ کیتا ہے۔ ایس رنج تلوار ماری وچوں تردی نکل گئی۔ مجھ گھمبھ گئی۔ تڈ ماریاں مجھ کڈھی۔ فجر گوکاں وگ گئیاں۔ بندیاں آکھیا: کون ہووے جیہڑا سعی کیاں نوں لگ پیا ہے۔ کھوجیاں آکھیا، ”کون نہ آکھو۔ ایہہ شینہہ ماریا پیا ہے۔ مجھ کھبھی کھلی ہکلیاں کڈھی سوں۔“ ہرل بولیا، اوس آکھیا، ”بھائی! ہر کوئی وگ جاو۔ کھوجی ترو بھئی بندہ ویکھنا ہے۔ مجھ میں اوہنوں ماف کر چھڈی ہے۔“ گھر آن گھتیو نیں سپراواں نوں۔ نہ اگانہہ نکلے نہ پچھانہہ۔ سپراواں نوں اکھیو نیں: مجھ ہے تہا تھے۔ اوہناں آکھیا، ”اساڈی جرات توں کم باہر ہے۔ اسماں سعی کیاں نوں لگنا۔“ اوہناں آکھیا، ”مڑ ہامو۔“ بابا ہامن آلا کوئی بن گیا۔ نورا ایڑناں ہا۔ اوس لیاندا ایڑ۔ اوس آکھیا ”بابا! مجھ ہا میں نہیں۔ مجھ میتھے ہے۔“ پیو لنگالے کے وگیوس، ”سعی کیاں نوں؟“ اوس آکھیا، ”اومارکا! جے بے ہتھیں شینہہ ماریا پیا ہے تے کھے ہتھ مجھ کھبھی کھلی ہے تاں چور کون ہے؟“ اکھے، ”توں۔“ تاں ہرل آکھیا، ”مجھ تینوں بخش۔“ ایہتھوں تورا تورا ہو گئی۔

تورا وت اکھیویں بھیڑا راج ماریا ہے۔ بلا ایڈی ہو یا ہے گھوڑی آ لے دھا کے آسن، جن بھراونا۔ اگوں بھٹی نکل آسن۔ بھٹیاں بندوقاں وگائیاں۔ بندوق جن آلوں ہائی کائی نہ۔ دھاڑ چل پئی۔ گودھے ماچھی بندوق سدھی کیتی ہے۔ راء حشمت بھٹی چکھیا ہے، ”کہیوں وگاؤ ہیں؟“ اکھے، ”سارے بھتے دھروڑیں جاندن۔ اوہ بندہ ون نال کھلا ہے۔“ اکھے، ”نہ وگا۔“ ”کیوں؟“ ”ڈٹھا ہو یا میں نہیں۔ ایہہ نور، کندر دا ہوونا ہے، جیہڑا وسدیاں بندوقاں دے پٹھ کھلا ہے۔“ اوس آکھیا، ”اسانوں بھاجی گھتن آیا ہے؟ میں وگاؤنی ہے۔“ راء حشمت بھنا ہے اوس آ کے موہری پٹ لئی۔ سد کے چکھیا ہے: مہر تورا ہیں؟ اکھے، ”ہا۔ راء حشمت، تورا ہاں۔“ حشمت آکھیا، ”توہیں تاں مینوں ڈٹھا ہو یا کوئی نہیں۔ تینوں کاہیں دسیا ہے؟“ اوس آکھیا، ”توہیں وی تاں مینوں نہیں ڈٹھا

ہویا۔ تینوں کاہیں دسیا ہے؟“ اکھے، ”تیری مثال ہے بھی کنڈ نہیں دیندا۔“ اوس آکھیا، ”تیری وی مثال ہے میں سُنیا ہویا ہے حشمت، دانے دا لڑائی دے وچ حقا پک ہتھ دے وچ ہوندا ہے۔ پک ہتھ نال لڑدا ہے۔“ حشمت آکھیا، ”وگ جا کجھ نیہسے آہدے۔“ نُورے آکھیا، ”پوند ویسوتاں ویساں۔ انج میرا چلن بندا ہے۔“ اوس آکھیا، ”گرا پوی اسیں گھر کھلے ہویا سے۔ اسیں کدے ونجیے؟“ اکھے، ”راء جی جتھے راٹھاں دے متھے پک جاون، ہردا گھر ہوندا ہے۔ اوہ جیہڑے بھتے جاندن، ایہہ تاں کوئی نہیں پیا آہدا نما نے پردیسی ہائَن۔ ہر کوئی ویہدا پیا ہے بھئی چلے ویندن۔ پوند ویسوتاں ویساں۔ نہیں تاں کھلا ہاں۔“ اوس ویلے راء حشمت پگڑی لاہ کے سٹی ہے اکھے، ”سلاری اوہراں سٹ۔“ پگڑے وٹائَن۔ اکھے، ”آہن راتیں ایجتھائیں رہو۔ فجر وگ جاویں۔“ اکھے، ”جیہڑے ایلے گھوڑی آلے دیاں سوانیاں ویکھنا ہے نا اوہناں آکھنا ہے سپرا نوں بدھی لے آویدن۔ اج نہ امدا ہو یوم مُڑ آوساں۔“ مُڑ آیا دو راتیں رہیا۔

مہر سارنگ بھروانا سردار ہویا ہے بکن دا۔ ایہہ رعایا دے بندے ہونَن۔ ایس ویر لینا ہا رجوعے توں۔ اوہناں بندے مارے ہوئے ہان۔ چار اکٹھے سردار ہونَن چوٹی دے۔ محمد خان ترہانا چدھرڑ منگینی آلا، چکتا، نُور دا چا بھوانے آلا، نُور، کندر دا سپرا تے چوتھا مہر سارنگ۔ سارنگ آکھیا، ”دھاڑ دیونی ہے۔“ کچھی تائیں آدم اکٹھا کیتا ہویا ہے۔ ترائے ہزار بندہ آہدن دھاڑدا ہویا ہے۔ چھ ویہاں وچ ڈھول ہویا ہے۔ مہر ہماؤں آکھیا ہویا ہا سارنگ نوں: بھترنیا جیس دیہاڑے رجوعے تے دھاڑ دیویں، چڑھدیاں راٹھاں دے مینوں مُونہہ وکھائیں۔ دیگرى دا وقت ہے۔ دھاڑ تیار ہوئی کھلی ہے۔ اکھے، ”اگانہہ آ ویکھ۔“ سوٹے تے تڑ کے آیا ہے۔ بھردا آیا ہے۔ ویکھ کے آکھیوں، ”سارنگ! دھاڑ نہ دے۔“ ”کیوں؟“ ”سوائے سپرا دے کسے دے مُونہہ تے دھاڑہ بلدا میں نہیں ڈٹھا۔ ایہناں نوں ایجتھوں رجوعہ تے رجوعے دے بندے نظر



پئے آوِ دِن۔ ایہہ دھاڑ چلنا ہے۔ ایس سپرا مری جاونا ہے۔ نہ دے دھاڑ۔“ بڈھڑیاں  
دی گل جھلی کدی کسے نہیں۔ ٹر پئے۔

راہ دے وچ پھنڈریں کوہ تے کھاوندے آئے۔ فجر دا وقت ہے۔ رجوعہ جن  
لتھا ہويا ہے ٹھٹھے فریشیاں دے نال، ابھول کِیاں آہلیاں تُوں اُتے۔ رجوعہ اگا نہہ دھا  
گیا ہويا ہے۔ تریہہ تے چالھی بندہ گلی رجوعے دا ہے۔ اوہناں نوں دس پئے گئی مہر  
سارنگ دھانا آوِندا ہے تے سپرا وی وِچ ہے۔ اوہناں مینیں محمدی نوں آکھیا، جیہدے  
ناں تے محمدی شریف ہے۔ ”بھئی میلا کراج سارنگ ہٹ جاوے۔“ صُج دا وقت ہے۔  
قرآن مجید حائل کیتا ہويا ہے۔ فقیر اللہ دا تسی ہتھ اِچ ہے۔ محراب متھے تے ہے۔  
داڑھی مُٹھ بھر ہے۔ قلعہ کنگراں دا پُدن پئے۔ اگوں آملیا ہے مہر سارنگ نوں۔ اوس  
آکھیا، ”مینوں سیداں، ہرلاں، گلو تراں ساریاں توماں گھلیا ہے اِچ اوہ نہیں پھر دے۔  
اِچ وِیر دا وٹا رکھ، مُر جیس دینہہ آویں۔ میں واسطہ گھنتاں خُدا دا۔“ مہر سارنگ واگ  
پھیری ہے۔ اوس آکھیا، ”فقیر ا! مُر دُعا دے چاں۔“ بھیس پیا ہے۔ سگو ناں کوڈھن  
دے ہويا ہے۔ اوہ وی مہر دی واہر اِچ ہا۔ اوس آکھیا، ”ہٹیا آوِنا ہے سارنگ۔“ اکھے،  
”اوہناں قرآن میلا کیتا ہے۔“ سگو آکھیا، ”بانہہ تیل نال چوچڑ کے تِلاں دی ڈھیری  
وِچ چاں منڈیے۔ چتے تیل بانہہ نال پتھر جاوِن اُتے قرآن چا کے وی وِیری مارنا  
چاہیدا ہے۔“ سے بندے مُر نکلے۔ مہر سارنگ وی واگ چاں پھیری۔ نُورے آکھیا،  
”مہر لڑنا ہے۔“ اکھے، ”ہا۔“ اکھے، ”ہک گل یاد رکھیائے۔ قرآن اساڈیاں جڑھاں  
پٹنیاں ہِن۔ ایس دھاڑ تیری چلنا ہے۔ مینوں بھجن دی عادت نہیں۔ میں مری جاونا  
ہے۔“ کسے نہ گولی بھئی اگوں تاں آدم کوئی نہیں۔ ڈھول وت پئے وگن۔ فقیر اللہ دے  
بھیس کے تکیا ہے۔ اوہ تاں پِلی آوِ دِن۔ فقیر آکھیا ہے، ”سیداں تے ہرلاں او!  
قرآن دامیلا کیتا ہے۔ خُدا دا واسطہ گھنتیا ہے۔ ایہہ اُچے آُن۔ بے لڑتاں پوِتاں

انشاء اللہ تسلیں داتری او۔ ایہہ گھاہ ہن۔“

اوس ویلے مُہارا ہرل بولیا ہے۔ اوس آکھیا، ”ہرلاں دے بچیاں او! میں اج تائیں پیدل کدی ناہم ٹُریا۔ اج میں سُنیا ہے سپرا ٹورا ہے وِج۔ میں گھوڑی گھر، بندھ کے آیا ہاں مت بھجی پوے۔ موت آ کے رہنا نیہے۔ کجھ میرے ایس آئے نوں وکھیاے۔“ ابھول، جہانے دا ہرل ہویا ہے۔ اوس پکے بندے نوں آکھیا ہے، ”چپل اُتے چڑھ کے ویکھیں نا کیتنا آدم ہے۔“ اوہ چڑھیا ہے۔ اوس آکھیا، ”مہرا ابھول زمین پر تیندی آوندی ہے۔“ ابھول، جہانے دے آکھیا: اگے اسیں بندے تھوڑے ہاں۔ ایہہ اساڈے دل گرا رہیا ہے۔ ابھول مگروں بھج کے چڑھیا ہے۔ اوس اوہدے مونہہ دے اُتے اُلٹھا ماریا ہے۔ اکھے، ”وہی یادیا! کدی زمین وی پرتی ہے۔ مُٹھ پیادیاں دی ہے۔ اکھے زمین پر تیندی آوندی ہے۔“ پٹھلیاں آکھیا، ”مہرا ابھول ڈھول ڈھیر وگدن۔ آہناں ہیں مُٹھ پیادیاں دی۔“ اکھے، ”لموچڑ ہونے وھی یاوے کچے بندے۔ بندے بندے دے گل ڈھوکا گھتیا ہویا نیں۔“ دل تھہراون کان گل کیتوس۔ لہہ آیا۔ ”ہلا سپرا دا بھارا کون چنیدا ہے؟“ اتی دھاڑ دے وچوں ڈر سپرا دا ڈھیر ہے۔ ابھول، جہانے دے آکھیا، ”بندوق تاں میں وگیساں۔“ کالو موہل، باقر ڈاہر، قائم، سلمان دے، سلطان، بہرام دے، مالی، بہلول دے، ایہناں آکھیا، ”آگُو اسیں بنسائیں۔“ پک بندے کان ٹھٹا تیار ہے۔ رُ پئے ہین اودائیں دھاڑ آل۔

سپرا نکلیا ہے۔ سپرا آکھیا ہے، ”میں نُور، کندر دا۔ میرا بھار کاہیں چایا ہویا ہے؟“ جیہناں چایا ہویا ہا بک نہیں بولیا۔ سناٹا چھا گیا۔ بخشا، ہماؤں دا ہرل ہویا ہے کریے کا۔ بندہ گراڑتا ہویا ہے۔ آکھیوس گل بہہ گئی۔ راٹھاں دیاں چکھے گلاں ای تاں بچدیاں ہونیاں۔ اوہ بھج کے نکلیا ہے۔ اوس آکھیا ہے مہرنوں، ”میں بخشا، ہماؤں دا ہرل ہاں کریے کیاں چوں۔ جیویں آوندیا پیا ہیں لگا آویں۔ میں تیرا بھار چایا ہویا

ہے۔“ بندے کسے رجوع دے آکھیا، ”سپرا اوکھنا ہاتے آدم آگوں ہو گیا۔“ مُبھارے ہرل آکھیا، ”ایڈا بے چھہوا راٹھ ہے ہمیشاں دھاڑ دُشمن دی دے وچ وڑ کے لڑدا ہے۔“ ایہا گل پئے کریندے ہان جوں سپرا دھاڑ دے وچ آ گیا۔ بخشا، ہماؤں دا اگانہ ہو یا ہے۔ سپرا اتھے تلوار اُلا ری ہے۔ ایسے ہتھ دے اُتے ابھول، جہانے دا کھلا ہا، اوس بندوق ماری ہے۔ مُرچا وی تڑٹ گیا، ڈولا وی تڑٹ گیا۔ ہتھ پٹھاں لڑھک گیا۔ بخشا آہدا ہا: میں اگانہ ہو یا بھئی پہلی تلوار میں مار لئیں تاں میرا جگ اچ ناں رہسی۔ میں اگانہ ہو یا ہاں۔ سپرا کبھے ہتھ دی ڈھال مینوں ماری ہے۔ گھتی اچ لگی ہے پھٹ نہیں ہو یا۔ میں سمجھیا ہے گدھے تائیں ہڈی کائی نہیں۔ چُت زمین اچ جا لگی ہے۔ عُم ساری سر میرا اِنج اِنج کریندا رہیا ہے۔ پانی پیونا ہوس ہاتاں دُوئے نوں آہدا ہا سر نپ۔ سپرا ایسے کبھے ہتھ نال لڑدا آوندا ہے۔ باقر ڈاہر مگروں آ کے تلوار ماری ہے۔ تلوار رگاں تائیں تردی آئی ہے۔ جھل کے تلوار سپرا آکھیا ہے، ”شائبش ہی بھلیا۔“ سپرا اگانہ لڑدا جاندا ہے۔ پچھانہ ایہہ آواز نکل گیا ہے بھئی سپرا مری گیا ہے۔ پچھلیاں دھاڑیں چلن لگ چئیں۔ آہدن: پچھوں پُک لگی ہوئی ہے۔ سپرا اٹھارھاں کرہیں اگانہ لڑدا گیا۔ اُتوں آدم تلواریں آلا کدھ ڈڑھا ہے۔ سپرا بہہ رہیا ہے۔ جیس ایلے اتنے کچے ہو رہن۔ پچھیا ہے، ”مارکا! میرا مُونہ کدے ہے؟“ اوہناں آکھیا، ”رجوعے نوں۔“ اکھے، ”توہاں توں اکھواؤ ہام۔ پُک نہ لگدی تاں میں ہڈ ورے کر وکھائی ہام تہانوں۔ ایہہ نہ اکھیائے سپرا وی چل کے مو یا ہے۔ میرا اچے وی مُونہ رجوعے نوں ہے۔ ہُن سر میرا وڈھو۔ میتھوں کجھ نہیں ہوندا۔“ اتھے میراٹی آہدا ہے:

ٹھٹیاں دوہاں مُقابلہ ہے، ڈھول مارو ڈٹے

تپک مہرا بھول دی ہے، جینوں گندے تے چائاں ہن، بنھ سُنہری ہن پکے  
 اوس ماری ہے نُور سپرا نون، گولی بھن کے وینی، رت موڈھے دی چکھے  
 جھل کے تپک سپرا اتل نہیں ڈولیا، دھر قدم اگیرے رکھے  
 نُور سپرا نون پون تلواریں، سار چکیں چتے

ٹھنیاں دوہاں مُقابلہ ہے، سار ماری ہے تاڑی  
 تپک ہے مہرا بھول دی، جیہڑی بہہ اُستاد سنواری  
 اوس دیا ہے ماسا، تن نُور سپرا دے ماری  
 نُور، کندر دا جھل کے آہدا ہے: ہائے جے اج تپک لگ نہ جان دیوم،  
 کدی نہ چلدیاں دھاڑیں  
 پہلی تلوار سپرا نون، باقر ڈاہر ہے ماری  
 تلوار بھن کوپر تے رگاں، جالئی کھکھاڑی  
 اُتوں ماریاں بین قائم، سُلطان دے، سُلطان، بہرام دے، مالی، بہلول دے،  
 تے کالو موہل جیویں آہرن تے سٹ وداناں دی ہے نُورے نون پین تلواریں  
 ویلا قہر کور دا ہے، جھمب گڑا قہاری  
 کُل راٹھ رحمت گھندا ہے سپرا نون، کوئی مردی واری  
 سپرا دامردیاں وی سدھا مُونہہ رجوعے نون ہے، خلقت آہدی ہے ساری

نُور آیا ہے نارنگ نون ساہنا، وانگ ہاتھی مستے  
 آمدن جھلی ہے نُور دی، مہر ہماؤں دے بخشنے  
 سپرا جھلے تے مارے، واہ لگن رستے  
 نُورا چنن دی گیلی ہے، کالو موہل، باقر ڈاہر، قائم، سُلطان دے،

سُلطان، بہرام دے، مالی، بہلول دے، وڈھ کے کیتا ہے تختے  
کولوں دھروڑی جاندن مہر سارنگ جہاں دے ہٹ حوالے، لے کھاویدن مستے  
پر راٹھ لڑدے تے مردے نی، لُج اپنی دی واسطے

کناں داسنیا ہے، سچ ڈھا ڈھی آکھے  
پہلی تلوار سپرا نون باقر ڈاہر دی ہے، تلوار بھتن کوپر تے رگاں جا لگی ہے کھا کھے  
اوتوں ماریاں ہن قائم، سلیمان دے، سلطان، بہرام دے، کالو موہل،  
تے مالی، بہلول دے، جیویں ساون بدل اناوٹ دا ہے، بد روپون سرلاٹے  
جھل مار تلواریں سپرا رنج ڈکاریا ہے، بس کیتی سوں آپے  
لوہا پت وریاماں دی، پھدھ ٹور، کندر دے چایا  
دھاڑیں چوں موہرے لڑدا، ٹور، کندر دا جایا  
آو کھاں وٹواں تے لالیاں او، اج کڈھ دے اُتے ہرلاں، ڈاہراں تے موہلاں،  
ٹور ہے مار وکھایا  
وٹو تے لالی آبدن: سپرا نون کون مریندا ہے، ٹور ہے کندر دا جایا  
اوس دیہاڑے مارے سپرا دا وچ چھاویں، پر بھمب نیں نون آیا

ٹور سپرا ویں ہے، جیویں باگیں ہے کیلا  
اوس وٹواں توں بار چھڈائی ہے، ایہناں لالیاں توں پیلا  
جییں دیہاڑے ماریا ہے ٹور، کندر دا، ڈھٹر ہو یا ہے ویہلا  
آہدے وٹو تے لالی ہن: سپرا نہیں مریندا ٹور راٹھ ہے اریلا  
اسانوں دی ڈبھ خوشابیں ہے، میر پور دا بیلا

## میر، مل دا کھریل

میر وی مل دا ہویا ہے، امیر وی مل دا ہویا ہے، مل، ماہنی دا ہویا ہے۔ ایہہ کھریل ہن جھامرے آلے۔ راوی تے بڑے بڑے راٹھ ہین، پر راوی دے سردار کھریل گنیدن۔ میر، مل دا، امیر، مل دا ایہہ جوڑی بھراواں دی ہوئی ہے۔ بھرا ڈھیر ہن مگر جوڑیاں تھوڑیاں ہن۔ جوڑی دا مطلب ایہہ وے مردے دم تاںیں اوہناں بھراواں ہک دُوئے دا ساتھ نہ چھڈیا۔ دوویں لائق ہوئے۔ ہک پاڑن آلا ہے دُو آسیون آلا ہے۔ میر، مل دا بہادراں وچ ہویا ہے۔ وچ سد دے دی آکھیا نیں، ”میر مل دا دھول سدینداں ہیں۔“ راٹھاں ایہوں دھول دی مثال دتی ہے بھئی جتنا دھول بھرا اٹھیندا ہے اتنا اٹھائے۔

ایہناں دا ویر لکی آ لے کاٹھیاں نال ہا۔ ایہہ ویر پڑھیاں دا ہا۔ بندے ہک دُوئے دے مریندے رہندے ہان۔ قدرت اللہ تعالیٰ دی ایسی بنی ہے۔ میر، مل دا وگیا آوندا ہے۔ اوس زمانے بھکھی دا سردار ہویا ہے راجا کنور سنگھ۔ کنور سنگھ دا بھرا ہویا ہے شمیر سنگھ۔ شمیر سنگھ چڑھیا آوندا ہے، ایدوں میر، مل دا کھریل آوندا پیا ہا۔ پتہ نہیں اوہ شراییا ہویا ہا یاں کیہ؟ اوس آکھیا، ”کھریل! رستہ چھڈ دے۔“ میر، مل دے آکھیا، ”توں گڈتاں نہوں لئی آوندا۔ توں وی لگھ جا میں وی لگھ جاساں۔“ سکھ

گاہل کڈھی۔ ایہدے ہتھ وچ بندوق ہائی۔ ایس دھری ڈکدا لگا آیا۔ سکھ مری گیا۔  
اگے لکی آلے کاٹھیاں نال ویر ہا اتوں ماجھے نال لگ گیا۔

ایس دوران امیر فوت ہو گیا میر دا بھرا۔ میر، مل دے تے ڈھی ہکا ہائی۔ دولت  
بی بی اوبداناں ہو یا ہے۔ اوہ جوان ہو گئی۔ امیر تے پکو پتر ہا۔ صالح اوبداناں ہا۔ اوہ  
دی کبھرو ہا۔ کسے گل توں جیوں آپس وچ بولے چا چا بھتریا تاں لڑ پئے۔ صالح آکھیا،  
”میں تینوں رجا لیاں۔“ صالح چڑھیا، جا کے مہر بہاب کاٹھیے نوں میلا چاں کیتوس: پیو  
میرا قصوری ہوسی بندے تہاڈے مارن وچ، اوہ مر گیا۔ میں تہاڈا ماریا ہو یا کوئی نہیں۔  
چا چا میر اوہ ودا نہیں بھادیں کوہ چھڈو۔ میرے نال رسائی کرو۔ مہر بہاب سجھیا ایہہ بڑا  
وکھ ہے۔ دشمن گھروں اٹھی تے آیا ہے۔ مارن آسان ہو گیا۔

گھر بھیتر دہینسر ماریا، سڑ لکا جائے

اوس رسائی چاں کیتی۔ ایدوں ہٹ کے صالح لگا گیا۔ راجا کنور سنگھ نوں جا کے  
مناویس چاں۔ بھرا تیرے دا قاتل چا چا ہے، میرا تاں قصور کوئی نہیں۔

میر، مل دے سجھیا میں ہن جھامرے بہہ نہیں سکدا۔ بھتریا مینوں لیندا ہے۔  
میر، مل دا اوتھوں چڑھیا ہے، پنڈی بھٹیاں دے آ گیا ہے۔ مینوں بہایو۔ اوہناں  
آکھیا، ”آ جا۔“ سردار ایڈر ہو یا ہے، جیس دیہاڑے میر، مل دا اوتھوں تڑیا ہا، ہزار ٹبر  
نال تڑیا ہے۔ ڈھی جوان ہے۔ پنڈی آ گیا ہے بھٹیاں دی۔ پنڈی آلے بھٹیاں  
قاصد گھلیا ہے ناتا دے چاں۔ میر نوں سوانی اپنی سدیا ہے لڑدے رہو پر ساک  
بھتریاے نوں دے چاں۔ اوس آکھیا ”جیس میتھوں وطن چھوڑایا ہے اوبدا ہن ناں  
لیوئی تاں میں تیرا بر وڈھ چھڈنا ہے۔“ ”ہلا۔“ اوس آکھیا، ”اوہ انجیں سہی، بھٹیاں  
لاگی گھلیا ہئی۔ ساک منگیا نیں۔“ میر، مل دا چپ کر کے چڑھ بیٹھا ہے۔ رجوع آ  
گیا ہے۔ سیداں نوں آکھیا بیس، ”چرائی کائی نہیں۔ مجھیں بہوں ہن۔“ اوہناں آکھیا،

”اتھے آ جا۔“ آبدن : رجوع آلیاں وی لاگی گھلن۔ سوانی مُردِ دسیا ہے۔ سوانی نون  
 آکھیوں، ”ڈھی جوان ہے۔ دیندا ہاں کسے گھر نون۔ ہر تھاہرے گاہل کیوں نکلے پر میں  
 پک بندے تون صلاح پچھنی ہیں۔“ ”کیہڑے تون؟“ اکھے، ”میں ایہہ نہیں  
 دسنا۔“ مطلب کیہ ہاس جے دساں تے ایہناں وُجُن نہیں دیونا۔

اوتھوں مہر بہاب کاٹھیا چاں تکیا ہے۔ دو دُشمن بن پر دانا بن۔ چل پیا۔ ہر  
 دوپہر بن۔ مہر بہاب کاٹھیا ڈیرے تے بیٹھا ہے۔ اُتون پک کاٹھیا بھج کے آ وڑیا  
 ہے۔ اوس آکھیا، ”مہر بہاب! میر، مل دارب دتا ہئی تے ایہہ لگا آوندا ہئی۔ اسیں  
 مار لینے۔“ مہر بہاب پچھیا، ”رنا کٹک نال پیس؟“ اکھے، ”ہکلا ہے۔“

ہووے ویری تے گھر آمنت کرے، غصہ من تے وت لیاونا کیہ  
 گودھا رام مُلتان دی کار کرنی، چایے پنڈ تے وت شراماونا کیہ  
 ”بھیڑیو! ویری ہووے بوہے تے آ جاوے۔ پتہ نہیں تَسا ہے، کائی گل کزو  
 ہے۔ بندیا ئی کریاے، مت کوئی کوڑی اکھ ویکھے۔“ میر، مل دے آ کے گھوڑا دروازے  
 دے وچ ڈکیا ہے، جیہڑا حویلی دا دروازہ ہا۔ سلاما لیکم کوئی نیسوں آکھیا، ”مہر بہاب  
 بیٹھا ہیں؟“ اکھے، ”بیٹھا ہاں۔“ ”اٹھی تے میری گل سُن۔“ مہر بہاب اُٹھون لگا ہے  
 کتھاں کاٹھیاں آکھیا ہے، ”مہر بہاب! سانھ گھوڑا اوہدے پٹھ ہے۔ تلوار کمر نال  
 ہے۔ ڈھال موڈھے نال پیس۔ اٹھا رہاں آگریاں بانس سوا گز نیزہ فولاد ہتھ وچ  
 ہے۔ ویندا وی ہیں تاں ہتھیار کیوں نیہوں لے ویندا۔“ مہر بہاب بڑا غصے ہویا ہے۔  
 اوس آکھیا ہے، ”ایہہ ست پُشتیا راٹھ ہے۔ ایہدے خون وچ وی دغا نہیں۔ ایڈا راٹھ  
 دغا کر سکدا ہے۔“ مہر بہاب لگا گیا۔ مہر بہاب دوویں ہتھ کڈھن، ”السلام علیکم۔“ تے  
 اوس آکھیا، ”علیکم السلام تے میرے نیڑے نہ آویں تے اوتھائیں کھلو کے میری گل  
 سُنیں۔“ مہر بہاب آکھیا، ”میتھے وسدا نیہوں پیا۔“ اوس آکھیا، ”تیرا وساہ نہ ہووم ہا



تاں توڑ نہ آواں ہا۔ تیرا وساہ ہم۔ مینوں اپنا وساہ نہیں، مت تُوں نیڑے آویں میرا عقل نکل جاوے۔ موئے ہوئے یاد آ جاوے تے میرے پیو دی قبر چُئی جاسی۔“ مہر بہاب اگے سچھیا ہے بھئی میلا آیا کھلا ہے، بھترے روک۔ مہر بہاب دل وچ آکھیا ہے۔ ایہہ نامراد میلا تاں کوئی نہیں آیا۔ اجے تائیں آکر گئی نہیں۔ رسی دا وٹ سڑیاں دی اوہو ہے۔ بہہ رہیا۔ ”دس۔“ میر، مل دے آکھیا، ”مینوں ایس وقت ہک رعیت دا بندہ تاں سمجھ۔ برادری دا غریب بھراتے سمجھ۔ ویر تیرا میرا اوہو جیہا۔ مت جانیں منت کرن آیا کھلا ہاں۔ بھرا دانا ہا اوہ مر گیا ہے۔ دُنیا تے ہزاراں دانا ہن پر دل نہیں کھلا۔ دشمن ہیں مگر دانا ہیں۔ جیہڑی صلاح میں چُکھاں چنگی نیت نال مینوں دسیں تے ویر اوہو جیہا۔“ مہر بہاب آکھیا، ”دس۔“ ”بھٹی تے سید ساک منگدن تے توں دوہاں گھراں نوں جاندا ہیں۔ پتر میتھے کوئی نہیں۔ ساک ہکارا دیونا ہے۔“ اوس چُکھیا، ”توں تاں ہجرت کر کے نیہوں گیا ہو یا اوہناں دے کول؟“ اکھے، ”جی آ۔“ اوس چُکھیا، ”اتھے راوی پیٹھیاں منگیا ہانیں یاں او تھے گیاں منگیا نیں۔“ ”او تھے گیاں تاں منگیا نیں۔“ مہر بہاب آکھیا، ”میر، مل دیا! دشمن تُوں تے میں ضرور ہاں پر ایہہ تیری شان دے واقف نہیں۔ پتھر تاں تائیں بھارا ہے جتنے تائیں اپنی جگہ تے ہووے، جیہڑے ویلے اپنی تھہرتوں ہل جاوے پتھر ہولا ہو جاندا ہے توں اپنی جگہ چھڈ گیا ہیں۔ کونناں دے وچ پیٹھیاں وی جدوں تیری مک جاوئی ہے، کسے ودھا نہیں سکنی۔ موت حیاتی دے فیصلے عرشاں آ لے کون ہن، پیٹھاں ہن نہیں۔ بے میتھوں صلاح چُکھنی آ تاں اتھے جن آلا، لا۔ ڈھی تیری تے میری وچ کیہ فرق ہے۔ تیرا میرا ویر ہو رہے، دھیایاں وچ تاں فرق کوئی نہیں۔ اتھے آ، میں اوس ڈھی دا ساک کریساں۔“ میر، مل دے آکھیا، ”میں بندے مارے ہوئے ہن کاٹھیاں دے، میں مری جاساں۔“ مہر بہاب آکھیا، ”تیری موت دا ذمے وار میں نہیں بن سکدا، پر جتھے ماریا پیا ہو یوں میرا سر

تیریاں لتاں وچ پیا ہوسی۔ ہُن؟“ اکھے، ”آ وندا ہاں۔“

میر، مل دا چڑھ پیا ہے۔ راہ دے وچ سوچن لگ پیا ہے۔ میں مار کے نوں  
آ کھنا ہے، لکھی جاو نا ہے، میرے نال ہک بندے وی نہیں ٹرنا بھی لڑائی پوندی ہے۔  
سوچنیدا گیا ہے۔ جا کے مجھیں نوں پھیرا ماریا ہے۔ اکھے، ”مار نیہے چھڈیاں۔“ اکھے،  
”چرائی کائی نہیں۔“ میر، مل دے آ کھیا، ”میں چرائی وکھ آیاں۔ اوہ ڈیلے مست اٹھے  
کھلن۔ کانہہ دے وچ اسوار لکدن۔ دھامن لیٹے پین۔“ ایہا اوقات ہا اوس ویلے  
بندیاں دی۔ اوہناں آ کھیا، ”اٹھی۔“ بکن پٹ لیا نیں۔ مجھیں چک لیاں نیں:

سوراں اللہ پاک نُون، جبار، ستار، غفار نوں  
کر تعریف کیے توں ڈھا ڈھیا! وڑ گیا ہیں مجھیں گونجاں دے ڈار نوں  
کنیں کیلیاں، کالیاں، بھھاسیاں، اڈیاں، بگیاں تے چور کڈھیاں،  
جیویں چوڑا سوہندا ہے، نورنی نار نوں  
چھلی راتیں چھیڑواں ماریاں ہن ہونگراں،  
گھٹے آن کے سٹیا نیں لعلوں دے ہار نوں  
مجھیں نوں چوون بیٹھا ہیں، بھانڈا دھریا ہے آن نساں نوں  
کتیں کھاوَن کانہہ، کماند، ایہہ لٹک سہاون بار نوں  
نھا کے دریا چوں نکلیاں ہن، جیویں شیشے سوہن بازار نوں  
چھلی راتیں کھاریں لگھ کے دیون گنکاں تے ڈھنکاں،  
الاپے آسا، بھیرویں، پیلوں، پہاڑی، رام کلی تے میگھ ملھار نوں  
ہک گل مجھیں دی بھیری ہے، چوراں نال کرن اُسارے،  
دھاگا لیدن ایہہ گھت مہار نوں  
شودھیاں جاندیاں ہن ودھے کریندیاں، پیا وچھوڑا ہے گونجاں دے ڈار نوں

نال میناں دے چوراں کدی نہ دتیاں، جواب دے کے بہندن سرکارنوں  
کیما آہدا ہے: سوا لکے دے مجھیں واپس نہیں آوندیاں،  
چتنے تائیں سائیں جھاتی نہ گھتن کاہکاں دے بارنوں

ایہہ مجھیں کُے نُور دے، ذکر اللہ دا سہانڈیاں  
چھپلی راتیں ماریاں بین چھیر ویاں ہونگراں، کھاری چڑھ اُگھانڈیاں  
خواجِ خضر راجی ہونداے، مجھیں آن پتتاں تے بہندیاں  
لیندیاں پھوارے تے ٹئیاں، نت سلامی خواجِ خضر دے رہندیاں  
لگھن دے ولاکے، نال کھمباں دے کھہندیاں  
مجھیں اُتار پریاں دا ہے کیما، پر نال نصیباں دے رہندیاں  
ایویں سائیاں دے اندرنوں بھیدے،  
مجھیں اگانہہ وی جا کے گھاہ چنڈاں دے کھانڈیاں

مجھیں کُے نُور دے، ٹردیاں رب دے سہارے  
مجھیں نوں سیت الہ دا ہے، دے لتیں نانگ لتاڑے  
مجھیں آ کے اوتھے چڑھدین، جتھے بگن شیر تے شوکن پھنیر کالے  
مجھیں مال ننگ دیاں ننگاں دا ہے، کائی لگی ہے سٹ نکارے

ایہہ چلدے چلدے، سر دوپہر ہن، جوں تکیا ہے تاں ککی دے رُکھ ہن۔  
مار کے آکھیا ہے، ”میر، مل دیا! بھٹل گئے ہاں اسیں ایہہ تاں ککی دے رُکھ ہن۔“ اوس  
آکھیا، ”جَن اتھائیں لا دیو۔“ آپت اِنج نال دیاں صلاح کیتی ہے بھی ایہہ ہے جم دا

کڑما۔ ایہہ جان کے آیا ہے۔ ہر شے سترایوں، لڑائی مئے پونی ہے پر ایہہ جرات کسے دی نہیں بھئی جن نہیہے لیندے۔ مہر بہاب نوں دس پئی ہے بھئی میر، مل دے آ کے جن لا دتا ہے۔ مہر بہاب نوں کونوں حکم دتا ہے چڑھ میری تیر تے، جتنا علاقہ کاٹھیاں دا ہے پھر کے ہوکا دے بھئی میر، مل دا میری امان وچ ہے، جیس اکھ گہری ڈٹھی میں آنا کڈھ لیاں۔ ایہہ ہزار ٹبر ہے۔ جتنے کھوہاں توں پانی بھریں ایہناں دیاں سوانیاں، سوا گادھی آ لے توں کوئی بندہ اودے نھاون ویسی، میں سر وڈھ چھوڑ لیاں۔ ڈاچیاں، مجھیں گائیں تے ایہناں دے پھل چھٹے وتن، کسے دی واہی اُجڑے میتھوں دھر سکدا ہے۔ مت کوئی پھل نوں وٹا وگائے۔ جے سنگ وی کسے دا بھر گیا نا تاں ایہہ لیک اساڈیاں پڑھیاں دے مگروں وی نہیں لہنی بھئی امان مال نوں مار لیونیں۔

میر، مل دا بہہ گیا۔ مہر بہاب بندہ چاڑھیا بھئی ایہدے بھترے نوں سد لے آ۔ اوہنوں ایہہ نہیں دسنا بھئی چاچا اوتھے بیٹھا ہئی۔ سخی سخی رسائی ہائی، صالح آ گیا۔ جیس ویلے روٹیاں کھا رہن رات دیاں تاں اوس پچھیا، ”کیوں سدیا ہئی چاچا؟“ اکھے، ”بچو! اگلی راتیں خیال آیا ہے پُرانے راٹھاں دا اکھان ہے بھئی ویر لگے تاں بیجا مکن نہ دیوتے ویر منڈی آؤ۔ ٹھاڈا ہے بیجا پیا مکدا۔ چاچے تیرے تے پتر کوئی نہیں تے تُوں کوارا ہو یوں۔“ اوس آ کھیا، ”جی آ۔ فلانے گھر توں ماں میری ساک منگیا ہے تے اوہناں آ کھیا وی ہے تے اسیں تیاری پئے کریندے آں۔“ اوس آ کھیا، ”نہیں تُوں چاچے دا ساک لے۔“ ”چاچے میر، مل دے دا؟“ اکھے، ”ہا۔“ صالح آ کھیا، ”میں دیا ہے ترائے ترائے کریندا چھھاں جا جھلیا پیس۔ میں کیوں ساک لیں؟“ اوس آ کھیا، ”نہیں میں تینوں آہناں تئیں گڈھیوں۔“ صالح آ کھیا، ”ایہہ گل وت نہ آ کھیں۔“ مہر بہاب آ کھیا، ”میں تینوں مہارک پک دیواں۔ چاچا تیرا یاں سیداں نوں ساک دیندا ہے یاں بھٹیاں نوں۔“ صالح آ کھیا، ”نہیں، اسان کھراں سُو رکھی ہوئی

ہے۔ میرے چاچے دے ہوئے تے کھل ہی ڈھلنا ہے عی قوم دانہیں ڈھلدا،“ مہر بہاب آکھیا، ”سو توہیں رکھی ہوئی ہوسی۔ میں تینوں پیا آہناں اوہ دیندا ہے سیداں نوں یاں بھٹیاں نوں۔“ صالح لمبڑا پیا ہا اوہ اٹھیا ہے۔ ”چاچا! گھر سد کے گاہلیں کڈھن کڈھ ڈڑھا ہیں۔ اوہ تاں ہوئے پنھاں دے راٹھ۔ توں پتر چاں ڈھو چاچے دے ہوئے تے۔ تیرے پتر دی لاش تے ہلوں نہ پھرن تاں مینوں کھل دا پتر نہ آکھیں۔ ماں سوئی ہے کسے دی، غیر قوم دا بندہ اساڈے ہوئے تے آ ڈھکے۔“ مہر بہاب اٹھیا ہے اوس ہاں نال چاں لایا ہے۔ اوس آکھیا، ”نسلی تاں ہو یو۔ نسلی انجیں کریندن پر بھٹریا! لیدا وی نہیوں تے کسے نوں لین وی نہیوں دیندا۔ چاچا تیرا میرے کول آیا ہے۔ ایہہ ایہہ صلاح کیتی پس۔ اوس نوں ڈھنگ نال میں سدیا ہے۔ اوہ جن لائی بیٹھا ہے۔ ساک اوس توں دو گھراں منگیا ہے۔ میتھوں صلاح چکھن آیا ہے، جیہڑا صلاح گیر ہو کے دھوکھا تے منافقت کرے اوس جیڈا بے ایمان دُنیا تے کوئی نہیں۔ دو ڈٹمن آپس وچ رلا کے میں اپنی طاقت تباہ کیتی ہے۔ مگر صلاح چکھن جوں آیا ہے۔ ایہہ تاں اساڈا کم نہیں صلاح بھٹری دیوے۔ چاچا تیرا بیٹھا ہے۔ اوس نوں تیرے سدے دا وی پتہ کوئی نہیں۔“ صالح رو پیا۔ اوس آکھیا، ”چاچا! میرا چاچا پہاڑ ہا۔ ٹھل ہا۔ راٹھ ہا۔ اوہنوں تریہیں چونہہ گلاں کمزور کتیا ہے۔ بھرا چنگا ہاس مر گیا۔ پتر ڈھیبوس کوئی نہ۔ دھی جوان ہو گئی۔ میں پتر بننا ہا، میں حرامدا بن گیوم۔ جے چاچے دی کنڈ میں نہ چھوڑیندم تاں ایہہ گاہلیں نکلیاں کوئی ناہن۔ واسطہ خدا دا ہئی، جیڈا میلا آہنا ہیں میں کریناں، جیڈی کس آہنا ہیں میں جھلیناں، چاچا مینوں منادے۔“ رووے۔ مہر بہاب آکھیا ہے، ”شاداشی راٹھ دیا پتر۔“

بندہ گھلیا ہے مہر بہاب: میرے مل دیا! دیو بھرے وگ کدائیں نہ جاویں، تیرے بوہے تے پرہیں پئی آوندی ہے۔ اوہ بڑا خوش ہو یا ہے۔ اوس سمجھیا جیہناں کاٹھیاں

دے میں بندے مارے ہوئے، اوہناں دے نال رسائی کرواؤ ہے۔ اوس گھڑے، گھڑونجیاں، منجیاں، بوہڑ پٹھ گھتائیاں۔ دھوئیں، ٹھے شروع ہو گئے۔ ٹھکر ہے آوندے پین تاں جوں ایہہ پڑھیں آ گئی۔ جوں میر، مل دے تکیا ہے وچ بھترنیا، تاں اوس دے تن بدن نوں اگ لگ گئی۔ میر، مل دا منجی تے بیٹھا ہے۔ تلوارنگی اگے پئی ہے، تڑپدا پیا ہے۔ مار کے سلام دتا ہے۔ اوس ولیم سلام نہیں آکھیا۔ شوہ پر پھر پھر کدے پین۔ جتنا خون ہا اوہ اکھ وچ بولے۔ سلام اوس کوئی نہ جھلیا۔ پڑھیں آ کے بہہ گئی۔ ایہہ اشارے کرے، بے آکھیں تاں میں چاچے دے پیراں تے ڈھے پواں۔ اوس آکھیا، ”بلا چھری بیٹھی ہے۔ تلوار اوس دے کول ہے۔ اوہ سر وڈھ لیسے۔ کیہ فائدہ۔“ چپ ہر شے۔ بولے وی کوئی نہ۔ چکھے وی کوئی نہ۔ بڑی دیر دے بعد مہر بہاب بولیا۔ ”میر، مل دیا! پتہ ہی ایہہ پڑھیں کیوں آئی ہے؟“ اکھے، ”نہیں۔“ اکھے، ”دولت بیوی دھی دی گڈھ میں گھت دتی ہے ایس چھوہر صالح نوں۔ دھی میری ہے میں گھر لے جاوئی ہیں۔ مارکا! دُعا خیر آکھو۔“ اوس بولن دا وقت ای نہیں دتا میر، مل دے نوں۔ تھاڑ تھاڑ کمبدا پیا ہے۔ ہنجوں ترپ ترپ کریندیاں پیاں ہن۔ ایہہ لفظ نہیں آکھ سکیا، دھی میری ہے تیری نہیں۔

مہر بہاب آکھیا ہے، ”تسیں بھائی مارکا گھراں نوں جاؤ۔ میں چھوہر لئی آواں۔“ ایہہ رُ پیا ہے۔ جن وچ گل سُنی گئی ہے بھئی مہر بہاب گڈھیں گھت دتیاں ہن۔ میر، مل دے دی سوانی آکھے سوانیاں نوں، ”دیومبھارکاں، اسیں اج وسدے جہان تے آ گئے ہاں۔“ مہر بہاب آکھے چھوہر دی بانہہ نپی ہے۔ ”اٹھی پچووا! دھی وی توں میری ہیں تے پرناو نا وی میں ہے۔“ اوس نہانی تکیا ہے تاں مگروں پوڑیا آوندہ ہے۔ میر، مل دے نوں دیکھ کے اوہ ڈر گئی بھئی میرے پتریر دا تاں ناں نہ سندا ہو یا پو۔ ماں ہدھاں دیس، ”اٹھی چاچا جوں پیا آہدا ہی۔“ اتنے نوں میر، مل دا وڑ پیا ہے تے

اوس آکھیا، ”چھوہرے! توں ہن میتھوں ڈری بیٹھی تے دھی نوں پکور ہوندا ہے۔ ہک  
 البس دے چھوڑیا ہے، دوا میں کیوں دیواں؟ ایس برے توں چُچھ، میتھوں چُچھیا ای  
 نیسوں۔ میرے دشمن نوں میرا جگر کڈھ کے دے چھڈیا پس۔“ مہر بہاب ٹردا وی  
 جاندا ہے تے آہدا وی جاندا ہے، ”میری دشمنی داتینوں چُچھیرے پتہ لکسی۔“ گھر لئی  
 گیا۔

جیس دیہاڑے جج ڈھکی ہے، مہر بہاب کے بُو ہے تے روٹیاں پکیاں ہن۔  
 فجر مہر بہاب داج کڈھیا ہے۔ داج دے وچ اکی ڈاچیاں ہن۔ اکی مچھیں، اکی  
 گائیں، اکی گھوڑیاں، اوس ست اکیاں دتیاں ہن۔ چھوہر پرنی کے لگھ گئی ساہورے۔  
 پرہیں بیٹھی ہے۔ مہر بہاب آکھیا ہے ”میر، مل دیا! اسانوں موئے ہوئے وِسرے  
 ہوئے کوئی نہیں۔ دھی ہائی تیری جیہڑی دے چھڈی ہے۔ دھیوں وچ فرق کوئی نہ۔ اوہ  
 میں پرنا چھڈی ہے۔ سال دا کارا ہے۔ سال تائیں تیاری کر لے۔ اتنے تائیں بے  
 شک اساڈے بُوہیاں تے لگاوت تے تینوں چُچھنا وی کسے نہیں۔ سال توں اُتے ہک  
 دیہاڑ وی اجھکاں تاں مینوں کاٹھے دا پتر نہ آکھیں۔ جتھے وی ہوویوں تینوں نکر ساں۔“  
 میر، مل دا اٹھیا ہے۔ اوس آکھیا، ”مہر بہاب! جیہڑا پیونال لڑے اوہ حرامدا ہوندا ہے۔  
 جیویں دھی توہیں پرنائی ہے انج میتھوں نہ پرینوئی۔ ہُن میں تیرے مقابلے تے تلوار  
 لے کے اٹھیواں تاں مُڑ میں حرامدا بننا ہاں۔ ایہہ تلوار ہی تے ایہہ پگڑی۔ سر وڈھنا  
 ہی تے وڈھ سٹ۔ جے ماف کرنا ای تے ماف کر چھڈ۔“ پیراں تے ڈھے پیا۔  
 جدوں رسائی دا وقت ہوندا ہے۔ اوہ رحمت الہی ہوندا ہے۔ مہر بہاب اٹھیا۔ اوس آکھیا،  
 ”اٹھیو کاٹھیاں او! ایہدا سر وڈھو۔“ اوہناں آکھیا، ”مہر! پہلے گھر چاں واڑیا ہی۔  
 وت دھی چاں پرنائی ہا بُو ہے تے۔ اسانوں ایڈا کنسلا جاندا ہن، پیراں تے ڈھٹھے دا سر  
 وڈھ لینے۔ اسان اللہ واسطے ماف کیتا ہے۔“ مہر بہاب آکھیا، ”جے اینوں ماف کرنا

نیں تاں ایہنوں جھامرے بہایو۔ جھامرے ایہہ تاں بہہ سکدا ہے جے کنور سنگھ راجا ماروتاں۔ بھیڑیاں او! میر، مل دا کھل مہاجر بنیا ودا ہے۔“ اصل وچ اوہ گل کر و ای ایہا ہا کاٹھیاں نال۔ راٹھ جوں ہا۔ اوہناں آکھیا، ”جَن جگاتن تے جا لا۔ کنور سنگھ تینوں پروں دھاڑ دیونی ہے۔ اسیں کاٹھیے وی آجسائیں کھل وی آجان۔ یاں اسیں دوویں گھر مک جسائیں یاں توں جھامرے بہہ سکسیں۔“

میر، مل دے اوتھوں جَن پٹیا ہے چاں تے بھترینا وی نال بیس، جگاتن شہر ہے راوی دا، اوہدے اُتے آ کے جَن لا دتا بیس۔ کنور سنگھ نوں دس پئی ہے۔ اوس نوں بھرا شہر سنگھ دا ویر یاد آیا ہے۔ اوس دھونے تے سٹ چاں ماری ہے۔ اوہ چڑھ کے آیا ہے۔ ہاتھی جھولدے کھلن۔ چاگردوں جگاتن نوں گھیرا ہے۔ مہر بہاب وی اپنے کلک لے تے آ گیا۔ مہر بہاب جائزہ لیا ہے بھئی ایہہ توپاں، ایہہ تاں ہکا کافی ہے کھلاں تے کاٹھیاں نوں۔ ایہناں دے اگے اسان کیہ تگنا ہے۔ مہر بہاب کنور سنگھ نوں آ ملیا۔ اوہنوں رسائی دا پتہ کوئی نہ۔ اوہ بڑا خوش ہویا ہے بھئی میری مدکان آیا ہے۔ مہر بہاب اوس دے تمبو دے ارد گرد ہزار ڈاچی بہائی ہے۔ ہر ڈاچی دے نال ہک تلوار آلا بہایا ہے۔ اوہ پیا جاندا ہے بھئی میری حفاظت کان قلعہ بنا رہیا ہے۔

دیگر دے وقت مہر بہاب بندہ گھلیا ہے۔ سوتے دا وقت ہوسی، میں سد کے چکھساں، مہاراجا کنور سنگھ، پرشاد چھکیا کہ نہ چھکیا۔ اوس ویلے تلوار چل جاوئی ہے۔ تئیں اپنی تیاری کر لو۔ حملہ اسان کرنا ہیں۔ پہلے حملے وچ ای اسان ہتھیاراں تے قبضہ کرنا ہے۔ اودے سکھ اسان کوئی نہیں آون دیونا۔ دیوبھرے لڑائی کرے، ایہہ توپاں وگن تاں اسان تاں پہلے پہلے وچ ای اڈجاونا ہے۔ ساڈی طاقت وی نہیں۔ ہتھیار وی نہیں۔ سوتے دا وقت ہے۔ کنور سنگھ کھانا کھا رہیا ہے۔ نوکر نوں آکھیا بیس، ”دودھ پلا۔“ اوس دودھ دا گلاس بھر کے اگانہہ کیتا ہے تاں باہروں مہر بہاب سد



کے آکھیا ہے، ”مہاراجا کنور سنگھا! پرشاد چھکیا کہ نہ چھکیا۔“ ایڈا دانا سکھ ہويا ہے اوس سدّ کے آکھیا، ”مہر بہاب توں تاں دودھ تے خون رلا رہیا ہیں۔“ نوکر آکھیا، ”اوہ تاں چچھدا پیا ہے کھانا کھا دھا ہے کہ نہیں۔“ اوس آکھیا، ”بے وقوفا! ایس آواز وچ اتنا جوش ہے، ایہہ کنھاں نوں اشارا ہے۔“ مہر بہاب آکھیا، ”دودھ تے خون اوس ویلے رلیا ہے، جیس ویلے ڈیگ توں دھونے نوں سٹ مار کے ٹریا ہیں۔“ اکھے، ”تیرا تاں دشمن سی۔“ اوس آکھیا، ”لکھ واری دشمن ہووے پر تیرا میرا کیہڑا سانگا ہے؟“ اتنے تائیں تلوار چل پئی۔ پہلا حملہ ایدوں ہويا۔ توپاں تے قبضہ کر لیا۔ سکھ اٹھیا تاں اگوں شے دے کائی نہ۔ سکھ مریون لگ پئے۔ سکھ ٹر گئے۔ کنور سنگھ وی بھج گیا ہے۔ مگروں میر، مل دے ہتھیں تلوار ہے، چکی آوندہ ہے۔ اوہ نہانا چل کے ہتھاں نوں آ وڑیا ہے۔ راء میر، مل دے دی ماں اٹھی ہے تے اوس آکھیا، ”وے میر! ایہہ نہانا تاں ہتھاں نوں آ وڑیا ہے، کجھ نہ آکھیں۔“ جوڑے چوں نپ کے سر وڈھ سٹیا پیس۔ ”اماں! جے سپ ہتھاں نوں وڑے تاں چھڈ دیویے۔ ایہہ کوئی ترس دا موقع ہے۔“ اوہ مری گیا۔

ایہہ چاچا بھتریا آ کے جھامرے بہہ رہن۔ پیو ڈھی دا بو ہے تے بو ہا ہے۔ گل کرن لکیاں دولت بیوی آکھے، ”پیو انج آکھیا ہاتے بابے انج آکھیا ہا۔“ سُنن آ لے سمجھ جانن۔ پیو سدیندی ہے مہر بہاب نوں تے چاچا سدیندی ہے میر، مل دے نوں۔ پیو نوں پیو سدنا چھوڑ دتا پیس۔ گھر آلا کائی آہری گل کروس تاں جھوکھا مہر بہاب تے کرنا ہے، پیو اگے نہیں۔ عید دا دن آوے ہا تاں محل اُتے چڑھ کھلونا۔ خیر ہووے شالا، میری چیکی روٹی نہیں پئی آوندی۔

مہر بہاب بیمار ہو گیا ہے۔ بندہ گھلیا ہے دولت بیوی آل۔ اوہ گئی ہے۔ اگانہہ اپڑی تاں مہر بہاب دے آخر ساہ ہن۔ ایہہ روون لگی۔ اوس آکھیا، ”چھوہرے! توہیں

روونا ہے، مینوں پتہ ہے۔ آئی چرکیری ہیں۔ میں ہک گل کرنی ہے سارا میلکھ چُپ کر جاوے۔“ پُراں نوں سدیا بیس: تُوں تھے دھیاں ہین، ایس چھوہر تے پُتر ہے، میرا آخری وقت ہے۔ ایہہ نہ جنیائے بابا بے ہوشی وچ ہے تاں ایہہ گلاں پیا کریندا ہے۔ اج تائیں اپنی زبان نال تعریف کدی ناہی کیتی، تُوں گل سمجھاوون کان گل کڑوہاں۔ خدا دی قسم اپنی ساری زندگی وچ جتنے راٹھاں نال ترکڑ ایج تُلایا ہاں، ہر راٹھ میتھوں کسا نکلیا ہے۔ میرے نال ساویں کوئی نہیں تُلایا۔ آپ توں وڈا راٹھ ڈٹھا ہے تاں ایہہ چھوہر ہے۔ میرا احسان ایڈا کوئی نہ۔ جے ہادی تاں ایس دے پوتے ہا۔ بہوں آدم اپنے بوہے توں بیگانیاں دھیاں پرنا چھوڑیندا ہے پر ایس چھوہر دے نال دی چھوہر کائی نہ دیکھسو۔ جیوندے پیونوں پیو سدنا چھڈ دتا بیس تے مینوں پیو بنا لیا بیس۔ میں مردا پیا ہاں۔ ایس تے چھوہر ہے تے تہا تھے چھوہریں ہین۔ ایس دا گڑ ونڈیندا میں اپنی اکھیں ایس حویلی وچ دیکھی جاواں۔ میں قیامت تائیں تُوں تھے راضی ہاں۔“ آبدن: اودوں پٹنے پے ہوؤن تے نال گڑ ونڈیندا ودا ہے۔ منکپوا کروا کے مہر بہاب دا رُوح پرواز کر گیا ہے۔

میر، مل دے دا پچھلا پہرا ہے۔ اکھیں تے موتیا چڑھ گیا۔ صالح سوچیا، میں سو نوکر وی چاچے دی خدمت تے کھلاراں تاں خُدا مینوں ہستی دتی ہے۔ میں کھلار سکدا ہاں پر چاچے دے دل وچ جاوئی ہے میتھے جوں پُتر کوئی نہیں۔ کیوں نہ پیو دی خدمت میں آپ کراں۔ آبدن صبح شام کھلا رہ جاندا ہا۔ اٹھاوون لگیاں بسم اللہ۔ جتی پواوون لگیاں بسم اللہ۔ موڈھیاں تے چاون لگیاں بسم اللہ۔ قدم بھرن لگیاں بسم اللہ۔ خُدا یا! توہیں مینوں توفیق دتی ہے۔ میں اپنے پیو دی خدمت کر رہیا ہاں۔ اُتوں میر، مل دے دی ڈاکر نکل جاوے۔ ”او مہر بہاب! خدا تینوں جنت نصیب فرمائے ایہہ توں بسم اللہ پیا کریناں ہیں۔ جیویں میں کڑو ہام، میں تاں کچر سد یونا ہا۔ میری کاہیں کرنی ہا۔ ایہہ

میرے بھرا دا پتر ہے، جیہڑا بسم اللہ پیا کریندا ہے۔“ بسم اللہ صالح کرے تے دُعائیں  
مہر بہاب نوں دیوے۔ انج میر، مل دا زندگی گزار کے لد گیا۔

## راء صاحب بھٹی

زمانہ رنجیت سنگھ دا ہویا ہے۔ کوٹ بھائی خان آلے میکن سردار سدیندن۔  
سردار فتح خان میکن ہا۔ پیو اوس دا مرگیا۔ ماں اوس دی جیندی ہائی۔ ریاست دے  
مالک ہان۔ سردار فتح خان دی ماں آکھیا میراٹیاں نوں، ”فتح خان کان ساک منگو چاں  
کسے چنگے گھر دا۔“ کوٹ مومن دے جا کے مومنائیاں توں اوہناں ساک منگیا۔ ساک  
اوہناں آدریا چاں۔ گڈھیں پے گئیاں۔ گڑی گبھرو ہک دُوئے نوں ڈٹھا ہویا کوئی نہ۔  
جج چڑھی۔ پرنا کے لئی آوندن۔ راہ دے وچ کھوہ پیا و ہندا ہے۔ اوتھے آ کے ڈولی  
رکھیاں۔ کنیں ٹھیاں تے اگ بال کے دھرن لگ پئے۔ کنیں پانی پیون لگ پئے۔  
اوس گڑی آکھیا، ”دائی مینوں وی پانی پیو۔“ اوس پانی دا منگر بھر کے آن دتا ہے۔ جیس  
ویلے اوس گھنڈ لاہیا ہے تے پانی مومہ نال لایا ہے تاں اگوں ساہواں کھلا ہا فتح  
خان۔ فتح خان جوان وڈڑ۔ سردار وڈڑ۔ خوبصورت سانھ گھوڑا پیٹھ ہے۔ عروسی کپڑے  
کیتے ہوئے۔ ڈھال تلوار لائی ہوئی ہے۔ جوں اوس تکیا تاں اوس آکھیا، ”میراٹیو!  
سارے جگ دے وچوں ایہہ گڑی میرے کان لدھی نیں۔ اوما چھیو!“ ”جی!“ ”ایس  
نوں گھر لے جاؤ میں کائی نہیں لے جاوئی۔ گڑی تاں ویکھو۔“

ویہت نیں ہائی کسے بندے سردار نوں ایہہ نہ آکھیا توں ایہہ کیہ پیا

کرینائیں۔ چھان دی عادت ہے مونہہ تے گل کرنی سردار دے۔ جج ساری ٹر پئی۔  
 ڈولی پئی رہی تاں مومنانی پچھیا، ”ایہہ کیہ آکھیا ہے فتح خان؟“ اوہ رو پئی۔ اوس  
 آکھیا، ”پچھا! جواب دتی ویندا ہی۔ قسمت اپنی نوں آکھ۔“ اکھے، ”ایہنوں اوہراں  
 سدیں ہک واری میں گل کرنی ہے۔“ دائی سدّ ماریا، ”فتح خان ہک واری مومنانی  
 سدیندی ہے۔“

فتح خان بھیں آیا۔ اوس گھنڈ اُتار کے اوتھے چاں رکھیا۔“ اوس آکھیا:

باگ لوینی آں، وچ لوینی آں کانا

ہک ماں مترتی ہے، دُو آہے دلس بیگانا

ترینا کھارے چڑھدی نوں، ڈھول چاں ماریا طعنہ

میں تینوں گھر گھر ڈھوڈھاں، کراگ دا بہانہ

کدی موڑ مہارنوں، میرے پورب دیاپانا

”گل سُن میری۔“ اکھے، ”تیرا میرا ایہہ گلاں دا وقت نہ پر مُر توہیں میرے

متھے نہ لگنا۔ مینوں ارمان ساری عمر رہنا ہا بھئی گل تاں کر لینی ہا۔ پیکیاں مینوں چک

کوئی نہیں چھڈنا۔ ہک منت کرینی آں۔ مینوں طلاق نہ دیویں۔ طلاق ہوئی نہ

سدیواں۔ کدھاں پیکیاں نال لگ کے مر جاساں۔ ایہہ کسے نہیں آکھنا، ایتھوں لگھی

ہے تے تیری سدیندی رہساں تے ہُن جا۔“ فتح خان نوں بڑا شرم آیا تے اوس

آکھیا، ”ماچھیو! ڈولی چایو۔“ ماچھیاں ڈولی اڑائی۔

فتح خان ڈیرا چاں مَلّیا۔ نہ اوہدے نال بولنا، نہ ملنا، نہ اوہدے ہتھ دا ٹگر

کھاونا۔ ماں دے دے سبھ کچھ۔ اوہ مصلے دے اُتے بہہ گئی ہے فریاد اللہ تعالیٰ دے

اگے کرن کان۔ فتح خان دی ماں نوں چھاؤنی وُجنا پیا ہے۔ اوس نوکریں نوں وی چاں

سدیا تے نونہہ نوں وی۔ ”ہوسکدا ہے مینوں رات چھاؤنی پے وُجے تے روٹی فتح خان

دی ایسی پکے کہ اوہنوں پتہ نہ لگے کہ میری ماں گھر کائی نہیں۔“ رات اوس نوں پے گئی ہے۔ ہٹ کے اوہ آئی تاں فتح خان پچھیا، ”اماں راتیں کدے ہائیں؟“ ”گھر ہام۔“ ”زندگی ساری تیری روٹی وی کھا دھی ہے۔ پراہن گتی دی وی کھا دھی ہے۔ شادیاں دی وی کھا دھی ہے، پر جیہڑا لطف رات دی روٹی وچ ہا ساری زندگی نہیں آیا۔ تیری تاں پکی ہوئی ہی نہ۔“ اوس آکھیا، ”ایہہ اوس بدنصیب دی پکی ہوئی ہائی جیہدے توں توہیں ڈیرا چاں ملّیا ہے۔“ ”مومنائی پکائی ہے؟“ اکھے، ”ہا۔“ جیہیں ویلے اوہ کرم کرن تے آوے تاں اوہ ڈھل نہیں لیدیا۔ ایسے نکلے جیہے عمل وچ اوہ موہی گیا۔ گھر آ گیا۔ وسن لگ پئے۔ پُتر ڈھی گیا۔ اوہدا ناں مہارے خان رکھیوئیں۔

مہار خان سست سال دا ہویا تاں ماں فوت ہو گئی۔ مومنائی مر گئی۔ فتح خان دی ماں وی مر گئی۔ پیو پُتر تھالی وچ آٹا۔ برادری زور ماریا فتح خان پر نی۔ اوس آکھیا، ”میں کوئی نہیں پر نیونا۔ نہ اوس جیہی لہھنی تے نہ میں پر نیونا۔“ اوہناں آکھیا، ”مڑ پُتر پرنا۔“ ”ہا۔“ نوکرنوں آکھیا، ”چل اج کدوں مہارے کان ساک منگیے۔“ اوس زمانے دے سردار ٹرن ہا تاں گھر جی ہونی، سنگل ہوونا، کبور ہوونا، گلاس ہوونا، کھٹا تماکو اگاڑیاں پچھاڑیاں تائیں۔ نوکرنوں اُمید بھتی ایہناں میکناں توں ای ساک منگنا بیس۔ ٹردے ٹردے میکناں دے علاقے چوں نکل گئے۔ ڈردا اوہ پچھے وی نہیں۔ چلدیاں چلدیاں جاؤ علاقہ وی ختم ہو گیا۔ بھیرے توں اتانہہ ٹپ گئے۔ تکیا ہے تاں کوٹ بھرتاں دا ہے۔ ماڑی ہے اوس دے وچ۔ زمانہ کھوہاں کھلڑاں دا ہویا ہے۔ ماڑی ہر دی تاں ہوندی ناہی۔ پچھپوس، ”ماڑی کیہدی ہے؟“ اکھے، ”احمد یار بھرت دی ہے۔“ ”کائی دھی وی بیس؟“ اکھے، ”پیسوں ای دھی۔ پُتر تاں بیس کوئی نہ۔“ ”کواری ہے؟“ ”کواری ہے۔“ نوکرنوں آکھیوں، ”آ ایس بندے توں ساک منگیے۔“ اوس آکھیا، ”فتح خان نہ تیرا جانو نہ نبھوں نہ تیری قوم ہے۔ کیوں گاہل کڈھنا ہیں کسے نوں؟“ اوس

آکھیا، ”مینوں اپنی قسمت تے بھروسا ہے۔ میں ایس توں ساک منگاں، ایس دی بُرات توں کم باہر ہے مینوں انکار کرے۔“ دس پئی بھئی ایہناں دے پردے بڑے ڈوگھن۔ گھوڑی توں لٹھا ہے تے نوکرنوں آکھیوں، ”ٹیر اگانہہ لئی آ۔ منگنا ساک تے پردے کیہے؟“ نوکر آکھیا، ”لے بھئی لڑاں دا ویلا آ گیا ہے۔ کہیں دے ستران نوں منڈی جاندا ہے سمیت گھوڑی دے۔“ ایہہ وڈ پیا۔ احمد یار بھیرے گیا ہویا ہے۔ ٹبر اوہدا کدائیں مُکان گیا ہویا ہے۔ اوہا چھوہر بیٹھی ہے، پردے دار۔ اوہدیاں ہم عُمر پردے دار وکھ کے بھجن لگیاں۔ احمد یار دی دھی آکھیا، ”میتھوں وڈے پیو دیاں نیہے تے میتھوں ڈوگھا پردہ وی نیہے، جیہڑا میرے متھے لگ سکدا ہے، بیٹھیاں رہو، تہاڈے متھے وی لگ سکدا ہے۔“ اوس گھوڑی بھائی۔ پیون پیوایا۔ روٹی کھوا کے ماں آل بندہ گھلیا۔ اوہ آئی۔ ”رد بلائیں بھائی۔“ ”خیر ہووی۔“ اندر وڈ کے چھوہر توں پچھیا، ”کون ہے؟“ اوس آکھیا، ”مینوں کیہڑا پتہ ہے؟“ اوس بندہ چاڑھیا احمد یار آ گیا۔ ”السلام علیکم بھائی جان۔“ تھہا پا کے ملیا۔ اندر وڈ کے سوانی توں پچھیا، ”کون ہے؟“ اوس آکھیا، ”مینوں کیہڑا پتہ۔“ اوس آکھیا، ”پراہنے آلی حد منگی ہوئی ہے۔ چھوہر مینوں سدیا ہے۔ میں تینوں سدیا ہے۔ توں ہٹ کے ساتھوں پیا پچھنا ہیں۔“ آکھیوں، ”بندے کوئی بڑے لگدن پر سیاپ نہیں پئی ہوندی، جیہڑے وچ لگے آئن گھر دے۔“ ”اچھا بھائی کدوں تڑے او؟“ اکھے، ”گھر آ لوں۔“ ”کتھوں تائیں؟“ ”ایتھوں تائیں۔“ اوہ نما نا ول مارے کہ پتہ لگے مینیں ہن، چودھری ہن، ملک ہن کون ہن؟ ترائے راتیں ہو گئیاں۔ اوہنوں ناں سد دا پتہ کوئی نہ۔ فتح خان آکھیا، ”گل تیرے نال وکھریاں کرنی ہے۔“ اکھے، ”دس۔“ ”مینوں جاننا ہیں؟“ اکھے، ”نہیں، عقل بڑ گیا ہے۔“ اوس آکھیا، ”میں فتح خان میکن ہاں۔“ ”سردار فتح خان میکن کوٹ بھائی خان دے آلا۔“ ”ہلا۔ توہیں سُنیا ہویا ہے؟ میں تینوں سُنیا ہویا ہی کوئی

نہ۔ انجِ انجِ میری شادی ہوئی۔ انجِ انجِ سب بنیا۔ اوہ مرگئی۔ پُتر ہو ہے۔ ساکاں دی بھکھ کائی نہیں۔ تمنا لے کے ٹریا ہاں بھئی جتھے دل و بے۔ دل و جیا ہے تیری ماڑی ویکھ کے۔ چھوہر ویکھ کے دل موہی گیا ہے۔ دیویں چاں تاں پُتر پرنا لواں۔ بے نہ دیویں تاں آپ پرینونا بیس، میں مُر نہیں ویکھنا۔ جانیں گاہل کڈھی ہے تاں جنجیاں مرضی کڈھ لے۔ جدوں رج رہسیں میں اُٹھی کے وگ ویاں۔“ اوس آکھیا، ”فتح خان تیرے آر منگنا کسے نہیں تے میرے آر دیونا وی کسے نہیں۔ پہلے منگی ہا، تو ہاں پرناں۔ بندے بندے توں نہ منگوائیں۔ میتھوں گڈھ گھتوا لے۔“ گڈھ گھت کے اوس دے چھڈی۔ بھرت اوس تے رنج ہو گئے۔ میکن ایس تے رنج ہو گئے بھئی ساٹھوں نیسوں لیا۔

مُھارا پرنی گیا۔ ترائے سال لکھ گئے۔ نوکر ہک خاص ہائی۔ اوس فتح خان نوں آکھیا، ”پُتر تیرے اج تائیں ایس نال زبانی کلام وی نہیں کیتا۔ ایہدے ہتھ دا پانی وی نیسوں پیتا۔ پُتر نوں پرنا، ہکو پُتر ہی اوتر وگ ویسیں۔“ فتح خان اُٹھیا ہے تے آن کے نوہہ دے سراتے ہتھ رکھ کے رو پیا ہے۔ اکھ، ”پُتر! جیوں اُمید تے میں تینوں لیاندا ہا توہیں پوری کر چھڈی ہے۔ سکیاں پتریریں ہوندین تے دُوئی راتیں پتہ لگ جاندا ہے۔ ترائے سال گزر گئے توہیں اج تائیں جنایا ای نہیں۔ پیکیاں نوں وی نہیں آکھیا۔ پُتر میرے آکھن وچ نہیں۔ ایہہ گنجیاں نی تے جتنے تائیں میں جیدا ہاں سرداری تیری ہے۔“ کچھ دناں بعد فتح خان مر گیا۔ ماں پو اوہدا وی مر گیا۔ وقت مُھارے دا آ گیا۔ جیہڑیاں اولیاں پیلیاں ہاں سبھ اندر آ گئیاں۔ بھرت نوں چکھے وی کوئی نہ۔ زنا فنا ہوندا ہے۔

مُھارے ٹھیکہ تاں چایا بار دا۔ رنجیت سنگھ دا زمانہ ہے۔ لکھ روپیہ گھانا پے گیا۔ لکھ ایہہ بھر وی ناہی سکدا۔ چڑھے ہرکارے تے اوہناں ایہوں گرفتار کر لیا۔ رنجیت



سنگھ دے پیش ہويا۔ اوس آکھيا، ”لکھ دے۔“ ایس آکھيا، ”میں تاں دے نہیں سکدا۔“ اوس عمر قید سزا سُنائی۔ عمر قید اودوں زندگی بھر دی ہوندی ہائی۔ ثمن بُرج دے وچ بند کر چھڈیا۔ میکن خوش ہو گئے پتی لا ولد گئی۔ بھرت بیٹھی۔ دُونیاں سبھ اڈ گئیاں۔ اوہ تاں شکار و پتھی جوں ہائِن۔ چھ مہینے گزر گئے مہارے نوں وچ قید دے۔ رنجیت سنگھ نوں خیال آیا۔ لکھ دی ڈھک اندر چاں واڑی تے روٹی میں پیا دیندا ہویوم۔ ایہہ مر جاوے میں لکھ وصول کدوں کرنا ہیں؟۔ کاوڑ بادشاہواں دی، چڑھاوے دریاواں دے، بھ نہیں پوندے۔ بادشاہ عُصے وچ آ گیا ہے۔ اوس حکم دتا ہے ہری سنگھ نلوا بُلَاؤ۔ ایس ہری سنگھ نلواے کشمیر کولوں لے کے وزیرستان تائیں ملک فتح کیتا ہائی۔ ہری سنگھ آ گیا ہے۔ اکھے، ”سو سنگھ دا دل نال لے۔ کوٹ بھائی خان دے نوں پو۔ ایندی عورت نپ لئیں۔ مال لٹ لئیں۔ زمیں فروخت کر دیویں۔ سارا سامان اتھے لے آ۔ میں لکھ وصول کرنا ہیں۔“

موچی چھو کرا کوٹ بھائی خان دے دا کجھ پڑھ پیا ہا۔ اوہ اڑتلی لگا ہویا رنجیت سنگھ دی کچھری وچ۔ اوہ سندا پیا ہا۔ پپو اوس نوں ملن گیا ہویا ہا لہور۔ اوس آکھيا، ”ابا جی! اسان پیڑھیاں کھادھا ہے میکاناں دا تے اج سترائ نوں ہتھ پیا پوندا ہے۔ سکھ شرابی ہن۔ ایہناں دے ہتھیں اوہ آوسی پتہ نہیں کیہ کریں۔ توں بھج تے بھرت نوں کڈھ۔“ اوس آکھيا، ”بچیا! میں بڈھا بندہ تے پدھ لہور دا ہویا۔“ اوس ماہری لے دتی ہک بڑی ترکھی۔ موچی بڈھڑا اوس تے چڑھ پیا ہے۔ جنگلاں دے زمانے ہائِن۔ اگ اوس نوں اوتھوں لگی ہوئی ہا پر لہہ کے اوس پانی وی نہیں پیتا۔ کوٹ بھائی خان دے آ گیا۔ ”چڑا بھرت! ایہہ ایہہ حکم نکل گئِن۔ پرسوں دوپہراں دا وقت ہوسی۔ سو سکھ دا دل اتھے آ جاسی۔ کائی شے ہتھیں گدی ہاتے لے کے نکل جا۔“ اوس آکھيا، ”بابا! کم وڈڑ کر آیوں تے مت بُری دیتائی۔ اج میں نس جاواں تے اوس قبر آ لے نوں اتنی

لعنت پونی ہے جیویں مینہہ وسدا ہے بھئی لگدی جوں کجھ ناہی۔ نہیں میں مُبھارے توں  
 لُوڈی نہیں۔ وفا دا سواد تاں ہے مُبھارے دے نال قید ہوئی کھلوتی ہوواں تے  
 مُبھارے دا تاں پتہ ہے تہا نوں، جیہڑا اوہدا میرے نال سلوک ہے۔ چنگا کیتا ہئی جیہڑا  
 مینوں خبرایا ہئی۔“ اوس نوکراں نوں حکم دتا جو رعایا دا بندہ پگڑے ول ہے اتھے میرے  
 بُو ہے تے آ جاوے۔ آگئے۔

دلِ نون گرمی کھلی، سُن کٹک طوفانی  
 کلولِ آئیاں ہن بیبیاں، مجھ چھوٹے پانی  
 ہُن سد امیراں نون آکھدی، ملکہ زمانی  
 ہو تْسیں موروثی جد دے، امراء تورانی  
 لے منصب طرے ہنڈھاوندے، حُسن جوانی

اوس آکھیا، ”وقت ہے مصیبت دا میتھے آ گیا۔ سو سکھ دا دل بیا آوندا ہے۔  
 گھر میرے لگنا ہیں۔ خدمت تْساں کرنی ہیں۔ ایہہ باگ ہے اساڈا۔ ایس دے وچ  
 کائی کھوہ دی کمی ہے تاں اوہ کڈھو چاں۔ صفائیاں کرو چاں۔ سو پلگھ نوار دا رکھ دیوہ۔  
 گاؤ تئیے لگ جاوے۔ ساہمنے گھوڑے بَجھ جاوے۔“ اسوار نوں گھوڑا ساہواں کھلا ہووے  
 تے اوہدی خدمت دیکھے تاں اوہ تد خوش ہوندا ہے۔ آدم شروع ہو گیا۔

پرس دا روز ہے۔ دل سکھاں دا آ گیا۔ اگول تکیا ہے ہری سنگھ آدم کھلا ہے۔  
 ہری سنگھ آکھیا، ”اوائے لڑنے کان؟“ اکھے، ”جی نہیں اسیں خدمت کرن کان کھڑے  
 ہاں۔“ لہندیاں نون سو خدمتاں شروع ہو گئیاں۔ اٹھ دیہاڑے گزر گئیں تاں آبدن:  
 بک کھانا کھا رہن ہا تا دُو آ ایس قسم دا ہوندا ہا کہ ضرور کھاونا پوندا ہا۔ اٹھویں دن ہری  
 سنگھ نلوے پُچھیا ہے، ”میں خدمت کرن آ لے دیکھن لگاں انتظار وچ رہیا آں کہ جیہڑا  
 خدمت کروا رہیا ہے، ایس گھر اپنے نون اگ لا چھڈی ہے۔ بھئی کائی گل منواؤ ہے،

ہُن تائیں میں خدمتوں کرواؤں آلا نہیں ڈٹھا۔“ اکھے، ”مُہارے دا پو کدے ہے؟“ اکھے، ”مویا ہو یا پس۔“ ”ماں؟“ اکھے، ”موئی ہوئی پس۔“ ”بھرا؟“ اکھے، ”کوئی نہیں۔“ ”پُتر اوہدا خدمت کروا رہیا ہے؟“ اکھے، ”پُتر کدوں ہوونا ہے عورت نال تاں بولیا کدی نہیں۔“ ”خدمت کون کروا رہیا ہے؟“ اکھے، ”اوہو عورت۔“ ”کون ہے؟“ اکھے، ”بھرت قوم دی ہے۔“ تاں آکھیوس، ”میں کشمیر کولوں لے کے وزیرستان تائیں ملک لتاڑیا ہے۔ بڑے بڑے خانداناں دیاں لڑکیاں ڈٹھین، ایس مزاج دی پہلی عورت میں پیا ویکھدا ہاں کہ ایڈے بے وفا مرد دے نال اتنی وفا دا ثبوت دیونا۔ اوہ عار نہ سمجھے تاں میں دھرم دی دھی سدھی بیٹھا ہاں۔ ایہو جیہی لڑکی نوں دھی سدنا فخر ہے۔“ اوس نوں جا دسیاں۔ اوس آکھیا، ”میریاں اکھیں لوہ موئین کہ پیکے کیویں ہوندن۔ ماں پو مر گیا۔ بھرا ہا کوئی نہ۔ قوم وسار چھڈیا ہے۔ اوہ پو بن کے پیا آوند ہے بھاویں سکھ ہے آوے۔“ ہری سنگھ نلوا وڑ پیا ہے۔ سو روپیہ تے پنچے کپڑے۔ ایہہ آکے سرتے رکھے پس۔ ہتھ پھیریا پس۔ آکھیا پس، ”چچا! پنچ ککے سکھ آں۔ دھیاں سدن دے عادی نہیں آں۔ ایس تیرے عمل اتنا متاثر کیتا ہے میں تینوں دھی سدھی بیٹھا آں۔ توں دھی ہو پوں تے مُہارا جوئی بن گیا۔ کوئی راٹھ وی ہے جدے موت دا خطرہ ہو سوس پُتر نوں گھلیسی چاں۔ جوئی نوں نہ گھلیسی۔ دھی رنڈن نہ ہو جاوے۔ پُتر مرانا راٹھ منظور کر لسی جوئی مرانا منظور نہ کر لسی۔ میں چالھی سال خدمت کیتی کھلا ہاں رنجیت سنگھ دی۔ میں جانداں اوس نوں آکھنا ہے مُہارے دیاں پنشن وچ باہیں دے۔ بادشاہ ہے پتہ نہیں نہ دیسی، پر جتھے مُہارا مرسی تینوں دس پوسی ہری سنگھ دا سر نال لتھا پیا ہے۔ پر پچیا مُہارا مری جاوے۔ میں وی مری جاواں پر ترے دینہ توں سنے گی تخت لہور دا نلویاں تباہ کر چھڈیا ہے۔ میرا مرنا اجیہا مرنا نہیں تخت پنجاب دا اڈ ویسی۔ میں ہُن جا رہیا آں۔“ اوہ اٹھی اوس بانہہ چاں نی۔ ”اگے رہیا ہیں افسر بن کے، اج

بنیا ہیں بیو۔ میریاں اُھیں سڑگیاں نی بھئی پیکے دھیاں تے رہندے کیوں ہن تے  
 دھیاں وت خدمتاں کیوں کریندین۔ اج دی رات رہو۔“ سکھ روون کڈھ ڈڑھا  
 ہے۔ نلوے آکھیا، ”ارمان تاں بڑا پیا لگدا ہے۔ میں نلوے قوم دا سکھ ہاں جیس پینڈ  
 وچ ساڈی دھی پرنی ہووے اوس پینڈ دا پانی اساتھے حرام ہے۔ میں دھی سد کے تیری  
 روٹی چاں کھاواں۔ ایہہ داغ میری قوم دے مگروں کدی وی نہیں لاہنا۔“

سکھ چڑھ پیا ہے۔ باہر نکل کے اوس سکھاں باقی دیاں نوں آکھیا ہے،  
 ”تساں وی کھادھا ہے میرے نال۔ ایہہ ایہہ گل میں کیتی آوناں۔ تسیں کیہ کریسو؟“  
 اوہناں آکھیا، ”تیری دھی ہے تاں اسادی وی دھی ہے۔ جتھے مرسیں نال نہ مرے تاں  
 سکھ دے پتر اسیں وی نہیں۔“ لہور وڑن لگے تاں آکھوس، ”ہر کوئی گھراں نوں چلے  
 جاؤ۔ رنجیت سنگھ بلائے تاں جاونا ہیں۔“ ترے دیہاڑے رنجیت سنگھ سنیا ہیں بھئی پرس  
 دے سکھ آئے ہون۔ اوہ حیران ہو گیا بھئی مینوں تاں گل ای نہ دسیاں۔ بندہ گھلیا  
 بھئی ہری سنگھ نوں آکھو، اپنی پلٹن لے کے پیش ہووے۔ ہری سنگھ اگے لگا ہویا ہے۔  
 تلواراں میاناں توں باہر ہن تے پلتھا کھیڈ دے آوندن۔ بغیر حکم بادشاہ دے تلوار میان  
 چوں کڈھنی ایہہ وڈا جرم ہا۔ دربار سارا دھرڑا گیا ہے:

آئے کنگاں دے دھراٹ، اُٹھ گرد چڑھی اے اسمان  
 تھر تھر کمی اے صاحبان، چوٹرنی کرے دھیان  
 اوس دوروں ڈٹھا ہے آوند، کوئی کھیوے دا سلطان  
 اُٹھ پکڑ جگاوے یار نوں، سورے رب رحمان  
 اُٹھی اوئے مرزا ستیا، اج پاٹ گیائی اسمان  
 تینوں کٹک سیال دے ویڑھیا، کر لے کوئی سماں  
 جٹ اُٹھیا نعرہ مار کے، ہتھ پھدھی تیر کمان

اگول کبیر تڑتے دیکھ کے، ہو کھلا حیران  
 جیس دن اے مرزا ماریا، صبح دی ہو گئی شام  
 بدھے بھلے پریت دے ول غوطے کھان  
 دربار ہل گیا۔ رنجیت سنگھ آکھیا، ”اوہری سنگھا۔“ اکھے، ”ہاں جی۔“ اکھے،  
 ”تلواراں میاناں توں باہر کیوں نیں؟“ اوس آکھیا، ”ایہناں چاریاں دا وقت آ گیا ہے  
 مہاراجا۔ ہُن باہر ای رہن گیاں۔“ رنجیت سنگھ سمجھیا، ایہہ تاں ہوش وچ نہیں۔ رنجیت  
 سنگھ پچھیا، ”اچھا توں گیا سی کوٹ بھائی خان؟“ ”آہو۔“ ”بندے پھڑے؟“ اکھے،  
 ”کوئی نہ۔“ ”مال مارے؟“ اکھے، ”کوئی نہ۔“ اکھے، ”زویں فروخت؟“ اکھے، ”کچھ  
 بھی نہ۔“ ”ایسا کیوں کیتا؟“ اوس آکھیا، ”ایس مُبھارے دی ہے جنی بھرت قوم دی۔  
 اوس اپنی میری خدمت کیتی ہے نا میں اوہنوں دھی سد آیا ہاں۔ اگر توں ہوندا توہیں  
 داج دینا سی۔ اپنا فرق ہے تیرا میرا۔ چالھی سال تیری خدمت کیتی ہے۔ سینہ سپر کر  
 کے توپاں اگے دھریا ہے۔ سانگاں دے اگے دھریا ہے۔ تلواراں دے اگے دھریا ہے۔  
 اج آخری دن ہے۔ مینوں پنشن دے وچ مُبھارے دیاں باہاں دے دے، نہیں تاں  
 جتھے مُبھارا مرے گا۔ میں نال مراں گا۔“ مگروں سو سپاہی بولیا ہے، اوہناں آکھیا،  
 ”مہاراجا! ہک لکھ ای ہے نا تیرے اگے ایڈی چیز تاں کوئی نہیں۔ جتھے مرے گا مُبھارا  
 ایس بے چارے نوں مرنا پوگا۔ جتھے ایہہ مرے گا ایس وی مراں گے۔“ رنجیت سنگھ  
 سمجھیا ایہہ تاں غدر پوندا ہے۔ رنجیت سنگھ آکھیا، ”کیوں ہے میں مُبھارا چھڈ دیاں تاں  
 تیری پنشن آگئی۔ اُلو دیا پٹھیا! تینوں اپنی قیمت دا پتہ ای کوئی نہیں۔ لکھ روپیہ تاں میں  
 تیری بجتی دی نوک توں قُربان کرنا ہویا۔ ایہو کجھ ہے۔ لے آؤ اکھے مُبھارے نوں۔“  
 مُبھارے نوں دس پئی ہے کہ رنجیت سنگھ تینوں یاد فرمایا ہے۔ نہواں تاں خون  
 سِک گیا ہے کہ موت ہے۔ ڈولاندا آدندا ہے۔ سلام کیتا پیس۔ رنجیت سنگھ آکھیا، ”او

مُہارے! ایہہ سو سکھ میں بھیجیا سی کہ ایہدی تیویں پھڑنی، زویں فروخت کرنی، مال مارنے خورے تیری عورت ایہناں نال کیہ کیتا ہے کہ سکھ ہو کے اوس موسلی نوں دھی کہہ کے آئے نیں۔ جے ایہناں دی دھی ہے تاں میری وی دھی ہے۔ نوے دا جوآئی ہیں تے میرا وی جوآئی ہیں۔ لکھ روپیہ ماف۔ قید رہا۔ اک گھوڑا تے سروپا۔ جوآیاں نوں کچھ دینا پنیدا ہے۔ ایہہ انعام ہے۔“ اوس ویلے مُہارے اپنا ظلم تے عورت دا صبر کنڈے تے دھریا ہے۔ ہنجوں ٹپن لگ پئین۔

ظلم یزیدی تے صبر حسین، رب بہہ کے دیکھے اوہلے  
جاں جاں ظلم حسین تے آون تاں طبق زمین دا ڈولے  
دھر کنڈا عدل انصاف دا، لا جرائیل کھلوتا تولے  
ون تیر شبیر دے اوپر، پر حمد خدا دی بولے

اوس ویلے پچھتاء لگا کہ میرا پیو سڑدا قبر نوں وڑ گیا کہ ہک واری نوہہ تے پتر بولیدے میں ویکھاں ہاں۔ ہری سنگھ بولیا، ”مرد نہیں روندے جے۔ چل میرے گھر۔ میری تیویں تینوں ویکھنا چاہوندی ہے۔ اوہ کہندی جوآئی وکھا۔“ اوہدے گھر جا وڑن۔ ”ارے گورو دی سنگھنی! ایہہ مُہارے خان جوآئی تیرا۔“ اوہ اٹھی ہے اوس ہتھ پھیریا۔ اکھے، ”سکے ہتھ پھیرن ڈیہی ہوئی ہیں۔ جوآیاں نوں کچھ دینا پنیدا ہے۔“ اوس ماریا ہتھ تے کنٹھا سونے دا تروڑ کے آکھیوں، ”ایہہ میری دھی نوں دیویں۔“ ہری سنگھ اندر وڑ گیا ہے تے جتنا داج مہاراجے کے دیندے ہائن اتنا چاں کڈھیا ہے۔ اوٹھی تیار چاں کیتے۔ کوٹ بھائی خان دے دس پے گئی ہے مُہارا بری ہو گیا ہے۔

آئیاں ڈھولاں دے مونہہ واگھاں وجن ساگھرو،

سنتیاں کلاں جگائیاں بیٹے لطف دے

اگوں آدم اکٹھا ہویا۔ مُہارا آ گیا ہے۔ اگوں آدم، بسم اللہ تے میں قربان

جی۔ اوہ کسے ال نہیں بھنویا بھئی میرے آل خط ای کسے نہ لکھیا۔ ملاقات وی کسے نہیں کیتی۔ میں پیر اوس دے کیوں نہ پکڑاں جیس دیاں محنتاں ہن۔ مہارا سدھا حویلی وچ چلا گیا۔ وچ حویلی دے وڑ کے اوس حال حال چاں گھتی۔ روون کڈھ ڈڑھا۔ بھرت آکھیا ہے، ”دیہاڑا خوشی دا ہے مہارے خان ایہہ کیہ؟“ اوس آکھیا، ”خوشی دا دیہاڑا ہے تیرے کان، جیس نوں ساری دنیا رحمتاں پئی گھندی ہے۔ اوس قبر آلے آلوں مینوں اتنیاں لعنتاں پیاں پوندیاں ہن جیس دا انت تے شمار کوئی نہیں۔ اوہ بے چارا سڑدا قبر وچ وڑ گیا تے بھرتے! تیری قیمت دا مینوں پتہ جہیل وچ لگا۔“ بھرت نوں پڑ ڈھیون لگ پئے۔ ”ک، پ“ آلے اوسے دی اولاد ہن۔

مہارے دے ہتھیں حکومت آگئی تے بھ، خ کیاں میکناں تے ظلم کرنے شروع کر دتے۔ جیہدی فطرت وچ ظلم ہے نا اوہ ہک لاهموں ٹلے تاں اوس دُوئی لاپے کڈھنا ہوندا ہے۔ اوہناں دے نوکراں نوں مروائے۔ اتنے مالے چاں لوائے جیہڑے اوہ ادا نہ کر سکے۔ اخیر بدھ سنگھ تھانیدار اوس لہوروں چاڑھیا تے پچھی سپاہی بندوقاں آلے اوس دے نال۔ دھرنا دے کے آ بہہ گنن بھ، خ کے بُو ہے تے۔ بھ، خ دے دو پتر ہوئن ش خ تے خ خ۔ اوہ اندر وڑے پین۔ رعایا دے کنیں بندے نس گنن۔ مہارے خان حکم دتا ہے ایہہ جیہڑے مکان پین ایہناں دی لکڑ دا اسانوں حصہ نہیں ڈھیہا ہویا۔ مکان ڈھاہیو میں لکڑیں ونڈنیں۔ ظلم دی انتہا ہے۔ ونکارے چڑھ گنن۔ جیہڑا محل ڈھاہن لگدن پردے دار اٹھی کے دوجے محل وچ وڑ جاندن۔ اوہ مڑ اوس تے چڑھ جاندن۔ پکے واری ش، خ بولیا ہے۔ اکھے، ”خ خ“، اکھے، ”ش۔“ ”بھیڑیا! ایہہ زندگی تاں کائی نہیں جیہڑی لئی بیٹھے ہاں۔“ اوس آکھیا، ”ہے تاں کائی نہ۔“ ”اٹھی مہارا وی مار گھتے تے تھانیدار وی جیہڑی رب کرے۔“ سڑے ہوئے شریک توں رب امان دیوے۔ نوکر وی نال ہن تے نکل آسن۔ اگانہہ آسن تاں پلگھ

اُتے تھانیدار بیٹھا ہے کرسی اُتے مہارے خان بیٹھا ہے۔ تھانیدار آکھیا ہے، ”میں  
 کراں کارروائی، ماملایوں نہیں دیندے؟“ اوہناں آکھیا، ”جی دیون نکلے ہاں۔ ایہناں  
 سپاہیاں نوں گھل اساڈے نال دیاں سامیاں نپ لے آون۔ ادھ جٹاں بھرنا ہے تے  
 ادھ اسان۔“ اوس آکھیا سپاہیاں نوں، ”دوڑو۔“ پنجھی سپاہیاں کنڈ کیتی ہے۔ ش، رخ  
 ماری تلوار تھانیدار دا سر اودے دُور جا پیا۔ مہارا بھج پیا ہے مگروں ماچھی بھج کے پیر  
 تے تلوار ماری ہے اوہ ڈھٹھا ہے۔ اکھے، ”دایا! سر وڈھ۔“ اوس آکھیا، ”ڈھاہ دتا ہے  
 بھلکے رس جاؤ اساڈا وارث کاہیں بننا ہیں۔ سر آپ وڈھو۔“ ہک ہک اوہناں ماری  
 مہارا وی مر گیا۔ ایہہ کمزور ہاٹن اوس ویلے اودوں حکومت دا بندہ مری گیا۔ سنے  
 ستریں سنے نوکراں نوکریں ایہہ نس گئے۔ جیس جن دے بوہے اُتے جاون بھی  
 اسانوں رہائیوں۔ اوہ آکھن: واسطہ خُدا دا ہے نیں اتھے گھرے نہ لائیو:

اے راجا ہووی بخت زیادہ، نہ گیرد رب نوں بھاوے  
 اوہ قدیم کریم دا مالک، چاں اُلٹے رنگ دکھاوے  
 اوہ بادشاہاں نوں تختوں سٹے، تخت تے جٹ بہاوے  
 احمد یار قہار توں ڈریے، ان سہندے بھار چواوے

ستر نال ہن۔ اگانہ رہن کوئی نہیں دیندا۔ ایس جگ وچ اوہ پھرن لگ پئے۔  
 بندہ بہائے کوئی نہ۔ بڑانے بھٹیاں دے آگن۔ ”راء زیادیا! اسانوں بہا۔“ زیادے،  
 احمد دے بھٹی آکھیا، ”میکناں او! مصیبت تاں تساتھے وڈی آگئی ہے پر نال عقل وی  
 چھوڑ گیا نیں۔“ ”کیوں؟“ اوس آکھیا، ”جیناں بندیاں دے کول تسیں پھر دے ودے  
 ہو، مگروں پین تہاڈے انعام نکلے ہوئے پھدھاون کان، ایہناں بندیاں ہے تسانوں  
 پھدھاون۔ تسیں ہر بندے دا بُو ہا ٹھوکری کھلے ہو۔ میں بہا نہیں سکدا جوں میں بسیویں  
 تے بیٹھا ہاں۔ میں مریناں ہاں۔ ہک بندہ تسانوں بہا سکدا ہے جے چاں تہانوں



بہائے۔ ترائے کوٹ بیس۔ تریناں دی اٹ اڈ جاسی تاں مہانوں کوئی پھدھسی۔“  
 اکھے، ”کیہڑا؟“ اکھے، ”صاحب کوٹاں آلا بھٹی۔“ اکھے، ”اسیں اوہنوں جاندے نہیں  
 توں اسانوں بہا۔“ اوس آکھیا، ”میرا اوہ شریک ہے۔ اوس سمجھنا ہے مینوں اگ وچ پیا  
 وگیندا ہے۔“ اوہوں اوہ ٹر پئے۔ ٹھٹھے شاہ جمال دے آلے سید پیر ہن۔ مہیں چوہڑ  
 شاہ، شاہ جمال دے نوں اکھیونیں، ”اسانوں ٹوں بہا۔“ چوہڑ شاہ لے کے کوٹ آ گیا۔  
 مہر میر داد گرواہ نوں نال لیا نہیں۔ آ گئے۔ ”راء صاحب! ایہہ میکن ہن، ایہناں نوں  
 بہا۔“ اوس آکھیا، ”اوہے میکن ہن جیہناں تھانیدار تے مہارا ماریا ہے۔“ اکھے، ”ہا۔“  
 ”سیدا! تیرے نال نہ ہوندے تاں میں نپ کے پیش کراں ہا۔ مہاراجے دے مفروور  
 میں بہائیں۔ نکل جاؤ ایہوں۔“ سید نوں وی بڑا شرم آیا۔ سید ٹھٹھے ٹر پیا۔ اوہ ویہت  
 نوں ٹر پئے۔ جتھے اُنتر چک ہے، اتھے پئے ویندے ہان، مگر اسوار۔ اکھے، ”راء  
 صاحب سیدنا ہے۔“ بھیں آئے ہن۔ اکھے، ”بہو۔“ اکھے، ”اگے تاں جواب دتا  
 ہی۔“ اوس آکھیا، ”تہانوں جواب نہیں دتا۔“

ہووے ویری تے گھر آمنت کرے، غصہ من تے وت لیاونا کیہ

گودھا رام ملتان دی کار کرنی، چاونی پنڈ تے وت شرمانا کیہ

”گل ایہہ وے کہ جواب میں دتا ہے سید نوں۔ ایہہ نمانا ہے پیر۔ راٹھا چاری  
 دا ایہوں پتہ کوئی نہیں۔ ایس سجھیا ہے کہ مرید آون تاں وت ٹر پویندا ہے۔ ایس ہے  
 ہن پھدھیونا۔ ایس میرے مونہہ تے آکھنا ہائی کہ میں کوٹ بہان۔ میں مخبر کڈھیا  
 ہے۔ بہو۔“ بہالین۔

پیر بخش فریسی رادھن آلا ایہہ مقتولاں دی دھڑ ہا۔ ایس جا کے رنجیت سنگھ نوں  
 خبرایا ہے کہ ٹھٹھے شاہ جمال دے دا سید چوہڑ شاہ بہاون آلا تے کوٹ سلطان دے  
 پیٹھن۔ سید نی گیا۔ سید آکھے، ”جی آ میں بہان۔“ سید ڈھکی گیا۔ راء صاحب آل

بندہ آ گیا۔ رنجیت سنگھ آہدا ای اوہ مفرور میرے تے آپ وی آ جا۔ راء صاحب چڑھیا ہے۔ میںیں گل محمد کلیار دے کول گیا ہے، جیہدے نال تے گل دا کوٹ ہے۔ ایہنوں نال لیا پیس۔ ایہہ لہور جا اپڑن۔ راء صاحب سلام کیتا ہے۔ ایہہ لہور آلے سکھ اوہنوں صاحب سدا سدا دے ہائے۔ رنجیت سنگھ آکھیا، ”صاحبہ!“ اکھے، ”جی۔“ ”مفرور میرے ہن تیرے کول۔“ اکھے، ”جی کوئی نہیں۔“ اکھے، ”تیرے اُتے مرکت ہے سید۔“ اوس آکھیا، ”مونہہ تے لے آؤ۔“ کڈھ لے آندونیں۔ سید دا مونہہ ویکھ کے صاحب سمجھ گیا کہ ایہہ آہدا ہے تے چلیاں ہویاں آہدا ہے۔ راء صاحب آکھیا، ”آل نبی دی ہیں، اولاد علی دی ہیں کلمہ پڑھیں نا، لا اِلهَ اِلَّا اللهُ مُحَمَّدٌ الرَّسُولُ اللهُ۔ بھئی کعبے ال مونہہ کر کے آکھ۔ توہیں مینوں کیہ آکھیا تے میں تینوں کیہ آکھیا۔ جیہڑے ویلے میکاناں دے توں نال آیا ہیں۔“ سیدنوں موقع ملیا۔ اوس آکھیا، ”میں تینوں آکھیا بہا میکاناں نوں۔ توہیں آکھیا تیرے نال نہ ہوندے تاں میں پھدھ کے پیش کراں ہا۔ مہاراجے دے مفرور میں بہائیں۔“ تے رنجیت سنگھ ہسدا ہسدا اُتانا لگا گیا۔ ”اونجام سگھا!“ اکھے، ”جی۔“ ”میں نہیں کہندا سی کہ صاحب میرے مفرور نہیں بٹھا سکدا۔“ صاحب نوں اجازت ڈھی گئی۔ سیدنوں وی چھوڑ دتوںیں۔ اُتوں پر بخش فریٹی آ گیا۔ ”کیہ آکھیا پیس؟“ اکھے، ”اوس دے کول کوئی نہیں۔“ اوس آکھیا، ”جی اوسے کول نیں۔“ اوس آکھیا، ”نہیں صاحب میرے اگے گوڑ نہیں مار سکدا۔“ اوس آکھیا، ”گوڑا بندہ ودا ساری بادشاہی تیری وچ ایہو ہک ہے، جیہڑا اساں مارنا ہیں، اٹھویں پہر ظاہر ہو جاونا ہے، جیہڑا ایس مارنا ہے اوہ ساری حیاتی ظاہر ہوون نیہوں دیونا۔“ رنجیت سنگھ آکھیا، ”نہیں ایویں آکھنا ہیں توں۔“

قُدرت اللہ تعالیٰ دی ایسی بنی ہے کہ ایہہ تھینہ میکاناں دا اتھے بیٹھا ہے۔ بھیرے میانی دے پراچے شیخ ہوئے کھوے۔ بہت وڈے آدمی ہوئے۔ نظام دین تے

صدر دین دو بھرا ہوئے۔ صدر دین، لہور میں ہا خزانے رنجیت سنگھ دے دا۔ نظام دین بھیرے کچھری لیندا ہاتے سرکاروں اوہنوں ہاتھی ملیا ہويا ہا۔ بادشاہ خزانے دا حساب منگیا۔ صدر دین حساب دتا۔ ادھا خزانہ وچ نہیں۔ بادشاہ حکم دتا ایس لکایا ہے ڈھک چھڈو۔ ڈھکی گیا۔ نوکرنوں حکم دتا صدر دین، ”جا نظام دین بھرا نوں آکھ، ایہناں ہن اساڈیاں پچیاں ہن رناں، ایہہ خزانہ اسیں پورا کرن نہیں سکدے۔ دوویں بھیناں وی مار گھت۔ اپنی سوانی نوں وی مار گھت تے اپنے بال مار کے میرے وی مار گھت۔ جدے نسیدا ہئی نس جا۔ اساڈے کان اج قیامت آگئی ہے۔ اسیں بچ سکدے نہیں۔“ نظام دین نوں پیغام ڈھیہا ہے۔ نظام دین سوانیاں نوں آکھیا ہے، ”ایہہ مُصلے تے کروے پین۔ دو دو نفل نماز گزار لوو۔ ٹساڈی موت دا وقت ہے۔“ تلوار لے کے نکلیا ہے تاں بالاں حال حال چاں گھتی ہے۔ اللہ پاک پناہ دیوے اپنے ہتھیں بچے مارنے۔ اگوں صدر دین دی سوانی بولی ہے۔ اوس آکھیا، ”نظام دین اسانوں تاں مرینا ہیں اساڈی بے عزتی نہ ہووے۔ جے ایہہ دوڈھ پیونے بچے جوں مرسیں تاں قیامت دے روز خدا اگے کیہ آکھسیں۔ اسان جوں اچے ایہناں دیاں منتاں وی ادا نہیں کیتیاں۔ اپنے ہتھیں کیوں مارو ہیں؟“ اوس آکھیا، ”کیہ کراں؟“ اکھے، ”نس جاویے۔“ ”بہائے کون؟“ ”جیہڑے بھٹی میکن بہا لین اسانوں نہ بہیں۔“ اوس ویلے کوٹ سلطان دے اُتے عروج ہويا ہے۔ ”اسان کوئی قتل وی کیتا ہويا ہے۔“ اوہنوں اوہناں اسواریاں لئیاں ہن تے اللہ تیری یاری۔ خضر آباد دے کول کھلا ہے خضرے آلا۔ ایس دے کول ترائے راتیں اوہناں نوں ہو گئیں۔ وناں دے وچ۔ ویکھو نا قدرت اللہ دی۔ اوہ چکھن، ”میکن اتھے ہن؟“ چھیڑو آکھن، ”میکن اتھے ہن کوئی نہ۔“ تریے دیہاڑے میکاناں نوں پتہ لگا کہ انج انج بندے ہن تے شہزادے دلی دے لگدن۔ بندہ گھل کے پتہ کروایا۔ ایہہ تاں پراچے پٹھن۔ راء صاحب کول آ گئے میکن۔

اوہناں آکھیا، ”اسیں آکھن جوگے تاں کجھ نہیں پر ایہہ پراچے اسیں تاں ایہناں دے راہکاں جوگے وی نہیں۔“ ایڈے وڈے آدمی ہوؤن۔ راء صاحب آکھیا، ”کیوں او میکناں او! اٹھ جھون کے چاں لدیوے تے لدے کھلے اُتے ہک پرون ہور چاں سٹیوے اوہ بہہ رہسی۔ ایہا موت جیہڑی اگے چائی کھلا ہاں پر لائے انج آؤ بھٹیپیاں، میکینیں تے پراچیاں رلا کے لے آوو۔ ایہہ کوئی نہ آکھے کہ اوہ پراچیاں پپیاں آوندین۔ دُونی حویلی اوہناں نوں چاں دتی۔

اوس ویلے رعایا تے برادری چاں اکٹھی کیتی بھئی گل سنو: سد میں نہیں گھلے۔ پڑ میتھے کوئی نہیں۔ ایہہ بھترے ہوئے۔ بھلکے کائی بلا کوٹ تے وجے تَساں آکھنا ہے، اپنا ہاسو کوئی نہ اساڈے مروا گھتے بیس۔ ہُن دسو کیہ کرنا ہے؟ اوس زمانے بھشیاں دے راہک سو بھی وڈڑ ہوؤن۔ سو بھیاں آکھیا، ”راء صاحب تک جوں آئے نی گوشت، دودھ تے پٹھا اساڈے ذمے چاں کر۔ بندے تیرے آوندے رہن اسیں دیندے رہسائیں۔“ کمی کوٹ دے بولن، ”راء صاحب! جیہڑا ہتھ دا کم تیتھوں ٹکر وی نہ لینا تے اسیں کریسائیں۔“ راء صاحب آکھیا، ”مڑ لپ آٹے دی اسیں وی دیندے رہسائیں۔“ اٹھویں دیہاڑے آہن: کھلوار پک ویندا ہا۔ اوس زمانے چکیاں تے پسدا ہا آٹا۔ راء صاحب چارے بھترے سدن۔ ”راء لطف۔“ اکھے، ”جی۔“ ”ایہناں بندیاں دے کول ہین گھوڑے۔ ینہاں اُتے توہرے بھروا کے رکھ چھڈنے توہرا خالی نہیں ہون دینا تے دوہاں حویلیاں دے وچ آٹا تیرے ذمے“ ”سردار بخش۔“ اکھے، ”جی۔“ ”اگلا پہاڑو گس جاوے حویلیاں دے اگے پہاڑو بجھ جاوے، کلا خالی نہیں ہون دیونا۔“ ”راء مونیا۔“ اکھے، ”جی۔“ ”ڈلی ڈلائی لکڑ ایہہ تیرے ذمے ہے دوواں حویلیاں وچ۔“ ”راء شہادت۔“ اکھے، ”جی۔“ ”بھائی تازہ دودھ تیرے ذمے ہے۔“ ہر بندے دے کم ذمے ہا۔ بندیاں دسیا ہُن پہاڑواں دے گوشت کولوں تک وٹیدن۔

راء صاحب بندے چاڑھے۔ خان دے کوٹوں علیانیاں دے کولوں باز انوائے۔ پرندیاں دا گوشت شروع ہو گیا۔

راء صاحب کوٹ دی گلی وچ و گیا آوندنا ہے تاں اگوں ہک پراچا چھوہر اوس ڈلاکی جیہی چائی ہوئی۔ راء صاحب ڈلاکی کھس کے اودے وگائی تے چا کے اوہنوں پُچھن لگ پیا۔ ”راء مونیہ بھیڑیا! ایہناں دے تاں نوکراں کدی ناہن لکڑیں چائیاں۔ کیوں ایہنوں لکڑ چوائی ہا؟“ اکھے، ”میں تاں ہوڑیندا رہیا ہاں تے آکھیا پیس، اگ پئی مردی ہے اسماں دُھکھا رکھنی ہے۔“ اکھے، ”ہک گل میں تسانوں دساں۔“ اکھے، ”ہا۔“ اکھے، ”ایس بچے دا ڈلاک چاونا عرش معلیٰ تے منظور ہو گیا ہے۔ ایہناں دی کٹی گئی ہے۔ ایہناں دی مُصیبت ہُن کھچاں مارن لگ پئی ہے۔ جدوں اتھے مُصیبت اپڑدی ہے تاں خُدا دا فضل شامل حال ہو جاندا ہے۔“ اوہا گل بنی ہے جیس دیہاڑے اوس اتھے لکڑ چائی ہے، رنجیت سنگھ حسابی ہور سدے ہوئے ہائِن۔ اگلے حسابی گھتھے ہائِن۔ خزانہ پورا نکلیا۔ پراچے پھٹ گئے۔ اے میکن پیٹھن جوں پراچے ہٹ گئے۔

سوتے دا وقت ہے جوں راء صاحب نوں دس پئی ہے کہ فلانی میکن نوں بھوآ لڑ گیا ہے۔ راء صاحب آیا ہے۔ اوہ ولساندی بیٹھی ہے چُپ کر کے۔ ”بھین جی سُنیا ہے بھوآ لڑیا ہے۔“ اوس آکھیا، ”وے صاحبیا! کوئا ہو یا سُلطانے دا مینوں دکھا کوئا بھائی خانے دا۔ مینوں لڑن دے بھوئیں تاں لوک کوئی سونا ہائی۔ مینوں پکھن کوئی نہیں آیا۔ پردیسی جوں ہو یا سے۔“ اودوں ڈاکر نکل گنپوس۔ راء صاحب آکھیا، ”ش۔“ اکھے، ”جی۔“ اکھے، ”میں وی چوٹی گھری دا زور لایا ہے۔ میتھوں تہا ڈا گھر پورا نہیں ناپیا ہوندا۔ میں تینوں پیش کریندا ہاں۔“ اوس آکھیا، ”کر۔“ ش نوں نال چڑھا لیا پیس تے توڑ لہور اپڑ گیا ہے۔ ”ایہہ جی ش، خ مُبھارے دا قاتل تے تھانیدار دا۔“ رنجیت سنگھ بولیا ہے۔ اوس آکھیا ہے وزیراں نوں، ”میں تہانوں کہندا سی کہ

صاحباً میرے مفروضہ نہیں بٹھا سکا۔ اوہی گل بنی۔“ ”ش۔“ اکھے، ”جی۔“ ”تیرے نال میں اوہ کراں جیہڑی دنیا تے کدی کسے نال نہیں کیلتی۔“ راء صاحب آکھیا، ”ایہہ نٹھا ہو یا تاں کوئی نہ۔ ایہہ بے چارا بندیاں نوں لہدا پھریا ہے کہ میں اوہدے ہتھوں پیش ہوواں جیہڑا مہاراجا دا بیللی ہووے۔ دُنیا ساری چاں آکھیا ہے صاحباً تے مہاراجا بیللی ہن۔ ایہہ نمانا میرے کول آیا ہے بھئی مینوں پیش کر۔“ ”اچھا ایہہ بات ہے۔ سچ ش۔ بیللی تاں بیللی ای سہی۔ جیہیں طرح بیللی کہوے۔“ راء صاحب آکھیا، ”مہاراجا! ایہہ نمانے مہارے دے ظلماں توں اک کے گل پین۔ پھٹ توں نیہنے ماریا۔ بندے چنگے ہے نی، جتھے لوڑ پیائی اوتھے کم آوسنی۔ تھکے ہوئے بندے ہن تے جیہڑی چٹی آہنا ہیں بھریسن تے چھڈ دے ایہناں نوں۔“ راء صاحب دے آکھن تے مہاراجے کچھ چٹی مار کے چھڈ دتے۔ ایہہ سدھے گھر وگ گئے۔ وین کھٹن لگ پئے۔ ایڈا سیانا تے کجاک بندہ ہو یا ہے بھٹی۔

## چودھری بہاب للیرا

موہلا، قادر بخش دا بھٹی ہويا ہے کوٹ موہلے دے۔ راء موہلے ماملا دیونا ہا۔  
زمانہ ایسا ہويا ہے بھکھ دا، ماملا لیکھے نہیں۔ سکھ، سپاہی بھیجے۔ اوس زمانے جھنگ دا  
گورنر ہويا ہے مولراج۔ ایہناں ٹھیکہ لیا ہويا رنجیت سنگھ توں بڑانے کولوں لگ کے بھکر،  
منکیرے تائیں، ملتان وی وچے۔ زمانہ رنجیت سنگھ دا ہا۔ سکھ سپاہی بھیجن۔ ایہہ  
اوہناں نوں روپیہ دو دے کے ٹال مٹول۔ بد رُکی جیویں ایہہ گرداور ہویدن، اوتھوں  
سکھ بھیجیا بھٹی موہلے توں ماملا لے آ۔ سکھ آ کے ڈیرے تے کھلا۔ ہزار ہزار گاہل  
کڈھے موہلے نوں۔ کدے گیا موہلا؟ سوانی پک پانی بھرن لگھی ویندی ہائی۔ اوس  
آکھیا، ”سردار جی! پک گل میری سُن۔ ایہہ موہلا مریلا سدیندا ہئی۔ ہئی اوہ ایتھائیں  
تے اوہنوں مُونہہ تے گاہل نہ کڈھیں۔“ ایس آکھیا، ”میں اوہدے مُونہہ تے کڈھاں  
گا۔“ اوس آکھیا، ”تُوں اوہدے مُونہہ تے گاہل چاں کڈھ۔ میں تیرے مُونہہ اچ کھنڈ  
گھتیاں۔“ اوہ گھڑی بھرن اگانہہ لگی گئی۔

راء موہلے نوں کسے دسیا بد رُکی سپاہی آیا کھلا ہئی ڈیرے تے۔ اوس گہنے تے  
بوٹے ماچھی نوں آکھیا، ”ایتھوں منجی وی کائی چا پوتے گھڑی پانی دی وی تے اوتھائیں  
جا پیے۔“ یاں راء موہلا ڈیرے نوں وڑیا ہے۔ سکھ آکھیا ہے، ”موہلا ہیں تُوں؟“

اُکھے، ”جی ہا۔“ اوس کاڑ گاہل کڈھی۔ ”ماملا توں نہیں دیندا۔“ موہلے ماچھیاں نوں آکھیا، ”کیوں کھلے ہو۔ مارو دھی چود نوں۔“ تلواریں شپ شپ کرن لگ پیاں۔ سکھ اوہناں ڈھاہ لیا۔ سوانی پانی بھر کے آوندی پئی ہائی۔ اوس آکھیا، ”دایا! بک واری سر نہ وڈھیں۔“ اوہدے مونہہ اِچ اوس بک مٹی دا وگایا ہے۔ موہلے آکھیا، ”ایہہ کیہ کیتا ہئی؟“ ”ایہدے نال میرا وعدہ ہا۔ میں آکھیا ہا موہلے نوں مونہہ تے گاہل نہ کڈھیں۔ جے کڈھیائی تاں تیرے مونہہ چ کھنڈ گھتساں۔ کھنڈ میرے کول کائی ناہی۔“ سکھ مری گیا۔ سکھ چڑھائی کرن لگ پئے۔ کوٹ موہلے دا خالی ہو گیا۔ موہلا وی نس گیا۔ دُونی خلقت وی نس گئی۔ سکھ آون، پھیرے مرین، شے لیسے کائی نہ۔

مُولراج جھیں دا بہت شوقین ہا۔ جیہڑیاں جھیں دا منگو ہے ناسعی کے ہرلاں کول، ایہہ مُولراج دا ہے۔ اِج وی اوہدے وچوں کٹا نہیں دیندے۔ جیس ویلے مُولراج نوں انگریزاں قید کیتا ہے نا تاں منگو اوہدا اِچ رُدا رہیا ہے۔ سعی کھلا ہا، بھرا نوں اوس آکھیا ہے، ”جھیں ول۔“ اوس آکھیا، ”ایہہ مُولراج دیاں ہن۔ لہو دیاں نھاتیاں ہویاں ہن۔“ اوس آکھیا، ”ستارھاں پیڑھیاں اساڈیاں اگے وی جھیں دے مگر مویاں ہن۔ دو اسیں مر گیا سے تاں حد ہو جاسی۔“ مگروں سائیں کوئی نہ بنیا۔ میراثیاں آکھیا ہو یا ہے ایہہ عرشوں لٹھیاں ہانیں۔ عرشوں اِنجیں لٹھیاں ہان جیویں میں عرض کیتا ہے۔

مُولراج جھیں دا شوقین ہا۔ جتھے چنگی جھ سنی سوں جیویں لینی پئی سوں، لئی ہے۔ اوہنوں دس پئی چودھری بہاب للیرے کول مجھ ہے رتی کیل۔ چگھاراں آلی سدیندن۔ ایس حلیے دی ہے۔ اِچ مجھ ہے۔ مجھ کھا گئی اوس نوں شکل سُن کے۔ اوہ بندے گھلن لگ پیا، ”مجھ دے چاں۔ گھوڑیاں لئیں تاں دیناں ہاں۔ جھیں لئیں تاں دیناں ہاں۔ بھونئیں لئیں تاں دیناں ہاں۔“ ایہہ ہور وئاویاں جھیں اوس شکل دیاں گھلے۔ اوہ واپس کر گھلے۔ ایہہ اوہ نہیں۔ حالاں کہ ڈٹھی ہوئی کائی ناہس۔ نقش اوس اِچ پکائے



ہوئے ہان۔ بہاب آکھیا، ”میں کوئی نہیں دیونی۔“ اوس جناب چاں دتا۔  
ایہہ گل راء موہلے تے بچنی۔ موہلے خیال کیتا بھئی پیو میرے دا بیللی ہا بہاب۔  
جے ایہہ مجھ چاں دیوے شاید میں بچ جاواں۔ ماملا اگے دیونا ہاس۔ حکومت دا بندہ  
مارلیوس۔ نٹھا ہويا جوں ہا گھوڑی تے چڑھیا ہے۔ سوتے ٹنٹی للیریاں دی آیا ہے۔  
چنچھیا: چودھری بہاب؟ اوہناں آکھیا، ”دوآہنے دے وچ مجھیں بہائی بیٹھا ہے۔“ چن  
نوں چودھویں ہوئی ہے۔ راء موہلا اودائیں ٹر پیا ہے۔ اولی من تے کھلو کے سد  
مارلیس بھئی جے ہے تاں اگانہہ ٹھل جاواں نہیں تاں ایویں پدھ نہ کراں۔ ”چودھری  
بہاب ہیں؟“ پہلے سد تے چودھری بہاب آکھیا ہے، ”کیہ کڑمیا! اگانہہ نہ آویں۔“  
موہلے دے ہتھوں پیروں چھٹ گیا۔ آہدن: مصیبت دے ویلے جن چھوڑ دیندن ایہہ  
حق ناہس۔ اگانہہ نہ آویں۔ ایہہ گل سُن بیٹھا ہے میری جیہڑا اگانہہ آون نہیں پیا  
دیندا۔ میرا کم کیہا کرنا سوں۔ موہلا اوتھائیں سیپ گیا تے کھلو رہیا۔ انہیں دل ایچ  
غم۔ تاں جوں پیلی منی توں دھرک ماریا بندے کسے۔ موہلا کھلو رہیا بھئی کوئی اگانہہ دا  
آو ہے چڑھائی لے جاواں۔ گل بھوں کیتیاں توڑا طبیعت ول ہو جاسی۔ لحظہ ہک ہويا  
اوه بندہ چڑھ آیا۔ ڈٹھا ہے تاں چودھری بہاب ہے۔ کوری دودھ دی سرتے ہے، اُتے  
من رکھیا ہويا ہے۔ ”موہلا ایں؟“ اکھے، ”ہا۔“ اکھے، ”ایہلا کھا۔“ اوس آکھیا، ”کم  
میرے دا پتہ ہئی؟“ اکھے، ”نہیں۔“ ”تینوں کاہیں دسیا ہے میں کھاہی ہوئی نہیں۔“  
اوس آکھیا، ”توں ہیں جم دا کڑما۔ توہیں کوئی پاژن کیتا ہوونا ہے نہیں تاں ادھی راتیں  
مینوں بیلے چوں کیوں اٹھاونا ہائیا تے میتھے ہان پراہنے۔ میں آکھیا سُن ون نہ  
ہووے۔ ایہہ کوئی گند کر کے آیا ہے۔ اودائیں ڈکاؤس۔ چھوہر میرے اگے روٹی رکھی  
ہے۔ میں خیال کیتا ہے بھئی جیہڑے مُصپتاں ایچ بندے آوندن نا، ایہناں نوں روٹی  
کوئی نہیں کھویندا۔ کم آکھیا۔ اوہناں ولدا دے چھڈیا۔ اگانہہ ٹردا رہیا۔“ راء موہلے

آکھیا، ”کھاڈی ہوئی وی کائی نہیں تے کھواہیں تاں کھاوئی ہے۔“ اوس آکھیا، ”کیہ گل ہے؟“ موہلے دسیا: انج انج سکھ آیا ہے۔ اوس گاہل کڈھی ہے۔ میں مرا گھتیا ہے۔ کوٹ موہلے دا خالی ہے۔ پیسے اگے دیونے ہان حکومت دے اوتوں بندہ مری گیا ہے۔ میں تیرا کم کیتا ہو یا کوئی نہیں۔ بیو میرے دا نیلی ہاؤں۔ اوسے دی قبر چاں ویکھ۔ ایہہ مجھ مینوں دیویں تاں شاید میں بچ جاواں۔“ اوس آکھیا، ”موہلیا! پتہ ہئی اوس مینوں زمین آکھی ہے۔ مجھیں آکھین۔ گھوڑیاں، سونا، چاندی۔ میں دتی ہے؟“ اکھے، ”نہیں۔“ اکھے، ”مجھ مڈھوں ہن قیمت تے آئی ہے بھئی ترکڑ دے اُتے ہک لاپے موہلا، قادر بخش دا ہے۔ ہک لاپے رتی کیل مجھ ہے۔ موہلیا! جے انکار کراں تاں تیرے پیو دی قبر نوں پاڑ دیونا ہو یا۔ ایہہ تاں ہک مجھ ہوئی۔ مینوں پُتر وی تیرے اوتوں کو ہوانے پون نا تاں میں ایس توں یالا نہ کراں۔ ایہو کم۔“ اکھے، ”ہا۔“ اکھے، ”ہن اگانہہ رُ آ۔“ پارٹپ گئے۔ گلاں باتاں ہوندیاں رہیاں جیس ایلے کچھلی رات ہوئی نا، مجھیں چھیٹن لگے تاں پُتراں نوں بہاب سد کے آکھیا ہے: رتی کیل مجھ ہے نا جیہڑی ایہہ بگھے اچ ونگ کے لگے جو یائے۔ ایہہ نہ نال لے جو یائے۔ کچھلی راتیں اوہناں مجھیں چھیٹ لئیاں۔

فجر چودھری بہاب اٹھیا ہے اوس مجھ نھوائی ہے۔ گانیاں پائیاں ہن۔ مکھن نال ماکھی ہے۔ مجھ تاں اگے بہوں سوہنی ہائی۔ تصویر چھپ گئی۔ مجھ بہاب چک لئی ہے۔ راء موہلا گھوڑی تے چڑھ بیٹھا ہے۔ ککو دی ماں ہوئی ہے جھنگ، دریا دے لہندیوں، دریا دے کنارے دے اُتے۔ اتنا پیار مجھیں دا ہو یا ہے جوں کچھری اوتھے بنائی ہوئی ہاس جوں مجھیں میری نظر پٹھ رہن۔ اگانہہ آئے ہن تاں سینکڑے مجھیں کھلیاں ہن۔ گُٹو پٹھیاں دے لگن پئے۔ ایہناں آ کے مجھ چھڈ دتی۔ کچھیا ہے، ”مُولراج؟“ اوہناں آکھیا، ”نھاون لگھ گیا ہے۔“ نھا کے ہٹنا مجھیں نوں ہتھ پھیر کے کچھری لاوئی۔ بہاب

آکھیا، ”راء موبلیا! مجھ ہے دپ گئی۔ ہُن تینوں چھوڑے یاں نہ چھوڑے۔ ہُن مجھ سانوں کوئی نہیں دیندا۔ توں اوڈھر ہو جا۔ جے گل جھل لئیوس تاں حاضر ہو جاویں۔ نہ جھلیوس تاں دھروڑ جاویں۔“ راء موبلا اوڈھر ہو کے بہہ رہیا۔ مولراج نکلیا ہے نھا کے۔ چیرا موڈھے تے ہے۔ گلوں ننگا ہے۔ وال چونڈے آوندن۔ جوں مجھیں دے وچ آیا ہے تاں تکلیا پیس تاں ”ہائیں! چودھری بہاب آلی مہیں کاہیں لیاندی ہے۔“ چودھری بہاب اٹھیا ہے۔ اوس آکھیا، ”جی میں آندی ہے۔“ اوس آکھیا، ”چودھری بہاب ہیں؟“ اکھے ”جی ہاں۔“ اکھے، ”تینوں کوئی گر جھ پئی ہوونی ہے۔“ ”نہیں جی۔“ اکھے، ”گر جھ توں سوا توں نہیں ڈگدا۔ میں تینوں مہیں آکھیاں۔ زمین آکھی۔ ہور چیجاں تے توں نہیں سی دتی۔ جواب دے دتا۔ ہُن توڑ لے آیا ہیں۔ کم کراں گا توں گل کر۔“ اوس آکھیا، ”جی اوہ موبلا، قادر بخش دا۔“ مولراج آکھیا، ”آہا۔ پاپی موبلا۔ فسادی موبلا۔ بڑا بُرا آدمی ہے۔ ہر صُح نوں اوہدے خلاف میرے کول تن چار پرچے آوندن۔ نہ آپ وسدا ہے نہ چھماں وسن دیندا ہے۔ اوس سکھ ماریا ہے میرا۔“ اکھے، ”جی کوئی نیسوں۔“ مولراج آکھیا، ”نہیں، نہیں، سنگھنیاں سونوں نہیں کھلو رہیاں۔ ہور جالین گیاں۔ اگر اوہ سنگھ نہ ماردا مہیں کاہیں دینی سی؟“ اتن نوں موہلے آن کے سلام دتا۔ ”موبلا ہیں؟“ اکھے، ”جی آں۔“ مولراج آکھیا، ”میں تیرے نال اوہ کراں ہا، دُنیا نکلے ہا، پر ایس مہیں دا مینوں بڑا شوق سی۔ اگر توں سکھ نہ ماردا مہیں کاہیں دیونی سی۔“ بولیا ہے موبلا۔ اوس آکھیا، ”تہانوں مجھیں دا بڑا شوق ہے۔“ مولراج آکھیا، ”مینوں کیہ شوق سی۔ شوق سی میری ماں بیچاری نوں۔ مر چلی ہے۔ جیس وقت مجھیں اساڈیاں چھڑن ہا۔ اپنے بھوچھن نال چھنڈدی سی تے چھنڈدی چلی جانندی سی دریا دے کنارے تک۔ بہاب آکھیا، ”پیاریاں تاں اساڈیاں نوں وی ہین، پر انج دریا آل بوٹاک انج نہیں نکلدیاں۔ چھیڑو انجیں ہُن ای نہیں دیندے۔“ مولراج کدیا۔ اوس آکھیا،

”گاہلاں کڈھن ڈیہا ہیں۔“ موہلے آکھیا ”نہیں جی اپنی غریبی پیا جنیندا ہے۔ چنگا  
سلام ہے۔“ جیس ویلے راہ دے وچ آئے موہلے آکھیا، ”چاچا ایہہ کیہ کیتوئی؟“ اوس  
آکھیا، ”انجیں مجھ لے جاوے ہا۔ ہاں دی پیڑاساں وی کڈھ چھوڑی ہے۔“

## فتح خاں موتیاں آلا

رنجیت سنگھ دا وزیر اعظم دھیان سنگھ ہويا ہے۔ ایہدا پتر ہیرا سنگھ ہويا ہے۔  
جیہڑی ہیرا منڈی ہے ایہدے ناں تے ہے۔ میں فوٹو وی ڈٹھا ہے اتنا خوبصورت ہا،  
جدوں بچپن وچ ہاتاں رنجیت سنگھ کول سویندا ہا۔ اُنج وی دادکے بھرا ہن۔ ایہہ او سے  
رنجیت سنگھ دی وڑھی دے وچوں ہن۔ فجر پنج سو روپے دیندا ہا رنجیت سنگھ، ہیرے  
سنگھ نوں۔ ایس دھیان سنگھ دو پتریلے بنائے ہوئے ہان۔ شیر خاں پٹھان جنڈاں آلا  
تھل توں تے فتح خاں ٹوانا، ایہہ مٹھیاں ٹوانیاں وچوں ہے۔ دھیان سنگھ دوواں نوں  
پتر سدیندا ہا۔ مڑ بیلپ دے ایہہ سکھ اتنے ترکڑے ہوئے جوں ہیرا سنگھ نوں مہارا جے  
پوشاک دتی ہے، اوہ پوشاک کر کے جیس ویلے ایہناں دے کول آیا ہے تاں دو واری  
فتح خاں موتیاں آلے دے مونہوں نکلیا ہے بھائی، پگ بھائی نوں بڑی ٹھیہڑی ہے۔  
چیرا بھائی نوں بڑا سوہنا پیا لگدا ہے۔ دھیان سنگھ تکیا ہے۔ اوس آکھیا، ”ہیرا سنگھ!  
ایہدے دل لگ گئی ہے۔ پوشاک اُتار دیس۔“ اوہ کجھ اچھکیا۔ اوہ وی گھرو ہا نمانا۔  
ایس دباکے آکھیا ہے، ”اٹھی اے! میں تینوں کہناں پوشاک بھائی نوں اُتار دے۔“  
اوہ اندر وڑ گیا۔ اوس ہور کر کے اِنج کر کے سٹی ہے۔ اوس آکھیا، ”جتھے شیر خاں تے  
فتح خاں ہون، اسیں تے مر جائیے۔“ دھیان سنگھ آکھیا، ”قسم گورو دی توں مروی

جاویں تاں مینوں ایہہ دو کافی ہن۔“

ایہہ فتح خاں موتیاں آلا ایس توں سدیندا ہا، سخی ایڈڑ ہويا ہے، رنجیت سنگھ ہک واری دربار وچ موتی تقسیم کیتے، ایسے نوں ڈھیے۔ ایس موتی وی راہ اللہ دے اُتے دے چھڈے ہان۔ نہیں تاں موتی کسے دے گھر پئے رہن کسے نوں کیہ وے، موتیاں کیہ آکھنا ہے؟ اکھ فلانا لکھ تے نھاتا ہويا ہے۔ لکھ تے نھاتا ہويا اوہ سدیندا ہا، جیہڑا لکھ تے نھا کے اللہ دے راہ اُتے دے چھڈے ہا تاں سدیندا ہا لکھ تے نھاتا ہويا۔

رنجیت سنگھ شادی کیتی سندھو والیاں سکھاں آل۔ سوانی دا ناں چند کور ہويا ہے۔ سندھو والیے طاقت پکڑن لگ پئے۔ ایس دھیان سنگھ نوں حسد آیا۔ ایس ساک دیون ایچ ایہہ تاں ودھدے پین۔ اوس کائی گوڑی یاں سچی ٹہمت لا کے چند کور مروا گھتی۔ اگوں زمانہ آ گیا کھڑک سنگھ دا۔ کھڑک سنگھ پہلی شادی کیتی جیس دے وچوں نوںہال سنگھ ہا، کھڑک سنگھ دا پتر۔ دوئی شادی کھڑک سنگھ سندھو والیاں آل کیتی۔ اوسے چند کور دی بھترئی ہوئی ہے چند کور۔ ایہہ وڈیڑی عمر دا ہا، اوہ نوجوان ہوئی ہے۔ ایہہ رکھدے ہان اک گڈویا۔ اسیں کروا سدیندے ہان تے سکھ گڈوی آہدن، جیہڑا مہاراجے نال رہے ہا دن رات۔ اوہنوں گڈوی بھر دیونی استنجا وغیرہ واسطے۔ ایہہ گڈویا رکھدے ہان سزراں وچ نابالغ۔ طاقت مڑ پکڑی اوہناں سندھو والیاں دربار وچ چند کور دے آون نال۔ سندھو والیے ودھدے جاون۔ اندروں ایہناں نوں حسد تاں ہا۔ کھڑک سنگھ دا گڈویا لکھ پیا ہے انارکلی دے بزار چوں۔ ہیرا سنگھ تے دھیان سنگھ پپو پتر کھلے۔ ایہناں دوواں آکھیا، ”او گڈویا! توں ہُن بالغ ہو گیا ہیں۔ توں ہُن مہاراجے کے گھروں نکل آ۔ توں ہُن رہن دے قابل نہیں۔“ اوہ چُپ کر گیا۔ رات نوں اوس کھڑک سنگھ نوں آکھیا، ”مہاراجیا! مینوں دھیان سنگھ تے ہیرے سنگھ انج آکھیا ہے۔“ اوس آکھیا، ”او! توں چُپ کر۔ توں میرے والاں نال رہویں گا۔“ ایہہ ایہناں

دی بہوں وڈی قسم ہا۔ فجر اوتھوں اوہ گڈویا پیا لگھدا ہے۔ ایہہ دوویں پیو پتر کھلن۔  
دوکاندار آل مُونہہ کر کے گڈویے آ کھیا، ”مہاراجے کہہ دتا ہے کوئی ماں دیاں ٹنگاں  
مرائے پیا توں میرے والاں نال رہویں گا۔“ ایہناں دوواں پیو پتراں ہک دُوئے آل  
تلیا، ایہہ تاں اسانوں گاہل کڈھ گیا ہے۔

صبح دا وقت ہے کھڑک سَنگھ تے گڈویا نکلے ہن قلعے وچوں۔ کھڑک سَنگھ  
پیشاب کرن بیٹھا گڈویا کول کھلا ہے۔ نو نہال سَنگھ، کھڑک سَنگھ دا پتر گبھرو ہویا ہے۔  
ایہہ قلعے چوں اِنج نکلدا ہے پیا۔ اگوں ایہہ دوویں پیو پتر۔ ایہناں آ کھیا نو نہال سَنگھ  
نوں، ”پرسوں اسان اِنج اِنج آ کھیا سی تے ایس گڈویے اسانوں گاہل کڈھی ہے۔“  
اوس آ کھیا، ”بڈھ دیو۔“ اوہ کھلا ہا جوں تلواریں شپ شپ کرن لگ پیاں۔ اوہناں  
ڈھاہ دتا۔ اوہ مری گیا۔ کھڑک سَنگھ بھج کے اندر آ وڑیا۔ اندروں اوس گنڈی چاں  
چاڑھی۔ ساری رات مہارانی چند کور سدیندی رہی، ”مہاراجا جی! بوہا کھولو۔“ فجر اوس  
حال حال چاں گھتی۔ جندرے بھن کے اندر وڑے تاں وکھو نیں مویا پیا ہے۔ جیویں  
اوس آ کھیا ہا میرے والاں نال رہویں گا، اوہ مر گیا۔

جیس ویلے مر گیا تاں ہُن نو نہال سَنگھ اگ لاونی ہائی تے چند کور وی نال  
ساڑنی ہانیں۔ ایہہ ایہناں دی رسم ہے۔ اوس دیہاڑے میاں گل محمد کلیار، وٹے دا  
اوتھائیں لہور ہا۔ ایہہ گل میاں باز میراٹی، مینیں گل محمد دی زبانی کریندا ہا۔ کھڑک سَنگھ  
مر گیا۔ نو نہال سَنگھ اگ لاونی ہا چند کور نوں۔ اعلان ہو گیا بھئی مہاراجے دے نال ایس  
نوں جلاونا ہے۔ اوہ روون کڈھ ڈڑھی۔ اوس آ کھیا، ”اوہنوں رب ماریا ہے مینوں کیوں  
مریندے ہو؟“ حرکت وچ بہرے سَنگھ ہوراں دی ہائی کہ مرے، سڑے تاں سندھو  
والیے گھنڈن۔ وچوں ساک تڑٹ جاوے۔ اِنج پئے لگھدن بھرا اوس دے گلاب سَنگھ  
تے دوئے دا ناں وی کجھ تاں ہا۔ اوہ لگھن تاں دھیان سَنگھ آ کھیا، ”اچھا بھئی مہاراجا

وی مر چلیا۔ اٹکھن ہُن رانی کیہ کرے گی۔ نال جرے گی کہ نہیں؟“ اوہ سُن دے آوعدن۔ رانی نوں اکھیو نیں، ”سڑتوں نال۔“ اوہ نکلے نہیں۔ پوشاکاں تبدیل کر کر باہر سٹے۔ اوہ خیرات ہائی فقیر لوک چالین۔ مڑ پوشاک کرے۔ مڑ شیشیاں اگے پھرے۔ مڑ روندی اوہ پوشاک لاہ کے ہور کرے۔ آدم باہر کھلا ہے۔ بان دے اُتے لاش پئی ہے کھڑک سنگھ دی۔ نال جلنا ہاس۔ انتظاراں ہر ہک نوں۔ آخر کار اوہ نکلی ہے۔ اوس نوں ڈولی دے وچ چایا نیں۔ ڈولی دے وچ بہت سارے روپے رکھے نیں، جیہڑے اوس اپنے اُتوں وار کے سٹھے ہان تے خلقت چاونے ہان۔ اگے بان چڑھیا ہویا سادھ اوس دے چکھے ڈولی پوئیں ہوئی ہے۔ میاں گل محمد کلیار آہدا ہے: جیس ویلے چند کور نیوندی ہائی نا انج روپے چاون کان، زلفاں اوس دیاں ایڈیاں ہان جیویں چوگردوں چن چودھویں دا بدلاں وچ آویندا ہے، انج گھیرا گھتدے ہان وال۔ جیس ویلے اتھے کر کے روپے سٹیندی ہائی تے وال ہتدے ہان تاں انج لگدا ہا جیویں کالے بدل چوں چن نکلیا ہے۔ ایڈی خوبصورت ہا۔ مگروں باہمن ڈھولکا وگائے۔ ”راجا راج کرے پر جا سنگھ وسے۔“ پر جا رعیت نوں سدیندن۔ اوہ رووے وی تے آکھے، ”نہ راجا راج کرے نہ پر جا سنگھ وسے۔ اسیں رب دے مارے نہیں پئے مردے چوڑ سنگھ دے مارے پئے مردے ہاں۔“ نونہال سنگھ نوں چوڑ سنگھ سدے۔ جیس ویلے پچھ دے اُتے آن کے کھلاری نیں نال مردہ پیا ہویا کھڑک سنگھ دا۔ تیل وگایا نیں بالن تے۔ اوس ویلے انج پھریا ہے نونہال سنگھ۔ طواف کیتا سوں۔ چکر لا کے سلام کیتا ہے نونہال سنگھ، ”ماتا جی سلام ہے۔“ قانون ایہناں دا انج ہا کہ اوس مُندری سٹنی ہا تے ایس اگ لاوئی ہا۔ تریکی واری جے مُندری نہ سٹے ہا تاں اوس نوں اپنے دھرم وچوں کڈھ کے چوہڑیاں دے پیش کر دیندے ہان۔ اوس انج چکر کڈھیا ہے تے ”ماتا جی سلام ہے۔“ اوس آکھیا، ”نہ تُوں میرا پُتر ہیں تے نہ میں تیری ماتا تے ایہہ یاد



رکھیں راج توہیں وی نہیں کرنا تے چوڑ سنگھ توں ایڈا ظلم کر رہیا ہیں میرے نال۔ اوہ رب دا ماریا مر گیا ہے تے مینوں دھنگی مریدے ہو۔“ ”نونہال سنگھ مڑ چکر کڈھیا، ”ماتا جی سلام ہے۔“ اوس مڑ ایہا گل آکھی، ”میں رب دی ماری نہیں پئی مردی۔ توہیں چوڑ سنگھ دی ماری پئی مردی ہاں۔ راج توہیں وی کوئی نہیں کرنا۔“ مڑ جیسی ایلے تریئے پھیرے تے آیا ہے تاں بھرا دوویں ساہویں آ چند کور نوں کھلن۔ رو کے آکھیا نیں: چند کور! جیسی ایلے توں چوڑیاں نوں پیش کیتی جاویں گی۔ اساڈے کیہ حال ہون گے۔ انج بھراواں آل ڈٹھا بیس۔ رو کے مُندری سٹی بیس۔ مُندری دا سٹنا اوس اگ لائی۔ میاں گل محمد کلیار آکھدا ہا: کائی اکھ ناہی جیہدے وچ ہنج نہیں آئی۔ کوئی ایڈا غم دا دیہاڑا اوہ ہانا کیا ہندو، کیا مسلمان ہر ہک ڈھاہیں مار کے روند اکھلا ہے۔ ایڈا ظلم ہو یا ہے۔ اگ انج بھڑکی ہے۔ ڈھیر سارے پدھ دے اُتے چھجا قلعے دا ہا، اوس چھجے دے پیٹھ جا کے کُرسی گھستی نیں، نونہال سنگھ دی، گرمی دی وجہ توں۔ ایتھوں پک ولوہنا اٹھیا ہے۔ ولوہنے لمب کڈھ کے اوتھے چھجے نوں اگ لاجھڈی ہے۔ کوئی امکان نہ اوتھے چھجے نوں اگ لگن دا۔ میاں گل محمد کلیار آہدا ہا: اوس دیہاڑے اساں قُدرت خدا دی ڈٹھی ہے۔ چھجے نوں اگ لگ گئی ہے۔ ہک بورا اوتھوں ڈھٹھا ہے سلھاں دا، بیٹھ بیٹھے دی چند نکل گئی ہے۔ اے چند کور سڑدی پئی ہے تاں نونہال سنگھ مر گیا۔ گھبرا گیا ہے۔ گھبرا گیا ہے۔

اوس ویلے ہیرا سنگھ مہاراجے کی فوج لے کے جموں وچوں نکلے اُگاڑن گیا ہویا ہے۔ سندھو والیاں دی فوج ایتھے ہے لہور وچ۔ ایہناں سمجھیا کہ جے آکھے نا مر گیا ہے تاں مت سندھو والیے تخت نوں بٹ ہو جاوے۔ گھبرا گیا ہے۔ بیٹھا اوتھائیں مر گیا ہا۔ اوتھوں راتو رات ہاتھی بھیجیا نیں بھکھر منکیرے۔ شیر سنگھ رنجیت سنگھ دا پُتر اوتھے ہا۔ راتو رات لیاندا نیں ہاتھی تے۔ فجر اعلان کیتا گیا ہے کہ نونہال سنگھ مر گیا

ہے ہن شیر سنگھ دربار لاونا ہے پہلا۔ شیر سنگھ دا پہلا دربار پیا لگدا ہے شالا مار باغ  
 وچ۔ ایتھوں ایہہ تریہیں نکلن قلعے چوں۔ قلعے وچوں نکل کے گھوڑیاں تے اسوار ہو  
 کے دوویں پڑیلے دھیان سنگھ دے نال۔ ہن شیر خاں وی تے فتح خاں موتیاں آلا  
 وی۔ تراہے انج گھوڑے جو لے ٹوریندے ویندن تے ایہہ تکی جاندن شالا مار باغ  
 نوں۔ دربار لگنا ہے۔ ایہہ آدھی راہ دی وچ پہنچن جاں چکے واری توپاں دی دھڑل،  
 دھڑل، دھڑل ہون لگ پئی ہے۔ جاں توپاں چھٹیاں ہن تاں راساں چھک کے کھلو  
 رہیا ہے دھیان سنگھ ”ایہہ کیہ ہو گیا ہے؟“ ایہناں دوواں آکھیا کہ مہاراجے نوں فوج  
 شلکاں دکھا رہی ہوسی۔ چاند ماری کر رہن۔ اوس آکھیا، ”بے وقوفو! میں وزیر اعظم  
 ہاں۔ میرے حکم دے سوا توپاں کیوں چھٹنا ہا۔ اج اساڈی فوج اتھے نہیں۔ سندھو  
 والیے وچ نہ گئے ہوں۔“ وچ دربار دے اوہناں توپاں چلاونیاں شروع کر دتیاں۔  
 شیر سنگھ مری گیا تے اوتھوں بھج پئے دھیان سنگھ آل۔ جیس ویلے اگوں بندے پھٹن  
 تاں اوہناں تکیا ہے کہ گلاب سنگھ ہووے آوندن دھیان سنگھ آل۔ اوہناں  
 اوتھوں لکریا ہے: ”پھنھی اساڈی چند کورکتھے ماری سی؟ ایس آکھیا، ”مہاراجا تاں کم آ  
 ای گیا نا۔“ خوشامد کیتیوس۔ اوہناں آکھیا، ”مہاراجے دیا پڑا! ایس پھنھے ہاں اساڈی  
 پھنھی کتھے ماری سی؟“ اکھے، ”ایتھے ای ماری سی۔“ ہوش اڈ گئی۔ تلواریں شپ شپ  
 کرن لگ پیاں۔ فتح خاں آکھیا، ”شیر خاں وخنج کرے۔“ شیر خاں پٹھان آکھیا، ”اج  
 تائیں پیو سدیا سے۔ پیواں مریں دیاں نوں چھوڑ کے بھجنا تاں حرام دیاں دا کم ہو یا۔“  
 شیر خاں دھڑک چاں ماریا تے اوتھے لڑ کے مری گیا۔

فتح خاں اوتھوں بیڑی ہے تے ایہہ امیر دے کوٹ آ رکیا ہے۔ ”راء امیر بیٹھا  
 ہے؟“ اکھے، ”بیٹھا ہاں۔“ اوس آکھیا، ”ایہہ ایہہ گل ہے۔ مینوں پچھوں سکھاں چکیا  
 ہو یا ہے۔ میں بھکھا وی ہاں نالے مینوں کائی شے کھوا۔ نالے مینوں اپنے علاقے وچوں

وی کڈھ۔“ اوس سیویاں بنوایاں ہن۔ اتنے تائیں راء امیر دا گھوڑا تیار ہو گیا۔ ایہہ نال چڑھ بیٹھا ہے۔ دریا ویہت آلا ٹپ کے جیس ویلے تیتی لغاریاں دے کول گنن تاں اوس ویلے اوس آکھیا، ”رب خوش رکھی۔ میں اپنے علاقے وچ آ گیا ہاں تے توں وگ جا۔“ راء امیر آکھیا، ”ایس گھوڑی دے میں ترپ سُنے ہوؤن۔ دو ترپ وکھینا ہیں؟“ فتح خاں موتیاں آلے آکھیا، ”میں ایہوں ترپ تے اٹھیاں تاں ایس مینوں مٹھیاں ٹوانیاں تیکر ہننے وچ تھاہرن نہیں دیونا۔“ راء امیر آکھیا، ”سٹ پئی پوندی سوں۔ ترائے دریا راوی، چھھاں تے ویہت جھاگی کھلی ہے۔ اے ہنّے دے وچ تھاہرن نہسوں دیونا۔“ اوس ویلے اوس ترپ تے اٹھائی۔ راء امیر آہدا ہا: میں بڑا پچھتانا۔ جتنے تائیں میری نظر پوندی رہی ہے ترپ توں ترپ۔ گھوڑی اوس توں ڈکی نہیں گئی۔ اوہ مٹھیں جا پڑیا۔

جموں دے وچوں فوج لے کے ہیرا سنگھ لہور آ گیا۔ ترائے دیہاڑے تلوار چلی۔ بڑے پٹ دتے سندھو والیاں دے۔ بڑے بندے مارے ہیرے سنگھ۔ ہُن ہیرا سنگھ نک تے رومال رکھ کے لاشاں پھر لوائے۔ ہک بھرا دی لاش تاں مینوں لہھی بے فتح خاں تیری لاش وی لہدی تاں میں مشر و دے کفن پوائیں ہا۔ تیرے جنازے کرائیں ہا۔ تیری قبر بنھائیں ہا۔ رووے۔ اوہوں کسے دسیا، اوہ مٹھیں گیا بیٹھا ہئی۔ اوس اوہوں بندہ گھلیا مولراج آل کہ حملہ کرنا ہئی مٹھیاں تے اوہ پھدھ کے میرے پیش کرنا ہئی۔ ایہہ ماتحت ہان مولراج کے لہور دے۔ اوس ویلے مولراج چھیڑاں سدیاں۔ راء صاحب آل وی بندہ آیا۔ مہر باقر بھروانے آل وی بندہ آیا۔ انجیں آر ول ول بندیاں آل بھئی آؤ۔

ایہہ چھیڑاں لے کے آئے۔ راء صاحب دے نال دو ماچھی ہن۔ دایا حاکما تے دایا رنگا۔ دوویں بھرا ہوؤن۔ مولراج نوں مہر باقر بھروانا آہدا کھلا ہے: وکھ لے

میریاں چھیڑاں وی۔ ون ون دے جوان ہین تے راء صاحب دو چھے ماچھی لے  
آدن۔ ایہناں نوں دینہہ نوں وی کجھ نہیں دسیندا۔ ایہناں لڑنا کیہ ہے تے بندوقاں  
کیہ مارنیاں نیں؟ راء صاحب نوں کسے دسیا مہر باقر انج انج آہدا کھلا ہے۔ اُتوں  
مُولراج آ گیا۔ اوس آ کھیا، ”راء صاحب! ایہناں ماچھیاں کیہ کرنا ہے۔ اکھیں چوں جوں  
دسدا کجھ مینے۔ ایہہ کیہ تپکاں وگیسن؟“ گل اگے وی سُنی بیٹھے ہان۔ راء صاحب  
آ کھیا، ”جی ایکھن اگانہہ لڑائی پوسی یاں نہ پوسی۔ ایہہ پیل ہے تیرا۔ آدن: ادھواڑ وچ  
جھاں ہوئی ہے اوس دی، کچھری آ لے پیل دی۔ مُولراج اتھائیں کچھری لیندا ہا۔  
ایہدے اُتے تاں بھیسے ساگ۔ ساگ دے اُتے چاں مودھا لوٹا رکھیے۔ اتھائیں  
توپکیاں دے نشانے دا پتہ لگ جاسی۔ میرے پتر ہین، توں آہدا ہیں شے کائی نہیں۔  
میرے گھر اچ ترکہ ایہو کجھ ہے۔“ مُولراج آ کھیا، ”بالکل ٹھیک ہے۔“ ساگ دے  
اُتے لوٹا رکھی گیا۔ چوٹی پیل دی دے اُتے ساگ بچھ گئی۔ مہر باقر نوں آ کھیا ہے  
مُولراج، ”وگاؤ تپکاں۔“ اتنیاں تپکاں وگیاں ہن کہ پیل دھوڑتے دھوں وچ نظر ناہی  
آندا۔ لوٹا کھلا۔ اوس ویلے اوہ ہس پیا۔ مُولراج آ کھیا، ”ایہہ برکت تاں وکھ لئی ہے  
ہُن توں اپنے ماچھیاں نوں آکھ راء صاحب۔“ راء صاحب آ کھیا، ”اُٹھنیو او دایا۔  
وگاؤ۔“ حاکما بولیا۔ اوس آ کھیا، ”راء صاحب! لوٹا تاں انجیں سمجھو کہ کھلا ای کوئی نہیں۔  
ایہہ میں پہلی نال ڈھاہنا ہے پر مہر باقر کیاں نوں آکھ اوہ وی وگاؤن۔ نظر نہ لگے۔ لوٹا  
میں ڈھاہ لیاں۔“ راء صاحب آ کھیا، ”میرا ناں کاہیں لینا ہیں۔ اُٹھی اُتانبہ۔“ اکھے،  
”رنگیا! اُٹھینا ہیں میرے نال؟“ اکھے، ”اُٹھینا۔“ اکھے، ”پہلے توں وگا۔“ رنگا جیس  
ایلے جویا ہے تپک تے، بولیا ہے حاکما، اوس آ کھیا، ”تپکاں پٹیاں وگدیاں ہن مُقابلے  
تے جے چک گیائی تاں میں تینوں وگا چھڑنی ہے۔“ اوس وگائی ہے تپک لوٹے دی  
وکی وچ آئی ہے۔ تھلے آ لے پری پھری ہے ساگ تے۔ پھر دی پئی نوں حاکمے

وگائی ہے اوس چالی ہے۔ اوس ویلے مولراج انعام دتن۔

جھنگلوں ٹر کے مٹھیاں جا ویڑھ دتا نین۔ اگوں فتح خاں سگھر کیتا ہے بھی  
میں لڑساں۔ فتح خاں بیلی ہا راء صاحب دا۔ سوتے کول راء صاحب بندہ گھلیا ہے بھی  
جیس تمبو وچ میں ہاں نا ایہدے وچ آ کے میری گل سُن جا۔ فتح خان آیا ہے۔  
”دس۔“ راء صاحب آکھیا، ”لڑنا ہے؟“ اکھے، ”ہاں لڑنا ہے۔“ اوس آکھیا، ”مڑ ایہہ  
بندے مکا لیسیں لہور دی طاقت ختم۔“ اوس آکھیا، ”نہیں چکھے ہور وی نین۔“ اوس  
آکھیا، ”مڑ اوہ آ جا سن۔ توں مکا لیسیں۔ چکھے اوہناں دی طاقت ختم ہو جاسی۔ بھیڑیا۔

بادشاہاں دے نال دلیری، پیش نہ ویسیا

توں ساری قوم تباہ کراؤ ہیں۔ نس جایاں پیش ہو جا۔ لڑ نہیں۔“ چپ کر کے  
اٹھی گیا۔ راء صاحب آکھیا، ”گل میری دل لگ گئی پیسوں۔ نس جاسی۔“ فجر ہم ہم  
ہوئی ہے جوں نس گیا ہے۔

سکھالی مگروں بھیج پی۔ کتیں دے دیہاڑے ہوئیں۔ سخی بہوں ہو یا ہے۔ نال  
اک پرہائیں ہاس گھوڑی تے چڑھیا ہو یا۔ ٹور پور تھل آ بھنویا ہے پیسے لین کان۔ گھنڈ  
کر کے وگیا آ وندا ہے۔ تھلو چن ہک چرنی لے کے کندی بیٹھی ہے۔ پیتاں دی راہی  
بیٹھی ہے۔ اوس آکھیا، ”وے! سردار فتح خاں ہیں موتیاں آلا؟“ اکھے، ”جی ہاں۔“  
اکھے، ”گھنڈ کر کے لگھیا ویندا ہیں۔ میرے تاں بال ترچھے دیہاڑے دے بھکھے  
پیٹھن۔ سخی مرد ہیں خدا دا رب دے نال تے دے۔“ بنجوں پییاں پس۔ میریا اللہ  
زندگی اچ پہلا سوالی ہے جیہوں آکھنا ہے کہ میرے کول تاں شے کائی نہیں۔ میں تاں  
زندگی اچ ایہہ لفظ آکھے ناہن۔ پرہائیں آل پرتیا ہے، ”کائی شے کول ہئی؟“ اوس  
آکھیا، ”اگانہہ ٹریں نا بنج دے بنج کول ہیں۔“ ”بنج ہیں؟“ اکھے، ”نچے دے چھڈ۔“  
اکھے، ”اسیں؟“ اکھے، ”خدا جوں ہے۔“ اوہ کھلو رہیا ایہہ ٹردا رہیا ہے، جیہڑے ایلے

نُور پور تھل آوڑن تاں اوہناں نوں پتہ لگا ہے کہ ایہہ تاں بے خرچ ہے ملنی داناں کر  
 کے جی ایہہ تہاڈے ودے ہان تری دے، کوئی پنج دے جاوے کوئی دو۔ رومال اوس  
 ویلے ہون لے جھکیاں آ لے، اوہدے وچ گھتدا رہیا ہے روک روپے ہان۔ اوتھوں  
 نکلن تے ہک جنڈ پیٹھ بہہ کے آکھیا بیس، ”گن کھاں کتنے ہین؟“ اکھے، ”چار سو۔“  
 اوس آکھیا، ”نہیں گھتھا ہین مُر گن۔“ مُر آکھیوں، ”گھتھا ہین۔“ مُر آپ ویہاں  
 ویہاں دیاں پالیاں لائیوں۔ چار سو نکلیا۔ اکھے، ”پنچواں سو کدے ہے؟“ ”پنچواں  
 کیہا؟“ اکھے، ”جد میں رب دے راہ تے ہک دیواں مینوں خدا سو دیندا ہے۔ اج میں  
 پنج دتے ہین پنچواں سو وچ نہیں۔“ اوس پیر چاں نپے۔ اکھے، ”ہک میں بچا لیا ہائی توڑا  
 ملاجی سہی پر خدا تے تیرے سو دے دا مینوں پتہ نہ۔“ اوس آکھیا، ”جا سورا سو گھٹا چھڈیا  
 ہئی۔“ ایہہ وت بنوں کوہاٹ آ لے قلعے نوں جاوڑن۔ مگروں سکھاں جا کے اوتھے ماریا  
 ہے تے سر آ کے مٹھیں سٹیا نہیں۔

## سختی سوداگر

آہدن: پک سوداگر ہویا ہے۔ اوس نول پتر ڈھیہا۔ اوس داناں اوس سختی سوداگر رکھیا۔ مُڑ اوہنوں پڑھنے پایا۔ جیہڑے ویلے اوہ نوجوان ہو گیا تاں سختی دے پیو دے دل وچ ایہہ رہے لڑکا میرا خوبصورت ہے۔ لائق وی ہے۔ میں شادی ایہدی کراں، جیہڑا گھرانہ میرے آر ہووے، رجیا کجیا، لڑکی ایس آر ہووے۔ ڈھیر بھنویا۔ کدائیں لڑکی اوس آر نہ ہووے گھرانہ وڈا ہووے۔ کدائیں لڑکی ہووے گھرانہ نہ ہووے۔ ہمیشاں اوہنوں تاڑ رہے۔ سوداگری تے اوہ گیا۔ ہنر پورٹھگ بازاں دا ہویا ہے کوئی شہر۔ اوہدے وچ جا اُتریا۔ اوتھوں دے سوداگراں دے نال ملیا۔ سودے سوتر کیتے۔ اوہناں روٹی آکھی۔ اوہ گھلے گئے۔ اگانہہ تکیا ہے۔

پک لڑکی گھر اوس دے، کائی صورت دی تصویر  
بھئی پنج وقت نماز۔ قرآن دی منزل۔ نظر نیویں کر کے ٹرنا۔ ہولوں بولنا۔  
سوداگر سختی دے پیونوں اوہ بہوں پسند آئی۔ گھرانہ وی اوہو جیہا ہے۔ لڑکی وی اوہو جیہی ہے۔ اوس ساک چاں منگیا۔ اوہناں آکھیا، ”دو بندے اساڈے گھر نہیں۔ توں مُڑ آویں۔“ گجھ ہاں ہوگئی۔ گھر آیا ہے۔ سختی وی بیٹھا ہے۔ سوانی نول آکھیا پیس، ایہہ ایہہ گل ہے۔ ایسا ساک ہے تے فلانی تاریخ نول میں جاونا ہے۔ دُعا کریں اُمید ہے

مینوں ساک ڈھی جاسی۔ اوہ وگ گیا۔

سختی دے دل بچ آئی بھئی ایہو کجھ انسان دی عمر ہے۔ مہن پرناؤ ہین۔  
بھلکے میں وی پیو آر ہو جاونا ہے تے اج تائیں پیر میں کوئی نہ پکڑیا بھئی میں راہ اللہ  
رسول دا سکھاں۔ کیوں نہیں کہ میں کوئی پیر پکڑاں۔ پیو اودا اودے گیا۔ سختی ٹر پیا پیر  
پکڑن۔ جیہڑا پیر سنے اودے کول اٹھ پیر رہے۔ اوہنوں تاڑے۔ بندہ علم آلا ہا۔  
کتھائیں پیر جال لائی بیٹھے ہوون رناں نوں، کتھائیں پیر تعویذاں دے پتر دیندے  
بیٹھے ہوون۔ اوہنوں نفرت آوے۔ ایہہ پیری کائی نہیں۔ ڈھیر بھنویا۔ اوس نوں ایہہ  
یقین ہو گیا کہ پیر کامل لہنا ای کوئی نہیں۔ کسے بندے اگے ٹھکھیا۔ اوس آکھیا، ”نہیں  
جیہڑے ایلے دُنیا پک جیہی ہو جاوئی ہے، دُنیا ختم ہو جاوئی ہے۔ اوہ ڈھکی پہاڑ دی  
وہدا پیا ہیں؟“ اکھے، ”ہا۔“ ایہدے پیلے پاسے فقیر ہے۔ اوس نوں جا پرکھ۔“ اگانہ  
گیا ہے لنگر پکدے پین۔ انجیں معلوم کیتا ہے کہ ڈھکی پہاڑ دی وی نُور ہے۔ یقین آ  
گیا ہے کہ پیر کامل ہے۔ اٹھ دیہاڑے رہیا۔ اوہنوں پرکھیندا رہیا۔ عورت نوں اوتھے  
آون دا حکم نہیں۔

ایس آکھیا، ”مینوں مُرید کرو۔“ اوس آکھیا، ”پچیا! نوے ہزار دا پندتا ہے پل  
صراط۔ میں تاں اپنا بھار چا کے لگھ پواں تاں لکھ شیرینی ہے۔ میں دُوئے دا بھار  
کیوں اٹھائیں؟ بڑے بڑے پیر بیٹھے نی دُنیا دے وچ، پکڑ کوئی۔ میں نہیں کرنا۔“  
ایہہ روون کڈھ ڈڑھا ہے۔ ایس آکھیا، ”گل سُن۔ اتنا علاقہ بھیں کے آیا بیٹھا ہاں۔  
تیرے اُتے دل یقین کیتا ہے۔ دن قیامت دے میں تیرا دامن گیر ہوساں کہ  
خداوند! مینوں رب رسول دا راہ ایس نہ دسیا۔“ فقیر آکھیا، ”پچیا! مُڑ تیرے جیہا اگے آیا  
کوئی نہیں۔ پیر وی مُرید کولوں دُنیا منگدا ہے۔ مُرید وی جا کے پیر کولوں دُنیا منگدا  
ہے۔ پک توں بندہ آیا ہیں جیہیں رب رسول دا راہ پچھیا ہے۔ میں مُرید تینوں کریناں



پر شرطیں وچ ہے نی۔“ ”کیہڑی؟“ اکھے، ”بارہاں سال تائیں چو تا قائم کرنا ہئی۔ نماز پڑھنی ہئی۔ اسم ذات یاد کرنا۔ ایہہ ذکر ہئی۔ نفی پکوانا ہئی۔“ نفی اثبات کلمے نوں سدیندن۔ اسم ذات خُدا دا اللہ ای ہے۔ دُونیاں سبھ صفتاں سوں۔ خیال آیا ہے پیو میرا گڈھیں گھتاون گیا ہویا ہے۔ ایہہ آہدا ہے: بارہاں سال دا چو تا قائم کر۔ میں وی ایہنوں ڈھیر تنگ کیتا ہے۔ چلو بارہاں سال تائیں شادی نہ کریاں۔ مُرید ہو گیا۔

اوتھوں ایہہ تڑ پیا ہے۔ دُعائیں منگدا آیا ہے شالا میرا پیو جباب لے کے آوے۔ گھر آیا۔ ماں توں پچھیا، ”پیو؟“ اوس آکھیا، ”بچیا! اوہ اجے تائیں کوئی نہیں آیا۔“ دُوا دیہاڑا ہویا تاں پیو آ گیا۔ ویڑھے وچ وڑدیاں ای اوس آکھیا، ”اونو کراں او! مُبھارک ہے نیں۔ سردار تہاڈے دی فلانے دینہہ دی گڈھ گھتا کے میں آیا کھلا ہاں، جیہڑا خرچ باب ہا اوہ میں حق مہر تائیں تار کے آیا کھلا ہاں۔“ اوہ ڈھول پھلکیندے لگے آئے۔ دھریاں وگن لگ پئیاں۔ ایہہ حیران بھی، میں ہُن کیہ کراں۔ گڈھیں نیڑے آوندیاں جاندیاں۔ ایہہ خیال کرے بھئی میں شادی کراں، اودوں پیر آلوں گُوڑا ہوندا ہاں۔ نہ کراں، جباب دیواں تاں پیو آلوں گُوڑا ہوندا ہاں۔ اخیر ایہہ صلاح بنائی بھئی پرنا لے آوندا ہاں۔ سچ آلی راتیں نس ویساں۔ مُر میری ہو کے بیٹھی رہسی۔ بارہاں سال کٹ کے آوڑساں۔ جنج چڑھی۔ ہُنر پور ٹھگ بازاں دے جا ڈھکی۔ اوہناں داج دان دتے۔ گُڑی پرنا کے گھر لیاندی۔ ایس فقیری لباس اگے بنا کے رکھیا ہویا ہا۔ رات سچ دی ہے ایہہ فقیری لباس پیندا تے اللہ تیری یاری۔ وَہندا رہیا۔ فجر نوکریں آئیاں۔ گُڑی نوں آکھیا، ”گرم پانی تیار ہے۔ اٹھی نھا۔“ اوس آکھیا، ”ساری رات خُدا دی کوئی کھڑک آیا ہے، میں اٹھی بیٹھی ہاں بھئی مت انج نہ جانے گدھی نال میری شادی ہوئی ہے۔ میں خاوند ڈٹھا ہی نہیں۔ میں نھاونا کیہ ہے؟“

سارے شہرچ گل ہُم ہُم ہو پئی۔ سوداگر دا لڑکا بیمار ہانس گیا ہے۔ سس، سوہرے اوہدا

ناں ”کڑمی“ چاں رکھیا بھئی پُتر دا مُونہہ پئے ویہدے ہاسے، کڑمی آئی ہے تاں اوہ وی  
 ویندا رہیا ہے۔ مگروں اوہدے پیکے آئے۔ کڑی ساری گل سُنائی۔ اوہ لڑ بھڑ کے،  
 حساب کر کے لے کے و ہندے رہے۔

سنی سوداگر جیس شہر چ جاوے عورتاں مگر ٹر پون۔ ایہہ آٹا شائٹا، ٹلر شکر منگ  
 کے جنگل اچ جا رہے یاں کسے گستان چ۔ ابادی اچ رہے ہی نہیں۔ بارہاں سال  
 کٹ کے ایہہ پپر کول گیا۔ پپر نوں جا کے آکھیا، ”میں آیا بیٹھاں ہاں بارہاں سال  
 کٹ کے۔“ اوس آکھیا، ”وُو کر۔“ وُو کیتا ہے۔ پپر مراقبے اچ بہہ رہیا۔ مراقبے اچ  
 پپر نوں اواز آیا، ایہہ اِنج ہے جیویں ماں دے عُذر چوں اِنج نکلیا ہے۔ ہٹ کے پپر  
 ہتھ پھیریا، ”شابش پچیا۔“ پپر دے اگے رو پیا۔ ایس آکھیا، ”جی بھار مینوں ایڈا چاں  
 چو پوئے۔ میں اِنج پرنی کے آیوم تے نس آیوم۔ بھین بھرا میرا کوئی نہیں۔ ماں پیو بڈھا  
 ہے۔ اوس عورت گلی گلی دے وچ میری عزت دھریکی ہوونی ہے۔ میں تاں گھر جاوَن  
 جوگا وی کجھ نہیں۔“ اوس آکھیا، ”پچیا! گل سُن جیہڑا اللہ واسطے اِنج کریندا ہے نا خُدا  
 اوس دی بے عزتی کدی نہیں کیتی۔ تُوں ایہہ یقین رکھ تیری عورت بدماشی نہیں کیتی  
 ہوونی۔ خُدا خود حافظ ہوندا ہے اپنے پیاریاں دا۔ کسے پیارے دی رب ایہہ بے عزتی  
 نہیں کرائی۔“

سوداگر اٹھیا ہے اوتھوں۔ دل اچ ایہہ وے گھر میں کوئی نہیں جاوَن، جتھے ساہ  
 مگ گئے۔ دُنیا چ پھر دا رہساں۔ کیوں کہ میں جاوَن ہے تاں میں ایہہ گل سُننی ہے کہ  
 عورت تیری ایہہ کار کیتی ہے۔ ٹر پیا۔ ٹر دا ٹر دا پندا منگدا بک شہر چ آ وڑیا ہے۔ گرمی  
 دا موسم ہے۔ ہاں بڑا کاہلا پیا ہے۔ سیک ہے۔ کسے شخص نوں آکھیا ہے بھئی میں نھاوَن  
 ہا۔ دل ہا نھاوَن کان تے کائی چھاں وی ہوندی۔ اوس آکھیا، ”چھائیں وی گھراں چ  
 ہویاں۔ تینوں کاہیں نھاوَن دیونا ہے۔ اِنج لہندے لے آلی چنڈ تے نکل جا۔ باگ

آلاکھوہ ہئی۔ باگ ٹھٹھا ہويا ہے۔ کھوہ و ہندا ہے۔ اوتھے نھا وی سگدا ہیں تے چھاں وی ہئی۔“ اگانہہ گیا ہے تاں دُھپ ایسی ہائی جوں پہلیاں چھاؤں دے بیٹھ ہی جا کے بہہ رہیا ہے۔ لڑکا پک لگھیا ویندا ہا۔ اوس نوں آکھیا ہے، ”پانی دا پک لوٹا دے۔“ اوس آن دتا۔ ایس گودڑی وچھائی۔ جمیل اُتے انج (تھہ دا اشارہ) موڈھی کیتی ہے۔ کنیں ٹکر باجرے دے ہین۔ کنیں ٹکر سوانک دے نیں۔ کنیں منڈوہے دے۔ کوئی کنک دا۔ ایہہ اوہناں دے نال سُرک کے کھاون لگ پیا ہے۔ خیال آیا ہے ایہہ حالت میری ماں وکھے اوہدا کلنیا پھٹ جاونا ہے، پر حمد ہے اللہ تعالیٰ دی۔ کم چنگے انج لگا ہويا ہاں۔

ایہہ سیں گیا ہے۔ کھڑک سوٹے دا سندا رہیا ہے بھئی کائی عورت اولوں دے اُتے کپڑے دھورہی ہے۔ سیں کے ایہہ اُٹھیا ہے۔ جوں تکیا ہے ناکہ عورت اتنی خوبصورت ہے و بہدیاں نال ہی فقیری گھزل ہوگئی۔ ایہہ لاجول ولا پڑھن لگ پیا۔ ہور جیہڑا کچھ پیر سمجھایا ہا۔ جوں سیت ہے تاں دل دھرکیندا جاندا ہے۔ آکھیوں: چلو مُڑ توبہ کر لیسائیں۔ میں بولیناں ہاں ایس نوں۔ عورت کپڑے شپڑے سارے سگنے گھتے ہین۔ آپ نھاون دی تیاری انج اوتھے آ بیٹھی ہے۔ ادھر ونجا اوس کیتا ہويا ہے پک چادر دا۔ فقیر لگا آیا ہے۔ آ کے دُوئے لاہے اولوں دے اوہ وی بہہ رہیا ہے۔ عورت خیال کیتا ہے، بیگانا مرد ہے اوس انج (بسر دا اشارہ) بیٹھاں جھٹکا لیا ہے۔ زلفاں جیہڑیاں ہین اوہناں چوگردوں ول لیا ہے جیویں چن چودھویں دا بدل بیٹھ آویندا ہے۔ مُونہہ وی اوس لکا لیا۔ ایہہ بہہ رہیا ہے۔ ایہہ لگ پیا ریت مارن دنداں دے اُتے کچھ کچھ۔ وجہ کیہ ہے عورت تنگ آ کے مینوں بلائے نا تاں مُڑ میں بولیاں۔ کائی گل کر لسی تاں میں ولدا دیاں ایس نوں۔ عورت خیال کیتا ہے پتہ نہیں کیتے تاں ایہہ بیٹھا رہسی۔ بیگانا مرد ہے میں کیوں بلائیں۔ اتنے تاں پیراں دی میل میں لاہ لہیں۔ اوس پک سُر چا بنایا ہے۔ اوہ گٹا ملن لگ پئی ہے تاں فقیر بولیا ہے۔ اوس

آکھیا:

ترور پیر پکھاوسی، مت نیور گھس جا  
جیس کنتھ دی تُوں ہیں کامنی، اوہدے کیکن رہے وِہا  
عورت نوں خیال آیا ہے فقیر اللہ دا ہے۔ مت میرے حق اِنج دُعا چاں کرے۔ میرا گھر  
آباد ہو جاوے۔ عورت اِنج کر کے وال چکھا نہہ سٹے ہین۔ اوس آکھیا:  
کنتھ میرا مُسافر ی، پنج کھٹے دس کھا  
بیل وانگوں اوہ پیٹ بھرے، اوہدیاں سُنتیاں رین وِہا  
مینوں تاں اوس چکھیا ای کدی نہیں۔ فقیر سمجھیا ہے گھروں تھوڑگی ہوئی ہے۔ ایہہ آوندی  
ہے۔ فقیر آکھیا ہے:

سونے وِج مڑھاوساں، رُپا مُول نہ انگ  
گدھے کنتھ نوں چھوڑ دے، چل ہمارے سنگ  
اوس آکھیا، ”فقیر! میں سمجھیا ہا فقیر اللہ دا ہوں۔ مینوں ایہہ پتہ نہ شیطان لھئیٹیا ہويا  
ہیں۔

من مُنڈیا تے مُونہہ ملوانا، دِلوں خوردہ ہے راگ دا  
باقندہ بردہ نخریاں، کیہ رستہ جانے باگ دا  
میں تینوں فقیر سمجھ کے آکھیا ہا، میرے حق اِنج دُعا کریسیں۔ توں آپ تیار ہويا بیٹھا  
ہیں۔“

جل وِج ڈیوا جے بلے، دھرت اچھٹی ہو  
ماں اسانوں وت جائے، میں تاں تُمہاری ہو  
فقیر بولیا ہے:

دھرم شرم گوا کے، ہُن پنچھی بھسے اُڑند

اُٹھ گڑیئے دکھا چاں، کتھے ہمارا رند  
 ”میں تاں اپنا ایمان و نجائی بیٹھا ہاں۔ میں ہُن ویناں۔ مینوں راہ دس چاں۔“ وجہ کیہ  
 ہے بھئی ایہہ اُٹھسی میں ایہدا جُتھ ویکھساں۔ عورت آکھیا ہے:  
 ہتھ کراں میرے کُج دسیوں، اُٹھ کھلواں تاں سارا انگ  
 دتھے سکولی لڑکے کھیڈن، اوہ تمہارا ہے رند  
 نہ اُٹھی کے دھینی ہاں نہ ہتھ اُتاناہہ کرینی ہاں۔ ہتھ اُتاناہہ کراں سببہ ننگا ہوندا ہے۔  
 ایہہ ٹر پیا ہے۔ نک وڈھیکن آوندا ویندا ہے۔ جا بُریا! بارہاں سال خُدا تے  
 نیک چاڑھی رکھی ہا۔ پکو لحظہ امتحان دا آیا ہئی۔ ہر شے کھڑا بیٹھا ہیں۔ ٹر پیا ہے۔  
 لڑکے سکولی کھیڈ دے وِدن۔ اوہناں نوں سلام دتا ہے۔ چُھیا ہے، ”ایس شہر دا ناں کیہ  
 ہے؟“ اوہناں آکھیا، ”ہنر پور ٹھگ بازاراں دا۔“ ”او تیرا بھلا ہووے ایہہ تاں میرا  
 ساہورا شہر ہے۔“ اوہناں آکھیا، ”سر گلڑ آر مُنیا ہویا ہے۔ سوہریا توں اساڈا جوانی  
 کدوں ہیں؟“ اوس آکھیا، ”نہیں میں سخی سوداگر ہاں۔“ ”اوہ نسوکل جیہڈانس گیا ہا۔“  
 اکھے، ”ہا۔“ ”ایہہ تیرا سالا کھلا ہے۔“ سالا اگانہہ ہویا ہے۔ ملیا، ”چل بھایا گھر  
 چلیے۔“ ٹر پئے۔ راہ دے وِج سالاے نوں پکا کے تکیا ہے۔ تھن اوہدے وڈے۔ نک  
 بھر ڈکن۔ اکھیں جیویں کدھاں وِج گھکے ہونداں۔ متھا کوئی نہ۔ کالے رنگ دا۔ ٹھڈھا  
 ساہ بھریوس، آکھیوس:

کالے کالے کبیرے کالے جیس کے نین

جیسا دیکھیا سالا، تہی سالا کی بھین

گڑی دے وی ڈنگ نکلے ہوونے ہن ایسے آر۔ لڑکا کھلو رہیا۔ اوس آکھیا:

اُچیا لمیا گھبر وَا دِناہیں نین ملوک

آپو اپنی ذاتیں نین تے قادر دے ہتھ ڈور

ایہہ ضروری نہیں۔ ایہہ بک ہتھ ہے تے پنج انگلیں ہین۔ آپو آپ شکل ہے۔ ایس ہتھ پھیریا بھئی دانا تاں معلوم ہوندے او۔ ایہہ گھر لے گیا ہے۔ اگانہ گیا ہے تاں سس چرخہ پئی کتدی ہے۔ سوہرا وان بیٹھا وٹیندا ہے۔ لڑکے آکھیا، ”ایہہ سخی سوداگر جوائی ہے اساڈا۔“ سوہرے ہتھ پھیریا۔ سس ارک پھیری ہے تے ہونگ وی نکل گئی۔ سسوں کاوڑیاں ہویاں ہون نا تاں ارک پھیریندیاں ہین پونی آلی۔

خیر بہہ رہیا۔ ڈھیر ڈھل ہوئی تاں تکیا ہے اوہو عورت جیہدے نال جھگڑا لائی رکھیا ہا۔ کپڑے شپڑے سکے تاں اوہ آگئی۔ ویرھے آلیاں آکھیا، ”مٹھارک ہووی اج تاں آیا بیٹھا ہے۔“ جوں اوس بھیں کے تکیا تاں اوس آکھیا، ”ایہہ تاں اوہو حضرت ہے جیہدا ہن تاں گھلدا رہیا۔“ ہس پئی۔ ایس وی پکا کے تکی کہ ایہہ تاں عورت ہے میری۔ رات ہوگئی۔ ایہہ بیٹھا مکان دے وچ۔ بھکھ وڈی وڈھیا ہويا۔ دل وچ آکھے اتنا زور نہ لین ہا۔ کوئی ٹکر دے چھوڑین ہا بھئی کھانے پئے پکیندن۔ تاں جے عورت ایہدی روٹی لے کے آگئی۔ تکیا ہے تاں منڈو ہے دامن ہے اُتے ساگ رکھیا ہويا ہے۔ جیویں نقشے اُتے ٹون (ن) چھکی کھلوتی ہوندی ہے۔ اوس آکھیا، ”ایہہ لا۔“ ایس آکھیا، ”بارھاں سال دے بعد آیا ہاں۔ تیرے پیکے ایڈے ٹلجے ہین جوں ایہہ روٹی میرے کان۔“ اوہ رو پئی۔ اوس آکھیا، ”بھرا وڈے وکھرے ہو گئے۔ قرضے اتنے اسا تھے ہو گئے، جائیداد اساڈی چلی گئی۔ دیہاڑے نہ رہے۔ ایہہ پرایا مکان ہے، جیس وچ اسیں رہے ہوئے ہاں۔ جیس ویلے دا توں آیا ہیں پیو میرا شہر اج بھجن لگا ہويا ہے۔ ایہہ کدوں پڑوپی منڈو ہے دے آٹے دی جھلی سوں جیہڑی تیری روٹی پکائی ہے تے اساں ساگ تے گزارہ کیتا ہے۔ بھیریا، بارھاں سالوں دے بعد جوں آیا ہاؤں۔ کھٹ کے میری تلی تے رکھیا کیہ ہی جوں ہن اُلا ہے دینا ہیں۔“ سوداگر آکھیا، ”روٹی اُٹھالے۔ تیرے ہتھ دی میں اوس دینہ کھاوساں جیس دینہ کھٹ کے تیری تلی تے

رکھساں۔ میرے واسطے حرام ہے۔ میں نہیں کھاؤنی۔“ پکو جیڑیاں نوں سدّ لے آندوس  
 اوہناں منٹناں ماجرے کیتے۔ اوس آکھیا، ”تسیں لے آؤ کھالساں۔ میں ایں دے ہتھ  
 دی کھاؤنی ہے جیس دیہاڑے کھٹ کے ایہدی تلی تے رکھنا ہے۔“

دوویں پئے آپو آپ منجیاں تے۔ پڈھڑ پک آن کے بُوہے دے وچ بہہ  
 رہی بھئی ایہہ بارہاں سال دے بعد کڑی گھبر و لاثانی بین۔ بہوں رات گزر گئی۔ نہ  
 سوداگر اوس نوں بلایا نہ اوس، اوس نوں بلایا۔ پڈھڑ باہروں بولی:

نہ کھٹ بولے نہ زیور کا چھنکار

میں جانی ہاں تسیں دوویں جنے پنوار

سوداگر آکھیا، ”توہیں ہصہ وٹنا ہے تاں لگھ آ۔ مال اساڈا ہے تے دھی آویے دھیان  
 تیرا ہے۔“ ”ہائے ہائے کیڈا بے حیا ہے۔“ اوہ وگ گئی۔

فجر سوداگر پیا۔ عورت منٹناں کرن لگ پئی۔ جنڈ پکس دے پڈھ آکے کھلو  
 رہے، ”اگے ویکھیا ہو یا تینوں نہ۔ ویکھیا تے بے صبری ہو گئی۔ نہ وچ۔“

دُعا سلام دیونے، میرے یار پورایت نوں

کھیاں دیاں جا کے ملیاں، بھٹھ راوی دے دیس نوں

سوداگر آکھیا، ”نہیں میں ویندا ہاں۔“ ”ویندا ہیں؟“ اکھے، ”ہا۔“ ”آوسیں  
 کدوں؟“ اکھے، ”اجو کے دیہاڑے۔“ اوس آکھیا، ”پک اجو کا دیہاڑا ہوندا ہے اٹھواں  
 دیہاڑا۔ پک ہوندا ہے سال نوں۔ توں کدوں آوسیں؟“ اوس آکھیا، ”میں سال نوں  
 آوساں۔“ ”کیہڑے ویلے؟“ اکھے، ”اج دے دیہاڑے دوپہر نہ ڈھلن دیاں۔  
 میں آ جاساں۔“ اوس آکھیا، ”ہن میری وی سُن لا۔ اج دے دیہاڑے توں نہ  
 آوسیں۔ میں جاننا ہیں مر گیا ہے۔ میں جلدی پنچہ دے وچ سڑ کے مر جاساؤں۔ ایہہ  
 گل یاد رکھیں تے ہن اللہ نوں سوچیا ہیں۔ جا۔“ سوداگر داڑھی تے ہتھ ماریا ہے۔ اوس

آکھیا، ”سچ دی لتھی ہے۔ دینہہ میں ڈھلن نہ دیساں۔“ ”جا۔“ اوس آکھیا۔

جا جانا ہیں ہور بنائے نی

ساڈی لگی پریت دے گھاٹے کبھڑے آئے نی

اٹھاں واگنوں بھار چوائے نی

اوس ویلے شاہیاں چھوٹیاں ہوئیاں ہین۔ پک نگری دے وچ آکے اعلان  
کیتا ہے کہ میں تعلیم دے سکنا ہاں۔ جے کسے پڑھنا ہووے۔ اوس شہر دے بادشاہ سدیا  
ہے۔ اوس آکھیا، ”میرے دولڑکے ہین۔ ایہناں نوں پڑھا۔ اتنی تنخواہ۔ منجی کپڑا، ستر  
مکان نوکر ایہہ میرے ذمے ہے۔“ ہور وی پڑھاون لگ پئے۔ اوہ وی پیسے دیون لگ  
پئے۔ عزت ایس دی اتنی بادشاہ دے دربار وچ، آوے سنے بادشاہ ہر کوئی اٹھی  
کھلووے، اُستاد آگیا ہے۔ ایہناں خوشیاں دے وچ آکے اوہ یاد ای نہ رہے۔ بیٹھا  
ہے مدرسے دے وچ تاں تلاں ہا نال۔ عورتاں ساریاں کپڑے دھوون لگ پئیاں۔  
ایس چُکھیا، ”مائی، اج سارا شہر کپڑے دھوندا ہے۔ کیہ وجہ ہے؟“ اوہناں آکھیا، ”پرسوں  
لوہی ہے۔“ ایہہ لوہی دا کارا کر آیا ہا بھئی لوہی آلے دیہاڑے میں آ جاساں۔ دوپہر  
نہ ڈھلن دیساں۔ ”لوہی پرسوں ہے؟“ اکھے، ”ہا۔“ جوں دھیان ماریا ہے پدھنوں:

کنیں ہزار کوہاں دا پینڈا، گھوڑا پل وچ جاندا

چوتھا طبق زمین دا آکھن، ہیگا مُلک دیاں دا

ایس یقین کیتا ہے کہ میں اپڑ سگدا ہی نہیں تے اوہ سڑکے مر جاسی۔ ایس  
روونا شروع کر دتا ہے۔ بھنے لڑکے اُستاد جی کیہ ہے نیں؟ پک پک دھچھ ماری ہے۔  
ہے تْساڈی ایسی تپسی۔ گل بادشاہ تے پہنچی بھئی اُستاد مردا ہے رو رو کے تے گل وی  
نہیں دسیندا۔

بادشاہ بلایا ہے۔ بادشاہ آکھیا، ”مرض ہئی تاں علاج کریناں۔ کسے تینوں ڈکھ



دتا ہے تاں اوہنوں سزا کریںاں۔ کائی شے کھڑی ہا تاں میں گھروں پوری کریںاں۔  
کسے عورت تے دل ہی تاں دس چاں۔ میں اپنا ترلا کریںاں۔“ سوداگر رو پیا ہے۔  
اوس آکھیا، ”ایہناں گلاں وچوں گل کائی نہیں۔ توں بن کے کچھنا پیا ہیں پیو۔ میرا حق  
ہے دسنا۔“ اوس ساری کہانی سُنائی۔ ایہہ ایہہ کار میرے نال ہے تے اوس سڑ کے مر  
جاونا ہے۔ اوس آکھیا، ”اُستاد، دل تاں اِنج پیا آہدا ہے بھی میں جلا دناوں حکم  
دیواں۔ تینوں پیراں آلوں نکلن لگے۔ او ظالما! توہیں کیہ اُستاد بننا ہیں جیہدی اپنی ایہہ  
حالت ہے، پر مینوں اوس لڑکی دا ارمان پیا لگد ہے۔ اوہ نہ جل کے مر جاوے۔“  
بادشاہ اکھ کیتا ہے۔ اوس آکھیا، ”بھی ہنر پور ٹھگ بازاں دا کوئی جاندے  
ہو؟“ اوہناں آکھیا، ”جی اسیں تاں ناں اِنج پئے سُن دے ہاں۔“ بادشاہ آکھیا، ”اتھے  
اوٹھی لتھے پین۔“ اوس ویلے ایہہ اوٹھی خانہ بدوش سدیندے ہانن بھی گھر موڈھے تے۔  
”ایہناں دے سارے مرداں نوں لے آؤ۔ گرفتار کرو۔“ اوٹھی آگئے۔ آدھی اسمان دی  
تائیں ڈھاہنگے ہتھ اِنج تے پلپیاں دے اُتے دھو دھو اڑانگڑے پئے ہوئے۔ وحشی لوگ  
ہان۔ بادشاہ کچھیا، ”بھی دیس پردیس پھر دے ہو۔ ہنر پور ٹھگ بازاں دا کوئی  
جاندے ہو؟“ اوہناں آکھیا، ”جی کنیں واری بھار اوٹھوں لدے ہین۔ کنیں واری بھار  
اوٹھے سٹے ہین۔ اساڈے بال وی جاندن۔“ بادشاہ آکھیا، ”شباباش۔ کسے دا ایسا اٹھ  
وی ہے نیں بھی جیہڑا ایس نوں پرسوں تائیں دوپہریں ہنر پور ٹھگ بازاں دے سٹے  
تے اٹھ دی قیمت جیہڑی ہے میں دیناں۔“ اوہناں آکھیا، ”جی کوئی نہیں۔“ بادشاہ حکم  
دتا، ایہناں ساریاں نوں ڈھکو جیہل اِنج۔ مال ایہناں دا خزانے داخل کرو۔ اوٹھیاں  
آکھیا، ”وجہ؟“ اکھے، ”وجہ ایہہ وے بھی تسیں اوہ بندے ہو نہ کسے دا جنازہ پڑھنا نہ  
کسے دا قینا آکھنا۔ کوئی راہ اُتے بھار سٹی کھلا ہووے تاں تاساں چوایا کدی نہیں۔ کم دا  
رُکھ تاساں چھوڑیا کدی نہیں۔ تہاڈے دُنیا وِچ رہن دا فائدہ تاں کوئی نہیں۔ جیہیں ویلے

ہر شے ڈھکن لگے اوس ویلے پک بڈھا جیہا اوٹھی بولیا۔ اوس آکھیا، ”جی میرا ماہرا ہے۔ پڑ میتھے کوئی نہیں۔ میں پتر بنا کے اوہنوں سانھیا ہويا ہے۔ مر اوس اُنج دی جاونا ہے جے تئیں ڈھکوتاں۔ توڑا ایہدے کم آ جاوے۔ مُونہ منگی رقم میں لے لیاں۔ پرسوں دوپہراں تائیں ایہنوں ہنر پور ٹھگ بازاں دے نہ سٹے موت سزا مینوں۔“ بادشاہ آکھیا، ”اٹھ لے آ۔“ جیہڑے ویلے اٹھ آن کے کچھری بچ کھلاریا ہے۔ ہر انسان دے مُونہوں حمد خُدا دی نکلی ہے۔ واہ میریا اللہ جے جانورنوں وی جے صورت دیون تے آویں تاں کیہڑی گل ہے۔ جیہڑی رقم منگی اوٹھی اوس دے چھڈی۔

اٹھ اوس بہایا ہے۔ ایس ماری پلاکی۔ اٹھ دے اُتے چڑھ گیا ہے۔ اوٹھی ایہدا گھر ژا نپ کے ماریا۔ کنڈ آ گئی۔ بادشاہ آکھیا، ”اُستاد نال ایہہ کیہ کیتا ہی؟“ اوس آکھیا، ”اُستاد تاں ہے پر آپ بے اُستادا ہے۔ ونجنا ایس اوتھے ہے۔ نہ میتھوں راہ چُکھیا ہے نہ اٹھ دی چال کچھی سوں۔ اِنج چڑھیا ہے جیویں اتھے دوپرا کرنا ہے۔“ بادشاہ آکھیا، ”ہلا دس۔“ اوس آکھیا، ”جی دو کپیاں شراب برانڈی ہووے۔ دو سیجاں کباب مچھی ہووے۔ ایہہ چڑھ ہے۔ جیس ویلے میرے اٹھ رفتار پوری کرنی ہے۔ ایہدیاں اکھیں چوں پانی نہیں کھلوونا۔ کھوپے دار عینک ایہدیاں اکھیں تے ہووے۔ گلے بند ایس دا کوٹ ہووے۔ جراباں ایہدے پیریں ہوون۔ ایہہ پہاڑ دی لیہہ لے لوے۔ اٹھ میرے دا جیس ویلے قدم ڈھلا ہوون لگے ایہہ پک کباب چھک کے شراب بچ سے کے اٹھ آل کرے۔ اٹھ میرا پلّیا ہويا ہے لے لیسے۔ جیہڑے ویلے جانے پسلیاں آلوں ساہ پیا نکلدا ہے۔ پک کباب چھک کے شراب بچ سے کے آپ کھا چھوڑے۔ جیس ویلے ایہہ دوویں چیزاں مک جاون۔ ایہہ کھبے پاسے بھیں آوے۔ جیہڑے ویلے اٹھ میرا کھلو جاوے۔ ایہہ یقین کرے کہ میں ہنر پور اِنج پتچ گیا ہاں۔“

اوس ویلے ہر چیز دتی گئی۔ ایہہ چڑھ بیٹھا۔ اُٹھ جیہڑے ایلے رفتار پوری  
 کییتی ہے۔ سوداگر انجیں جاندا ہے کہ درخت میرے آل بھجڑے آوعدن۔ جیہڑے  
 ویلے اُٹھ دا قدم ڈھلا ہون لگے۔ ایہہ پک کباب اوس نوں کھوا چھڈے۔ پک آپ  
 کھا چھڈے۔ پہاڑ مک گیا ہے۔ ایہہ کھبے پاسے بھیں آیا ہے۔ تکیا ہے تاں شہر دا نام  
 نشان وی کوئی نہ۔ دل اچ گالیں کڈھدا ہے۔ بڑا دھوکھا کیتا بیس۔ گھوہ و ہندا ہے۔  
 اوس دے اُتے آن کے اُٹھ ڈکیا بیس۔ اٹھی آکھیا با جییں ایلے لہن لگیں اُٹھ نوں ہُش  
 ہُش نہ کرے۔ کھلے اُٹھ توں کسے بندے نوں آکھے، مینوں چا کے لہا۔ کیوں، اُٹھ آگا  
 نوادنا ہے پچھوئیں جند نکل جاوئی ہے۔ مت اُٹھ ایہدے اُتے نہ ڈھے۔ ایہہ آپ نہ  
 مر جاوے۔

اوہ گھوہ تے آیا ہے۔ گدھیال نوں بچھایا ہے۔ سلام دیون کان ارادہ کیتا  
 ہے۔ رگاں آکھیا پرسوں دیاں اسیں بند ہاں۔ اوس نوں اشارہ کیتا ہے۔ مینوں پانی  
 پیو۔ اوس لوٹا پانی دا بھر دتا ہے۔ ایس دو گھٹ بھرے، رگاں تر ہوئیاں۔ ”سلاما لیکم۔“  
 ”ولیکم۔“ اوس آکھیا، ”ہنر پور ٹھگ بازاں دا ایتھوں کتنا پدھ ہے؟“ اوس آکھیا، ”ایہہ  
 باگ ویہدا پیا ہیں۔“ اکھے، ”ہا۔“ ایہہ باگ آلا گھوہ اوہ شہر دا ہے مگر باگ دے  
 شہر کھلا ہے۔“ اوس ویلے یاد آیا ہے ایہہ اوہا تھاہر ہے جتھے میں سوئی نال جھگڑا کیتا ہا۔  
 ایس آکھیا، ”ہن پک گل کر۔ مینوں چا کے لہا۔“ جٹ اوّل سوال مندا نہیں جے منے  
 تاں اپنا گوڑ وچ لیندا ہے۔ جٹ نیپیاں مہاراں ”ہُش ہُش۔“ اوس نماںے مسیں پیر  
 رکاباں چوں پھکے۔ اُٹھ آگا نوایا۔ پچھوں سوداگر کھلے آرچی کے دور جا ڈھٹھا۔ اُٹھ  
 ڈھٹھا مر گیا۔ ”ہن پک گل میری من۔ دہ روپے لے لے۔ میتھوں رکلیندا نہیں۔ ایس  
 شہر اچ جا دس نخی سوداگر آ گیا ہے۔ سوداگراں دے گھر دس۔“ اوس آکھیا، ”میں انجیں  
 چاں کراں ہا۔ ایہہ ڈھکے کھلو جاوے ہن۔“ اوس آکھیا، ”گاڈھی تے مینوں چاں بہا۔“

توں جا،“ دہ پھک لے۔ چا کے اوس بہایا۔ اکھے، ”باہری نون رولی آویں۔ آندری نون ٹٹا پوچھل دیویں۔“ اوہ وگ گیا۔ گھر جا کے سوانی نون آکھیوس، ”ایہہ دہ روپے نی۔ پک روکھل جھل گئی ہاتے ڈھی یہاوے دیئے، میں ساری رات دا ماریا ہويا ہوں تے ایہہ بوبھنواتے میں سونا ہاں۔“

گادھی دے اُتے اوہ بیٹھا۔ اوہدا شہر آل مُونہہ۔ دیکھے جدے ہندو سڑدے ہان مخلوقاں اودے بھجدرین۔ ایہہ حیران ہے کہ میں کیہ کراں۔ تاں جوں پک ماچھی انج لگھ پیا۔ اوہنوں ایس سدیا۔ ایس آکھیا، ”ایہہ کیہ ہوندا ہے پیا۔ آدم پکے اُرانہہ بھجدا ہے پکے پرانہہ۔“ اوس آکھیا، ”بھانیا! کیہ پچھنا ہیں؟ سوداگراں دا ایہہ شہر ہاتے کوئی بندہ ایسا نہیں کہ جیس اوہناں دا نمک نہیں کھادھا۔ میں خاص کر کے نوکر ہاں۔ دیہاڑے اوہناں دے رہے نہ ایڈوں پک ڈھی دا چڈ آیا۔ اوس آ کے اوہناں تھوں ساک چاں منگیا۔ اوہناں نماںیاں دتا۔ پہلی راتیں اوہ نینگرس گیا۔ بارہاں سال کٹ کے پَر آ وڑیا۔ سوانی ایہہ ایہہ بھارا چاں کیتا۔ سال دا کارا کر کے لوبی دا وہ وگ گیا۔ اوہ عورت آہدی ہے۔ اوہ مر گیا ہے میں سڑنا ہے۔ کنیں تماش بین بین کنیں روکن آلے بین۔ میں اوہناں دا جدی ہاں۔ سمجھیں تاں میری وی اوہ ڈھی ہے، پر جمد یوں لا اھیل بڑی ہائی، پر ضدل وی بڑی ہائی۔ اوہ آہدی ہے، میں سڑنا ہے۔ ایس شہر اساڈے نون اگ لگنا ہے۔ مُسلمان دا فرزند چٹھ پیا چڑھدا ہے۔ میں تاں مُونہہ کیتی ویناں۔“ سوداگر بولیا، ”اوہناں نون دس جوں سخی سوداگر آ گیا ہے۔“ ”کوڑ ماراں؟“ اکھے، ”نہیں۔“ اکھے، ”میں سخی ہاں۔“ ”توں سخی ہیں؟“ ”سو روپیہ لے لے تے اوہناں نون خرا۔“ اوس کڈھ کے ماریا اُلٹھا۔ ایہہ گادھی دے پیٹھ آ ڈھٹھا۔ آکھیوس، ”گندیا! انج وی کدی کسے کیتی ہے۔ چڑھ میرے موڈھیاں تے۔“ سوداگر نون ماچھی موڈھیاں تے چڑھالیا تے بھج وگیا۔

اودوں دوپہر ہوئے کھلے ہاں۔ سوداگر دی لڑکی چٹھہ دے وچ بہہ کے تیل دگا  
 کے اوس اگ چاں لائی۔ ماچھی بھجدا آوندا ہے تے آہدا ہے، کیہ سخی سوداگر آ گیا۔ اگ  
 نہ لیائے۔ اوتھے گھماٹ ہیں۔ آدم دے رواٹ ہیں۔ سندا کوئی نہیں۔ ماچھی بار بار آہدا  
 آوندا ہے۔ کیہ سخی آ گیا۔ اودہی آواز کسے نہیں سنی۔ جیہڑی نمائی دا اوس ویلے سارا  
 وجود کن بنیا ہو یا با۔ اودے کناں تے آواز آیا ہے:

آکھ گیوں بھئی جھبڈے آوساں، تے گھنیاں نی مدتاں لائیاں

ہائے میں توہاں مار مکائی ہاں، دیسوں دُور کرائی ہاں

دوویں مل گئے۔ سوداگر اوہنوں لے کے اپنے گھر آیا ہے۔ تکیا ہے ماں  
 تے پیو گئے ہو گئے ہیں۔ رورو کے برا حال۔ لوگ زکوٰۃ دیندن تاں اوہناں دا گزارہ  
 ہے۔ ماں مُصلے تے بیٹھی ہے۔ اوس مگروں آ کے تھبا بھریا ہے۔ اوس آکھیا، ”کنڈ ٹھر  
 گئی ہے سخی تاں نو نہہ؟“ اکھ، ”اماں میں سخی ہاں۔“ اللہ دی حکمت اوس نوں روون آیا  
 ہے۔ چھلکے موئیے دے پئی گئے۔ اوہ مل گئے۔

## چار سیانے

جیہڑا زمانہ ہويا ہے نامُغلاں کولوں لگ کے سکھاں تائیں، ایتھوں تائیں دا پتہ ہے، پگ رکھدے ہائَن سردار دے سر اُتے۔ ساری قوم رعایا رل کے۔ پگ آلا سردار ہوندا ہا۔ ہر کم دا ذمہ وار ہوندا ہا۔ برادری وچ وی اوہدی سرداری منی ویندی ہائی۔ ہر گھوہ توں پنج مرلے اوس دے نکلدے ہائَن۔ خرچ وی اوسے دے ذمے ہوندا ہا۔ ڈیرا وی اوہو پکیندا ہا۔

ہک زمیندار ہا۔ چار پُتر ہان اوس دے۔ اوہ زمیندار مر گیا۔ جیس ویلے چالھیا ہويا، قوم ساری اکٹھی ہوئی۔ وڈے نوں اکھینیں، ”سر اُتے پگ رکھ۔“ اوس آکھیا، ”پگ عمر دے لحاظ نال نہیں، پگ دا حقدار اوہ ہوندا ہے، جیہڑا خرچائیں ہووے، نیک ہووے، برادری دا خدمتگار ہووے تے رعایا دا وفادار ہووے۔ پگ دے قابل ہے اساڈا نکلدا بھرا۔“ پرہیں نکلدے نوں آکھیا، ”توں پگ رکھ۔“ اوس آکھیا، ”میرا ہک پپو مویا ہے تے ترائے پیٹھن۔ مینوں ارنج حیا آوندا ہے کہ تریئیں وڈیاں بھراواں دے ہوندیاں میں سر اُتے پگ رکھاں۔“ اج اوہ زمانہ ہے جوں پگ دے مگر بھرا، بھرا دا سر کپیندا۔

اخیر لوکاں آکھیا، ”فلانا ستھی ہے، اوس تے ستھ لے جاویے۔“ ضامن لے

دے لیونیں بھی جیہدے سر اُتے اوہ پگ رکھے، اوہ قبول کرے۔ اوہ جوں چارے  
 ناہن رکھدے۔ اوہ چارے بھرا ٹرپین۔ جیس ویلے بارنوں وڈن تاں وڈا بولیا ہے،  
 ”مارکا! ایہہ زناور ہے، ہکلا ٹپیا کھلوتا، نال بندہ کوئی نہیں۔“ گھرا ویکھ کے اوس توں  
 نکلدے آکھیا، ”ڈاچی ہے۔“ تریا بولیا، ”پک اکھوں کانی ہے۔“ چوتھے آکھیا، ”اُتے  
 ماکھی لدیا ہویا ہے۔“ تھوڑی جیہی ڈھل پکھوں وڈے پک گھرا ویکھ کے آکھیا، ”زنانہ  
 ہے“ دُوئے آکھیا، ”پاولیانی ہے۔“ ترے آکھیا، ”رُٹھی ہوئی ہے۔“ چوتھے آکھیا، ”پیر  
 بھارا سوں۔“

اتنے تائیں مگروں پک ڈنڈ کے آلا آن رلیا۔ ”کیہ مارکا! ایتھوں کوئی زناور  
 لگھدا ڈٹھانیں؟“ اکھے، ”ڈاچی ہا؟“ ”ہا۔“ ”کانی ہے؟“ ”ہا۔“ ماکھی لدیا ہویا  
 سوں؟“ اکھے، ”ہا۔“ ”اسانوں تاں کوئی پتہ نہیں۔“ اوس آکھیا، ”بندے دے بچے بنو  
 تے مینوں ڈاچی دیو۔“ اکھے، ”فلانا ستھی سُنیا ہویا امی؟“ ”ہا۔“ ”اسیں وی ستھ لئی  
 وینے ہاں توں وی لگا آ۔ ڈاچی اسانوں پے گئی تاں لے لوں۔“ ہُن اوہ بیچ ہو گئے۔  
 جھٹ ہویا تاں مگروں ترے ڈنڈکیاں آ لے جنے آن رلے۔ ”کیہ مارکا، ایتھوں کوئی  
 بندہ لگھدا ڈٹھا ہے نیں؟“ ”زنانی ہے؟“ ”ہا۔“ اکھے، ”اسانوں تاں کوئی پتہ نہیں۔“  
 اوہناں آکھیا، ”اسانوں باہیں دیو۔“ اکھے، ”آہے ڈاچی آلا دی ہے، تَسیں وی لگے  
 آؤ۔ اوتھے ستھی کول گل کر لینے ہاں۔ اسانوں گھتیس تاں لے لو یائے۔“ ہُن ایہہ  
 اٹھ جنے ہو گئے۔

رُدے رُدے جیہڑے ویلے ستھی دے شہر وچ آئن تاں اگوں پک مائی  
 ملی۔ اوس توں پکھو نیں، ”فلانا ستھی؟“ اوس آکھیا، ”اوہ تاں سال دا مر گیا ہویا  
 ہے۔“ ”بیڑا بڈ گیا۔“ اوہناں آکھیا، ”اڈ گیوسے۔“ حیران کھلوتے۔ کواری جیہی پک  
 چھوہر لگھی، سر دے اُتے گھڑے۔ اوس پکھیا، ”کیوں کھلے او؟“ اوہناں دسیا، ”فلانے

ستھی تے ستھ آندی ہائی پر استھے آن کے سُنیا ہے اوہ سال دا مر گیا ہے۔“ ”اوس آکھیا، ”مر کوئی نہیں گیا۔ اوہ ڈیرے اُتے سُنیا پیا ہے پر ترے سال دا انھا ہو گیا ہے۔“ خیر اوہناں آکھیا، ”مڈگل تاں سُن سکدا ہے۔“

اگانہہ گئے تاں ہوا ترکھی گھلی ہوئی ہے۔ ستھی دیاں لتاں اودائیں ہوا آل ہن۔ مجھلا ستھی دا گل آیا پیا ہے۔ اوہناں پک دُوئے نوں آکھیا، ”ایہہ فیصلہ لکھی پیا نہیں۔ پڑھ آپ لوو۔ ایس کیہڑی ستھ بھنی ہے؟ جیہنوں اتنا ہوش وی نہیں۔“ بھارے تے اوہ جاگ پیا۔ اوس پہلے لڑکجیا تے آکھیوس، ”مارکا! ستویں پڑھی میرے نانکے عیال ہاں۔ اوہ خون جدوں چھکے تاں ہوش نہیں رہندا۔ ویکھدا جوں پیا ہام، تیز ہوا آل سیانا بندہ تاں لتاں نہیں کریندا۔ تہاڈی ستھ نہ بھتاں تاں جیویں تہاڈا دل ہووے اُنج کر لیاے۔“ اوہناں آکھیا، ”پہلے تاں توں اپنی مکا۔ پک مائی ملی ہے تے اوس آکھیا ہے کہ توں سال دا مر گیا ہیں۔ پک چھوہر ملی ہے تے اوس آکھیا کہ توں ترے سال دا اتھا ہیں۔ مر یا وی کوئی نہیوں۔ ایہہ کیہ وٹ ہے؟“ ستھی آکھیا، ”اوہناں سچ آکھیا ہے۔ جیہڑی پہلی ملی ہے اوہ میری سوانی ہے تے میں سال دا اوس کان مر گیا ہاں۔ جیہڑی چھوہر ملی ہے اوہ میری دھی ہے۔ ترے سال دی جوان ہے۔ اوس وی ٹھیک آکھیا ہے کہ میرا پیو اتھا ہو گیا ہے۔“

چنگا، ہُن ایس ڈاچی آلے دی سُن۔ ڈاچی آلے آکھیا، ”میں ایہناں توں چکھیا ہے زناور کر کے۔ ایہناں آکھیا ہے ڈاچی ہے۔ کانی ہے۔ ماکھی لدیا ہو یا سوں۔ ہُن آبدن کہ پتہ کوئی نہیں۔“ اوس اوہناں چواہاں بھراواں آل مُونہہ کیتا۔ وڈے آکھیا، ”ایس چکھیا ہے زناور ٹپیا ہے۔ میں آکھیا جی ڈاچی ہے۔ کیوں جو اوس دا موتر گھریاں اُتے ہا۔“ دُوئے آکھیا، ”ڈاچی نال مردواں گھرا کوئی نہ۔ میں ایس توں آکھیا ہکلی ہے۔“ ترے بھرا آکھیا، ”میں آکھیا جی کانی ہے۔ کیوں جوں ہک پاسوں



رُکھاں نوں چردی ہے تے دُوئے پاسے مُونہہ نہیں مریندی۔“ چوتھے آکھیا، ”جی میں آکھیا، ماکھی لدیا ہويا سوں کیوں جو جیہناں جھاڑیاں نوں کھنّ کے لگھدی ہے اوتھے ماکھی دیاں مکھیاں میں ڈُٹھین۔“ ستھی ڈاچی آله نوں آکھیا، ”تُوں وگ جا۔ ڈاچی ایہناں کول کائی نہیں۔ ایویں ڈھوڈھ نہ دُجا۔“

ہُن واری سوانی آله بیلیاں دی آگئی۔ ستھی آکھیا، ”ہلا بھئی تئیں گل کرو۔“ اوہناں گل کیتی اساں کچھیا ہے کہ ایہتوں کوئی بندہ لگھیا ہے۔ ایہناں آکھیا ہے۔ زنانی ہے۔ پاولیانی ہے۔ رُٹھی ہوئی ہے تے پیر بھارا سوں۔ ہُن آہن پتہ نہیں۔ پہلے آکھیا، ”جی میں آکھیا ہے کہ زنا نہ کھرا ہے۔“ دُوئے آکھیا، ”جی میں آکھیا ہے کہ پاولیانی ہے کیوں جوں پک قدم لٹا پٹیندی ہے تے دُو آنکا۔ ایہہ تانے دی پئی ہوئی ہوونی ہے۔“ تریئے آکھیا، ”ہے جی، رُٹھی ہوئی۔ اگانہہ بھجدی ہے تے گھرے کچھانہہ مُردن۔ مگروں بھیں بھیں کے ویکھدی ہے بھئی پچھوں کوئی آوندا تاں نہیں پیا۔“ چوتھا بولیا، ”جی، جتھے پیشاب کیتا سوں اوتھے دوواں ہتھاں دیاں تلیاں دے نشان لگے کھلوتے ہانن۔ ٹیک نال اٹھی ہے۔ جیس توں میں آکھیا پیر بھارا سوں۔“

ہلا ہُن اساڈی سُن۔ اسیں چاروں بھرا ہاں۔ پیو فوت ہو گیا ہے۔ پگ اُتے اساڈا جھیرا ہے۔ چواہاں وچوں کوئی وی سر اُتے نہیں رکھدا۔ ایہہ ہُن توہیں رکھنی ہے ضامن اساں پہلے لئے دتے ہون۔“ ستھی اٹھی کے گھر لگا گیا۔ اوہدی صلاحو ہانن، اوہا جی تے اوہا سوانی۔ اوس آکھیا، ”جیہڑے ایہہ چار پراہنے آئے پٹھن، ایہہ چارے میتھوں دانا ہن۔ دانا دی ستھ بھننی اوکھی ہوندی ہے۔ بے دانا اپنیاں گلاں وچ پھس ویندا ہے۔ ایہہ تاں چاروں وکیل ہن تے میتھوں ودھیک ہن۔ دسو ہُن کیہ کراں؟“ جی تے سوانی آکھیا، ”سوکھی گل ہے۔ چاروں ہن امیر بندے۔ چواہاں نوں پک پک نوکر تے پک پک کمرہ آپو آپ دے، رات دے رہن واسطے۔ وت ایہناں

چواہاں توں چُکھ تہاڈی رات کیویں ٹپدی ہے؟ ایہناں دیاں گلاں وچوں پتہ لگ جاسی کہ پگ دے قابل کیہڑا ہے؟“

ستھی اوہناں نوں رات رہائی۔ چواہاں نوں چارے کمرے تے چارے نوکر دتے۔ وڈے توں نوکر چُکھیا، ”گھر دے پئے چُکھن تہاڈی رات کیویں ٹپدی ہے؟“ اوس آکھیا، ”میں کوئی ان نہیں کھا سکدا سوائے کنک دے۔“ کنک اودوں اوکھی ہوندی ہا۔ گھوہاں دے زمانے ہون تے کنکاں بندیاں تے گھٹ ہوندیاں ہائے۔ خیر، اوہناں کنک دی روٹی دواگھلی۔ جدوں اوہ روٹی کھا رہیا تاں نوکر چُکھیا، ”کنک دی ہے؟“ اکھے، ”ہے تاں کنک دی پر چھڑگاہ گدھڑیاں دا گھتی رکھیاں، وچوں موتر دی ہواڑھ آوندی ہائی۔“ اوس جا کے ساری گل ستھی نوں دسی۔ ستھی آکھیا، ”اوس بھڑوے توں کوئی چُکھے اساتھے تھی کنک دی ہا۔ اسیں داندان دا گاہ کیویں گھتیے ہا۔ اوس گل ٹھیک کیتی ہے۔“

دوے بھرا کولوں نوکر چُکھیا، ”تہاڈی رات کیویں لگھدی ہے؟“ اوس ولدا دتا، ”تروس مجھ ہووے تری کیل۔ ترے سال دی سوئی ہووے اوہدا لوٹا دودھ دا نہ ہووے تاں مینوں نیندر نہیں آوندی۔“ اوہناں اوہدی مرضی دا دودھ دواگھلیا۔ نوکر دودھ پیوا کے چُکھیا، ”تروس دا ہے؟“ اکھے، ”ہے تاں تروس دا، بنی ہوئی نہ ہوندی تاں نارے دا ساء نہ آوے ہا۔“ نوکر جا کے ستھی نوں دسیا۔ اوس آکھیا، ”واقعی ترے مینے دی بنی ہوئی ہے۔“

ترے بھرا کولوں نوکر چُکھیا، ”تہاڈی رات کیویں لگھدی ہے؟“ اکھے، ”لپ شراب دی نہ ہووے تاں مینوں نیندر نہیں آوندی۔“ اوہناں شراب دواگھلی۔ جدوں شراب پی رہیا تاں نوکر چُکھیا، ”کیہو جیہی ہے؟“ آکھیوس، ”شراب تاں ہائی پر بناوے ویلے پٹھ ہڈی دھکھدی رہی ہائی۔ سواد نہیں آیا۔“

نوکر سبھ توں نکلے توں چُکھیا، ”ہاڈی رات کیویں لگھدی ہے؟“ اوس  
 آکھیا، ”زنانی بانہہ سر پٹھ ہووے تاں مینوں نیندر آوندی ہے۔“ اوہناں کنجری گھلی۔  
 جیس ویلے کنجری بُوہیوں وڑی تاں اوس آکھیا، ”اندر نہ وڑیں خُدا ویبہدا پیا ہے۔ جدوں  
 تائیں بچپنا رہیا ہے اماں دی بانہہ سر پٹھ رہی ہے۔ جدوکی شادی ہوئی ہے اپنی سوانی  
 دی بانہہ میرے سر پٹھ ہوندی ہے۔ غیر سوانی ولوں تاں اج تائیں اکھ چا کے نہیں  
 دیکھی۔“ اوس ویلے نوکر گھر گیا تے اوس ساری گل سُنائی۔ فجنوں ستھی ڈیرے اُتے  
 آیا۔ اوس آکھیا، ”میری نظروچ پگ دے قابل ایہہ بکوا نیں۔“ تریئیں بھرا اُٹھے  
 اوہناں نکلے نوں ہاں نال چاں لایا تے اکھیونیں، ”ایہہ بھیڑا بٹھدا نہ، اساڈی نظر  
 وچ وی ایہو ہا۔“